

國學基
本叢書

明

書
十

套

國學基本叢書

明 書

(十)

傅維鱗纂



商務印書館發行

國家圖書館典藏

由國家圖書館數位化



626
756
V.10
明書卷一百二十八

列傳四

名臣傳十三

薛蕙傳

薛蕙字君采。亳人。蕙性寬簡質直。不與人校。尤善施與。拯人之急。歲荒。歎捐金活民爲多。自幼穎慧。七歲能屬文。年十二有詩名。題三教圖曰。斯道有三教。聖心無二天。陰陽動靜機。活潑一圓圈。試問一歸何處。此理玄之又玄。人咸異之。十五攻文詞。有聲時都御史儀封王廷稱之曰。是李何之流也。登正德九年甲戌進士。授刑部主事。尋陞吏部驗封司員外郎。進考功郎中。尤獵意爲詩。凡樂府歌章。溫雅麗密。遂乎追躡漢魏矣。嘉靖初議大禮。廷臣論奏紛然。蕙著爲人後解。大要謂大宗不可絕。而義變則偏子可以爲後。又著爲人後辨。爲繼統固繼嗣。而繼嗣所以繼統。且禮無生而貴者。雖天子諸侯之子。苟不受於君父。亦不敢自成尊也。忤旨罷歸。所居之西曰西原。故有水竹之勝。築室日遊衍其中。著書樂道。逍遙自適。凡一十七年。儉約常如貧士。人亦不敢以非義干之。紛華聲別之言。一不出口。已而當路者屢薦於朝。堅臥不起。卒年五十二。蕙晚隱沈酣釋老諸書。久之深於其說。其言曰。老子之道。卽仲尼之道也。性一而已。則老

子卽仲尼之道。不得不同。特性與天道之說。孔門所罕言。故老子之書。雖同於仲尼。而後世之不知其同也。遂註道德經。皆飾以儒語。又曰。易曰。寂然不動。感而遂通天地之故。樂記曰。人生而靜。天之性也。感於物而動。性之欲也。子思曰。喜怒哀樂之未發。謂之中。發而皆中節。謂之和。中也者。天下之大本也。和也者。天下之達道也。數言者。雖有精粗詳略之不同。然語老子之言。皆所謂殊途而同歸也。至於論佛氏。則曰。性命且近之。實非荒唐汗漫之論。特於其至近至神。難以覺悟。故謂之玄妙耳。儒者拒以不信。既不足以知此。然世之禪學。猶皆以明心見性爲原。無他說也。至於方士之流。則大背老莊之指。旁門歧徑。不勝其變。西方之書曰。若菩薩通達無我法者。如來說不真是菩薩。又曰。一切聖賢。皆以爲無法。而有差別。此與老子之言。豈非同條共貫乎。卽二端而觀之。可以見方士之道之陋矣。其大指如此。人多翕然從之。唐順之亦以爲曠識云。

史官曰

王鏊傳

王鏊。字濟之。吳人。成化十一年會試第一人。殿試第三人。幼穎悟不凡。十六隨父讀書太學。太學諸生爭傳誦其文。侍郎葉盛嘗奇之。目爲天下士。授翰林編修。閉門力學。避遠權勢。弘治初。陞侍講。實錄成。陞右諭德。八年。薦陞侍講學士。爲日講官。時內官李廣怙寵干政。鏊進講。意存諷諫。上退謂左右曰。若等知今王鏊之論乎。蓋謂廣也。上每出遊後苑。鏊進說。無盤於遊田辭嚴意暢。上悚聽。自是不復出遊。其凡事進

規類如此。整學問瞻博。有識鑒。爲文容爾雅。議論快暢。試士南宮。專尙經術。險麗奇表者。一切屏去。弘治間文體一變。整有力焉。東宮將出閣。大臣請選正人端國本。首薦整。陞少詹事。兼侍講學士。尋進吏部右侍郎。時馬文升爲尙書。韓文及整爲侍郎。會虜火箝入犯。整上籌邊八事。一定算。二重主將。三嚴法令。四恤邊民。五廣召募。六用間。七分兵。八出奇。遂薦秦紘起陝西總制。又請科貢之外。略倣前代制科。如博學宏詞之類。以收異才。六年一舉。舉不過十餘人。其翹然出類者。儲之翰林。餘補科道部屬。中書先有官者。量才加秩。數年之後。士類濯磨。必以通經學古爲高。而脫去謏聞之陋矣。其選將才亦然。十六年憂去。武宗卽位。復除侍郎兼學士。會災異。謝遷求退。薦整自代。常是時。八閣導上遊狎。中外洶洶。臺諫交論不聽。韓文時爲戶部尙書。與諸大臣伏闕請誅八閣。召諸大臣至左順門。中官傳諭甚厲。衆相視莫敢發言。整對曰。八人者不去。亂本不除。上竟不去八閣。反分布要路。瑾入司禮監。韓文劉健謝遷相繼逐。瑾欲引焦芳入內閣。而廷推整。瑾恨之。迫公論。不得已。遂與芳同入內閣。進戶部尙書。文淵閣大學士。逾年加少傅。改武英殿。上時政四時。曰講學。曰延下。曰用人。曰節用。時瑾方威鉗士類。按索微瑕。輒枷械死。整謂瑾曰。士大夫可殺不可辱。辱而殺之。吾尙何顏於此。瑾恨又不已。必欲置死地。又欲以他事中健遷。整前後力救得免。瑾又欲殺黎澹。逮詔獄。坐激變。土官罪死。整曰。土官未叛。何名激變。或惡楊一清於瑾。謂築邊大費。瑾又欲罪之。整曰。楊總制高才偉略。爲國修邊。豈可以功爲罪。初瑾見整開誠與言。亦強聽之。芳專事嬖阿。瑾驕倖日甚。整無可奈何。居常戚戚。四年夏力求去。瑾每恚整相忤。又輒發怒欲中傷之。整惴惴。

杜門瑾敗得免。嘗自贊曰：噫嘻先生，何如其人。窮年校書，結髮勵行，白首於道，茫然無聞者乎？爵廟公孤，官居臺閣，志懷輸忠，幾昧納約者乎？貴戚赫炎，不能附麗，權璫狂獪，不能竊阿，一有違言，超然不辱者乎？遇事直前，不知顧忌，見利思義，不知規避，歸臥空山，晏然寤寐者乎？斯人也，其量則隘，其才則庸，無裨於世，自潔其躬，跡其所至，蓋知慕首陽之節，而不知柱下之工，知希止足之疏，而不能爲應變之崇者乎？居閒十餘年，世宗立，遣行人存問，曰：朕行且召卿，整疏謝，乞上講學親政，略以爲國家經筵之設，盛矣。經筵一開，天下欣欣焉，傳之以爲希闕之典，其間寒暑皆輟，春秋之月，日不過三日，三日之期，風雨則免，政事有妨，則免，講之日，夙具講章，至期講訖，綸音賜宴，儼然而退，上下之情，未見其親且密也。至於日講，可謂親矣。然體分過嚴，上有疑焉，未嘗問也，下有見焉，未嘗獻也。昔高宗學於古訓，遜志時敏，成王訪學於羣臣，曰：學有緝熙於光明，商周之君好學如此，夫人主一日萬幾，固不暇如儒生學士日夜孜孜，然而帝王精一之傳，治天下之大經大法，古今治亂之迹，天人精祲之際，自非遜敏緝熙，亦安望其有得。今乃闕略如是，暴之之日少，寒之之日多，傳之之人寡，咻之之人衆，未見其能得也，且不獨高宗成王爲然也。漢光武雖有軍中投戈講藝，息馬論道，至夜分乃罷，唐太宗延四方文學之士，房杜褚薛輩十八人，分番直宿，討論經籍，或至夜分，今貞觀政要與魏徵所論，亦可見矣。宋世賢主，宮中消日，惟是觀書，居常禁中，亦有日課，翰林侍從，日寓直禁中，以備顧問，我太祖甫得天下，開禮賢館，與宋濂劉基章溢輩日相講論，其後聖學高明，詔誥天下，皆出御製，睿翰如飛，羣臣拱視，今御製文集是也。仁宗臨御，建弘文閣於思善門之

右文學之臣數人入直。時至館中講論。孝宗經筵之外。每觀永樂大典。又嘗索太極圖西銘諸書於宮中玩之。尤嗜故學士沈度之書。日臨數過。夫古帝王之學如此。祖宗之學如此。陛下睿哲自天。春秋鼎盛。講明聖學。正其時也。臣愚特望於便殿之側。復弘文閣故事。妙選天下文學行藝著聞者七八人。更番入直。內閣大臣一人領之。如先朝楊溥故事。陛下萬幾有暇。時造館中。屏去法從。特霽天威。從容訪問。或講經。或讀史傳。或論古今成敗。或論民間疾苦。閒則遊戲翰墨。雖詩文之類。亦惟所好。蓋亦日講之義。而加親焉。大略如家人父子。上有疑則必問。下有見則必陳。日改月化。有不知其然而然者。時御經筵。所以昭國家之盛典。日造弘文。所以崇聖學之實功。如是不已。則聖德日新。又新高宗成王。不得專美於前矣。言親政。則曰易之。泰曰。上下交而其志同。否曰。上下不交而天下無邦。交則泰。不交則否。自古皆然。而不交之弊。未有如近世之甚者。君臣相見。止於視朝數刻。上下之間。章奏批答相關接。刑名法度相維持而已。非獨沿襲故事。亦其地勢使然。何也。國家嘗朝於奉天門。未嘗一日廢。可謂勤矣。然堂陛懸絕。威儀赫奕。御史糾儀。鴻臚舉不如法。通政司引奏。上特是之。謝恩見辭。惴惴而退。上何嘗問一事。下何嘗進一言哉。臣愚以爲欲上下之交。莫若復古內朝之法。蓋周之時有三朝。庫門之外爲外朝。詢大事在焉。路門之外爲治朝。日視朝在焉。路門之內曰內朝。亦曰燕朝。玉藻曰。君視朝。退適路寢聽政。蓋視朝而見羣臣。所以正上下之分。聽政而適路寢。所以通遠近之情。漢制大司馬左右前後將軍侍中散騎常侍散騎諸吏爲中朝。丞相以下至六百石爲外朝。唐皇城之北南三門曰承天。元正冬至。受萬國之朝貢。則御焉。蓋古之外

朝也。其北曰太極門。其內曰太極殿。朔望則坐而視朝。蓋古之正朝也。又北曰兩儀門。其內曰兩儀殿。常日聽朝而視事。蓋古之內朝也。宋時常朝則文德殿。五日一起居。則垂拱殿。正旦冬至聖節慶賀。則大慶殿。賜宴則紫宸殿。或集英殿。試進士則崇政殿。侍從以下。五日一人上殿。謂之輪對。則必述時政利害。內殿引見。亦或賜坐。或免穿靴。亦三朝之遺意焉。蓋天有三垣。天子象之。正朝象太微也。外朝象天市也。內朝象紫微也。國朝聖節正旦冬至大朝會。則奉天殿。卽古之正朝也。常朝則奉天門。卽古之外朝也。而內朝獨缺。然非缺也。華蓋謹身武英等殿。豈非內朝之遺制乎。洪武中如宋濂劉基永樂以來如楊士奇楊榮輩。日侍左右。塞義夏原吉輩。常奏對便殿。於斯時也。豈有壅隔之患哉。今內朝罕復臨御。常朝之後。人臣無復進見。三殿高闕。鮮或窺焉。故上下之情壅而不通。天下之弊由是而積。孝宗晚年深慨於斯。屢召大臣於便殿。議論政事。將大有爲。而民之無祿。不及觀至治之美。天下至今爲恨。惟陛下遠法聖祖。近法孝宗。盡除近世壅隔之弊。常朝之外。卽文華武英。倣古內朝之意。大臣三日或五日一起居。侍從臺諫各一人上殿輪對。諸司請事。上據所見決之。有難決者。與大臣面議之。不時引見羣臣。凡謝恩辭見之類。皆得上殿陳奏。虛心而問之。和顏色而道之。如此人人得以自盡。陛下雖深居九重。而天下之事粲然畢陳於前。唐虞之世。明目達聰。嘉言罔伏。野無遺賢。亦不過是而已。大禮議起。連逐輔臣。士類咸願起官。未及起。病卒。年七十五。贈太傅。諡文恪。所著有震澤集。記聞長語。行於世。史官曰。當劉謝去而焦芳入。斯高之勢成。鑿又與韓文。謬言八閩者也。鳳峙鷲林之內。直以全身。復多所

救正。要必有以服其心矣。或去或不去。歸潔其身。況終於去乎。

彭詔傳珪、陳壽、林瀚、王雲、鳳傳

彭詔字鳳儀。莆田人。天順元年進士。爲刑部郎時。張岐以壽甯侯兄。從外臺謁僉都御史入院。詔疏岐不可用。乞召故尙書王竑。李秉侍郎葉盛。下詔獄。給事中毛弘等論救得釋。尋晉郎中。其司有輦轂間事。多涉貴近豪戚。脅挾撓沮。詔屹然不吐茹。外戚家冒賜額奪民田。敕詔卽按頃畝。詔至眞定。繞田周視徑歸。上疏自劾曰。昔田文令馮驩收債於薛。驩故折券矯賜薛人。今眞定田祖宗以來許民間種。卽爲恆產。不復增科。以勸力農。往年韓太監廣甯侯屢奏虐民。賴先帝明聖。民間稍得安業。乃今周彧又復強詞飾奏。傷民病國。臣誠不忍履畝。奪小民尺寸地。附益貴戚。又逮下詔獄。言官交論得釋。他日又有貴戚請荒田者。上怒。顧左右曰。周彧爲彭詔所持。令朕負朝論。奈何。又以爲請耶。常是時。何喬新與詔同官刑部。純懿貞方並負重望。成化六年陞四川按察副使。尋進按察使。請王府葬祭。停遣內臣及行人。又劾雲南太監錢能冒貢珍奇。擾驛遞。十四年爲廣東布政使。薦陳獻章。劾鎮守太監顧恆。非禮貢獻。又劾市舶太監章睿。矯稱進奉。私庇富豪。輒亂舊章。妄開新法。民間力役更無曠丁。籍上均徭。豈有餘戶。又劾珠池監丞黃福。採捕禽馬。騷動雷庶。又劾錦衣鎮撫梁海。洩者。太監芳弟也。芳見疏大怒。會詔應詔陳言。條上漸不克終。四事上不喜。芳從旁言。詔每事輒邀名。命左班相左右得大官。上直視芳不應。芳懼伏地。調詔貴州。未幾吏尙書尹旻屢薦詔大器。上故知其名。二十年遂陞右副都御史。巡撫江南督糧儲。明年召入爲大

理卿未上。又坐論內外官貢獻。道改副都御史。巡撫順天。孝宗卽位。交薦召入。爲刑部侍郎。會浙江不靖。敕詔巡視。詔勦罷不職守臣。誅其渠魁。事遂定。戶部鹽法沮壞。復敕詔理鹽法。詔繪煮海貧人曬淋熬負。折閱明償之苦節。爲八圖以獻。上覽之惻然動容。曰。貧丁如是耶。召入吏部爲侍郎。弘治四年。督刑尙書。安遠侯柳景總兵。兩廣巡撫秦紘發其奸賊鉅萬。景有挾欲破法擠紘。詔竟抵景法。褫其爵。景賊方入。八百兩。忽降。獨旨。詔言景賊始些須。卽獨他日。遂可營復爵位。爵位旣復。遂可營求征鎮。漸不可長。詔在部二年。請致仕。卒。贈太子少保。諡惠安。詔孝友直諒。寡欲清心。儀狀默然。不啻寒士。所著有國朝名臣錄。贊。莆陽文獻志。政志文集百餘卷。

傅珪。字邦瑞。清苑人。成化二十三年進士。選庶吉士。授編修。弘治十三年陞左中允。正德四年。閹瑾惡翰。林不附己。矯旨大明會典文訛舛。奪預修者官。珪降修撰。瑾敗。復中允。五年。以學士陞吏部右侍郎。明年轉左。陞禮部尙書。當是時。武宗好佛。自稱大慶法王。外廷雖聞之。而無徵。俄內批禮部。番僧請腴田千頃。爲大慶法王下院。乃書大慶法王與聖旨等。珪佯不知。執奏。孰爲大慶法王者。敢並至尊書。褻天子。壞祖宗法。大不敬。詔勿問。田亦竟止。寵伶戚賈。請改牙牌。珪曰。優敢亂祖宗法邪。戚又欲改教坊司印。珪曰。優敢亂祖宗法邪。皆格不行。時流賊亂中原。太監陸闇總軍容。征久不捷。諸內臣又立監鎗名。益出後曹內。臣統軍。下廷議。衆莫敢先發。珪奮曰。兵老賊疲。賊日熾。以冒功者宥。債事者漏網。失將士心。今賊在郊圻。肺腑。民間囂然思亂。禍在宗社。旦夕吾輩死不贖責。諸公尙首鼠耶。疏上。竟遣監鎗諸內臣。俄有旨。令致。

仕歸。杜門謝客。及卒。遺命無請葬祭。嘉靖元年。理守正文臣。贈太子少保。諡文毅。珪朴端簡。諒自檢甚嚴。孝友之行。孚於鄉典。

陳壽。字本仁。新淦人。成籍遼東。成化八年進士。爲中書仁人。選給事中。弘治元年。以都給事中。陞大理寺丞。御史爭寺承勅壽。吏部尙書王恕言壽廉正。稱執法吏。改南光祿少卿。陞南鴻臚卿。十三年。陞僉都御史。巡撫延綏。十六年。陞南京副都御史。正德元年。南京科道劾逆瑾被逮。壽抗疏救諸言官。瑾怒奪職。八年。薦起巡撫陝西。未幾。遷南京兵部侍郎。九上疏乞休。陞南京刑部尙書。乞致仕。許之。初。壽任科。方貴妃寵族人橫甚。中官梁芳。又結妖僧繼曉。干國是。壽疏論。繫詔獄。得釋。在延綏。會火。篋入犯。出奇兵。卻之。加俸一等。旣歸田。杜門謝客。陝西鎮守內臣廖鏡。暴虐吏民。楊一清言壽忠鯁。輕去就。宜起撫陝西。壽至陝。清勁。鏡畏斂戢。比去。陝人號哭擁之。不能行。壽卒久之。都督楊宏。陝人也。上疏言壽仁廉。恤下。知兵能遏敵。請卹其後。歷官四十年。大半在散地。食祿任事不久。而廉名最著。尤無所歸。諸子旅寓飄泊。歿不能葬。久之。親舊相周。僅歸其喪。壽爲言官時。直論時政。得失無隱。然不喜彈劾人。曰。吾父戒我。勿作刑官。枉人。若言官。枉人尤甚。吾不敢妄言。楊一清曰。宋王素爲諫官。言人才難得。無事之時。當爲朝廷愛惜。程明道爲御史。告君曰。使臣拾遺補過。則可。若搜索臣下短長。以沽直名。臣不能也。本仁得之矣。

林瀚。字亨大。閩人。成化二年進士。改庶吉士。爲翰林編修。歷陞諭德。弘治三年爲祭酒。上疏請開科進人才。大略謂今天下學校。作養日盛。科貢二途。取有定數。歲有常規。不無遺材淹滯之歎。詔開貢。瀚爲祭酒。

垂十年。待諸士嚴而有恩。請託不行。故事祭酒。膳役銀歲百數。瀚悉貯官。構祭酒公署。及監中諸師儒寓舍。九年。進禮部侍郎。仍掌監事。十二年。入吏部。爲侍郎。明年。爲南吏部尚書。會災異。率羣僚陳十二事。曰。明黜陟。去冗官。清吏弊。定莊田。折鹽鈔。處監生。嚴軍政。省供應。收才望。禁奸貪。停不急。寬民力。時有御史。自巡按逮獄。二三儒生。黃緣傳奉。授中書舍人。上疏申救御史。乞寬宥全風憲之職。收回中書舍人成命。杜倖進之門。則天命天封。自協至公。忤旨。自劾不報。十七年。復疏重根本。以回天變四事。曰。保固南京。以重祖宗之根本。佑啓皇儲。以重天下之根本。撫綏百姓。以重邦家之根本。增進賢才。以重政治之根本。明年甲子。適符洪武十七年。聖祖開科取士之期。宜加增鄉試解額。以廣賢路。是年請老。疏云。臣在南京。親見諸尙書翟瑄。董越。謝綬。王繼。陳道。乞休不允。三年間。相繼物故。言辭懇切。亦不允。正德元年。吏尙書缺。給事中邱俊。御史石玠。薦其學優才贍。剛方貞介。未幾。改南京兵部尙書。參贊機務。因災異。會陳十二事。曰。隆大孝。以先天下。言先帝奄忽。上賓。陛下親承付託。惟任大臣。而不改先帝所倚用。立大致。而不易先帝所貽謀。斥遠近習。力體先帝先賢遠佞。不假貴戚。力行先帝割私任公。戒飭邊備。常若先帝不忘夷狄。節省財費。常若先帝不忘生靈。事無巨細。無內外。惟做先帝所已行者。而力行之。則大孝之實。通於天下矣。其次集羣議。以決大政。改州治。以奉陵寢。崇儉德。以裕財用。省虛費。以甦軍民。增貢舉。以進人才。修武備。以禦寇盜。省匠役。以甦民困。節工役。以省財用。清吏役。以革宿弊。清馬政。以防欺蔽。大優容。以廣言路。剴切無忌諱。是時閣瑾側目。方正士會南京科道官言事被逮。瀚獨往送贖。且議上章。直諸言官。瑾聞之。

恨勒科道招詞逮瀚爲黨。矯詔降浙江左參政致仕。瑾恨未已。復矯詔指瀚與大學士劉健謝遷尙書韓文等爲奸黨。瑾誅復尙書致仕。按察司副使陳伯獻常稱其賤者。卽之不知其爲貴。卑者卽之不知其爲尊。愚不肖者卽之不知其爲賢。且智獨非意相干者。卽之始知其懷然不可犯也。卒年八十六。贈太子太保。諡文安。子庭樞。嘉靖中爲工部尙書。諡康懿。庭機。官南京禮部尙書。諡文康。庭機子彥。亦爲南京禮部尙書。諡文懿。三世皆爲祭酒。熾弟煙。舉進士爲參政。

王雲鳳。字應韶。和順人。成化二十年進士。弘治十年爲祠祭郎中。疏論中官李廣及異端左道倖進者。是歲十二月朔。駕自郊壇還。坐事謫陝州知州。編修劉瑞上疏言雲鳳守官廉正。持行清介。雖獲罪宜早賜召用。不報。明年陞僉事。提學陝西。十五年改副使。提學如故。政尙嚴厲。士始不能堪。終成戢。多成就。正德四年入爲國子祭酒。益嚴厲。明年改南通政使。請告。七年起家。右僉都御史。巡撫宣府。益發奮才氣。日夜理邊。邊吏憚其威。憂去。十年又起家副都御史。理饑兩淮。浙遂上疏乞休。又移書吏部尙書楊一清曰。山中屢聞讒言。近留王昂一疏。人尤傳頌。昔唐介貶數月。兩轉未久。復殿中侍御史。王昂旣不獲留。推薦超擢。在公筆端。每恨李文達公近稱賢相。然羅一峯淪落以死。岳蒙泉坎珂終身。極貪陸布政。顯得超拜尙書。今文達貴勢安在哉。切恐奔趨富貴。譚利達者。相見則稱功頌德。乞憐求官。直諒之言。無由上達。雲鳳疊辱薦糞。感激慚懼。敢不布其愚。今兩耳並聾。百藥不效。冀得耕田納稅。養親讀書。惟俯垂憐念。使猿鹿魚蝦各得其性。幸甚。疏上。予告。雲鳳樂於從善。勇於聞過。居常言動儼然。終日立朝正色。不避權貴。當

官孤立。直行己意。以故上下多齟齬。家素貧。遭閹瑾誣贖。稱貸鄉曲。終其身不能償。妻女五人幾凍餒。史官曰。衛蔡霍者必猛獸。逐鳥雀者藉鷹鶴。孔父立廟。莫敢致難。拂士之重於國家久矣。彭韶傳珪。陳壽王雲鳳之所彈劾執奏者。非奪戚畹之田。卽折中涓之角。使人主屈於朝論。宰相愧其移書。壯矣哉。其有鷹鶴之致乎。陳伯獻稱林瀚曰。賤者卽之不知貴。愚者卽之不知賢。獨非意相干者卽之始知其懷然不可犯。諸君子之風規可槩見云。

劉忠費宏傳

劉忠字司直。陳留人。成化十四年戊戌進士。選庶吉士。授編修。陞侍講。幾三紀。始拜侍讀學士。忠修勵行檢。時國家無事。翰林程李輩有文學詞藝。好交遊。有聲譽。忠獨恭儉沈默。正德二年丁卯春。與楊廷和充經筵侍書。故事。講書義畢。後必獻規諫之語。旣罷。上問太監劉瑾曰。經筵講書耳。何添出許多說話。瑾對曰。此二人當打發南京去。遂陞南京禮部侍郎。時南京無缺爲添註。及行。忠謂廷和曰。別瑾否。廷和曰。瑾所爲如此。不可更見之人。必以我輩交瑾矣。忠深然之。廷和以錦幣辭瑾。瑾喜曰。劉先生不足我耶。後瑾厚廷和而疎忠。至南京進尙書。明年改南京吏部。忠性峻。行方寡合。一介不苟得。惡士人覬趨。自處常過。抗貴人亦力抑之。以故久在南京。南京名吏隱多。俛仰瓦合。忠獨毅然持風裁。奪越閩點吏竄名籍。詭冒者千人。焦芳顧知忠薦忠賢。五年正月。瑾傳旨召入翰林學士。掌詹事府事。管誥敕。是年瑾誅。始被推入內閣。是時張永幸用事。大臣事永復如瑾。忠益持重。永遣其黨廖鵬來謁。忠不加禮如僕。又卻其餽。永大

不說。忠在閣不滿三月，乞致仕，不許。累進少傅，兼太子太傅、吏部尚書、謹身殿大學士。忠每進謠言，貴倖茲不悅。正德六年，累疏辭疾，未允。強起考禮部貢士，出院即乞省墓。上忽召李東陽至，煖閣，摘錄中語言欲罪之。東陽爲力解，忠即日陛辭去。歸田杜門，其在內閣未久，以故無大建明。然重厚持正，同事者忌而擁之。嘉靖初，遣使存問，卒贈太保，諡文肅。侍郎崔銑初入翰林，見忠，忠慨然曰：「古羈人，匹士雖當流離，困絕不取非義財，況祿食者乎？」許進常與銑論當世人物，獨推許章懋、雍太。且曰：「子初仕，慎事大夫，翰林惟司直一人耳。其見重於人如此。」太常卿魏校曰：「忠留意人才，嚴於考績，臧否精當，人不敢干。風裁整肅，爲一時之重。」

費宏，字子充，號鵝湖，鉛山人。祖授五子，長珣，鄉薦。早卒。次瑄，號復菴，進士官參議。瑄官遊於外，而宏父五峰瑤暨弟順菴瑛，遂主家政。宏生而秀異，與季叔雪峰瑤相上下。瑄喜曰：「亢吾宗者，必二子也。」攜入京，躬課督之。成化十九年癸卯，甫冠，遂與叔瑤同領鄉薦。甲辰，試春官不利，卒業北雍。時邱濬爲祭酒，甚重之。二十三年丁未，舉進士，廷試第一人，授翰林修撰。初，宏之上春官也，瑄方以邵水主事出治呂梁，貽書與宏曰：「汝脫下第，毋南歸，宜入北監讀書。」丙午代還，宏訊曰：「伯父何以知宏不第？」令入北監也。瑄笑曰：「此爾遠到之兆也。」吾常夢汝入北監，領班籤，籤乃彭文憲公故物。文憲常遊北監，中狀元矣。汝勉之，至是果然。是歲八月，憲宗崩，孝宗卽位，預修實錄。弘治九年丙辰，皇太子出閣，改左春坊左贊善。武宗卽位，擢太常寺少卿兼翰林院侍讀。丁卯，擢禮部右侍郎，尋轉左。時閣瑾竊柄，凌轢公卿，會瑾敗，諸所變更，悉皆釐正。

唯山東、河南、陝西、山西鄉試解額。瑾增其數。宏謂求賢國家大典。且開科期迫。請今科姑聽之。俟後復舊。上可之。十月。陞禮部尚書。鑄印局額。設大使副使各一員。食糧儒士二名。及滿將補投考者不下數千人。請託者半之。當事者每難處分。宏於食糧二名外。預聽缺者四人。習字四人。擬次第補度。可逾十數年。由是投考及請託者皆絕跡。辛未十二月。以文淵閣大學士入閣。預機務。甲戌二月。進戶部尚書。兼秩如故。會錢甯入宸濠賄。規復護衛。宏執不可。有同列嫉宏而覲其位者。陰助甯。一日。忽傳旨詰責。宏因引咎力請退。有旨令致仕。而從弟編修。竊亦罷抵家。杜門謝客。不敢履城府。築樓一區。日課諸子。會羣從有與鄉人爲讎者。赴愬。會宸濠知之。招讎家人。令摺摠入奏。欲以聳動上意。奏入。下都察院。時兵尚書彭澤掌院事。洞燭其奸。既駁罷。又欲加罪。濠知計不行。乃嗾羣兒。嘯聚奸細。焚掠其室。廬積聚。又侵毀其先墓。宏恐避處縣城。正德十四年己卯六月。濠反。隨遣數十騎趨信陽。宏過進賢。爲縣令劉源清所斬。會王守仁以羽檄徵兵列郡。信州知府周朝佐。鉛山知縣杜民表等皆率兵往。宏爲贊畫方略。遣人間道致書於守仁。畫方略。濠平。守仁欲上聞。時御史謝源伍希儒方隨軍紀功。乃奏曰。大學士費宏編修。常護衛之。再請也。昌言明沮。已懷先事之憂。及逆謀之既成也。間道獻策。又急勤王之義。逾年。世宗入繼。甫旬日。卽降敕起宏。而竊亦召用。時辛巳四月也。嘉靖三年甲申五月。進吏部尚書。謹身殿大學士。八月。大同卒叛。殺參將賈鑑。巡撫都御史張文錦。議者欲遣將出師以討之。宏曰。變出於激。不叛者故多也。討之勝則玉石俱焚。不勝則彼拒城抗命。損威傷重甚矣。乃議先遣兵部右侍郎李昆往撫諭。以觀其變。而以都御史蔡天

祐往巡撫。命都督費勇鎮守其地。代還舊總兵官江桓。乙酉。武宗實錄成。進少師兼太子太師。賜宴禮部。時弟竊從。子懋中皆翰林。編修預史事。竊進左贊善。懋中進修撰。丙午六月。獻皇實錄成。加正一品俸。進華蓋殿。是年累以疾謝。上不允。丁亥二月。疾再作。辭益力。允之。時子懋賢登進士。選庶吉士。疏乞歸侍養。并允之。令疾瘳。日照舊作養。十四年乙未。上念宏召起用。遣行人王憲芝捧敕催促。宏遂於六月朔冒暑行。至七月二十日。至京。召見文華右室。賜銀圖書一文。曰。輔舊元臣。入閣辦事。郊陪祀歸。一夕卒。年六十八。贈太保。諡文憲。

史官曰。劉忠風裁嚴肅。再忤權閹。斥不獲立朝。難進易退。嶮然而不磷者也。費宏拒濠護衛。幾蹈虎尾。濠敗獲免。屬有天幸。父子兄弟。俱踐清華。抑守正之報乎。

楊守陳、吳寬、張元禎傳

楊守陳字維新。鄞人。景泰二年進士。家居八年。至天順二年。授翰林編修。成化三年。累官司經局洗馬。充講官。經筵。守陳進講。武成曰。論語稱大舜無爲。周書稱武王垂拱。願後世人主深拱禁中。委政內侍。反召閹樂之禍。高居無爲。唯對嬖豎。反啓祿山之亂。何也。蓋舜武能舉相除凶。惇信明義。後世人主。直安危利災耳。上傾聽稱善。八年遷侍講學士。內艱去。守官五品。十六年。孝宗爲皇太子。出閣。簡守陳日講。時文華大訓成。篇目做大學衍義。事涉中官。令不得刪去。尋陞少詹事兼侍講學士。譽望日起。薦國子祭酒。薦吏部侍郎。又薦入內閣。皆不果用。孝宗卽位。進宮寮官。柄臣忌守陳。擬南吏部侍郎。上覽疏曰。守陳宜留。

此卽塗去南京字。未幾詔議禘禮。禮官請禘懿祖。以德祖比宋僖祖。百世不遷。守陳疏言。禮天子七廟。祖宗功德。故凡號太祖者。卽始祖。必以配天。若商周契稷。皆有功德。非直原本統也。宋僖及我德祖。可比商報乙周亞辛。非契稷比。議者習見宋儒。嘗取王安石說。遂使七廟既有始祖。又有太祖。太祖配天。又不得正位南向。名與實乖。非禮也。時不能從。弘治元年。疏論講學聽政。累數百言。略曰。陛下御極以來。屏棄珍翫。放遠奇袤。聽納忠諫。躬覽題奏。持此不懈。可幾堯舜。臣恐過慮。正始猶易。保終實難。若內養勿深。外資弗博。銳志少懈。愆心漸滋。有初鮮終。古今大戒。上善其言。三月御經筵。禮部并請午朝。得如守陳奏。後數年。上時召輔臣坐論政事。閱章奏。皆自守陳發之。大臣顯畏。上英明。一見卽頓首伏地請退。上留再三。又謝容臣等出議。上下每退歎息。守陳在吏部。僞偏持正論。會修憲宗實錄。充副總裁。再請解部事。專史職。不允。未逾年。又辭。且請老。曰。吏部進退百官。衆怨所集。尙書王恕尙不免人言。況臣迂疏。宜亟退。上不許。請老益力。乃以本官兼詹事丞。專職史館。而以張悅代云。守陳嘗曰。國可滅。史不可滅。靖難後。不記建文事。遂使當時朝政。與方黃死事諸臣。皆闕落無傳。及今蒐采。猶可補輯。景帝已正位號。英宗實錄。標目猶書。邨戾王附。宜改正。凡疏留中者。多忠言正議。國家大政事。例不得登實錄。宜先付史館。以備遺亡。未幾卒。諡文懿。後二年。實錄成。贈禮部尙書。守陳孝友方正。與人交篤於信誼。居常恂恂。若不出口。至論事辯是非。毅然不可屈。博學多識。文詞澹雅。五經四書。時有獨見。不泥古說。錄爲私鈔。凡數百卷。弟守陞。南吏部尙書。從弟守隨。掌大理寺事。工部尙書。諡康簡。守隅。廣西布政使。二子。茂元。刑部侍郎。茂仁。四川按察

使皆能濟美克世家。

吳寬字原博長洲人。成化八年進士第一人。時年三十八。寬爲諸生時有文行。卽負重望。徐有禎常稱吳生館閣器。歲貢入太學。張汝弼尤奇寬。初授修撰。歷官春坊詹事。侍武宗於東宮。東宮中侍豎不欲太子近儒臣。數移事間講讀。寬率宮僚上疏曰。仰惟東宮講學。寒暑風雨則止。朔望令節則止。一歲不過數月。月不過數日。一日不過數刻。況又間有推移。時或罷歇。古人八歲出就外傅。欲離近習。親正人也。借曰習讀於內。終不若就傅於外。上嘉納。寬於經筵進講。閒雅詳明。意存規諷。至理亂雅正安危之際。尤反復朗誦。上改容聽之。弘治十七年。孝肅太后崩。議祔葬廟禮。先是成化四年。孝莊睿皇后崩。中外藉藉言周太后萬歲後葬裕陵。祭睿廟禮皆如適。至諡稱睿皇后。與孝莊同。輔臣覺其誤。又未敢顯言。詔禮官議。議未能決。賴上仁聖。張主綱常。再三召輔臣密議便殿。悲愴感悟。必欲如禮。又下廷臣議。寬以掌詹事與議。衆促寬言。寬出揖衆議臣曰。魯頌姜嫄闔宮。春秋考仲子之宮。皆別廟。漢唐來皆然。至宋始有並祔者。其禮已謬。然皆諸帝繼室。作配天子。非後世子孫嗣承帝位。尊崇不生者。惟宋李宸妃歿。仁宗傷痛。始追尊祔祭。非禮不足爲法。衆議臣皆是其言。定議。上喜曰。大義深恩。並行不悖。改稱孝肅太皇太后。祀之奉慈殿。奉慈殿者在奉先殿西上。初建奉祀母孝穆太后。令稍展其制。中室奉孝肅。左奉孝穆。嘉靖初。右奉孝安。邵太后。寬忠信宏厚。廉靖方嚴。好古力學。文翰瀟美。以禮部尙書掌詹事府。卒。贈太子太保。諡文定。王鑿稱其文不事追琢。而體裁具存。外若簡淡。而意味雋永。明興文士獨推西揚有典則寬。方之無愧焉。

張元禎字廷祥。南昌人。少以奇童知名。七歲甯獻王召見。命爲詩。大加稱賞。天順四年進士。選庶吉士。授編修。憲宗卽位。勸行三年喪。及上疏論王道。幾萬言。語連萬安等。萬安等惡之。乃告病歸。家居二十餘年。潛心理學。名益大著。廷臣交薦。弘治初。召修憲宗實錄。進左贊善。陞侍講學士。乞歸養母。家居者又九年。衆交薦修大明會典。爲副總裁。陞學士。日講。孝宗立。熟元禎文名。時特俾講說。每奏輒稱善。內艱歸。久之卽家進南太常卿。召入修通鑑纂要。改太常卿。侍武宗東宮。尋掌詹事府。疏勸經筵講。太極圖及西銘圖。孝宗亟取二書觀之。曰。天生斯人以開朕也。將大用之。竟困於讒口。久之進吏部左侍郎。未任卒。爲人孤峭奇拔。以是不容於時輩。平生博涉羣書。尤好探經傳。多所獨得。詩文平實。爲人所重。楊廉稱其造詣高出。一時必儒者之學。果有見焉。始可以讀先生之作。

史官曰。明祖有言。吾取士欲得經明行修。博古通今。文質得中者。如守陳寬。元禎之講學議禮。文章足以華國。問學足以明道。所謂先進於禮樂者。非歟。後世經筵爲具文。議禮如聚訟。如三人者。蓋其鮮哉。

明書卷一百二十九

列傳四

名臣傳十四

梁儲傳

梁儲字叔厚。廣東順德籍南海人。別號鬱洲居士。晚更號厚齋。成化十四年戊戌會試第一。廷試二甲第一。改庶吉士。授編修。二十二年兼司經局校書事。孝宗於東宮日侍講讀。旋丁內外艱。弘治四年辛亥服闋。進侍講。與修憲宗實錄成。進司經局洗馬。壬子主考順天鄉試。復侍武宗於東宮講讀。戊午主試應天。是歲冬册封安南國王。充正使。庚申九年考滿。遷翰林學士。辛酉再主試順天。壬戌奉詔教庶吉士。與修大明會典。書成。進少詹事。仍兼學士。本年遷吏部右侍郎。奉命充正使。册封魯藩。正德改元。詔纂修孝宗實錄。及續修會典。俱爲副總裁。轉左侍郎。明年進吏部尚書。兼學士。專典誥敕。掌詹事府事。又明年戊辰主會試。時閹瑾竊權專恣。有不附己者。輒以計去之。乃指摘會典紕繆。貶爲吏部右侍郎。實錄成。復尚書兼職如故。瑾憾儲不置。摺摭媒孽。俄有旨調南京吏部。尋加太子少保。五年瑾敗。召復官。兼文淵閣大學士。典機務。既至進武英殿。加少保。兼太子太保。尋進少傅。兼太子太傅。謹身殿大學士。廢一子錦衣世千。

戶辭改尙寶司丞。又辭改中書舍人。又固辭弗允。甲戌再主會試。凡六司文衡。六年考滿。進少師兼太子太師。華蓋殿大學士。先是楊廷和首秉朝政。以父喪去位。儲言於武宗。敕遣行人慰諭。命有司卽其家督促上道。廷和至。儲遜居其下。士論多之。武宗之將幸宣大也。楊廷和暨蔣冕皆在告。中外洵洵莫敢先發。儲與毛紀泣諫於左順門內。旣而紀亦在告。儲獨廷爭累日。不得命。陝西親藩有請良田爲牧地。錢甯江彬及宦官張忠輩受重賄。請上許之。兵部及科道交章執奏。謂太祖高皇帝有禁。茲田不得畀藩封。上曰。朕念親親與之。勿爲開言。楊廷和蔣冕皆引疾不出。儲曰。公等皆託疾。如國家事何。是時上怒甚。令內臣督促草制。儲承命上制草曰。昔太祖高皇帝著令曰。此地不畀藩封。非吝也。念此土廣且饒。藩封得之多。蓄士馬。饒富而驕。奸人誘爲不軌。不利宗社。今王所請懇篤。朕念親親。其畀地於王。王得地宜益謹。毋收聚奸人。毋多畜士馬。聽壬人勸爲不軌。震及邊方。危我社稷。是時雖欲保全親親。不可得已。王其慎之。毋忽。上覽制駭曰。若是可虞。其勿與。事遂寢。會上欲稱威武。大將軍鎮國公朱壽巡邊。令內閣草制。楊廷和同儲力諫不聽。屢使促敕。廷和稱疾不出。至是上御左順門。而促儲。儲不敢草。上震怒。手劍立曰。不草敕。齒此劍。儲免冠解衣帶伏地泣曰。臣有罪。今日就死。他日陛下猶憫臣。臣草敕。他日陛下覺而悲曰。儲無禮。以臣名君。臣罪不赦矣。上擲劍起。不促草敕矣。時禮部尙書李遷學等廷議建儲居守。朱甯陰受甯王宸濠賄。謀入甯王世子江彬亦欲立所厚遠。藩儲大聲曰。皇上春秋鼎盛。建儲未宜輕言。萬一有他。吾輩伏斧鉞矣。王瓊王鴻儒亦助言之。議欲寢。十四年己卯考一品九年滿。進階特進光祿大夫左柱國。兼給

誥命褒諭。賜燕禮部。會江西兵變。大駕欲親征。儲與蔣冕扈從。至南都。凡七請回鑾不報。時且欲郊。儲與冕疏言。南都郊。仁祖配天。北都郊。太祖太宗配天。若遂郊。配位不知所裁。乃不果。又將南幸。北歸。尚未有期。儲冕復跪請於行宮。西階。自卯至酉。汗浹衣。上遣中使傳諭再四。儲弗起。曰。未得俞旨。不敢起。上乃曰。子不南矣。乃起。庚辰冬至。德州。自劾請罷。不允。抵京。再疏。又不允。儲乃杜門求歸。言妻喪未葬。先壘未修。老病之軀。無所陳力。上固留。遣官爲治葬事。蒼先人墓。而賜祭。遂與羣大臣同受遺命策。世宗自輿入。正大統。儲與冕實奉行勸進。事稍定。復申前請。既而外議謂儲黨逆。濠復護衛。儲墨不辨。攻詆者屢屢。儲乃復固申前請。上始可其奏。賜敕特遣行人送歸。命有司月給廩食。歲致輿隸。蓋十六年辛巳夏五月也。儲歸日。與弟參議億。徜徉山水間。嘉靖四年乙酉秋。上念定策扈迎功。唯儲未錄。詔廢子世錦衣。指揮疏辭。上重違懇誠。報可。而遷子均輔爲尙寶司卿。儲疏陳謝。慰勞有加。六年丁亥三月二十五日卒。年七十七。贈太師。諡文康。諭祭九壇。遣官營葬。儲沈重博雅。接人和易。立朝四十餘年。議論每持忠厚。故羣邪用事。從容其間。若履坦途。所著有鬱洲集。蠶帽著論曰。儲立朝四十年。其功多矣。乃自掩蔽。不肯以功自誇。故人不得知之。聞謗不辨。故謗言日積。平生好施德於人。人或賴儲以自庇。反操戈向之。故海內後進之士。未而之者。徒聞謗語云云。亦附和而毀焉。始宸濠未反時。凡所餽皆有記籍。濠誅後。閱籍。唯儲與王鏊無受餽。廣州同知沈尙經曰。南海梁儲田無百畝。所有者香山浮坦。從化賊巢。庾敵不堪之士。其家儉樸如此。御史王濬請典刑儲。給事中田賦。儲門人也。請沒儲貲以代天下輸租之半。劉瑾遂矯詔籍其家。儲

在南京初聞報色不動及鈔閱家無長物世宗御極言官連疏劾儲假宸濠衛兵是爲故縱反者請召置獄正罪如尙書陸完儲曰余唯致仕去而已終不肯辨人曰是公大罪何所容辨儲不辨而劾者不已久之乃知與宸濠衛兵者非儲實廷和當制事在正德九年三月十五日蓋舊例凡閣下當制擬旨人親署御著筆迹故不得而評儲唯引罪連疏乞致仕無片言自明人服其渾厚焉黃佐曰蔣冕方在庶寮儲延譽宮府力拔爲輔御史西王張連論列詆毀人不能堪而儲以連才引慝往謝立意薦揚竟至大用連終身慚感後楊一清在內閣親承世宗面諭命撰敕召用而訃晉至世宗悼惜久之

史官曰當武宗時君有穉滿之荒羣小在側強藩外伺而能蒙難正志執羈紲以捍牧圉入左腹以獲明夷蓋其難哉惟梁儲晦以全身誠以悟主退讓和易以遠患回天納牖不避難險蓋兼婁之容甯之愚以成其弘濟者當世一人而已

許進李承勛胡世甯傳

許進字季升靈寶人成化二年進士除監蔡御史巡甘肅山東風裁卓然道士以黃白術干湖廣李總兵不遂誣總兵反汪直欲爲己功逮李百口至京煨成獄下法司讞進發道士奸卽日磔道士於市御史滿三考陞山東接蔡副使明敏發奸伏如神東昌有武官子懷數金挾一儒生飲酒家是夜武官子被殺無主名有司疑生逮生酷訊生誣服進閱牒疑託他事徧取商歷入閱至布商家乃武官子死之明日酒家市數十布價厚進曰此必武官子金也一訊遂伏儒生得釋不死弘治元年陞廣西按察使尋陞僉都御

史巡撫大同。數條邊事。戎政修明。小王子瓦剌兩種聞其威名。遣元哈桶察察少保等兩年三貢。僅費幣銀六萬兩。雲中上谷河曲塞境無敵患。當是時。士馬強壯。軍容嚴整。進才智忠毅。又能幹旋應變。以故每貢多至三千人。少亦不下二千。至關皆下馬脫弓矢入館。戢戢聽命。代藩諸郡王或驕。與巡撫通酒食。乾沒芻餉。進一切持法行己意。諸郡王輒惡進。會武邑王璉沐不律。進發其罪。廢爲庶人。警動諸郡王。諸郡王自是不敢譁忤巡撫。四年。上言守內臣石岩刻侵士餉。撓軍政。岩亦誣進。擅用旄幟。降兗州知府。以寬簡宜民。七年。冬。陞陝西按察使。明年吐魯番速檀阿力及其黨牙蘭劫忠順王。據哈密。馬文升薦進改巡撫甘肅。至鎮。結赤斤罕東諸夷爲援。又結小列禿截吐魯番後。誓言遠征。不恤浮議。冬月與都督劉甯彭清冒雪夜行。出嘉峪關二千餘里。擣哈密城。牙蘭遁去。得忠順王。陝巴及都督罕慎。復哈密城。斬首百餘級。獲牛馬駝數千。時牙蘭既走遁。別種八百人登臺自保。將校請曰。斬此八百首功。公且得封侯。進曰。捐脅從柔遠人。期在安輯。安忍以多馘爲功。逆天道無後。違者斬。八百人竟得不死。疏請懷輯罕東諸夷。相援。離吐魯番黨。與孤其勢。西域遂定。九年。陞右副都御史。巡撫陝西。進爲平役。調餉。興水利。開屯田。去貪殘。獎循善。格強禦。馭下有權。人稱神明。關隴大治。十年。召爲戶部右侍郎。會刑部主事鄭岳言事下獄。疏救岳。彗星見。又條上修省事。外戚奪河間民田。進往核田歸民。與戶部尙書周經上疏曰。此皆小民恆產。國家賦役之地。若奪彼與此。仁者不爲。十三年。敵入大同塞。且犯宣府。京師戒嚴。進兼憲職。提督軍務。與平江伯陳銳出師勦敵。銳失律。總兵王璽違進節制。又敗。銳璽得罪。進致仕。既歸。廷臣論薦。四十八疏。孝

宗知進時稱許進可大用。又曰：劉大夏若入吏部，進可代大夏。未及召，孝宗崩，武宗卽位，首召爲兵部左侍郎，提督團營。正德九年，代大夏爲兵部尙書。當是時，大夏屢求去，俟進至，曰：「吾可去矣。」謂進曰：「勉爲國家負荷報先帝。」時上不親政，進疏乞勤聖學，戒遊逸，改吏部尙書，代焦芳。時閹瑾專權，進持正不可干撓。三年，考察外官，瑾得賂，輒欲留諸貪殘吏，進不肯。瑾怒，百方欲中傷之，不可得。以劉吉署員外郎，再署郎中，爲非制。又諛進薦雍太非其人，除籍。瑾怒猶未解，又搆進在大同時，籍士出服役錢，失句校，爲吏乾沒。且籍進家，會瑾誅得解，復官。致仕，卒。贈太子少保。卒後十七年，巡撫上其功，得諡襄毅。進子八人，詩鄉進士。誥進士，歷官吏部侍郎、南戶尙書、博學能文。卒諡莊敬。贈太子太保，讚歷官少保，兼太子太傅、吏部尙書、文淵閣大學士，乞致仕，上不喜罷。讚小心守法，不敢任喜怒進退人，上常稱讚端慎。爲夏言嚴嵩所持，在吏部不得盡行其志。論歷官太子太保、兵部尙書，有才略，好談兵。進以子讚贈少保，明稱父子科名。官爵極盛，輒推許氏云。

李承勛，字立卿，嘉魚人。弘治六年進士，父田，歷官都御史，承勛幼靖敏，長與諸兄郎中承恩、評事承芳、貢士承箕、承顏相師友，修勵行業。初知太湖縣，力行善政。陞南京主事、刑部，歷戶二部郎中，出守南昌。當是時，南昌難治，劇賊驕藩，內外孔棘，承勛深略雄才，撫機輒應。正德六年，贛賊犯新淦，執參政趙士賢，靖安賊據越王嶺，瑯瑤岸，華林賊破瑞州，承勛廣詞謀，繕壁壘，扼溪澗，屢進戰，擒胡雪二，讒遠府，華林賊又叛，殺副使周憲，承勛諭降健賊王奇，約內應，夜引兵舉火爲號，大破賊，斬首三千，境內安輯。卽上疏請獨進

租八年挑源賊起江浙執兵部吳廷舉總制俞諫請邊兵勦賊承助曰賊乏食必掠裴源積粟請饋兵自德興南昌自岳源分兩翼伏裴源而令邊兵驅賊果走裴源大敗遁去太監黎安欲奪其功諛承助竄賊詞命大理卿燕忠卽訊未幾誣白陞浙江按察使歷陝西河南右左布政使十五年陞副都御史巡撫遼東遼東故富饒無敵患自汪直開邊敵輒搆貳擾開原懿路汎河三城極殘破承助修築定遠慶雲古城鎮夷松山柴河六堡墩望一百八十一所屯田千五百頃又修中固鐵嶺蒲河撫順諸城皆濬陸樹木爲阻固東圍少寧進俸一等逾年請告嘉靖初起掌南都察院轉南京刑部侍郎進尙書又召入爲吏部尙書道改刑部加太子少保上疏論時事改兵部尙書兼都御史代胡世甯提督團營惡郭助驕縱翦其羽翼助愬之欲并中世甯承助辭營務不允八年爲兵部尙書當是時田州岑猛叛用兵兩廣騷動芒部沙保又叛吐魯番奪我哈密搖河西小王子歲入塞承助與世甯相繼本兵同心經理戎事頗戢承助奏裁各省鎮守守備內臣二十七人錦衣官校旗勇內府詭匠數千人此皆破祖宗法依城社坐耗國儲腴民膏血大蠹衆束手閉目莫敢向問者承助恃上聖明一旦翦剔去騰驤四衛者詭冒依附奸欺不可詰上言宮府一體清官軍考選清核並如旗手等衛制曰可內臣言四衛禁軍隸兵部不更往歲彰義門破敵東市勦曹賊皆四衛功以直內故得號召易集下兵部再議承助執言往歲之事正以兵權歸闈人致亂彰義門之戰由太監王振東市之賊卽太監曹吉祥也上從其議九年大風晝晦上恐懼憂邊詔問方略答曰聖祖有訓謹備外戎去歲冰合北敵盡入河套以故陝西邊患延甯固原爲急甘肅軍餉專仰河東

宜於蘭州及時糴貯以備河西災窮。曩時河西急苦吐魯番亦卜刺又深入兩下夾擾孤危益甚海賊套賊出入殺掠並經莊浪被其殘害急宜繕塞設險斷臂截踵使賊相隔絕兀良哈最近京師不善撫卽爲門庭之患雲南安鳳之叛軍民困敝臨安蒙自盜賊復起曠日持久恐釀成大患交趾世子流寓老撾異日歸命請援或據地求封皆未可測惟用人理財早爲警備以保社稷幸甚十年議耕桑禮詔問之承助答言禮有儀文政有根本惟上下儉節墾田興水利足民衣食今日急務議郊禘又詔問之承助以傳經術順人心爲對承助楚人久有重名上稔知之欲用爲吏部尙書不果是年春充正使册九嬪晨起趨朝暴疾卒年五十九贈少保諡康惠承助學有源委才無枝柱提兵南北曉暢軍事通達國體議論英發潔廉自守家無餘資子枚益府長史

胡世甯字永清仁和人弘治六年進士世甯骨相奇古家貧力學志節清峻長益韜戢留心世務初爲德安推官陞南刑部主事歷郎中與李承助魏校余祐友善相切磨問學時稱南都四君子十八年春詔求直言世甯條上十事其一言用人宜立賢無方先朝李賢薛瑄入內閣不由翰林翰林如胡儼劉球不由庶吉士年富以教官爲給事中王翱以大理左寺正復爲御史今一切鉞轉專泥科條以故才賢抑塞朋類引援乏人佐理其來有漸出爲廣西太平知府太平瘴鄉多土官苗獠世甯至訪接示禮意不擾一錢翁然帖順一檄創壺關萬夫畢集工費數千金皆土官辦閱數旬成太平州酋豪李潛淫刑撓法莫敢詰世甯密受方略龍英士知州趙元瑄元瑄擒潛來獻散其兵四千人歸農元瑄者潛外兄也土官世及輒

轉展結勘。索賂土夷。土夷以故怨叛。益輕中朝士人。世甯令土官生子。卽開府。子弟應世及者。年且十歲。朔望或有事調集。皆攜之見太守。太守爲識年數狀貌。父兄有故。按籍爲請官於朝。土官大悅服。謂胡太守仁廉。內艱歸。土人走送者數萬。服闋北上。過滄州。會流賊攻州。世甯入城爲州防守。賊攻城不能破去。補寶慶知府。節約公廉。有威。藩府人不敢忤。盡平其役賦。當是時。川蜀江浙盜起。陞江西按察副使。兵備東鄉。東鄉盜藪。初縣。世甯勦強撫順。東鄉安戢。督戰裴源。及廣昌城三邑。時都御史俞諫用兵。挑源久無功。甯庶人有逆謀。世甯上平賊二策。惟勦與撫。今素無定。恩威倒施。事多轉展。賊益無忌憚。惟舊撫者不勦。再叛者不撫。新起者必撲滅於微。持此三端。官有定守。民有定志。戢戰興農。救傷卹困。治安之效可尋。崩解之亂可息。不然。民窮財盡。兵連禍結。後患未涯。殷憂方甚。又恐江西之患不止。盜賊最可憂者。天旱日久。千里赤地。水泉亦竭。田禾無收。麥種難下。來歲民饑。賑救無備。省城被火。延燒萬室。基地所便。盡歸王府。債負所責。閭閻破家。莊田所逼。村落結寨。三司官多被鈐束。錢穀刑名。奉行府案。近者買辦漸行於外府。搔擾徧及於窮鄉。臣恐此不善處。則良民不得安生。聚爲大盜。臣下懼有隱禍。多懷二心。禮樂政令。漸不自朝廷出矣。甯王懿親多才。豈有毫髮過議。但內外臣僚。輔導非法。自因逆瑾得復。護兵以來。威勢日盛。上下官司。承奉太過。伏乞聖明。廣集羣臣。及江西鄉士。有識士夫。會議推舉。才望服人。公忠體國。不避權勢。不惑浮議。大臣一人。兼任提督巡撫之責。假以陳金彭澤之權。使其統御將帥。調度兵食。激揚清濁。易置官吏。興革利弊。皆得便宜。其新舊盜賊。應撫應勦。或先或後。悉聽計畫。萬全奏聞。區處久困民窮。

妙選循良。曲加撫綏。早期休養。務使安全。更乞溫詔戒諭賢王。益崇謙順。遠避嫌疑。仰遵祖訓。止治國內。官僚江西藩臬郡縣。應有政務。遵事朝廷。奉持常憲。無得交私。罔上廢法。該府更宜嚴戢官闈。恪守禁例。施舍己責。惠及貧民。莊田基址。悉還原業。再有稔惡不悛。及投充撥置者。法司提問如例。更乞嚴敕鎮撫以下官。鈔奉太宗聖旨事例。凡遇王府發放事務。必須奏準。方許奉行。庶幾小民有再生之望。地方無意外之虞。宗室有盤石之固。九重舒南顧之憂。疏上。宸濠大懼。徧賂權奸朱甯。蕭敬張銳等。及兵部尚書陸完都御史石玠。坐世甯誹謗妖言離間罪。必欲殺世甯。世甯先已陞福建按察使。乞休未得。允歸抵家。宸濠徧遣兇徒。挾上旨襲世甯。巡浙江御史潘鵬附宸濠。盡囚其家人。索甚急。會李承勛爲浙按察使。匿世甯。變姓名。問道歸命京師。得不死。下錦衣獄。於獄中三上書言江藩橫逆。朝野皆聞。徵臣贛愚。天日共鑒。兩京言官程啓充徐文華輩。並疏論救。諸奸亦懼。後事未可知。得出獄。謫戍瀋陽。居四年。宸濠果反。釋世甯。士伍薦除湖廣按察使。未任。嘉靖初擢僉都御史。巡撫四川。世甯疏勸修德講學。條上四川爲吐番所苦。餉道梗阻。乞用人理財增兵。將明賞罰。未幾召爲吏部右侍郎。未至。外艱去。服闋乞休。時大禮議未決。世甯疏乞早定大禮。赦羣臣小過。簡賢求治。又聞羣臣伏闕爭大禮得罪。復上疏言羣臣心欲效忠。詞乃過激。乞擴然開釋。消除疑沮。圖回治安。召爲兵部左侍郎。上京東邊備二十五事。又上大學仁人能好惡。洪範惟辟作威。福臣無得僭易。大傳不出戶庭。無咎講議三章。疏入留中。言官因劾世甯告密。世甯乞下其章宣示。引罪求去。不允。又上知人官人疏。尋以病乞改南京吏部侍郎。未幾擢南京工部尚書。以左都

御史召與李承勛同過沛。疏漕河事宜。改刑部尚書。霍韜言世甯廉直。宜繼憲。加太子少保。仍右都御史。提督團營。尋復爲刑部尚書。張璫惡陳九疇。世甯力爭。九疇有功河西。忠勇不可殺。九疇快奸回。輕中國。九疇得不死。風霾詔求直言。上勤學恤民。任官十事。轉兵部尚書。加太子太保。力辭。疏言外敵方強。內憂日甚。天下之人奄然皆無忠義之氣。我朝尚書兵部者。臣鄉里所聞。方賓于謙。耳目所逮。劉大夏。彭澤。忠勤爲國。不得保全。其幸免者。依阿。輒媚。坐視。養亂者也。授姚崇。李剛。故事。上定武略。崇憲職。重將權。增武備。更賞罰。御土夷。定邊儲。絕弊端。正謀謨。惜人才。十事。時桂萼倡言太平。勸上消兵興禮樂。世甯又特疏。申論武略人才二事。上知其忠梗。促上任。議行十事。又議棄哈密。不可勞中國。奔命小夷。閉關絕貢。便芒部。會沙保木末。誅矯誣。請賞力薦。陳九疇。馬吳可。任軍旅。唐龍可。爲兵部侍郎。相佐助。在告。又上武備人材邊儲三事。自度不得行其志。決意辭疾去。李承勛代爲尚書。逾年。又召起南京。參贊機務。兵部尚書。辭不起。嘉靖九年九月。端坐而逝。贈少保。諡端敏。世甯樸忠直。諒氣壯才雄。濟以學問。優於經濟。淡薄甯靜。清素不沾。席書嘗稱其論事如結舌。草奏如懸河。邵銑曰。胡公疾惡如讎。善則猶已。余兩爲公屬吏。手畫勉。余忠孝大節。公兵曹不數月。夙弊大奸利事。整刷十五六。議哈密與方獻夫不合。論芒部功。王瓊以爲發其過。大不喜。薦賢才。桂萼以爲侵官。相壓。亂政發怒。訴於朝。哈密吐魯番疏。制置極詳。吐魯番劫曲先衛人。牙木蘭爲將。牙木蘭擁帳內徙。歸我吐魯番。遣使來。而大臣卽欲縛牙木蘭與之。易哈密。乃議曲先衛本中國。羈縻牙木蘭。反正歸順。非納叛比。而哈密空城懸遠。無益事實。吐魯番善賈多巧術。往往以珍

奇嗜時貴自成化至於今中國爲彼欺負今欲甘心牙木蘭以攜貳我屬夷而以哈密爲餌釣大利宜敕王瓊爲國忠謀先盡復瓜沙羽翼之地悉收亡失屬夷封植哈密永爲不侵不叛之臣而後請敕降印庶不辱王命且吐魯番方悞楊中國懸衡諸夷但遠越流沙烏合難久我大震威略以離其黨購賞義務使相破滅此伐交之術正宜厚牙木蘭以風蠻夷及薦馬昊施儒楊必進及九疇爲將皆報聞河西之義語侵張璉彭澤陳九疇得免奇禍昌化嗣伯下廷議世甯言吾輩不得以厚賂故誣朝廷桂萼變色大沮以故諸大臣皆忌之賴上明聖憐其忠梗終始眷注焉集有奏議行於世其危言正色遠慮深憂天性然也子純肇慶知府有材行幼子繼幼讀書不大了了父亦棄之世甯調兵至江西兵官以世甯出見繼繼曰兵素不習安能見我父哉兵官請教繼乃指示進退離合勢甚詳凡三日而世甯歸閱大異之願兵官非能曉此者以詰不能諱其實告世甯嘆曰我有子自不識何也自是擊賊必從繼方略世甯十不失三繼策十不失一也世甯勦宸濠繼跪曰疏入必得重禍奈何世甯曰吾業以身許國疏入下詔獄繼奔哭病死世甯母獨不哭曰此子在當作賊胡氏滅矣

史官曰許進撫代撫河西關隴威遠夷悞強藩跡其雄略馬鈞陽之亞也寧失首功不戮脅從宜後世有興者矣李承勛提兵南北屢平劇賊其大勛尤在中樞使宮府內盡一旦廓清誰之力歟胡世甯懷柔苗夷結以恩信勦撫定策爲行間寶符至於直道侃侃發江藩之奸與舉朝文武爲難抑何壯也史稱其危言正色遠慮深憂直匪躬之大臣矣

楊一清傳

楊一清字應甯。雲南安甯州人。父徙巴陵。又徙丹徒。年八歲。以奇童薦入翰林。爲秀才。憲宗命內閣選師教之。受業於黎澍。十四歲中順天鄉試。時已抗顏爲人師。有文中子之風矣。成化八年壬辰。進士。授中書舍人。交結海內名士。益有文名。從學者日衆。出爲山西提學僉事。丁憂服闋。補陝西提學副使。在陝八年。大作士類。士有博記誦者。修文辭者。專攻舉業者。所學不一。皆誘而進之。三邊學多士。廣歲必一試。其蒞事愈久。愈嚴。夏楚之用。殆無虛日。士試懷懷守法。及去任。士追憶往事。凡中才以上。可貢可舉者。未常一扑及之。性明知人。方進取日。或許以將來科第。及冠世名世。必卒如其言。嘗語人曰。陝有三奇士。康海。呂柟。馬理。後皆爲聞人。故其造士五十餘年。猶用不盡。當是時。雖宗室不能奪諸生之席。雖撫按不能撓課士之權。爲明提學第一。十一年。召爲提督四夷館太常少卿。十四年。進南太常卿。弘治十五年。劉大夏言馬政廢壞。陞副都御史。督理茶馬鹽馬。陝西人素喜一清。一清官益高。才益展布。清牧地凡十二萬八千四百餘頃。條上茶鹽牧事宜。及易置馬吏。奏請輒允。收事有成。益開水草善地。起城堡廬舍。河湟涼固間。雲錦成羣。又奏準招商。自出資本買茶。裝籠轉運。茶司每一千斤。價五十兩。大約計官銀萬兩。舊買馬不過千匹。如此可得馬二千匹。官益而商不損。與開中不同。著以爲制。十七年。敵入花馬池。塞十八年。敕一清經略邊務。兼巡撫陝西。一清條邊事。勦罷總兵武安侯。及兵備不職者。裁折中官支應。歲省數千金。創城平敵。紅古以援固原。築垣瀕河。以捍靖敵。敵入。聞一清至。輒遁去。正德元年。改總制三邊。兼理馬政。是

年陞右都御史。疏言陝西各邊延綏城堡據險寧夏甘肅河山阻隔賊雖侵犯爲患猶淺惟花馬池至靈州地里寬漫城堡稀疎兵力單弱一或失守敵衆拆牆而入犯環慶寇固原踏平鳳臨鞏其間漢土雜處倘兵連禍結內變因之而作根本動搖誠非細故此所謂膏肓之疾腹心之害也成化初年北敵在套彼時未有邊牆恣肆出入已而得巡撫寧夏都御史徐廷璋修邊牆二百餘里開濬溝塹延綏地方邊牆壕塹又得巡撫都御史余子俊修濬完固北敵不復入套者二十餘年世人玩邊備漸疎牆旣日薄溝又日淺弘治十四年大敵由花馬池拆牆而入戕破四郡敵大得志始蔑邊牆爲不足畏連年擁衆拆入我軍動輒失利寧夏鎮巡屢奏築牆濬塹提督軍務都御史史琳又乞於花馬池韋州設立營衛兵部奏下總制尙書陳紘紘止添修四五小堡及於靖□至環慶地方挑挖邊塹僅七百餘里自謂可無敵患弘治十七十八年各敵復大舉仍自花馬池清水營拆牆深入紘所修邊塹營堡不能捍禦阻遏攻陷清水營殘破花馬池上廬宸慮敕臣經理臣聞劣歷官陝西有年敵情邊事頗常究心但今頻年旱荒倉廩空虛餉餉不繼敵衆動號數萬倏聚忽散未至而廣徵士馬則徒費芻糧旣至而調兵應援則援不及事縱使大兵旣集務速則彼或不來持久則我師先老恐終無以伐其深入之謀沮其方張之勢常聞防邊之計莫危於戰莫安於守臣恐坐談不如親見自慶陽環縣延綏定邊寧夏花馬池興武清水營直抵靈州一帶邊牆城堡墩臺躬親閱視廣集衆思兼收羣策參酌指益始有定論其大要有四修濬牆塹以固邊防增設衛所以壯邊兵經理靈夏以安內附整救韋州以遏外侵當務之急莫先於此但陝西財匱民勞修

邊之役人多異議。然利害有輕重。關係有大小。大事可成。則小費不足計。遠效可圖。則近怨不足恤。此臣區區犬馬之忠也。今之河套。卽周之朔方。漢之定襄。赫連勃勃統萬城也。唐張仁愿築三受降城。置烽墩千八百所。自是突厥不敢踰山牧馬。朔方無寇。歲省費億計。減鎮兵數萬。受降遠在河外。古之舉大事者。未嘗不一勞而後永佚。類如此。受降授三而之險。當千里之蔽。正統以來。浸夫其險。舍受降而衛東勝。已失一而之險。又輟東勝以就延綏。則以一而之地。遮千餘里之衝。遂使河套沃壤。爲敵甌脫。巢穴其中。深山大河。勢顯在彼。而寧夏外險。反南備河。此陝西北敵之患。所以相尋而莫之能解也。茲欲復守東勝。因河爲固。東接大同。西接寧夏。使河套方千里之地。歸我耕牧。開屯田數百萬。用省內運。不然。則陝西用兵。殆無虛日。八郡之人。疲於奔命。民窮盜起。禍將何極。及今將延綏寧夏邊防。設法整飭。賊來有以待之。雖非上計。猶愈於無策。敵衆聞知。或數十年未敢輕犯。我得休養生息。東勝之議。未必終不可復也。世之論邊事者。或專主戰伐。臣亦非敢忘戰者。方將蒐選官軍。策勵將士。備車馬。備器械。儲糗糧。明斥候。今冬北敵若復侵犯。謹當獨率諸將。恭行天討。成功在天。臣不敢必。凡所當爲。臣不敢避。今首以築牆挑塹爲言。宜必增葺多口。但受恩深重。自當爲國遠圖。今年套內無賊。腹裏有秋。人民稍安。正可有爲之日。伏望聖明俯垂省覽。下兵部議。敕一清便宜經理。二年一清。言臣卽兼巡撫。已不能專力馬政。今冒總制。事益廢闕。乞仍遣巡茶御史兼馬政。是年引疾東歸。閣瑾惡一清不已。又羅織逮詔獄。李東陽力救得釋。兵部疏言一清修邊方有端緒而去。凡羅餉費銀十餘萬兩。起戶役銀十六萬兩。及諸犒勞藥餌。辦運木石。皆一

清精神運用。計慮周悉。今付之新任撫臣。意有異同。事無統紀。恐徒費財。靡益邊務。乞遣大臣專理。議上。兵部右侍郎文貴。右副都御史張鼎。陝西巡撫副都御史曹元。乞簡用。瑾意不欲脩邊。內批罷役。銀鎔大。繼解京。事竟止。五年。安化王寘鐸反。寧夏召一清。總制陝西。延綏。寧夏。甘涼軍務。同太監張永討賊。兵纔至陝。仇鉞已擒賊。一清謂永曰。藩室亂易除。國家內變不可測。奈何。永曰。何謂。一清曰。公豈一日忘情。願無能爲公畫策者。遂促席手畫瑾字。永曰。渠日夜在上。傍上一日不見渠。不樂。今其枝附已成。耳目廣矣。奈何。一清曰。公亦天子信幸臣。今討賊不付他人。付公。上意可知。公試班師入京。詭言清。上問語寧夏事。上必就公問。公於此時。上寘鐸僞檄。并述渠亂政凶狡。謀不軌。海內愁怨。大亂將起。上英武必悟。且大怒。瑾誅。柄用公益矯瑾行事。呂強。張承業。暨公千載三人耳。永曰。卽不濟。奈何。一清曰。他人言。濟不濟。未可知。言出公必濟。願公言時。須有端緒。且委曲。上萬一不信。公頓首請死。願死上前。卽退。瑾殺奴。餵狗。又涕哭頓首。得請卽行事。無緩頃刻。漏機事。禍不族踵。永勃然作曰。老奴何惜餘年報主乎。已而永入京。請見如一清策。竟誅瑾。永力薦一清才望。上召爲戶部尚書。尋加太子太保。六年。改吏部尚書。中原盜起。上平賊十一策。金山之捷。皆其貽書陸完。指畫機宜。卒如所算。賊平。加少保。一清在吏部時。給事中王昂劾吏部謫官。一清疏救。御史孟洋劾內閣謫官。一清疏救。雲南陝西鎮守太監誣奏。巡按御史張瑛。劉天和。王天相。逮下獄。一清又疏救。十年。入內閣。加少傅。太子太傅。武英殿大學士。尙書如故。一清不屑幽謹。錢甯惡之。以災異自劾去。歸丹徒。宸濠變起。一清以鎮江爲江南首郡。此地有備。則三吳無虞。乃親閱城設。

險出粟賑軍。貽書調金山軍爲外援。設中軍營爲內應。故地方恃以無恐。武宗南征幸其第。宴飲庶歌兩晝夜。有導上復南幸者。一清從容婉諫。遂不東。嘉靖初遣使存問。大禮議起。一清見張璁疏曰。張生此論。聖人復起不能易也。璁等向用力薦之。嘉靖四年敵大入塞。擾關隴。起一清兵部尙書兼憲職。提督陝西軍務。未幾召入內閣。首薦起大學士謝遷。費宏遂請老。一清亦請老。尋加少師改華蓋殿。上憐其老。令朝朔望。一清復銳意修邊。及選將練兵。屯田防敵。上亦用其言。竟中止。一清惡郭勛驕橫。諷御史趙鏗勦助。奪助後府及團營。八年秋一清計去璁等。霍韜曰。議大禮者吾輩三四人。張桂去且及我。急上疏列一清二十四罪。上立召璁還內閣。俄朱繼宗獄起。坐一清受張容金錢。名請永誌。又輒與容指揮世錦衣。上又憐一清老。有功不問。言官屢劾削籍。明年疽發背卒。繼孫元援詔請得復官。二十七年贈太保。諡文襄。一清生而隱宮。貌類寺人。學博才雄。善調停。應變濟務。尤曉暢邊事。羽檄旁午。一夕十疏。口拈指授。悉中機宜。又好汲引人人。或嘗已。願揭薦之。一時俊達喜功名者亦爭趨其門。先是一清在靈州。日習演營陣。人多笑之。一清知之曰。予誠書生。不諳軍旅。嘗聞古人行必謹哨探。止必修戰備爲法。每諭諸將曰。無事當如有事時隄防。有事當如無事時鎮靜。又念武侯李靖未嘗廢營陣。世無岳武穆。豈可恃野戰以爲能耶。笑者服其識。一清明於知人。如拔仇鉞於列校。舉王守仁於庶僚。錄楊宏於編戍。而有功漕運。識伍文定而首倡義捷。用喬宇而捍禦留都。拔俞諫而總制江右。皆儲賢於無事之日。卒靖大變。有幹才。人多稱焉。史官曰。韓魏公自謂才周四面。方是經綸好手。如楊一清之有猷有守。好尙旣端。於邊防馬政造士用人。

投之所向無不卓然利今而法後近代才相鮮能儷之至於用寺人去寺人肘腋大奸如距斯脫劉謝諸賢不得不讓美矣

梁材劉麟雍太吳廷舉傳

梁材字大用南京金吾右衛人幼岐嶷儼如成人甫受學輒慨然有經濟天下之志弘治十二年己未登進士授德清令刻苦勤敏一日勘事他邑重囚越獄去材還禱於城隍賊未幾就擒材詰之曰汝既遁何復爲我擒賊曰有一緋衣人尾之欲脫不能耳人咸以爲異正德二年督刑部廣東司主事獄大小無遁情刑尙書洪鍾每命諸司錄其讞案以爲法五年改山東道御史閣瑾誅榜諭天下出材手筆大學士李東陽見而絕愛之及爲史記先是東陽與楊廷和各製一篇不愜意乃會刑尙書何鑑都御史楊綸令其屬徧爲之東陽見材作喜曰以古詞兼律筆足示天下後世矣遂錄付史館六年出知嘉興未幾調杭州杭以繁富名材至愈以清約自勵入覲具一書二帕贊京貴囊中無一長物而其廉幹益著聞十一年進右參政尋進按察使會宸濠變起濠去浙邇倚鎮守中官畢真爲內應人心洶洶御史張縉謀於材曰事急矣將若何材卽就案草檄調兵方略布置一日悉具又自往說真令撤兵衛自是好謀內沮兩浙恃以安嘉靖二年以服闋再爲雲南按察使先是有土酋相讎夷者六載未定御史須材爲之材卽召致諭以王法當誅死今姑貸汝如例罰牛羊若干以贖土酋頓顙輸服御史難其太輕材言治夷法如是足矣不爾是激之變也後詔知夷果密調兵聞無他乃止三年督貴州左布政使調廣東凡入民課金令輸者自

權之而親爲監督。主藏者不得高下其手。往來傳置諸所餽遺。卽果蔬弗受也。材兩典名郡。及爲藩臬長。壹以便民爲務。頌聲載途。所至立專祠祀。六年進右副都御史。巡撫江西。未兩月。召爲刑部左侍郎。七年改戶部。兼右僉都御史。總督雲貴川廣糧餉。偕總制伍文定往平雲南。至澧州聞捷還。辭兼職。冬督尙書。十年丁內艱。十三年召復任。駕謁山陵。材受敕。偕宣城伯銜鎬居守。如是者三十七年。以考滿解職。明年廷臣上議。言司徒乃國計大臣。總領財賦。得人實難。竊見材操心廉直。終始不渝。且綜理旣閑。出納有贄。實清朝人才之望。及今未衰。尙堪任使。乞蚤召用。以盡其才。上俞之。起原官。加太子少保。材在位。素令親信。察市價低昂。斃戶不得乾沒。所省官錢不可貲算。張璉新貴用事。常以意氣挫折公卿。一日於朝堂厲聲語云。梁大用某處糧草當辦。則應曰諾。某處折銀當發。復應曰諾。璉意其黯黯弗了也。旣而偵之。則無弗夙具者。乃歎曰。渠固若是辦耶。上念吏治龐雜。特命材以戶尙書行考察事。所汰簡者數百人。人心大服。又大獄久不決者。上命兼刑尙書讞勘之。居數日。盡得其情。擬奏。上喜曰。得尙書十二人如材者。朕可無憂矣。事竣乃還印刑部。皆以特旨從。此前此未有也。平生爲國薦賢。絕不欲人知。是時士大夫頗尙圓通。公卿或阿上取寵。而材獨屹然自守。有古大臣風。然竟以此忤時。翊國公郭勛特寵擅專。損兵冒餉。材疏劾之。上下其章。所司響助威。莫敢詰。復按助不法十事。草成未上。爲僚友泄其語。反爲所中。遂落職歸。歸兩月而卒。嘉靖中工作大興。邊費無藝。加以水旱癘疫。所在告災。材籌之殫竭心力。必不稍以加賦於民。在職力主節財。諸濫請浮費悉斥。初世宗以祠禱故。於額外有所需。材執曰。終不以無益虧國計。世宗

心不善也。頃之材去且死，卒後邊儲大窘，計無所出。世宗乃歎曰：「令梁材在，當不至是。」居恆約敕僚屬，壹意奉公。自起家縣令，至尙書處公，靡者什九。私居者什一。終日高拱堂上，內外肅然。在廣東日，右布政林富市肉數多，召其僕，誡勿過豐。富聞之大怒，短衣露頂，踉蹌而出，詈不已。材類視簿書，端坐自如。富慙而退。爲戶部尙書，語其屬曰：「若輩與人一接杯酒，飲有干謁，能峻卻之乎？」坐部治事，無敢闌出入。以故資緣請寄，悉格不行。而歲計益治，材狷潔正直，出於天性。佐食園蔬，絕無兼味。公服用浙蕉極下者，底裏不厭瀚綴，唯裾鮮潔而已。爲尙書宅憂歸，始有居室。崔銑稱之曰：「自公召還司徒，塗人丐子相語云：『今天眼開，召爲梁公矣。』此與司馬光入朝何異？」西長安街有屋一區，予嫌其陋，公至卽居之。但掃地塗壁而已。予甚媿不及也。卒之日，家無餘貲。子孫至不能之京，斬卹典隆慶初，贈太子太保，諡端肅。

劉麟，字元瑞，其先江西安仁人。國初以武功籍南京廣洋。至麟始登弘治九年丙辰進士。是時外戚張氏驕橫，執法臺諫擊之，逮治甚急。麟與歸安陸崑抗章申救。孝宗爲之震威，事尋得解。除刑部主事，進員外郎。錄囚畿內，所疏雪冤滯無慮數百人。轉郎中，擢守紹興。漢劉寵故處也，在郡精核廉敏。甫五日，郡聲不和。閩瑾銜麟，出守不修謁，猶掇郎中時瑣細，廢爲編氓。郡人爭致贖。麟曰：「勤苦諸君，吾治不逮前劉，敢蒙一錢惠耶？」既去，越人肖像爲小劉祠。時與龍霓及湖人吳琬施侃陸崑交，因徙居於湖。山人孫太初亦以羈旅入社。湖中風雅稱中興焉。瑾誅起知西安，遭內艱去郡。服闋遷陝西參政，屬關內饑，敵數深入，朝遣大臣督兵，將厚賦軍興。諸司莫敢異。麟曰：「靖邊本以衛民也，民可先困乎？使者色沮，會有赴闕陳訴者，命

與參政共圖其便。議遂寢。麟亦嚴核侵漁。括逋負。邊儲竟以不乏。踰年擢雲南按察使。謝病歸。嘉靖初起爲太僕寺卿。擢副都御史。巡撫北畿。復引疾。章至三四。上始得請。時論方高。其才節再起。爲大理寺卿。改刑部右侍郎。尋陞工部尙書。水衡泉貨之府。高潔士頗避之。麟咨白吏部。盡選才廉充曹任。仍請築外帑。刷四司之財貯之。特銓主事一人。與臺臣同典出納。上嘉其意。賜庫名曰節慎。實自麟始。凡工部上供。率關內府所徵多湊典式。不受核。麟條上最甚者十二事。得旨裁之。中官用此御麟。會上遣近璫督造龍袍。於蘇松。麟請罷遣。忤旨。勒令解職。卽歸。益遠世紛。里中不復知有鉅公者。其於文。以冲夷雅澹之詞。發現瓊奇。蠲之氣。窈眇穠纖。冥與神會。書法宗羲。獻以還。片簡尺牘。人爭寶之。至與人談。往往出微辭。臻妙趣。早參玄理。兼達天命。常請王廷相預作墓銘。好樓居。而力不能作。友人文徵明寫層樓圖。遺之。常懸之壁。命曰神樓。賓至則陳法書名墨。以爲娛。叩以時事。不答。公卿交薦。不知也。性情約。疏布自喜。事繼母。戈遇異母弟鳳。尤篤恩禮。先人田廬。悉以委之。絕不以豐約累志。吏尙書李默言麟傲居溧陽。常道門人候之。麟引至臥內。見四壁惟掛書數束。他無長物。又二十年。觴予峴山逸老堂。了無宿具。旋以乳羊博市。酤風雨蕭蕭。欣然達夜。其風尙如此。常以爲麟。揆文似公幹。治財似士安。剛介不撓。似器之。至於廉約。省素家無餘貨。位列三事。以功名始終。此與東牟劉祖榮何異。世稱二劉。不其然乎。年八十八卒。贈太子少保。諡清惠。

雍太。字世隆。陝之咸甯人。成化五年進士。授知吳縣。吳濱湖。湖漲淪田千頃。太作隄。民受其利。稱雍公隄。

吳民有妾亡者。妾父訟其夫密殺吾女兩月。匿尸湖中石下。召訊夫。夫曰：妾逃兩月，蹤跡不可得。妾父脅財始知死所。太使人視其尸。乃訊父曰：夫密殺汝女。汝安知匿於石下。此又豈兩月尸邪。此必非汝女。汝殺他人女。冀得賂一拷而服。十年召爲監察御史。舊令行。吳人富好饋。太不受一錢。巡鹽兩淮。淮竈丁貧而餓者幾二千人。太巡滿。俱與完室。歷陞浙江右布政使。時勢家鬻販私鹽。鄉人效尤。幾至千輩。盜竊橫行。太先收富家人抵罪。羣盜悉平。晉僉都御史。巡撫宣府。參將李穉不法。部下狀其惡。太具草且聞上。穉跪堂下乞受責。圖自新。太曰：此亦軍法也。縛下杖之。三軍股慄。穉乃譖太時相。言官遂劾太以擅辱將官罷。退居章曲別墅。不涉城市。正德二年。給事中潘鐸薦其有敢死之節。克亂之才。詔起左副都御史。操江固辭弗允。尋陞南京戶部尙書。時閣瑾用事。以太鄉人。欲親用太。太不應。遂斥太去。而諸所常薦太者。馬文升許進皆獲罪。太歸從居章曲。日焚香讀書。與鄉人論穉事。不與上官相見。族黨有犯。必告有司。曰：某是某非。幸無以太故屈法。年八十卒。

吳廷舉。字獻臣。嘉魚人。成籍梧州。成化二十三年進士。授廣東順德知縣。潔己字民。時劉大夏爲左布政使。知廷舉。移文輒具尺書。廷舉益盡力效職。都御史屠蒲召見廷舉。甚溫。廷舉請事。都御史曰：順德有大璫某者。屬我修其家廟。縣令可理。昔之廷舉謝曰：令非有舊例新恩。一夫不敢役。一錢不敢費也。蒲慚已之。市舶太監出銀市葛。廷舉卽以銀市二萬。曰：奉此爲式。如不中。請還金。且葛雷產也。太監怒。取金去。汪御史惡廷舉。曰：彼專抗上官。市已能者。會廷舉壞淫祠。撤其材。作土隄書院賢館。修學宮。御史按而會其

直竹木碎屑計斤兩。廷舉囚服梏手。日詣訟所。士夫羣泣訴其亡私盜狀。御史大慙。釋之。弘治九年。蕭入爲吏部尙書。時廷舉爲令十年矣。遷成都同知。起復。改松江。上疏請修軍政。十八年。廣東盜起。陞兵備僉事。討平十三村池水盜。正德二年。革兵備。三年。改鹽法。兼屯田。四年。陞廣東右參議。再逾月。陞瓊州兵備副使。時閩瑾專權。廷舉發鎮守內官潘忠二十罪。又奉有旨。取作幣解京。皆非正費。曰。貢進內也。曰。司禮打點錢。賂瑾也。又疏便宜事。忠亦許。廷舉五年。瑾矯旨坐其枉道。荷校不死。戍雁門。再月。赦罪還鄉。是年。瑾誅。改雲南兵備副使。六年。陞江西右參政。討挑源賊。時總制數易。官兵不協力。歷數年。費萬計。賊益熾。廷舉饒智略。勇不避難。及逢盤錯。益喜。與副使胡世甯發憤。欲設奇。取捷。平賊。且諭解散。反爲賊得。賊劫廷舉。求撫。廷舉詞色不撓。久之。伺得賊中要領。誘勁賊。執其酋出。廷舉復入。討平之。九年。陞廣東右布政使。立番舶進貢交易之法。平傳役。十年。嶺西。獠。撞作亂。兼兵備副使。撫治廣肇諸府。十一年。轉左。十二年。湖南饑。陞副都御史。賑濟。十三年。救勸永順保靖兩江口夷情。廷舉爲堅明約束。條奏上。十四年。還京。復出湖南。定諸夷地界。又疏言六事。備宸濠變。宸濠大恨。惟恐其巡撫江西。嘉靖初。召爲兵部右侍郎。上疏忤輔臣。改南工部。又改南戶部。督右都御史。理南畿。折豪強。植貧弱。禁私驛。止妄工。南圻肅然。廷舉長身而瘠。面如削瓜。敝衣帶穿。不修藻飾。神采英毅。志識雄偉。言行必自信。人鮮能奪之。視財利如糞土。妻子饑寒。而施予不較。有亡。陞南工部尙書。卽疏歸。歸二年卒。年六十六。所居湫隘。亡郭外田。顯有書至萬卷。卒之日不能殮。都御史姚鎮爲之經理。崔銑稱其貞才潔履。厚行定力。鮮儷也。又曰。廷舉恆衣食人。妻子

乃不能給朝夕。官四十年。百瘁九死。不能一月安於朝。推下賢哲。不憚屈己。卒未聞報德者。史官曰。大臣之負經濟者。類以才掩其節。若梁材之食無兼味。劉麟之四壁束書。風尙可挹也。俱典名郡。俱筦國計。磊磊有治辨聲。梁之才至令兼攝六曹。其經濟何如哉。雍太能完竈丁之室。而廷舉不肯修大璫家廟。遺愛遺直。古之人歟。崔銑曰。吳公恆衣食人。妻子乃不能給。百瘁九死。卒未聞報德者。苦節如是。亦可爲世慨已。

明書卷一百三十

列傳四

名臣傳十五

陳察陳寰傳

陳察字原習常熟人母譚夢斗間氣下傅體竊而視腹有赤文曰鳳已遂娠生察察生嶷然莊甚動止自矩下帷日夜誦不輟舉進士初爲南昌推官選授南京監察御史闍瑾擅權察持議亡所屈坐罰輸米邊百五十石瑾誅甯彬煽起益甚察力爭不得嘆曰死耳而不難老母耶是時母譚老乃移疾歸養又九歲會弟寰免檢討亦歸母譚趣之起曰若毋以吾老爲念而孤天子恩乃起守故官俄當出按滇上疏言天下大計五曰備荒曰治兵曰屏盜曰水利曰民牧俱下所司著爲令甯王宸濠反江彬說上以南方饒樂可游上欣然嚴中外且發察抗言弄兵者陸梁彭蠡間寧能舉大名哉發三千騎渡江可徑縛取奈何屈萬乘尊奪吏士任且上出而京師空然無六尺寄撫監卽北不憂敵不憂蕭牆內耶上不懌切責之奪一歲俸按滇屏騎呵以身周行箠棘而微刺民間得失滇中別產銀幸臣請縣官場而征之歲可佐度支費什一下使者議察持不可曰此兵端也且上以採用事者觀其利余觀其害而從臾之不可竟罷議金齒

帥沐崧挾中官颺而嚙察。劾治如律。上未有子。察抗疏略曰。臣越在外。微妄干國家大議。死罪死罪。陛下之踵先帝尊者十五年矣。先帝十八年而棄羣臣。亡卒然之患。以有陛下也。陛下多狎游。壯未有子。羣臣心忤然竊慮萬一宜早定大計。擇親賢。竄禁邸。端良之士。屏翼左右。陛下固萬壽無量。庶有以培本根。消窺伺。臣民不勝大望。不報。亡何武宗崩。世宗入繼。詔求直言。而察還自滇。數上書陳君德。興革利弊。復出按蜀。察奏上以罷蜀鎮守及諸織造中官。具其狀甚悉。中官尾得書。銜之刺骨。謀格不下。然上固已心動。後次第有所裁。具如其奏。其按鎮蜀。一罷青曬布袍。導二吏符節而已。方面而下大懼服。憚憚亡以奉下。風墨吏多解印綬去。內艱歸。服除。再入爲御史。王邦奇者。壬人也。例罷所任千戶。不得志。緣上意。誣大學士費宏等。給事中楊言。因糺邦奇。上悲爲大臣遊說。朝置獄訊。備五毒。察大呼曰。臣察願以不肖軀。易楊言地下。衆錯愕。引避而上。連日攝之。不爲動。退具草言。亡論邦奇語非是。大臣不自飭。扞文罔。亡以消厭人議。惟上體貌終始。其聽自勦。邦奇別下司寇。遂彈治。勿令天下有以窺見風旨。上曰善。因遂寬言獄。郭助方挾幸爲奸利巨萬。察時監軍事。發其陰。請賜罷。上謂御史。曷吾不愛助。以謝御史。其令助就第。察守御史久。同列屢起大位。幾徧始遷。太僕少卿。垂拜察。復辭薦代人。太僕於故事不得辭。又不當得薦代人。坐調潮州檢校。察怡然。卷衣出。倍道趨潮。聚諸儒生。譚經學。諸儒生人相勸。亡倍陳公。葦歲移信州。推官距箴南昌。更可三十歲。治如南昌。晉浙江按察僉事。陞副使。踰年遷山西按察使。尋遷山東右布政使。已又遷浙江布政使。入爲光祿卿。既上皇子生。贈祖父官。錄一子太學生。改左僉都御史。撫南贛。至鎮中約。

東定保甲。繕要術。勒習技射。士密英授之。捕搜盜魁。盜相戒。請明吏毋污陳公。鑄爲也。而察益頗高。皇帝大詰。闢里社。社人給小學。彬彬矣。乞骸骨。疏數上。許之。故受經羅欽順。而友張調章。拯相與劇切爲君子。歸杜門。益讀習濂洛諸先生書。希關外事。監司歲時行部。問造察。察度其人長者乃已。或其人非長者而侈。則徐出所飯。麥強飯之。曰。余田父甘也。又多吳語。刺刺是非。咸遠避去。所寢卽生平不二衾。蔬食。衣冠。鞠亡易。第令綴以絲。棧色錯然。久而失其故。少年觀以不堪。或相率摘。費其非情云。既老病且亟。捐私田三百。爲邑助。博士弟子貧者。曰。吾異乎。所以益子孫侈者。卒年八十三。有集及奏草若干卷。弟曰寰。字原大。生而秀髻眉。孩提慧敏。母譚。宿治佛嚴。晨從樓誦諸品經。而臥寰樓下。竊聽。則已聞記可十餘品。譚母驚曰。豎子安所得之。笑曰。媼晨不樓誦耶。嚮者吾固聞之。弱冠舉鄉試。第三人。明年舉進士。選庶吉士。年授翰林檢討。大內災。寰上書言。先帝未辨色而起。謁上帝。已復告於寢。出朝羣臣。召對以問。考得失。祭必躬。裸獻終十八年。卽亡以寒。嗚小故廢罷者。主上所親觀也。今奈何。獨厭法服。謝拂士。貂狐之裘。貝帶翹。躡而射。馳大鹿之墟乎。臣愚筭之。諸王邸。仰觀先帝嚴藩屏。備不虞。甚愼悉也。上往奪中。貴瑾筭。邸罷王。不置。瑾自以孤上易發耳。臣愚以爲修故事。擇近屬賢者。真邸中。上一旦有子。令還國。亡害也。疏入。發奸人諱。又他條絕逸。欲遵顧命。禁橫斂。正法度。節濫用。語多懸。上不省。奸人從帷中下其奏。奪半歲俸。寰鬱鬱不自得。且念母老。謝病歸。與其兄更出入侍養。母暑中疫。不解衣而持侍者月餘。衣廁。踰垢生蟻。貌損髮盡白。世宗卽位。修武宗實錄。召仍檢討。寰言。邇者采尙書故實。上六館。此不過從牒囊中探得之。

何關人主大計。卽翰林臣臚列具員耳。今以爲宜復古。左右史記言動。祕燕之間。備列形管。亡令他日。暨爽國事。又太宗下金陵。諸緣故主駢儻。父老一二志焉。臣不佞。首陽之餓。豈紂聖武王非耶。上幸人賜一傳。瓊瑾不掩。庶有以風示永永。不報。楊廷和器之。謂曰。吾老矣。薦爲經筵講官。其所陳析治忽要致。營壘不厭。上恆目屬之。且爲閣臣。若講不常如是。耶宮中有妃之戚。或謂且罷講。寔言人主事以一微戚廢大典。無已則殺吉而事乎。上曰善。時寔以久常遷。會艱。日馳一羸倉頭從而南。哭不已。抵家。工方爲母譚像。未成。寔尸息有間。驟然啼曰。余庶幾得之。跪命墨黻丹粉。啼未絕而母譚之像儼然。兄察自蜀來。望大號曰。母而在哉。服闋守故官。會張璠等由議禮驟貴。患所羽翼寡。而宿嚴重寔。欲以風致之。寔謝曰。諸君吾故人。非不知從諸君佳。第吾憂身後耳。乞南。遂爲南司業。亡何兄察坐事謫潮。寔聞。棄官偕行。萬里抵嶺。而別。遂歸臥益堅。後以薦起爲國子司業。世宗制禮樂。下有司。毋得仍孔子王稱。其尊爲先師。而言者遂上書言闕里廟器物王者非常。寔持不可。曰。陛下尊孔子先師。以抑之耶。將尊之也。卽尊之。闕里制當益亡所裁。言者不自惟。而謬推測聖意。宜寔罰。上從之。陞南京國子祭酒。已拜。則上所論次太學章。及勸上進德勤政戒土木省齋祀。上覽書善之。謂寔忠愛朕。所進留覽。寔先後蒞太學。其大指寬體輔情而行。最後整條教策。怠惰。時時周訪諸生。貧老病老資給之。以故爭自喜得出。陳公門幸甚。然寔晚更官薄。助教劉世龍上封事。多所譴忤。下獄。柄臣疑其出寔。銜之。遂致仕。寔歸。兄察亦罷歸。日夕相與考問德義。間出而雁行。白鬚眉。醫履甚都。稚子走相邀。指曰。此陳先生也。卒年六十三。所著集二十卷。

史官曰。事親孝。則忠可移於君。陳察。陳寰。至性孝友人。也。觀其思成母像。與徒步隨兄萬里。可謂孝子。悌弟。故一出而觸閣寺。死諍友。建國儲。皆聲聲大節。風百世。史稱陳元方兄弟。閨門雍睦。有德有行。以今絮古。何愧二方。而宦業殆過之矣。

王以旂。周金傳

王以旂。字士招。江甯人。生而廣額豐頤。音吐如鐘。弱冠游膠庠。才名蔚起。金澤以右都御史掌南院。解圍帶贈之曰。君異日服此不難也。正德六年辛未。舉進士。授江西上高知縣。時華林賊方熾。流賊復入江掠舟。揚旗剽劫庫獄。以旂集鄉兵。要害處徧置鐵蒺藜以防之。賊自是不敢窺。上高已又生擒流賊數十人。闔境帖然。益省刑紓賦。與民休息。縣大治。選監察御史。掌院左都御史彭澤甚見器重。一日指其坐曰。當拂拭待子矣。出河南省試。期至。會宸濠叛。闔瑾者黨濠。倡議罷試。以旂徐言江西去汴遠。且濠旋撲滅。罷試無名。遂事事如故。瑾又傳武宗親征。道出汴。輒下牒取帑銀四萬備供應。諸司莫能應。以旂執不可。謂天子御六飛。必戒前路。救至。圖之未晚。今豫發公帑萬一從他道。銀散不可歸。誰執其咎。瑾乃沮。嘉靖壬午。按福建。時泉漳盜起。流劫安溪。勢日張。以旂檄分守及都指揮率兵勦之。月餘平。癸未代還。先是以旂父感風痺。再疏終養。家居十年。壬辰仍補御史。督北畿學。甫十閱月。擢南太僕寺少卿。甲午陞大理寺右少卿。戊戌春陞光祿寺卿。八月陞都察院右副都御史。撫治鄖陽。時有議革撫治者。以旂繪四省交會圖。鑲之石。著論言不可革狀。議遂罷。庚子陞左副都御史。佐院事。辛丑轉兵部右侍郎。是歲徐呂洪竭。漕舟

滯不行。臺諫言宜如先朝故事。簡大臣督治。於是受命兼左僉都御史以行。至則先求故道。視泉脈。循經流。塞分殺。自徐洪南抵沽頭。增閘若干。又相地形引水。暫築土壩若干。漕舸得如期達京師。汶上甯陽間。故有四水。橫置湖中。曰安山。曰南旺。曰馬場。曰昭陽。勢豪侵沒。多獻德邸。藉其牽制有司。因循不敢問。以旂謂水櫃復。庶畜洩有地。河溢則懸河以入湖。河澀則懸湖以入河。足備緩急。遂任怨力復之事。竣。上嘉悅。加俸一級。癸卯陞右都御史。掌南院。人皆憶金澤贈帶事。至是驗矣。以旂處父母邦。務持重。屏驕從。簡出入。舊宅在聚寶門外。市人填溢。歲時歸祀。必由他道。謂其子曰。昔張湛入里門。必步。可取以爲法也。乙巳考察京官。中外翕然服其當。是年刷卷御史以公錯。參武弁至千餘員。有旨贖罪。以旂念衛官多貧。值熱減詔至。卽承德意悉蠲之。歡聲載道。丙午召入爲工部尙書。至則琉璃河圓明閣工興。經營節縮。得不重費。工完。賜銀幣者再。九月二品滿考。上遣中官賜寶鏤羊酒。丁未改左都御史。掌院事。以旂思彭澤語。益感奮。尋轉兵部尙書。兼提督團營。先是陝西總督曾銑倡議復套。業奉命集議。俄旨出逮銑。卽命以旂以尙書兼右僉都御史代之。陞辭。馳入關。亟罷郡縣軍需。停造器具。邀功生事之言。一切屏遠。又嚴盜馬之罰。禁劫營之弊。勵諸將慎固封守。雖倉卒建牙。而能推布腹心。畢屈羣策。如延安設遊擊一人。清平高家二堡。與清水營文縣。設守備四人。岷州設判官一人。文縣參將改分守。靈州參將移橫城。平口西甯二守備。改參將。疏入。皆得允。前此哈密熟番。久留甘肅。以旂患之。同都御史楊博。廉關外鉢和寺榜。可田可廬。召諭諸番。爲繕室廬。分比舍。卽口授田。示之生計。仍約朔望。族首得入關爲市。諸番感喻。稽首聽命。遂

徙帳房七百有六。男婦三千五百有奇。是舉不煩一夫。而數十年種類爲之一清。自二十七年入鎮。至三十二年防秋者五。市馬者二。北口西番無大舉。無深入。戊申敵犯山丹。己酉犯波罷及莊浪。己又犯高家堡。再及鎮羌。皆督師敗之。冬出塞揚兵。破敵忻都。庚戌敵擾磨石。移軍敗走之。又敗之雷塞。敗之甘涼鎮。敵斬首一百三級。蓋數年所未有者。復敗之寧夏西沙窩。辛亥再戰肅州。斬首五十七級。又敗之寧夏。壬子大破敵於清平堡。斬首九十四級。又連敗之驅馬城。燕麥川。火燒溝。神塘嶺。己酉番賊出沒境上。斬一十五級。庚戌番賊再犯。調兵甘涼。斬五十七級。辛亥斬三十七級。計斬敵六百六十八級。番族二百級。奪獲夷器共萬六千有奇。駝馬牛羊八千四百。降敵及番族三千餘人。邊人自敵中聞而歸者千二百有六十人。修完延慶定邊等處城堡。審塞四千六百四墩臺一十二。築完瓦查梁及蘭州邊牆二百餘里。前後上功。蒙恩廕子者二。賜金帛者八。賜敕獎勵者二。壬子八月二品九年滿考。加太子太保。癸丑春病劇。撫按代奏。得旨致仕。不及聞閏三月三日卒於固原。聞者莫不奔喪失聲。諸鎮軍民爲罷市者數日。蓋以旂平生不務矯激之行。而唯存實心。不取倖得之功。而必圖成事。不期顯效耀目前。而要之久遠。不出己意。違衆論。而協諸公議。有大古臣之風。四十三年間所治。政聲大振。功績可數。訃聞。上震悼。輟朝一日。予祭葬。贈少保。諡襄敏。廕一子爲冑監。以旂性恬和。事父至孝。病十年。食飲起居。不暫離側。溷器亦自澆滌。與鄉人處。皆得其歡心。雖介節慷慨。而無幾微見於顏色。於宗族故舊。恩義尤篤。爲工尙書入京。至東光。聞鄉友蔣淮三喪。厝蓮兒窩。時舟已隸百里。亟命回舟。留五日。出俸易棺。遣人護歸南都。鄉人謂其長厚。自

金澤後方再見云。所著有漕河奏議、漕河撮稿、督府稿、督府奏議若干卷。

周金，字子庚，武進人。正德戊辰進士，擢給事中。陞太僕少卿，僉都御史，轉副都御史。致仕。家居六年，以原官薦起。陞兵部侍郎，轉都御史。歷撫延綏宣府保定淮鳳。已陞南京刑部尚書，改戶部。金所生也。因得焚黃先人之墓，人以爲榮。金爲人闊達警敏，自在科中，則已諳習世務。章數十餘上，度可施行而後言。武宗數游幸，金上疏請早朝，躬覽章奏，總權綱，頗見采納。又言京糧歲入三百五萬，而食者歲乃四百三萬，當痛爲澄汰。中官以迎佛盃織濫討引鹽，暴橫道路，當罷。又部督馬昂納女弟後宮，外議云已娠，請誅昂而還其女。昂雖不罪，而女竟黜。是時閹幸擅勢，與言路爲仇，不旦暮死，則竄。金爲給事中九年，老成周慎，卒免於戮辱。而以久次擢爲太僕卿，貌瓌偉，善議論。初在科，每九卿廷議軍機大事，衆輒目屬金。金口對甚辯，聞者心愜。壬申狼山之捷，兵部議有功將士例陞三級，金笑曰：不然。將士有實職，有虛銜，有正副參遊，實職大而虛銜小有，管哨管隊，實職小而虛銜大。今一例陞級，則管哨以下皆可爲督府，而參副以上或止於都司，首尾倒置，非便。衆是之。癸酉議用兵吐魯番，復哈密，金極言西邊虛饑，而吐魯險遠，且青海之賊窺伺西甯，乃欲遠拯哈密，可乎。衆曰：如吐魯索金幣，何。金曰：彼能效順，國家何愛於賞，不然，勦之未晚也。卒從其議。於是衆以金可屬邊事。以此延綏宣府皆推金往。金既裕達不拘，有帥臣體裁，又善煦嫗，接下。其在兩鎮，人見金色詞，旣已心安，金益務寬簡，以慰帖之。常欲答一二走卒，時窮冬多不袴，金惻然曰：邊人窘，乃若是，遂不忍答，而百方爲之招商聚粟，廣屯積芻，以時給其食，使人有重生之心，又爲之葺

墩牆。疏石渠。期於利盡而人不勞。邊人益愛之。嘉靖甲申。大同殺都御史。報至。金愕然。踟躕久之。曰。吾得之矣。乃開門召諸將卒盡入。環列庭下。謂之曰。若輩知大同殺都御史乎。衆曰。知之。金曰。若輩以殺之爲得已耶。衆叩頭曰。狂賊自取族耳。尙何道。金曰。不然。邊人勞苦甚矣。而又虐使之。是趣之殺也。假令上下相愛若父子。彼將倚以爲命。縱授之刃使殺焉。其誰忍乎。衆大歡呼。叩頭退。當是時。以片言立解上下疑阻。及之宣府。總督馮侍郎以苛刻失衆。金數爭之。不得。侍郎又以引鹽數萬。與其私人爲市。而商人無能得者。衆固甚怨。會諸軍詣侍郎請糧。不從。且欲鞭之。衆遂憤轟然而罵。因圍帥府。金時以病告。諸屬奔竄。泣告金。金曰。吾在也。毋恐。即便服出坐院門。召諸把總官。陽罵曰。是若輩剝削之過。不然。諸軍豈不自愛而至此。欲痛鞭之。軍士聞金不委罪若也。氣已平。乃擁跪而前。爲諸把總請曰。非若輩者罪也。是總制者罔利。不息我衆耳。金從容懇諭。以利害。衆驚曰。公生我。始解散去。而總制自是亦心愧金。延宜皆敵衝。金內撫諸軍。外策強敵。關城晏閉。邊氓綏帶。四五年訖無敗事。人益以爲才。自金去宣府八年。大同復殺總兵。據城亂。金時起巡撫保定矣。遂往拒紫荊。擒大同謀者數人。送京師。會真定巡按李御史有疑疾。入其邑。聞銃聲驚。以邑令謀已欲挾之死。廣平守爭之。又以守亦謀已。至遣吏發卒捕守。一城盡空。金聞變。星馳撫定之。上章露巡按罪狀。而臺長庇其屬。爲之訟寃。金復上章力辯。廷論竟直金。而黜御史。金本通達。不務爲崖異。然大體所在。不肯苟爲媿媿。此蓋金所難者。其以都御史出鎮淮也。章聖梓宮南祔。始奉旨。由江而諸護行。大臣至儀真。議從陸。諸官心知不可。而憚於江險。他惜不敢任。金獨言沿江山險路不可。

通狀且奉玉體馳峻坂。上下撼頓。上聞之悲惻奈何。議論往返數日。而諸大臣亦密探沿江路果險。如金言乃決從江之議。以鍊維舟行。如期至承天。以葬江千里。免於伐樹壞屋。役夫數萬人。得無走死山谷。中金之力也。入爲刑部尙書。轉戶部。益能其官。乙巳。致仕歸武進。明年病卒。年七十有四。金喜讀書。雖稗官小史。亦用以資其經略。尤喜爲詩歌。羽檄倥傯中。率不廢詩。有上谷漁陽稿。書有晉人風骨。家居好獎進後輩。與人言娓娓不厭。與士人言讀書。與俗人言勤業。莫不取其有益。平生儉樸。既貴自奉如居約時。獨祀先款客極豐潔。曰賓祭重事也。年五十。遂獨居。未常畜媵妾。教諸子愛而有法。一飲食必有訓。卒賜葬祭。贈太子太保。諡襄敏。

史官曰。明自中葉。武功不兢。官塞上者。以贈烽堡遠斥候爲務耳。自會銑以套議見戮。益噤不敢言出塞。而王以旂在甘涼甯肅間。屢奏首功。俘馘過當。前此未有也。周金善撫邊。毗恩及窮袴。卒能止譁定變。坐安反側。威愛兼克。斯封疆之昆乎。

張時徹字九一鄞人。少內敏而狀默默。就外傳。日授書數百言。輒誦。益之輒又誦。又強以十日所當授書。

益之輒又誦。人多異之。二十舉於鄉。又三年登進士。授南京禮部主事。改進兵部員外郎。還復爲禮部郎中。官南京八年。所日與呂柟。鄒守益。顧應祥輩游。工詞賦。名籍甚。陸按察副使。督江西學。江西爲貴臣藪。諸造請一切報罷。以是不能無噤意。會九廟災。嗾言官論調之。時徹笑曰。一博士長應天道耶。尋得白。補。

山東以故官飭治臨清。至則益持風裁。罷使客額。外供重錦文。鬪剖決風發。又時申束約。境上毋得容尺刃寸鐵入境。絕剽攻警。所部稱治。轉福建右參政。閩徭故無準。乃衡準著徭書。以式來者。遷雲南按察使。多辨冤獄。黔公釀。怒釀者與抗利。囊三木以徇。時徹道問之。曰。釀旱不當釀。時徹曰。釀無預旱。破而縱之。遷山東右布政使。時左使以疾請告。代視篆。夙案如洗。吏自逋復署者五十餘人。外艱歸。服除。補湖廣。時有楚變。諸司出入陳兵衛。時徹獨否。曰。誰敢干天子法也。諸宄散。當滿不得去。鶉衣而俟命。時徹憫之。謂孰非臣子乎。趨吏治移一月。而得滿去者百餘人。又常脫孱吏戍。并釋連坐六百人。臺臣無以難也。遷河南爲左布政使。諸內賦者。至卽驗入之。曰。毋使居亭鍛工窟民也。已徹其道里費。而官輸之塞。曰。毋使道路虞民也。王將軍當頒祿籍。封之人自爲授受。曰。毋使國臣得侵漁民也。有損吾任之。守遷右副都御史。巡撫四川。行未抵川。而白草番攻陷堡寨。殘裨將人。或謂撫之便。時徹奮曰。蜀獷僻。不以此時一伸法。將奈命吏何。乃率擗之。克番寨五十餘處。斬首千餘。俘獲五百五十餘人。與降者約。出賦視內地。捷聞。進兵部右侍郎。治如故。已又平馬獯番。賜金綺。已又平敍瀘蠻。以中蜚語罷歸。尋入爲南京刑部右侍郎。未上。以敵警召入兵部。是時仇鸞挾重肘腋間。藉寵勢張甚。旣已奪侍郎商大節兵。又勸使聽約束。大節疏劾之不勝。下獄論死。淹繫。而時徹每與鸞議左。鸞惡之。當出邊。挾時徹從治兵。欲遂中之。而鸞病疽死。於是爲白大節冤。且當大用。會大節部兵上書。請得復以爲帥。時徹署部事。如所請。上大怒。謂帥生死由其部卒耶。且責其無君。鐫二秩。適內艱歸。倭寇起東南。起復爲南兵部尙書。倭有勁者僅百人。轉鬪千里。所抵

皆奔潰。至南京郭外。時徹發兵出禦之。不利。方調兵逐倭。而嚴世蕃夙惡之。搆勒致仕。既歸。益肆力文章。所著述不休。每弋釣山水。張宴樂。與文士爲詩酒之樂者二十四年。少時其族子邦奇長。時徹十六歲。先入翰林爲庶吉士。以經術行誼稱天下。時徹方髫。見其父曰。叔父其代興哉。邦奇爲南兵尙書。時徹尋經繼之人以爲代興之言大信。

喻時字中甫。別號吳皋。光州人。成進士。爲吳江令。吳江嚴邑。戶口財賦甲天下。吏緣是得乾沒爲奸。時則嚴旬校。具得其狀。始爲絜法提衡之。秋夏稅以限上。毋事敲撲。力役以則。應以時。毋待號召。鄉小民鬪鬪。毋復之三老。就時片語立決。大者笞遣之。各自得意去。臺郡國下訊諜。及他利害關白。鑄一大櫃。中手自封發。吏亡間不得事也。卽不敢望得一嘲笑。以少見指。而鄉小民亦不復知有吏。治不爲操切。撫按巡郡邑。時有所刺促。皆取大滑吏治警之。竟時任無敗墨吏。卽諸按部抵吳江。亦不問吏。及大滑。每曰。令治之久矣。以治行第一。徵拜監察御史。屬敵欲求貢。或謂敵統給我。且事體大。弗許便。時疏曰。毋爾也。敵以虛給我。而我遽絕之。是授彼名也。敵以實輸我。而我逆拒之。是創彼心也。我且又代負。夫不爲彼先。不爲彼後。內固吾守。而外探其幾。此在一才邊吏任耳。又條備敵十四事奏之。上皆嘉納。時嚴嵩初得幸。有墨聲。時抗疏論列。謂其人險而獯。久之且亂天下。業已上。卽素服候訊北闕。上心動。時言而難去。嵩勿究。視嚴河東。屬歲旱。時禱雨。早弗利民。而當饒得饑。或強。時母禱曰。國以民爲本。吾不忍以吾職易吾民。竟禱雨立澍。歲大稔。而嚴額亦不虧。嵩日益貴用事。乃移疾歸。會內艱。服闋守故官。出按蜀。自嚴厲操守。有風稜。

卽方面大將散法不徇情糾彈之窮治亡所縱舍汚吏望風解印綬去蜀以大治一夕夢數百人焦頭哭請救次日問所部則有大火飛渡江爲災近千家焚死者不能殮時謂棺槨爲設薄奠夕復夢來謝如初還遷應天丞轉太僕少卿俄以右僉都御史撫真保日夜拊循具吏民練兵實選將扼險敵騎入犯距浮圖峪十里覘我師整而和遂巡引去亡何改督操江佐南臺數上疏陳便宜計擒大盜汪然朱良弼等振武營兵驕再倡亂時奪其謀進左副都御史督漕運時故常爲令屬江南運爲四議以請其大指約束長賦者毋私兌留減存料銀添給運卒行糧改徵腳直詔可著爲令時益精勤於職爬搔垢弊殆盡籍羨餘數萬計皆上之朝時人爲謠曰琴琴鼓下長淮真若翁青天來偕提督陝西三邊軍務至則獎率將士出邊逐捕首□百餘馬駝牛羊稱是□吉能竇兔台吉入犯時合三鎮兵徼破之獲首□五百餘又以延綏兵擣□獲百餘級三上捷賚白金文綺進食二品俸入爲兵部右侍郎協理戎政上八事其嚴補替禁奸詭定編派於戎政尤切敵入犯京城時佐大帥鎮遠侯營於郭敵不敢越而南手詔慰勞賜玉食法酒尋改南兵部侍郎會尙病在告而時攝武選軍政進其屬矢天諭之一時翕然稱明考績至家有嫉之者中以浮言詔候別用遂歸里居三年召爲南戶部侍郎督留儲時業已病強起供職條上四事曰明注選重部運省解納分水兌詔次第行之竟以不勝劇卒年六十五時好爲古文辭源出盤庚周禮追琢詰屈世謂之喻氏學

沈啓字子由吳江人啓弱而父歿爲諸生時朗偶有聲常構失產勢家且訟且讀書訟勝而書亦就舉應

天鄉試更七舉始成進士授南京工部主事世宗嘗幸楚所從水道則南京具諸樓船以從具而上或改道耗縣官金錢不具而上猝至且獲罪尙書周用意疑之以問啓啓曰召商需材於龍江關急驛偵上所從道以日計舟可立辦夫舟而歸直於商不舟而歸材於商不難也已上果從陸得不匱水衡用乃大賢啓中官請修皇陵錦衣朱指揮往視之尙書宋景請啓與偕往朱指揮謂啓竊有請也錦衣故嘗遜部曹而指揮秩高於曹郎請以秩坐啓唯唯朱指揮大悅有問啓曰竊亦有請於公太祖制皇陵毋得動寸土違者死今修不能無動土而死可畏也朱指揮色攝曰請如教見中官人啓具以前語對朱指揮復從旁與之乃祇飭垣屋以報所省復巨萬萬景益賢啓不以官稱而恆稱爲先生當三載考北上景特餞於郊曰主事固不當餞自爲國士餞耳考最留爲刑部主事歷郎中時尙書開淵積已賢啓而啓後先所承詔獄三十餘事讞亭情法間至損上威以信所守淵亦時從中調護得不罪尋陞紹興知府紹興轄縣八獨會稽新昌蕭山田賦左累其長至賸產以償啓平其顛而殺之里俾輕而易完人人稱便郡田於山多苦旱室廬櫛北苦火又濱海苦魃爲虎者啓禱於神輒應至虎復爲魃渡海去其他政績往往類是而賈舶之議起蓋舶客許棟王直輩挾萬衆雙嶼諸港郡要縉紳利互市陰通之而持上旨恫喝之且授疏稿曰公第上必郡受其利而公得善遷啓持不可薦紳怨之刺骨陞湖廣副使時督撫侍郎張岳屬紀功啓卽請從軍中往岳不懌曰捷至不若遺戰危事一旦叵測奈吾何啓起謝曰故事也卽不在行而以級請賞誰爲辨者遂與監軍張副使偕之軍所卒狼跳挾一首至云此黑苗酋某也公誦之黑苗酋某久著

勇而此僅踰冠必詐也。監軍不自得引去。俄而黑苗酋某復出抄掠。監軍乃前謝曰。公實得我。時官兵利級賞多所縱殺。啓令生獲口與級同。自是全活者甚衆。岳亦遂賢啓。且欲薦啓大用。而以守紹興他事罷。前後四爲南北曹屬。守郡監司五。受其長知。而其長皆海內稱名臣碩佑。皆大賢啓。然不能勝其郡之要摺紳。與一二用事者。知者冤之。既歸築室仙人山。結詩社以自娛。快出入倪素。若不爲官者。其教子弟治經術。孝弟力田。斬斬有法。不輕出入公府。而使者于施以時至。詢卽爲露見利病。佐其守攤稅已。佐其令築城度行而有私損。勿恤也。性孝義。急人之難。甚於己。常與計偕還。道遇其師盧生癘。傳其從者舟人皆舍之。啓與共載。旦夕謹視湯藥。未抵舍而愈。癘竟不染也。卒年七十八。至老視聽不衰。啓博學無所不窺。諸經子史陰陽律歷水利洪範紫微堪輿家言。而尤邃於易。所著有家居稿南北稿西臺諍稿越吟稿楚吟稿雞窠嶺稿南廠志南船志收越議略吳江水利考杜律七言註晴窗便覽若干卷。

陳堯字敬甫。南通州人。幼而穎異。就外塾。日誦千餘言。卽他兒所受書耳之皆成誦。甫誓工屬文。知通州高鵬得其經生業異之。已偕諸生試。文益奇。爲飯齋中。鵬問謂媪有甯馨兒可念也。蒼頭出。羹語是且入見夫人。見必一叩首。堯怒叱之曰。咳。吾豈汝曹抑頂人耶。鵬問而得其故。愈異之。撫曰。生自愛。必爲國器。弱冠舉於鄉。名聲驟起。然困公車者久之。顯於文益工。尋從呂卞游。反而求之。身心之間。純如也。成進士。隸事工部。時議爲獻皇帝立廟於大內。世世勿遷。部尙書以試堯。堯乃上議。謂禮緣情者也。而制於法。夫所謂勿遷者。德祖也。太祖成祖而三也。獻皇帝之世。次則孝宗也。其廟宜以孝宗。則亦祧而藏諸夾室。

俟大給則並出之。尙書弗能用。然心隨其議。授都水主事。當治清江廠。選部郎林春內賢。堯欲引以自近。而不得。堯既之任。有廉勤聲。好讀書。思以著述自見。其所論白。改鑿黃河之上游。避灌口以達清江。而沮於都御史不果。後都御史檢故牘行之。世世受河利。歷營繕郎中。時上方勇於宮室之事。無虛歲。而將作諸僚。且緣以博功賞。堯獨務爲節省。建沙河行宮。堯與一主事監之。主事欲徵商。堯爭之不可。乃曰。事畏相撓。請得分半而任之。堯所任獨不徵商。主事亦不敢征也。迄工畢。所省金錢以數十萬計。已復建大高玄殿。堯入視工籍。曰。何多也。汰其十之三。已。又視工直籍。曰。又何多也。汰如之。所汰率多中官之私人。與虛直度。無如堯何。則更目堯曰。陳古人。陳古人云。所省又以數十萬計。工完。當上功籍。堯獨辭。尙書意甚恨之。比奏上。獨不遷。久之。擢知台州府。比至。掃去一切供億。所讞決以情。衷三尺而行。吏抱案堂皇。受成事。伍伯持挺兩廡。惴惴至日晏。不得一飽。然率以善滿去。竟堯任無訾。陟者。暇則延見諸儒生。講說經義。遇旱禱雨。輒澍。歲獲稔。如是者屢。上治狀第一。而鄉貴臣中飛語。調知南安府。郡當嶺南孔道。香藥犀象之類。故守之市之。若譏稅者。堯併不復市。堯所領郡多佳山水。數從其賢士大夫游。以其不好飲。相與稱爲醒翁。作醒翁亭以配宋歐陽修。堯亦因自號云。踰歲。轉長蘆轉運使。時鹽課歲不登。堯白其御史云。私鹽禁不厲。則亡鬻官鹽者。不爲官鹽利便。則驅而入私鹽。其要莫若嚴私而寬公。所謂嚴者若而條。寬者若而條。御史是之。課驟增至萬餘。而商不病。居長蘆復五載。人意堯不能無望。堯笑曰。我何望爲。卽薄我。而以中大夫佐人主急哉。遷廣西右參政。二載。遷貴州按察使。時三殿災。所採木倚貴州。兵民不勝力。堯

爲更番之議。以紓其劾。布政使用苛法。採丹硃貢。都御史議開永甯銀池。堯皆力持之。三載。遷雲右南布政使。未上。移廣西左。其再至廣西也。吏民鼓舞相慶。時靖江宗人無慮千計。率童而祿於官。堯曰。天祿也。非朝命不可。他郡兵歲五百。戍會成。浸溢而倍者三。堯悉勒令如原數。諸降湖徙粵者世廩。已別子則以報效。世半廩。已又其別子。則又以報效。世半廩。堯第令廩及身而已。所裁省帑賦。復以萬計。陞右副都御史。撫四川。嚴嵩以非其意。謂客曰。彼何人也。而亦蜀帥。堯聞之不爲動。旣而嵩以論罷。六番招討楊氏死。二子爭立。勢且用兵。堯曰。無庸也。移檄授其嫡長符。遂定。安民相習爲白蓮教。至聚千人。有欲捕以爲功者。堯第致其首抵罪。衆皆解散。滇大酋鳳繼祖跳之建昌。滇撫移文欲堯擒之。堯曰。建昌去滇一水。而兵不渡。將嫁禍蜀也。急之則窮。獸且挺。緩之一夫力耳。繼祖覘知堯亡他意。束身歸。其不貪功名。先大體。類如此。遷南京戶部右侍郎。未上。改工部。兼右僉都御史。總理河道。常議修高郵河隄。常用石。堯曰。石所從遠。而湖力薄。不至嚙多樹木。隔以板。而葦土實之。費率省半。又獨淮徐之河。負三萬金。召爲刑部右侍郎。未代。而景恭王自楚返葬。輜重千艘。而漕艘復入之。黃河徙道者百二十里。堯憂之甚。選一大校探刁陽湖。得故漕道。舟自潰口入。轉而達湖陵。亡所失。堯旣得代。卽移疾歸。再請不允。轉左侍郎。請益力。許之母尙在。生事死喪。邁恆常。堯天性孝友。嘗以餘俸置丙舍。負郭數頃。旣而念其仲冠叔完孺。悉畀之。冠有子大壯。成進士。完亦舉鄉貢。皆成立。堯他亡所好。願獨好書。雖老持一卷不廢。有治河副使梁。巡鹽御史張。皆出堯門。每請所託。謝無有。則爲梁言通夫役苦。第寬之。可活數十百人命。爲張言通有鹽舍。而領眞州。

鹽不便任之可歲減民數千百緡二人唯唯行之鄉人皆感焉堯後先持憲以嫉惡聞然嘗奏記大學士徐階曰天之生大賢大不肖僅僅耳卽中人夥而中人者有志而未練則見欺有才而暴施則見忌此兩者器使之近賢苛責之近不肖姑置而觀其後可也階善之卒賜祭葬祀學宮子大科成進士爲河南府推官文學政事有士風

史官曰張時徹按滇能雪冤獄帥蜀多戰功所至有聲績而輒悟不得竟其用喻時筮仕吳令卽赫赫裕治辦聲條列東南財賦可運諸掌首勦嵩相識踪辨姦矣沈啓蹕厲風發應事明敏獲上而不能諧下負介志焉陳堯著績水衡通工惠商其所省將作河隄金錢以億計皆優剗割之才不束於流俗有爲有守之臣也詩云或哲或謀或肅或乂諸臣有焉

明書卷一百三十一

列傳四

名臣傳十六

霍鑾李時傳

霍鑾字仲鳴其先諸城人永樂中籍爲錦衣校尉遂籍錦衣至鑾而始讀書以孤童善屬文正德中成進士改翰林院庶吉士授編修預纂孝宗實錄成當增秩而閣瑾抑之與其儕俱外遷鑾得刑部主事瑾誅復舊官滿九載進侍讀主應天試世宗初以選侍經筵日講鑾長身玉立美音吐工進止上固已目屬之預修武宗實錄成進官時侍讀學士董紀超爲詹事府詹事而鑾得學士雖以久資故而大學士費宏欲拔以與張璉桂萼埒甫十日而推南京吏部右侍郎鑾以次復得上忽心動曰是安可使之南因罷弗用再主順天試擢禮部右侍郎仍日講上所慰賜往往同尚書而會閣臣缺命廷臣會推上意欲用新貴人顧所推皆著碩上弗悅也命再推始及鑾上不得已用之俾以吏部左侍郎兼學士直內閣首輔楊一清頗以鑾資淺疑上報曰用鑾於顧問差得益耳未幾竟用張璉爲尚書大學士出鑾上久之賜鑾銀記二其文曰清謹學士曰繩愆弼違侑以教諭俾家封言事時一清位高而輩前璉幸用事時有所陳啓

鑾墨墨而已。上詰之，則曰：聖德無可獻替，上以是心易鑾，而鑾獨謹身自守，明倫大典成，進禮部尚書文淵閣大學士。又久之，始進武英殿。後至者輒居鑾上，游加至保傅。鑾前後六年故自如也。上建無逸殿於西內，命鑾與輔臣李時坐講。鑾講詩，函風七月之章，賜宴賚。又賜縱遊苑中，使中官簪紅藥於帽，懸蜀扇於帶，俾賦詩稱謝，賜飛魚服。人以爲榮。尋內艱服除，而鑾家故貧，其在政府，不以苞苴名。既久，不召至，不能自給。上旋思之，而時議南狩，夏言常扈從，顧鼎臣居守。上曰：北敵且伺間而動，奈何？鼎臣請廷推重臣，按行九邊，以兵威忱止敵，上不應。已而曰：吾得之矣。霍鑾自內閣出，足稱重臣也。卽家起充行邊使，改兵部尚書，兼都察院右都御史。以往，賜璽書金帛，一切得便宜行事。總督鎮巡皆聽約束。鑾乃齎內帑金二十餘萬，自宣府西巡至大同，益西入偏頭關，保德州，渡黃河，歷清水營，入榆林，仍自花馬池而西抵甯夏。由莊浪涼州越甘肅，盡西嘉峪關而止，還歷鄭延，取內道，出潼關，以東撫保定，轉自遵化永平出山海關，至廣甯，還薊門喜峰，燕河太平馬蘭諸鎮。所至宣上威德，散金錢以資士，練兵保隘。其在宣大，則與總督尙書毛伯溫議築五堡，保成。加太子少保，賜金幣。在喜峰，則與總督左都御史劉天和議拓關，關成，予一子官。中書舍人還復命，仍以禮部尚書武英殿大學士入內閣。上所以褒諭有加，再論邊斬級功，予世襲錦衣衛副千戶。鑾以輔臣出行邊，邊之文武大吏咸囊鞬出迎，惴惴望顏色。鑾一切以寬和待之，遂至監司而上，皆盛供帳，酣飲譟浪，至連日夕。蓋始而畏中而悅，終而狎且易之。歸橐皆盈，而清素之風衰矣。尋以二品滿六載，進太子太傅，賜玉帶蟒服，以陝西捷，加少保安南下，賜金幣及俘奴。夏言既以忤旨歸，鑾

代爲首輔。進少傅。謹身殿大學士。滿三載。考授光祿大夫。柱國。鑾頗以溫厚回上意。上嘗怒言官奏事不實。鑾徐對曰。彼豈特許風聞故耶。爲之解。又嘗從容語邊將。鑾曰。邊將驍勇者多。所見無踰於周尙文。小過嚴耳。上曰。卿言之善。嚴固當以寬劑也。尙文果爲名將。常以所厚門生張惟一屬吏部尙書許瓚。欲調之選曹。爲瓚特奏。上兩不問。而爲之斥選部郎。以其誤許瓚也。鑾在內閣。前後垂一紀。居其上者。若楊一清之巧。張孚敬之強。夏言之倨。俱貴重有勢力。鑾皆以柔道承之。故得久自安。而其居首輔。則嚴嵩次之。其材諳藻飾。皆遠出鑾上。又能以勤敏結上知。上所以謀揆錫賚嵩者。時時越鑾而致座。特以鑾用事久。不忍棄也。而鑾猶用故事持嵩。亡所遜避。嵩漸不懌。至鄉會試。而以其子中書舍人汝儉。太學生汝孝。連占高第。物情洶洶。嵩尤忌之。給事中王交等因而劾鑾。鑾奏辨。上大怒。會鑾不候處分。肆行擾瀆。屢以直無逸爲辭。嚮同夏言禁苑坐輿罪。止一人。全不知懼。以朕不早朝。並君行事。二子縱有軾轅才。豈宜分明。並用下部院參議疏。上因盡奪鑾官秩。併二子削籍爲編氓。旋以困厄死。年七十。穆宗初。其子疏請昭雪。詔復其官。諡文懿。子祭葬。而二子卒不得牽復。一子汝儉。爲錦衣衛指揮僉事。

李時。字宗易。河間之任邱人。父榮舉進士。累官山東右參政。致仕。時生而端重沈默。有大人度。三十餘成進士。改翰林院庶吉士。授編修。與纂修孝宗實錄。兩同考會試。進侍讀。加俸一級。再進右春坊右諭德。仍兼侍讀。主武舉試。再主順天試。世宗初。侍經筵日講。同纂修武宗實錄。遷禮部右侍郎。修睿宗實錄。充副總裁。俄以母憂歸。服除。爲戶部右侍郎。復改禮部。轉左侍郎。遂拜尙書。時素以寬厚不立異同。得長者譽。

而上自講筵故已目屬之。既擢尙書。則上與少傅張孚敬相推明大禮。後則采用都給事中夏言議。大者如四郊分祀。而配太祖。出太宗。進獻帝。令皇后親蠶。裁定孔子廟祀。時奉行而已。度有所不可。則稍稍持諍。然亦不能堅。而上以其終長者。意安之。賜玉帶。尋以四郊告成。加太子太保。俄進武英殿大學士。入內閣。加少傅。孚敬方得罪歸。時入卽居首。召對文華殿。而見上諭以事天安民。修身講學。一切毋負簡委。裨益聖治。卽命充祀儀成典。大明會典總裁官。上於西苑建無逸殿。成而御之。賜時坐。命講周書無逸篇。大學士翟鑾講。函風之詩。談宴甚決。且引見章聖皇太后。賜白金文綺。俄而孚敬復用。時居次。改兼吏部尙書。事孚敬甚謹。亦不敢有所抵牾。而孚敬意更不能容。如議孔廟及言官馮恩獄。密疏證時出異語。以微結物情。上亦不爲動。彗星見。條陳三事。曰務安靜。曰惜人材。曰慎刑罰。且請宥大禮大獄諸臣。報聞。上與孚敬務以刻核嚴切爲急。而時數用寬大調劑之。所救解不少。始時在禮部。上賜銀記一。其文曰忠敏安慎。至是真之閣中。而失之。疏請罪。上弗問。特爲補鑄。以賜久之。加少保。冊皇后爲大禮副使。上在位久。益明習政務。嘗召時與尙書夏言。從容品隲諸大臣材器。皆精當。時歎伏以爲非所及。孚敬得請老。起故相。費宏代之。甫兩月。宏復卒。於是時始居首。累賜飛魚。蟒服。麒麟服。上謁陵。命時等扈從。途次供張。一切出尙方。朝夕馳乘。以備顧問。禮成回鑾。奉母后汎西湖。時與侯助尙書言鼓楫前導。復命汎舟西苑之太液。皇史晟成。加太子太傅。累朝訓錄成。加少傅。兼謹身殿大學士。九廟成。加太子太師。予一子尙寶司卿。尋進加華蓋殿大學士。昭聖旣以尊重失。上指而其弟延齡復犯大辟。章聖與並列。而恥爲之下。旣各居慈。

慶慈甯二宮矣。而章聖病不豫。上忽諭時。以慈甯宮多不祥。欲奉居楚舊邸。歲時朝謁。時皇恐不知所謂。第云聖母遠和甯。任遠道。皇上膺社稷。重寄。豈宜遠出。凡持之者再三。而上始謂昭聖實爲巫蠱。且欲行大事。時益皇恐。不敢明所以。第云臣萬死不敢聞命。上亦止。常從上幸九龍池。有民婦號而訴其邑者。上震怒。欲逮令抵法。時諍曰。此風不可長也。令付所司核治。而當民婦犯罪。上許之。時爲相。於親故間有所庇徇。然最爲老成詳謹。以體肥不禁勞。得疾卒。年六十八。贈太傅。諡文康。子坦舉進士。爲光祿少卿。先卒。

史官曰。昔姚崇相。而盧懷慎每事推崇。遂有伴食之目。霍鑾李時。清鑒不及懷慎。才又遜之。而借出借入。皆一時才相。其不爲伴食者幾希矣。時有守多所教正。力拒昭聖之誣。兩宮宴然。時之隱德也。

景暘傳

景暘。字伯時。少產揚之真州。尋徙居金陵。爲人器量宏雅。凝然負公輔之望。數歲時隨父官廣州。劉大夏見其文異之。曰。此國器也。正德戊辰舉進士第二人。授翰林院編修。時閣瑾亂。政挾勢凌轢朝士。見者靡不重足屏氣。其不爲阿者。暘及何瑄。崔銑。呂相也。在館職。以不獲裨補。時政居恆深念。作自劄一篇。其詞曰。凡受職於天子。若臺閣省署。藩臬郡邑。以及百執事。咸有常職。晨興而夜畢。終日業業以從事也。尙慮其有遺。若謬言者。不若是。曰不職而有罰。罰且弗測。又不容以緩。而葢是職者。必自責。自將於勤慎。所以補過也。雖至蹇劣。亦不敢不然。女雖職。天子近侍。在古六太之列。然史局不責以史事。經帷不責以進講。

既不得成啓沃開導之益。與磨研編削之功。而退復不束修自勵。而恬享大官之賜。美服而安坐。於心能自甯乎。古稱竊位。蓋近是也。已。夫語弗慎。爲誇爲毀譽。爲誕爲凡。近爲詔爲易爲詭。爲諛。行已弗慎。爲矜爲貪墨。爲放縱爲淫邪。爲率易爲苟且。爲側媚爲薄。居家弗慎。爲兄弟妻子。媵女。凌童僕。輿阜里閭。昏姻女欺。而又弗勤於誦覽書史。精研義理。以博所見聞。則人將鄙之。而於自居亦甚卑矣。古人云。一事不知。儒者所恥。能無作乎。凡此皆女之職也。女欲自立於兩間。而不負天子顯用之意。能弗勤乎。莊子曰。適里者宿春糧。適千里者三月聚糧。言不可不豫也。況女又將有臨事之責也。女能弗豫已乎。百司執事。皆有警罰。女縱不及於是。如百司執事。甯不愧於人。非鬼責乎。且又安能終保其不女及也。其刻意自勵如此。久之爲講官。常進講。必越宿齋沐。覲有所感悟。九年遷國子司業。以資當進侍讀。梁儲曰。成均爲多士範。非君不可。賜曰。朝廷官人。敢自擇邪。於是六館諸生。人人以爲得師。二年請養而南。改左中允。管南京國子司業事。時南方士競便利。賜於請託。壹切謝不行。士習稍正。與諸生講解。寒暑不輟。典籍餽廩。私益以劑。後知之。歸其益。曰。吾雖貧。何相賊也。辛巳。以母憂去。甲申。服除。北上。行至真州。病卒。易簣之地。卽其懸弧處也。人咸異之。賜爲人篤於孝義。母目盲。萬方療之不愈。旦夕禱於神。一日雙瞳爛然。舊疾如失。人謂其孝感云。娣早寡。奉與母居。爲嫁娶其子女。使得所。友人張貢見賜女欲與婚。未聘也。貢尋卒。賜哭曰。曩業心許之。忍負吾亡友乎。卒召其子妻之。居官清約過甚。不異布衣時。每升監乘一牝羸。蹀蹀行。旁觀者率不能堪。賜自若。工文以意勝。恥事鉤棘。詩蕭散有致。嘗曰。詞貴達意。若以摹擬爲工。按古人之迹。尺尺。

寸寸務求肖似。何以達吾意哉。識者疑其言。所著有前谿集若干卷。

史官曰。賈生爲傅不得職。至哭泣以死。古人之不苟於其官如此。史秩近世。視爲冷局。類以翫愒自放。而賜爲詞。以自剋責。何其厚也。乃若處高爵。膺任。略不以國安危爲念。而唯身家是營。聞賜之言。可以愧矣。

劉天和歐陽鐸傳

劉天和。字養和。麻城人。少穎朗。十歲能屬文。十五從父進士璉。令豐城。命天和從楊廉談理學。因以古人期之。嘗告其父曰。此子資實可與進道。二十舉於鄉。天和爲人。長身玉立。顧盼偉神。三困公車。游太學。人爭友之。成。正德三年。戊辰。進士。授南京禮部主事。居二歲餘。會武宗誅閹瑾。於臺臣多所更置。天和以茂異徵。拜監察御史。出按陝西。前是鎮陝太監廖堂貪橫甚。而其弟鵬官錦衣。表裏爲奸。及天和當出。鵬候邸中。甚口肩脅。爲堂請一日歡。天和正色不之顧。既抵陝。首榜堂不法事於衢。飭諸司毋曲徇。而又縛其爪翼數人於獄。堂陽爲惴惴。請一切得自新。天和亦冀其貌悔。小寬之。而謗書則陰上矣。會癸酉。監鄉試。事而鵬素奴事錢甯。從中道地。堂謗書誣天和。詔逮天和。既就繫。堂使所親信。喝校卒。且啗之利。以求甘心焉。長安吏民萬餘人。慟哭擁車。車爲軼不得發。輿聲震地。壯者至掙挺求堂。欲捶殺啖其肉。堂恐杜門引避。咸甯民郭鎮等。竟死車下。堂遣親信尾天和行。欲醜以滅誣。而其豪張傑王倫數十人。相與嚙臂爲盟。護天和。所過舍傳。必週視。食必先嘗。堂所遣尾者。不得近。竟以免。入京。下詔獄。幸臣甯入鵬。嗾考摭其罪不得。遂長繫。於是給事御史俱疏救出獄。謫金壇丞。十年乙亥。進爲令。有治理聲。擢蘇州府同知。時

孝豐大盜湯毛九等倡亂。撫按檄天和往蕩平之。陞湖州知府。至湖則專禮一隱碩德耆。與謀政所當先。復折徵均耗賦。其民大悅。以擬前代湖守晉謝安。石唐顏清臣。宋文彥博。凡六載。世宗初。考績天下第一。晉山西按察司副使。督學校。以母老乞歸養。報聞。尋仍故官。督陝西學校。嘉靖六年丁亥。遷南太僕少卿。尋改太常卿。以其年爲都察院右僉都御史。督甘肅屯政。乃條所以當革者五。曰掊剋。曰占役。曰湖場。曰派撥。曰侵漁。所以當興者五。曰開墾。曰墩堡。曰牛種。曰治水。曰屯兵。又備夷者四。曰回賊當處。曰海賊當防。曰零賊當勦。曰番賊當撫。疏上。以次報可行之。尋以母老請告。不許。改督諸邊糧餉。尋改撫陝西。天和前後凡三蒞陝。其一切利弊。斲若鏡燭。首疏鎮守中官當汰狀。罷之。因裁損守令不經於費者三十餘事。民又大悅。每出則共相指曰。此吾嚮者擁車公耶。何吾秦之多幸也。出師平洮。泯叛番四十二族。獲甲首三百。敵倍之。已又平湖店大盜。殲其魁。論功。賜白金文綺。已又平漢中妖賊。悉殲之。凡再乞休侍養。俱不允。進右副都御史。仍撫陝西。十一年壬辰。內艱歸。喪毀踰禮。以祭葬請。許之。服闋時。會黃河驟南徙。歷濟而除。皆旁溢。不可以漕。乃起天和。以原官總理河道。比至。晨夜改舟車爲檣楫。探求盡得其利便。濬淤以故。導潰以新。疏汴河。自朱仙鎮至沛縣。飛雲橋。殺其下流。又疏山東七十二泉。自臬尼諸山。達南旺河。濬其上流。役夫僅二萬。不淹時而河工就。天子嘉之。晉工部右侍郎。兼右僉都御史。仍其職。是多召入理部。事未受代。丙申。春。遷兵部左侍郎。兼右副都御史。總督陝西三邊軍務。至則申軍令。豐儲餼。廣埤塹。選鋒銳。飭甲械。士氣踴躍。思效。是年七破敵。明年丁酉。十一破敵。又明年己亥。又十一破敵。所上級多至二三。

百餘少亦不下四五十。上以屢有功。推恩加右都御史。再加左都御史。其侍郎俱如故。進兵部尚書。則都御史如故。其金幣歲至三四賜。積幾數百千。己亥春。諜敵吉囊將大入。萃羣帥而誓之。大出。賜金爲牛酒。嚮士陳二寶劍堂。指左劍曰。將不用命者。徇此。指右劍曰。卒不用命者。徇此。敵衆果大至。挾詐乘我帥醉。遂埤登焉。天和前已聞警。率所部夜行八十里。抵花馬池。卽故壘營之。敵錯愕不敢犯。引而西。天和召醉帥二。詰其狀。立斬以徇。衆皆股栗。遂奮躡敵。會天大雷雨。敵弓膠皆解。馬蹶蹶泥淖中。天和以所撤延綏兵搏其左。甯夏兵柱其右。固靖兵擊其鋒。親以大兵尾之。強弩火礮四合。敵遂大敗。走。梟敵酋及強敵五百餘級。敵人畜器械無算。捷聞。天子行告廟飲至禮。下書褒予甚篤。卽軍中策拜太子太保。予錦衣正千戶爲世官。賜金幣踰等。尋加少保。改南京戶部尚書。亡何。入爲兵部尚書。督團營。時中官大將多所私。股腹其廩。以空名予營。天和力欲清之。而諸共事者。爲首鼠臂螳。以尼天和。天和鬱鬱不得志。會報敵將大入。天和日夜治軍不休。因以成瘁疾。敵去。因懇休。上督而許之。賜馳驛歸。歸四十四年乙巳十二月卒。贈少保。諡莊襄。遣官諭祭葬。天和賦性忠孝。歷官三十五載。修潔正。大家無長物。所著有聞水集。關陝奏議。安夏錄。督府奏疏若干卷。詩文多雅淡可觀。

歐陽鐸。字崇道。別號石江。秦和人。少穎卓。四歲能盡識雲臺二十八將名氏。六歲受經。輒成誦。十三工屬文。踰冠登鄉薦。明年成進士。自是力爲古文辭。而尤精治經史。曰。其退可韞身。而進則宰天下者。授行人。上書論時政。語剴切。報聞。尋使蜀。蜀王奇其貌。欲自結。厚遺金帛。扇皿。鐸一無所受。曰。使事有職。不敢以

私拜王賜。歸下峽。舟束於盤渦。欲覆。衆叫號不已。鐸神色自若。徐命取器物投之。渦殺其勢。而會風怒。泊舟於灘。以免。人自是服其器量。遷行人司副。陞工部員外郎中。時有鎮清江中官。假寇警。請得如江西故事督軍務。疏上請。大臣皆茅靡。鐸時在郎署。乃獨持衡。大臣問曰。奈何無事而弄兵。以邊鄙我中土。而要節鉞。夫中土無大兵。節鉞不輕假。中官不當妄帥。勿聽便。大臣賴其強。乃已其事。鐸以便養乞南。得兵部武庫。戒藏吏懸隸直以待。至則給之。毋得先顯者。其顯者亦毋予羨。諸曹署甚稱之。時喬宇爲尙書賢。鐸至引以自副。每語輒達丙夜。曰。吾老矣。固當讓歐君也。出爲延平知府。鐸思所以易其俗。首下令禁黷祀。淫祠。故數百十所悉撤。以其材葺學宮。里社。建李侗祠。館諸儒生。文治彬彬矣。禁死者毋久匿弗葬。葬毋張宴。毋得爲佛會。民翕然從之。司禮太監蕭敬其隸民。外謬爲共謹。而羣從子弟多丞郎。緹帥諸舍人。子里居暴橫。時強買民田而遺其賦。列肆櫛比。侵官道。至不能方軌。民苦賦爭。徙竄。鐸歸賦於蕭。蕭曰。奈何重困吾民也。已。又正官道界。斬其餘椽。曰。復爾。我盡役而肆矣。已。又得蕭氏奴殺人狀。立決。毋所縱。舍人子憤。跳之敬所。讒之。敬大恨。曰。今乃魚肉我。一旦失上意。吾無歸地矣。謀中以危法。將爲緹騎逮。吏尙書陸完微聞。惜其才。舉堪繁劇。改調福州。鐸嘆曰。彼亦有大璫在。將寘我罪也。竟投劾歸。部固檄鐸上。及上而鎮。福太監尙銘。果盛氣以待。曰。蕭公誠貴人。無奈桑梓何。吾而帥也。鐸不顧。裁減其橫需。且半。郡有祭常頒胙。故事益市肉。肉且及其客成。徧勿爲市肉。肉亦不及客。銘恚。使隸委肉郡庭而去。鐸陽喜。謂諸吏曰。尙公毋以若相禮而勞苦耶。趣分肉。詣謝。銘益不自得。會迎春。鐸又削其宴劇。銘益恚。因謁次庭。詰之。

鐸不爲動。銘至，出僭諄語。鐸徐拱手曰：「公以臣子忍爲是言，卽上聞，得無不可耶？」遂趨出。而城中士大夫爲鐸陰喝，銘客曰：「府君盡得而奸私矣。」已則曰：「吏民爲府君持若錄而橐矣。」客大懼，語銘以解。而鐸益自厲爲苦節，寬省刑役，牧養小民，肺石之醵，不以自供，皆備庾賑。至絕一切會費，銘廉得治狀，自愧服。舉治行第一。嘉靖二年癸未入覲，賜綵幣羊酒。明年擢廣東副使，督學政。滿三載，陞雲南右參政。未上，召爲太常少卿。是時世宗方有事禮樂，議建南北郊，改太祖之舊，下羣臣議。咸唯唯，而鐸獨以時誦未可報。大爲人望所屬。遷南京光祿寺卿，上六事，皆爲官節省。搜乾沒，稽出入，上嘉納之。著爲令，尋以繼母憂歸。服除，卽家拜南京左副都御史，督操江兼佐院事。會服以外艱不果上，服除，召補前職。未幾，改撫應天十郡，督糧儲。恆謂吾不虞他郡，獨虞蘇蘇，以一郡漕餉天下半，卽不給，奈何？厥田雖上下，伯季也。季畝僅五升，而伯至十五倍之，是驅而蕪也。於是議均法，請於上。比其最重與最下者而稍損益之，重而不能盡損者，爲遞減耗米，派輕齋折除之，以陰見輕，輕不能益者，爲徵本色，遞增耗米加乘之，以陰見重。諸推收田者，從坵不從戶，田爲母，人爲子，奸巧無所容。逃竄漸復，而鐸又令民歲以田出緡錢僱役，毋得仍十年舊。裁省郵置濫費，定收納，凡數十百條，推行之無害，民大悅。時顯鼎居政府，以書貽之曰：「公行法而吾家增賦千石，然爲百貧家家減十石，鐸惠政於十郡，非一而獨於蘇著，又獨於田賦著，是時章聖皇太后梓宮，祈顯陵，道經所治，鐸第嚴飭守令將佐，儲糗糒，除戎器，廣游徼，毋令梓宮有他而已。」問所以待山陵使者，鐸曰：「使非徹侯中貴人耶？此有司事，非吾任也。」既事竣，所經由撫臣以次受賞，山陵使獨勅其不飭。時旣已。

遷南京兵部左侍郎。猶奪俸。上雖以山陵使言奪俸。而所遣調者。交得其治狀以聞。上心器之。亡何。吏部闕右侍郎。以應補者請不應。凡再請。再不應。而特用鐸。其入佐吏部。當考察。鐸佐其長。務以精核行之。不阻勢。不修伎。其斥謫以否。不以毀人。皆服之。九廟災。大臣當乞休。鐸引老乞歸。上以其不老而僞老。怒許之。明日。卽束裝辭。就道人謂公姑緩。上姑怒。行且召矣。謝曰。去弗敢留。召弗敢稽。人臣節也。彼知我者。以我爲恭。不知我者。以我爲黷。及歸。卜武溪之勝。構盱武草堂。讀書杯咏其中。甚樂也。可二年。所有薦者。累二十餘疏。鐸不動。已而寢疾。箕坐瞑目。不語而卒。卒之前十日。有光起盱武。若落星。越禾蜀江而墜。故居年五十八。

史官曰。當世廟時。人主雖端居玄室。而能親裁章奏。烹阿封墨。不予左右以權。故劉天和不死於慶堂之手。而歐陽鐸得伸其志於鎮閩之二豎。良以威福不測。有以懼其心也。天和著功西邊。士畏民懷。咸樂爲之用。如廉頗之用趙人矣。歐陽撫吳。吳至今思之。守其賦法不變。雖田疇之歌。何以尙諸。

徐階傳

徐階。字子升。華亭人。嘉靖元年壬午。舉於鄉。明年。賜進士第三。授編修。會張璁議撤孔子像。下儒臣問狀。衆莫敢持異。階條具三不必。五不可狀。上以不奉詔罪之。謫延平推官。至則毀淫祠。闢社學。清久繫獄。囚。以文致入者。咸得平反。盜阻尤溪。爲亂。監司以屬階。乃設方略。窮其窟穴。旬日而獲。其渠帥。并餘黨百二十人。滿三載。遷黃州府同知。未任。擢浙江僉事。督學政。又三載。陞副使。改督江西學政。會皇太子出閣。

選宮寮。入爲司經局洗馬。兼侍讀。久之。進祭酒。爲籍籍諸生淑慝。月朝廷誦之。以吉服受淑籍。素服受慝籍。然有曖昧失者。多務覆蓋之。諸生以故。人人感激。相戒勉。擢禮部右侍郎。尋轉吏部。故事。吏部官罕歸門。示重階。以爲不能盡人才。破例延訪無倦。署部事。所推轂。多愿厚長者。抑刻深儇捷者之人。當大計所。貶退。能不以衆口爲定。天下翕然賢稱。未幾。兼學士。掌院事。尋擢禮部尙書。莊敬皇太子薨。階議喪禮。稱上旨。上察其慎勤。召直無逸殿。階遂累請立皇太子。不報。二十九年庚戌。敵薄都城。中外震恐。階請出戴綸。李珍於獄。復其官。俾敵愾自效。又密言敵間潛入。請上還大內。備非常。上雖難於還。而心念其忠。會中涓陷敵歸。爲敵乞貢。上幸便殿。問羣臣。階曰。賊深入。不許激怒。許則操左券以責我。臣請計緩之。上曰。何指階曰。遣辨士風諭。以無文故。且徵其情實。實則令聽命於甌脫。爲外臣通貢市。往返少日。我備完。而兵益集。敵且退。不退。從而拒之。其勢必得所欲。上稱善。因請上視朝。會廷臣議。廷臣皆言貢非敵始意。許之。愈一小快耳。而墮軍威。長敵志。不可居數日。勤王兵集。敵亦退。時昺豹以副使坐法戍。豹會令。亭階悉其才。曰。欲威敵。非豹不可。卽日薦起行伍。爲都御史。階上言。延安卒善戰。而雲中卒善謀。宜各用所長。上從之。時以朵顏三衛爲敵耳目。請顯責之。階謂三衛導敵。有其情。而無其迹。罪之不可。置之不可。不若責以扞圍失職。使彼易受。而後撫之。上以爲然。自是言便宜者。率密語之。寔益任用。吏尙書缺。廷推階。上曰。階素內直。奈何中道而棄之外乎。亡何。孝烈祈廟之議起。初。孝烈方皇后。自九嬪册立。庚子宮闈之變。有翊護功。上德之。旣崩。一日。上忽諭禮部議。祔仁宗。而以孝烈主祈廟。階言。女后不宜先入廟。宜祀之。奉先

殿別室。上盛怒。趣再議。階不得已。遜言曰。禘廟乃聖子神孫事。臣子之心。何忍煩上親議。無已。宜倣古廟數遞加之。益太廟奉先殿各一室。令仁宗緩禘。而后先祔。或可。上不許。竟禘仁宗。祔孝烈。然天下皆踴階議。未幾加少保。兼東閣大學士。上欲罷入衛卒。階言其非計。又請汰營兵老弱者。而取其餉。以充賞賚。倡勇敢。皆見納。一品滿三載。進柱國。太子太傅。癸丑。主會試。時倭亂東南。上疏謂將校主戰。而守令主守。今將校北。輒用軍興法。而守令無恙。及城潰矣。復坐將校死。而僅左降守令。是文武異刑。而法不一也。民進止視守令。不視將帥。今兵一而民百。奈何以戰守併責將帥。將校履肝肺以死。而文吏持口舌以制。難以責其振矣。夫守令勤則餉峙。具守令果則哨探嚴。守令警則間不容。守令仁則兵必力。臣以爲重責守令可也。又疏請罷浙江撫臣與更江南督臣。皆報許。階念敵盜邊。士不得田畜。宜大米麥買無所得。而戍卒月餉七鑽。僅易粟二斗。時畿甸二麥熟。石直四鑽。可及時收買數十萬石。石費五鑽。可出居庸抵宣府。費八鑽。可出紫荆抵大同。大約合計之。費中金一兩。而飽士卒一月。其地米麥價且漸平。上如其言。給事中吳時來。刑部主事董傳策。張翀。極論嚴嵩罪狀。嵩念階於吳。張俱座師。而董又鄉人。於上前具道本旨。所以爲者。上下三人於獄。拷掠無所得。三人遠戍。階獲解。尋加太子太師。嚴嵩所以危者百端。無如之何。會上所居西苑永壽宮災。徙居玉熙宮。隘甚。階朝夕旁皇曰。此豈至尊居。乃請掄三殿餘材營之。數旬而宮成。更名萬壽宮。進少師。時嵩奸益露。上久察階忠。密札諮問。交午階所。鮮及嵩矣。居無何。御史鄒應龍疏論嵩父子不法。上勒嵩致仕。下其子世蕃獄。戍之。擢應龍五品京職。上雖退嵩而心憐之。忽忽不樂。手

諭階欲傳嗣令擬詔階謝不敢部奏陸應龍通政參議上忽切責部臣以應龍爲邪不宜官階力陳亦悟弗責輟嵩直廬賜階階既首揆盡反嵩政務收人心用物望嚴杜篋籠天下翕然想望風采初嵩在事操權自利六卿皆束手階盡謝卻之或謂非宰相體階曰夫操表曠以希望者而亦負春荷鍤耶前是奏功率責閣臣階以爲不稼取禾無以示勸自是報捷不復與賞匠頭徐杲有殊寵上欲崇以宮保階力持祖宗無是法無啓倖端上默然十五年滿加上柱國固辭階小疾上親爲調藥溫諭諄切方士熊顯等進長生藥階力言不可餌又問階比日乩何以不下階謂此曹持紫姑術實得於衆口而託之神語未宜深信上由此稍息厭方士語矣北敵由牆子嶺入犯通州報至兵尙書楊博以上方有行宮祠釐不敢奏而使宜令關門戒嚴敵阻白河水掠香河階請亟先備順義而以奇兵徼之古北口敵果走順義不能入出古北口遇伏兵敗上創恨博不早計博危懼階從容言博悉兵情盡力於官上姑解階以張家灣當天下委輸請出光祿羨金三萬城之設一裨將始爲重鎮穆宗在裕邸而景王未之國愛幸日異奸人謀欲更樹階力稱引古今調護萬端景王卒就國異議旋息上下制建零壇及更興都故宮殿階第以藏匱爲言工遂已天下鹽額淮揚最重歲賦六十餘萬嵩當國令都御史鄒懋卿出經理搜積羨得百萬以爲功遂著額額不登商多亡匿急則雉經階請仍其舊流徙登復而額盡登海瑞上書斥乘輿上甚速詔獄欲殺之階疏言草野倨侮然不過仰恃聖明以死沽直名耳不如置之則彼計失而聖德益廣瑞獲免上久疾欲幸興都階力言不可至上崩穆宗卽位階推先帝意罷齋醮土木復諫諍得罪諸臣舉士有節行及恬

退久廢者。所草登極詔。孳孳急民利。天下大悅。階明習典制。中外倚重。上欲幸故邸。力言祖宗時。非郊祀。幸學耕藉。駕不出。今諸大典未一行。而先幸故邸可乎。上雖不輟幸。而以頃刻歸。亡何。御史齊康受高拱旨。力詆階。乃引咎乞休。於是九卿大臣皆爲之辯雪。而臺諫因劾康及拱。拱竟去位。康以遠謫。而階少安。時有中旨。令館臣撰中秋致語。階爲先帝新棄羣臣。非宴樂時。臣不敢奉詔。上爲罷宴。上謁陵甫至齋宮。使中官以意問曰。祀在明日。欲輕騎一出觀形勝可乎。階曰。上以祀來乎。以觀形勝來乎。以祀來則先游而後祀。非所以展孝思也。上悅。祀畢始出觀。上欲以大監李用等分監營兵。又命修內教場。勒中官習騎射。階持甚力。乃止。一品九年再滿。力求去。詔留慰。加伯爵俸。固辭。久之乃視事。上數幸南海子。階諫不聽。又與中使李芳忤。遂稱疾不出。御史張齋因劾階奸利六事。階再疏辭。允之。還里杜門自守。而高拱再起。以舊事銜階。拱知交爲吳監司郡守者皆伺階。凡與階有睚眦怨者皆乘是侵之。會拱爲張居正馮保所逐。階獲免。萬曆二年甲戌。孫元春舉進士。每戒之曰。無競之地。可以遠忌。無恩之身。可以遠謗。咸謂名言。十年壬午年八十。神宗使使存問。賜諭優渥。階材而好學。少從聶豹切磋理道。後與歐陽德輩推明王守仁良知之旨。相爲磨淬。獨勵躬行。以抒經濟。生平不置姬媵。不爲臺榭之飾。友弟惇讓。肫肫無僞。田宅錄。輒以推弟姪。十一年癸未閏二月卒。年八十一。贈太師諡文貞。所著有世經堂集二十六卷。爲文有根抵。嚴於法度。

史官曰。徐階事逆鱗之君。且與奸相伍。而能謹身近主。納約自牖。不府權。不斂怨。善處大事。克厭衆心。故

前有嵩而不能螫。後有拱而莫之勝也。然拱賢者何以相厄。蓋嵩驕而階慎。拱直而階婉。薰蕕也。方員也。皆不可同器者也。休休有容。自古難之矣。

胡松傳

胡松字汝茂。潞州人。幼卽嗜學。家窶無所得異籍。則傍借抄讀。更輯古名臣奏疏。諦觀之。喟然歎曰。經理天下者。不當如是耶。少卽負聲譽。嘉靖七年。戊子。領鄉薦第一。己丑。成進士。授東平知州。秩滿遷南京兵部員外郎。改禮部。進郎中。陞湖廣參議。山西督學副使。進參政。以言事指斥權貴得罪。家居者十餘年。後用言者薦。再起爲陝西參政。尋轉浙江按察使。進右布政使。轉江西左。擢爲右副都御史。巡撫江西。陞兵部左侍郎。改吏部。陞南京兵部尙書。尋以吏部尙書召入。方其爲州時。州有巨豪劇寇。前守累不能收捕。設法擒殲之。民有訟。必先諭之以理。不得已。方置於法。故民莫不愛其惠。而畏其威。至構祠祀松。在留都時。以部員冗職。稍有多暇。卽聚經史。求微詞奧旨。參稽考互。必浹洽曉暢而後已。且曰。爲學如儲積。既多。水旱盜賊。應用將不竭矣。及在湖藩。職糧餉。值湖北叛苗鎮箠之變。松紆籌策。親履行陣。遂致蕩平。捷聞。特降璽書慰勞。賜白金綵幣。其督學山西時。松樹風聲。明經術。將以儲實材。爲天下用。而士類亦彬彬然。嚮風。會士會入南地抄掠。民倉卒奔避太原。太原城堅。閉弗納。松憤然曰。是非我赤子耶。若何弗納。弗納其奚要守爲。守將懼。遽納民。民賴以全活甚衆。於是松遂上疏曰。敵之敢於深入者。以邊將暗懦。失於先機故也。賞罰不得當。功罪不時審。奸豪潛入。外地爲嚮道而莫之察。帥臣隱挫。覲冒以捷聞。而弗之究。則

備禦何由嚴。而寇安得不深入。竊爲國家憂之。謹上便宜十二事。曰懲苟玩。曰堅障礙。曰懷搆貳。曰蓄孽。救曰慎任使。曰利器具。曰廣間諜。曰清耗橐。曰嚴備禦。曰核屯戍。曰預積貯。曰撫傷疲。弊數千言。皆切中邊計要害。上可其奏。擢參政。協守瀾關。上嘗語侍臣曰。胡松可大用。松以文臣。一旦起言邊事。人多忌之。而疏中語頗侵當時用事者。以故得罪去。松家居築娛老堂。奉二親。別構尙友堂。聚天下諸書讀之。又曰。是文耳。曷若偕一二同志遊東南。歷覽形勝。常有脫悟處。時松同年友羅洪先唐順之亦以言事廢。二人並有志學古者。與俱入宜興山中。盤桓究解。而松之神情脫然也。當是時言者以邊才薦松。乃起陝西駐平涼。條數百事。若嚴保甲。均賦稅。選伉健。置常平。大都可爲經久計者。其在浙。將吏多散。軍食傳時。松案發之。賊巨萬。人心肅然。其撫江西。適流賊豕突。殺長吏。松受命。卽率浙兵千餘人。倍道出賊不意。悉殲之。因議曰。豫章爲閩廣下流。當受其衝。莫若其要地。增置城濠。屯戍守。先事而待之。復減租稅。理冤獄。舉賢良。黜貪墨。民得蘇息。始廣西賊帥張連者。黠慧獷狃。爲諸酋長。其巢穴連諸洞寨。驅羣蠻時出寇抄。諸郡苦之。諸路討之。數歲不能克。至是悉平。蓋松之力居多云。松勳隆望重。不數遷。爲吏尙書。天下望松大用而竟卒。松於書牋所不讀。然得其精意大義。皆可見之施行。故事輒應。不假旁求探索。如武庫之儲。百器畢具。唯其所用。爲文出入班馬。其大旨本之程朱。體格嚴峻。有奏疏書記傳志詩文若干卷。

史官曰。周

明書卷一百三十一

列傳四

名臣傳十七

陳其學傳

陳其學少聰慧博文強記嘉靖甲辰進士授行人沈靜自守丁未選御史彈緹帥陸炳擅作威縱諸校乘傳驛自立錢法禁切民間至於罷市又使私人徐某結京山侯崔元擅鹽利有詔下徐某獄責炳元各對狀事雖得釋而權奸凜然敬憚之戊申按兩淮鹽法增通秦之賑清過淮之稅減餘鹽價值劾總兵及內臣容盜侵擾疏呂梁洪夫額之濫及河漕大臣遷轉之非詔皆允之庚戌陞陝西僉事轉榆林參議五載悉心兵防邊境以安備兵肅州時哈密諸夷爲亂出嘉峪關三百里直抵墩煌防其猖獗久之陞本省參政守花馬池陞山西按察使晉僉都撫大同會俺答兀慎入犯左衛督將軍劉漢等破走之癸亥進副都撫山西適大虜入中部洛川等處率參將孟鸞戰捷先是韓藩歲祿已六萬而宗室日繁漸增至十二萬歲額不及其半積逋且六十萬至是奉國將軍融燭等百四十人至會城大譟檄藩司借帑金四萬七千分給之又疏請留贓罰鹽鈔年例課稅諸銀以賑其急并列其狀得旨悉如議廢融燭爲庶人燭不受詔

逐逮者。且執平涼知府祁天敍。殿。性愷。悅。言諸王子反。徐戡定正法。尋以本官總南京糧儲。請本折兼收。民尤稱便。陞戶部侍郎。改兵部左總陝西軍務。考績。陞右都總督。如故。敵大舉犯花馬池。禦之。斬獲頗多。會別部有所亡。失歸待勸。事白。卽以原官總宜大。逆人邱福等入犯宏賜堡。趙總兵迎戰。敗之。斬首一百七十八。召理戎政。復陞南刑部尚書。尋致仕。久在邊。習敵情。僞戰守相資。多所斬獲。歸家。闢大忠祠。以祀忠節。爲風勵。市田以周學校。屢薦。加賜存問。萬曆甲戌卒。年八十餘。諡恭靖。子琛。官至知府。史官曰。闕。

劉自強傳

劉自強。字體乾。浙人。中嘉靖甲辰進士。授廣平推官。陞吏部主事。歷員外郎。忤嚴世蕃。已遷太僕少卿。猶出爲陝西參議。晉山西副使。營卒王慶乘夜爲變。城中大駭。知慶有嬖妾。選勇士伏旁舍。待詰旦。慶來。擣擊。輒斬其首以殉。餘黨瓦解。遷陝西參政。進按察使。大旱。一城亡所得水。相麻舍旁鑿之。泉源涌出。居人神之。名劉公泉。進湖廣右布政轉左。歲饑。賑饑。全活甚衆。四十三年甲子。遷應天府尹。一尙書以事囑。怒擊其隸人治之。尋進右副都御史。撫四川。寇黃中負險。鷲會湖湘兵討之。時妖人蔡伯貫乘間。嘯聚敵掠。自強曰。黃中大鼠耳。封而守之。可立斃。伯貫出押虎也。可急擊勿失。輒移師攻伯貫。一鼓殲之。還兵向中。所據牛欄坪。險絕。斬木爲雲梯。陽攻之。而微察山旁側。有少罅。督甲士夜銜枚上。鉦鼓并作。呼聲震巖谷。賊悉降。捷聞。賜金綺。拜戶部侍郎。總督倉場。隆慶二年戊辰。轉右都掌南院。進南戶部尚書。再改南兵部。

參留務。庚午入爲刑部尚書。奉詔疏薦侍郎趙貞吉。布政使曹金。荊州知府趙賢。郎中呂霍。孫應元。後皆爲名卿。萬歷初。累疏乞歸。許之。自強內行甚備。請均田。議增城。蜀重役。定水禍。爲德於鄉甚多。萬歷十年卒。年七十五。賜祭葬。子懋武。以廕爲徽江知府。

史官曰。明

夏言傳

夏言字公謹。號桂洲。貴溪人。性警敏。能屬文。尤長於筆札。少奕奕有備聲。舉進士。授行人。擢給事中。奉詔覈斥錦衣冒濫官屬三千二百。出按皇莊。侵占農地二萬餘頃。糾中官趙彬。建昌侯張延齡。前後七疏。皆報可。轉右給事中。疏請杜內臣傳乞。救知府郭九臬等緹逮。及請慎出入。以嚴政體。及論邢福海等。不當以傳奉陞。皆謬。爲人所傳誦。內艱服除。守故官。尋轉左。遂進兵科。都給事中。時山西劇盜陳卿。糾衆據青羊山。爲亂。朝廷大發諸鎮兵討平之。而所遣將臣以下。久爭功不決。且有因而爲利者。言發其事。遂命往覆勘。次第功罪。皆當時兵部。廷擢左都御史。王憲出行邊。禦敵。憲有難色。言勸罷之。而上實心器。言會吏科都缺。故事當以左序遷。特旨移言長吏科。言以是益自負。時上方幸張孚敬等。相與推明宗祀。禮樂之事。言謂農桑天下本。今人主旣親耕籍田。而后不親蠶。非所以昭陰教。示婦職也。因上皇后親蠶疏。上大悅。報旨稱美。而南北郊之議起。太祖初卽位。爲圓丘於南郊。以祀天。爲方澤於北郊。以祀地。行之未幾。而合之。恆以元正之後三日致祭。因大享羣臣。蓋頗用漢唐故事。上與孚敬密議。不以爲善。孚敬微泄之。

言乃上疏。謂當以冬至祭天於南郊之圓丘。以夏至祭地於北郊之方澤。而引周禮及高皇帝初卽位詔爲據。而謂漢唐以爲不足法。上益大悅。下禮官會羣臣議。有謂以高帝二百年之定制爲不當輕易者。有謂工鉅而財詘。不當輕舉者。有謂夏至前而冬至後。於天尊地卑不稱者。上乃召言見便殿。賜璽書褒獎。與四品服。欲以風厲羣臣。而卒莫之應。詹事霍韜辨論益切。至貽書切責言。指以爲奸邪。言悲繳其書上之。因遂劾韜五罪。上怒甚。械韜下臺獄。上不欲太宗與太祖並配天。與孚敬議。以太祖配天。而太宗祀大享殿。如古明堂。以配上帝。孚敬意難之。下羣臣議。亦莫之應。而言復伸上指。攷古禮以請。上又益大悅。以祀典成。特進翰林院侍讀學士。仍兼都給事中。侍經筵日講。賜金飾花犀帶。視尙書。言常薦左僉都御史李如圭。以右副都御史出賑濟陝西。於是僉都缺。廷推言與諭德彭澤。上遲徊久之。而御史熊爵謂言出如圭以爲己地。言亦辭。上乃勉慰言。俸食四品俸。澤以孚敬力復超爲太常卿。言恨孚敬不已。薦而右彭澤。銜之。且覘上意。雅不欲大臣太專。乃露章論孚敬與吏部尙書方獻夫有所好惡。彭澤奸邪。不當驟遷。上雖爲兩解。而孚敬與澤亦遂惡言矣。上以四時祀太廟。奉太祖爲始祖。居中。而太宗下皆東西相鄉。至大輅。則以太祖之四世祖德祖居中。而懿熙仁三世皆合。而太祖屈居五。至是欲舉禘祭。大雩。秋報之禮。下羣臣議。言以爲禘者禘也。謂禘其所自出之帝也。德祖旣爲太祖之始祖。豈可復爲始祖所自出之帝乎。請虛其位。而加隆稱焉。仍以太祖配中。允廡道南。則謂朱氏爲顯頊裔。宜禘顯頊。輔臣孚敬會羣僚議。東閣倡言曰。請虛位者失之無尊。顯頊者失之遠。宜仍禘德祖便。言復上書諍之。上雖意未決。而心是言。

旋進詹事府少詹事兼翰林院學士。言眉目疎朗，美鬚髯，大音聲，不操楚語。上故已才言，至進講，愈目屬之。既顯與孚敬異，孚敬恨，乃因行人司正薛侃之疏，用彭澤計而傾之。卒不勝，語見孚敬傳。言出獄月餘，遂進禮部左侍郎。學士如故，掌院事。未幾，晉禮部尚書。與李時並召對，所以褒勉獨有加。時朝臣多與孚敬仇，謂言能抗之，而言既以開敏結上知，又折節下士。時有御史喻希禮上疏，謂祈求祀不在祠醮，而在行仁政。因請宥大禮大獄得罪諸臣。御史石金亦言之。且謂人才用舍，政事張弛，一切付之廷論，而陛下恭默凝神，提挈綱領，使其真精內蘊，根本固則姦斯之慶自集。上疑其有所譏諷，大怒。下書數百言，苛責之。命言參究，毋得黨護。言謂希禮金所奏內稱宥罪可逆天休，是但常情福利之說，養心不貴勤察，則啓人君怠逸之漸。論事迂疎，罪實難追。第原其本意，似亦無他。乞優容。上益怒，切言位列大臣，黨護，速希禮金於詔獄。謫荒徼。及言謝罪，弗罪也。以是言益得公卿間聲。御史馮恩嘗有疏，品第三公九卿長佐，多所不滿，而獨稱言救時宰相。上既以制作禮樂，自任多所更易，言爲禮尚書，所建白多當上意，欲驟貴之。其委寄與閣臣埒。賜銀記曰：學博才優，俾得密封言事。未滿考，以督南郊，特加太子太保，尋加少保。督建皇史巖，加兼太子太傅，重書寶訓實錄成。進少傅。再以監建宗廟工成，加兼太子太師。前後錫賚御書繡蟒飛魚麒麟玉帶兼金尊珍饌時鮮之類，無虛月。爲之釋先戌籍，有所陳乞，亡不立得。而是時霍輅起家吏部左侍郎，以舊郅中言莫能間也。會順天尹劉淑相與言之狎戚，費完不相善，坐奸人所中下獄。疑言庇其客而主之，因上書許言罪，上怒不聽。言亦疑輅主之，謂淑相與輅謁陵歸，縱飲九龍池，爲不敬，而輅時

已轉爲南京禮部尙書矣。乃上書論言。以朦朧爲故少師費宏請諡得文憲。且減緊關情節。當死言亦許。縉大罪十餘條。幾於訟師巷口。上兩不問。鑄縉俸一秩以謝言。縉至南京復攻之。上亦不深責。而言氣乃驕。皇子生。言入對。上喜甚。手簪花於帽。侑以白金文幣甚渥。遂兼武英殿大學士。入內閣。是時李時居首輔。而上所以委寄之。不能如言重。一切禮文之事。皆以屬言。賞亦稱是。言氣益驕。漸徭視八座。嘗從上謁陵。駐沙河。言庖中火。延武定侯及大學士時行帳燬。而上別授言廷臣六疏。亦從燬。言與二臣合辭請罪。上俱弗問。而獨責言當特疏。而今者不特疏。爲屬不敬。言惶恐乞休。上勉留之。時獻皇帝已崇爲皇考別廟矣。通州同知豐坊。小人也。上疏請復古禮。建明堂。加尊獻皇帝廟號。稱宗以配帝。惟下禮部議。尙書嵩議以功則太宗親則獻帝。以配帝惟上裁。而不敢任稱宗。上不悅。令再議。戶部左侍郎唐胥爭之力。褫其官。於是嵩懼如上命。獻帝遂稱睿宗。入太廟。言亦莫能持也。尋以滿六年考錄一子中書舍人。李時卒。言居首。尋以祇薦皇天上帝奉冊勞。言加特進光祿大夫上柱國少師。餘如故。上柱國於人臣未有加者。加之自言始。時顧鼎臣亦加少保。太子太傅禮部尙書武英殿大學士。鼎臣於言爲先達。長且十歲。言躡貴至師傅。先大拜。踰二歲。而鼎臣繼之。意不肯相下。事有所可否。言內不能善也。尋上以章聖皇太皇妣葬顯陵。躬行謁視。言與翊國公助俱扈從。而鼎臣同留守。其委寄特重。因賜言助鼎臣蟒服玉帶白金綵幣。郭勛者。故武定侯也。善孚敬。孚敬左右之。得幸上。至貴重。封上公。數上書論劾大臣。無不立應。與言爭寵而妒。上至承天謁陵畢。嵩請率羣臣賀表。上問之言。謂宜俟回鑾至京而後舉。上乃報罷。殊不悅。嵩得其

指乃固請賀。上答詔以賀非卿等誠言所謂方是。第禮樂自上出。賀亦可。言數與所親厚。大臣宴遊。竟日上。間有宣諭。獨助在。賞賚稍厚於言。以是益驕恣。數侵言。言亦強應之。言既小失。上指會上。幸大峪山。閱視永陵工。言進居守。敕遲。上怒。責言。因勒令上其前後所賜銀記。璽書手札。言懼謝罪。固請上所賜不吐。上愈疑其有所毀損。落勳階。少師。以少保尚書大學士致仕。言乃檢十年中璽書手札四百餘通。并銀記上之。辭行。上怒解。遣中官止之。復少傅。太子太傅。仍故官。言入朝。具疏謝。上勉益勵。初忠。盡心匡輔。秉公持正。不惟副朕簡任。亦免中怨。復疏謝。謂自處不敢後於他人。唯一志孤立。爲衆所忌。上不悅。詰責之。乃一其疏中洗改字。言皇恐引罪。亡何。雷震奉先殿。召言與大學士鼎臣往視震所。不時至上。復不悅。命禮部糺之。言等復請罪。上曰。朕所數寬言。非爲言。爲左右誼重也。言乃滋情成性。蔑不知警。何以表率百僚。鼎臣亦相效。尤耶。念其知罪。姑宥之。尚書霍韜入掌詹事府。數面詰言。而郭助喜其得助。益橫。時有訓導蕭時芳者。疏言三臣皆中興元佐。同功一體。而外譏沸騰。心迹未白。非國家福。宜賜之坐。以杯酒釋其心。御史舒鵬翼亦有言。上俱不聽。而訓導罷爲民。御史坐譴。言又上疏乞骸骨。謂位高則怨。尤易集。官久則過失自多。咎積而不悟。則謗日聞。身危而不避。則過將大。上勉曰。勿負朕心。還言所賜銀印及璽書手札。會陝西三邊大捷。推功言。復助階。及少師。太子太師。仍進吏部尚書。華蓋殿大學士。江淮寇平。復推功言。賜白金綵幣。璽書褒獎。明年以北邊謠。再賜璽書褒獎。時九廟災。言方以疾在告。乞休不允。霍韜死。而言與郭助爲仇。益甚。言既數以病請急。然實不病。而以無子故。多擁諸姬妾爲懽。慈壽皇太后崩。上傳示太

子服制議言報疏有譌筆上遂切責今陳狀言引罪因乞休上怒盡削其助階散官以尙書大學士致仕言始聞上怒乃上備敵事宜冀以解上曰若既蘊忠謀何自愛而欲去朕耶姑不問是時上方治齋醮其爲青詞及他文獨言與尙書嵩稱旨而言且陛辭因詣西苑齋宮叩首上聞而憐之特賜酒饌俾還私第調理以俟後命而郭勛轉恣橫其於督工治兵培克盜斂以數十萬計上微覺其事前是春時給事御史請勛助與提督大臣會派役卒助弗便也內閣撰敕且數月而助弗肯領尋與言俱引疾在告京山侯崔元害勛寵久上以元薦景神殿新得獨對從容問言助皆吾股肱也而相妒者何也元不敢對上復曰言疾欲歸果否歸當在何時元乃曰俟聖誕後始敢請耳又問助何病元曰助實不病言歸卽出耳上首領久之而給事御史伺上有留言而惡勛意因勛助故不領敕爲作奸植黨以戢國法助奏辯語多不遜上大怒於是削同事者尙書王廷相官奪伯陳鏗俸而給事中高時者言所厚也因盡列助貪縱不法數十條上下詔獄移三法司覆讞論斬奪封爵誥券獄成疏留中尋復言少傅太子少傅餘如故俾疾愈之任言雖以疾在外閣事多所取決而於窮治勛指授批根無所不極上猶心念助疑其中言構也久之言一品滿九年考上遣中使賜金幣寶鈔肥豕上尊盡復其階勳官職賜敕褒諭錫宴禮部前是言與嚴嵩同鄉稱晚進而言以議禮驟貴不爲下嵩事之甚謹言入內閣嵩遂越顧鼎臣爲禮部尙書言有力焉嵩奉行唯恐不當意言亦以門客畜之會坐失上旨當罷呼嵩與謀而嵩已造上所幸方士第謀倚言而代其位言覺之嵩旣數爲給事御史所攻乃益爲恭謹以媚上是時已心愛嵩甚於言言乃日嗾所善給事

御史益攻嵩。上益憐之。上居西苑齋宮。許入直諸貴人得乘馬。言獨製小腰輿以乘。上聞之不善也。人主故所御。翼善冠。上不御。而御道士冠。因命尙方倣而雕。沈水香爲五冠。以賜言。及成。公希忠京山侯元大。學士鑾尙書嵩。言獨密疏。謂非人臣法服。不敢當。上大怒。時昭聖章聖太后會前後崩。郭勛請改其一宮。爲皇太子宮。言與上意合。不許。而至是。上卒問皇太子宮當何建。言偶忘之。念與作工役費重。倉卒對曰。今兩宮皆虛。可改其一以居皇太子。上愈怒。令五臣皆出直。尋召成公等入對。罷言不召。尙書嵩乃於冠香冠。而帽輕紗帽。以至。使上見之。上果悅。因令成公等三人出。獨留嵩慰諭。甚至。嵩頓首雨泣。訴言陵陷。上使悉言罪。乃得甚口。少頃。上遂手敕都察院。數言三罪。又謂郭勛。旣以不領敕下獄矣。猶復羅織不已。與太監高交關共謀。朕不早朝。言亦不入內閣。軍國重事。私家裁之。王言要密。視等戲具。且言官爲朝廷耳目。一犬不如。專一聽受。主使逆君。沽譽傾人。取位以奉所悅。戕人一家。以代報復。卿等其布此論。俾中外知之。上蓋欲言官論劾言。尙疑言。且復用。相顧莫敢發。亦不敢請罪者。十六日。上忽宣言。入拜皇考諱忌。仍直西苑。候聖誕禮成。言乃謝恩。因乞骸骨。欲以常上疏上之。八日。而始奉御批。令革職閑住。時日食旣。上諭禮部。以臣子欺逼君。外陰侵犯內陽之咎。言以臣欺君。上作威作福。不下郭勛。念與卿等累年供事。免死去之。爲失刑。於是給事御史。乃敢合疏論言。且請罪。上益怒。命部院盡覆核之。謫降十餘人。餘留者。亦奪半歲俸。亡何。勛病死刑部獄。上以悲。因他事。奪尙書吳山職。餘鷄俸有差。還助子孫侯爵。言久貴用事。家富厚。高薨。雕題廣囿曲池之勝。勝侍使辟及音聲入部。皆選服御膳羞。如王公。其始海內縉紳。意

其且復用問遺踵接。後漸不召。則漸亦希簡。言居恆邑。邑遇元正聖壽。必上表賀稱草土臣。上亦報聞而已。久漸憐之。復禮部尚書武英殿大學士。仍致仕。是時嵩最得上意。獨相。上微聞其專。特召言。自家復任。既陞見。盡復其階勳職秩。時嚴嵩已爲少傅兼太子太師。亦加言少師以示並重。而言仍驕。直陵之出其上。凡有所擬。直行意。不復顧嵩。嵩心恨之。故事。閣臣日給酒饌。當會食。言與嵩對案。不食所給。而自攜庖甚豐。亦不以食嵩。始嵩信其子世蕃黷賄。報復睚眦。海內咸恨之。謂言能奪嵩而制其命。深以爲快。未久。言復忤。吏部尚書聞淵。老臣也。不能泯忍。事言。會其部左侍郎缺。當以翰林臣補。而禮部左侍郎許成名。崔桐皆應得。吏部初擬成名。而桐有力。遂推桐。給事中彈之。語連少詹事黃佐。王用賓。遂悉勒致仕。每淵俸半年。下文選郎中於獄。抵罪。淵氣奪。不復敢抗。都給事中厲汝進劾嵩子世蕃。及王錫爵。尚書王暉。皆有請。囑言欲借以搖嵩。嵩辯疏上。上卽爲杖汝進等。幾死。而遠謫之。暉斥爲民。杲坐戍。言不救。御史陳其學以鹽法事論京山侯崔元都。督同知陸炳。言擬旨令陳狀。皆造言請死。有所進。藥炳至長跪而解。以是皆與嵩比。而謀構言。言殊不悟。上左右小璫求謁言者。言奴視之。其詣嵩。嵩必執手延坐。款款密持黃金。置其袖。以是爭好嵩。而惡言。上或使夜瞰言。嵩寓直何狀。言時已酣就枕。嵩知之。故篝燈坐視。青詞草。言初以是得幸。老而倦思。聽客具藁。亦不復檢閱。多舊所進者。上每擲之地而棄之。左右無爲報言。言亦不復顧。嵩聞而益精專其事。以是上益愛之。未幾河套議起。始言由書生。以片言合上意。驟貴。欲建立奇功。名以自顯。固居恆謂太祖制。文臣非出將入相。不得封公侯。非謂文臣不得封公侯也。文臣不得爲三公。

也。以故於議撫大同。討安南。平潞寇。皆自顯露其策。不復託之代言。而猶未歎其志。曾銑者。以御史平遼陽。叛卒顯。累官總督陝西三邊。念河套肥饒地。久棄之邊與敵。共欲策復其地。聞於言。言見以爲名美大悅。而言之繼。妻蘇有才色。言嬖而畏之。其父綱。頗交通關節。恣奸利。銑故綱同鄉。雅善之。亦有所結納。綱亟爲言稱銑才。言益自信。以爲功必可成。亟下兵部會廷臣議。銑所謂大司農金錢。以數十萬計。調山東河南良家子。亦不下十餘萬。皆心知其難不敢決。而言意亦小沮。會銑疏復請給誓劍。得專僇節師以下。上心惡之。始下諭言等。套虜之患久矣。今以征遂爲名。不知師出果有名否。兵果有餘力。食果有餘積。成功可必否。一銑何足言。祇恐百姓受無辜之僇耳。言懼不敢決。請上。乃以前諭下。司禮監印發兵部。及預議諸臣。嚴嵩既以窺上指。乃上疏。及稱敵之不易勝。河套之必不可復。師旣無名。費復不淺。而謂在廷之臣。無不知其非者。第有所畏耳。因引咎乞罷。上始報嵩。以言私薦曾銑任事之忠。不顧國安危。民生死。唯徇銑餽欲耳。而不允嵩辭。言懼上疏謝罪。且謂嵩於計議之際。了無異詞。而忽先臣等具奏。不過誘臣以自解。上不悅。責言之專徇私情。強君脅衆。下部院參看。嵩遂具疏力詆言之擅權。謂機事大小。毫髮不復關同。言亦力辯。上怒甚。罷河套之役。遂逮捕銑。而部院奏言事爲任意。迹涉強君。上因盡奪其餘官。俾以尙書致仕。言出國門而難作矣。始成甯侯仇鸞鎮甘肅。貪愎桀驁。數違總督進止。銑論究其罪狀。言擬旨令逮捕。嚴嵩旣得志。與崔元陸炳謀。欲深言罪。乃代鸞具草。謂嘗關銑復套議。故銑恨而中之。又敵入延安。殺掠吏民數萬。輕出定邊營。損卒復數千。懼而遣其子曾瀉。以五千金賄蘇綱。俾轉以二萬金賄言。故

爲之解。而戒使復套以爲功。時曾濬以胄子在太學。上遂捕濬與蘇綱下詔獄。陸炳極意煅煉。崔元行金於諸中官。實其事。獄上。論綱邊戍。且追所受金。因逮言。言始觀鸞辯。謂彼方就逮。發疏時。上下諭不兩日。何以知上語。而敷演爲文。又何知嵩疏而附麗若此。蓋嵩與崔元輩爲之也。其辭甚明晰。而上方怒甚。弗省也。銑就逮。以小緩期。罪緹騎長奪其官。法司常銑比守邊將帥。守備不設律斬。上不許。令更擬。於是取嵩指。以交結近侍官員。紊亂朝政。律斬。妻子流二千里。銑性果銳。有機略。其死不常罪。天下冤之。尋言至。時於車中聞銑所坐。驚墮車曰。噫。吾死矣。復具疏辯。其辭甚苦。而刑部尙書喻茂堅等據銑律以請。謂言實當八議。所謂議貴議能者。上怒。切責茂堅等。□□其語猶及。言前不戴香冠事。言妻蘇氏發廣西。從子禮部主事克承。從孫尙寶司承朝慶。皆奪職爲編氓。言至秋。竟坐棄市。年六十七。言雖以驕蹇得上。惡然亦頗能持爭。上嘗諭之欲退處西內。使太子監國。言時年六十。答諭云。臣全數已盡。萬死不敢奉詔。上爲之止。其後所深恨言者。挫郭勛與不肯戴道士冠。時天下方怨助之橫。與嚴嵩之奸貪。謂言能裁之。以是多惜言者。隆慶初。其家上書白冤狀。復吏部尙書已再盡復其官。賜諡文愍。予祭葬。言始有妾孕七月而蘇氏妒之。嫁民間生一子。後言死而蘇氏知之。迎置家。其貌甚類言。且得官矣。卒病死。言竟無後。

史官曰。高位疾顛。厚味腊毒。寵利之際。蓋其難哉。夏言以改制變禮。驟結主知。此洛陽少年所致恨於絳灌者也。旣躡躋貴近。志得意疏。抵隙蹈瑕。日在張弧履虎中而不悟。方以爲君恩可恃。而刃已在其頸矣。夫愛憎變於前。禍如發矢。說在彌子之駕車食桃也。使言學道謙讓。見微知止。何至與霍韜郭勛輩同類。

而並譏之耶。

鄭曉傳

鄭曉字窒甫。別號淡泉。其先開封人。祖徙鹽官。爲鹽官人。曉少有異質。年甫十歲。通經傳子史。嘉靖元年壬午。舉浙江鄉試第一。明年中會試高等。執政甚愛之。曉竟不一謁。授兵部職方主事。日取故牘閱之。由是盡知天下阨塞。與其士馬虛實強弱之數。兵尙書金獻民屬撰次九邊圖誌三十卷。人爭借其草錄之。甲申。以議大禮杖闕下。乙酉。大同卒。殺巡撫都御史。常事者請宥之。曉抗疏以爲不可。不報。內艱服除。補武選。又外艱去。家居八年。會朝廷特詔起廢。時許讚爲吏尙書。調曉考功。逾年始至。至轉郎中。巡按御史有所論劾不常者。曉勘得其實。反譎御史。夏言罷。會有詔考察臺諫。嚴嵩意在去異己者。曉更黜其所厚者若干人。癸卯。嚴世蕃以治中求爲尙寶丞。曉爲非故事不聽。嵩益怒。密疏曉抗上市恩。貶判和州。而世蕃遂遷尙寶丞。曉至和。日夜治民事。訪諸所欲惡。次第罷行之。民大悅。未幾遷太僕丞。丙午。遷南考功郎中。尋遷南尙寶卿。歷南太僕少卿。鴻臚光祿太常卿。癸丑。遷刑部右侍郎。甲寅。改兵部。兼僉都御史。出撫鳳陽。會倭奴入寇。江之南北運道爲梗。上下憂之。曉至鎮。勵將士。選民兵。集鹽場之壯勇。禦之於通泰。襲之於如皋。擊之於海門。擣之於呂泗。圍之於狼山。斬首九百餘級。賊震恐遁去。東南之賦四百萬石歸輸於京師。無後期者。又築三里閘以通漕渠。開湖櫃以興水利。淮以南迄今無水患。嚴嵩故銜曉。僅擬加俸。曉素以文學聞海內。又羶然不勝衣而出撫。以武功顯。人多以爲不可測。三十四年乙卯。遷吏部左侍郎。

尋遷南京吏部尚書未行。上以曉知兵，特旨留爲右都御史，協理戎政。奏罷諸軍之役於工作者，衆咸感奮。戊午，改刑部尚書。會楊溥總督宣大，曉兼掌兵部事。時議謂宣大重鎮，欲留溥久鎮北門。曉上疏謂：楊溥還本兵，則九邊將帥咸得人，而戰守之事咸飭。所可恃以無恐，甯獨宣大爾邪？上雅重溥，且重曉，詔令溥還本兵，曉仍刑部。奏論錦衣所治獄多失實，而五城御史受民訟非制。既又謂汪直於法必常誅留都亂卒，漸不可長。劾嚴嵩、張紳、董傳策。吳時來不可罪，諫立儲。郭希賢不可殺。薊鎮閩廣提督憲臣王忬、阮鶚誤事之失，不必深求。咸與嵩議不合。時御史鄭存仁者，善揣時宰意，妄以職掌奏曉。曉具疏述故事甚悉，嵩不能奪。乃從中搆之。詔曉執法終是自尊，乃奪職還家。角巾布衣，數攜一童子訪故所識。與論桑麻晴雨，或時共飯山蔬水藻，相對終日。見者不知其爲名卿，性儉樸，尤審於辭受。所居絕去紛華，松窗竹几，蒲茵練帷，蕭然如山僧焉。四十五年丙寅秋卒。子履澐等訟曉受誣事於朝，詔復其官。穆宗卽位，賜祭葬。贈太子少保，諡端簡。廕一子爲冑監。瀆舉嘉靖壬戌進士，歷尙寶丞。準以廕官南京都察院，照磨。曉爲學雖主用世，而於性命之說、義利之辨，咸能剖析精微。直窺堂奧。華亭徐階謂其持論正而不迂，嚴而不刻，剛而不激，高而不亢。與唐馬周陸贄抗衡。所著有吾學編、古言、今言、奏議文集、諸經解。史官曰：鄭曉練達時務，兼資文武，經術經世，卓然行其所是，絕無阿格。此賈陸以上人也。兼有良史之才，敘事贍而不夸，質而不野，是非必衷於道，使後世據爲倬史。嗚呼！若曉之直諒多聞，施於有政，誠不愧尙友矣。

呂本傳

呂本字汝立。餘姚人。生而端穎異。凡兒稍長。頤而白。皙眉目秀朗。父嘗攜謁謝遷。遷一見奇之。撫而嘆曰。異日名位差勝我。屬其子學士丕善誨之。當是時有鄒絢諸變者。皆名士。本與之下。其文遂灼然有聲。不攝本至京師。俾贊所業於費宏。宏復奇之。如遷。俾與其子游。尋歸。就試於浙。不利。而其父客丕。所以疾卒。本千里奔扶柩歸。除服。薦於鄉。明年游北雍。祭酒魏校愼許可。獨稱爲賢。登進士高等。改翰林庶吉士。時大學士李時器重本。以爲公輔器。世宗猝問時。諸吉士誰可大用者。時獨以本對。授檢討。充經筵展書官。校對列聖文集。南京司業缺。時翰林以南國子爲外僚。多不欲行。而皆謂本欲得之。時怪問本。謝曰。非敢欲之。唯上命耳。遂南。時南祭酒歷馬汝冀。鄒守益。黃佐。程文德。四五人。天下所稱賢者。然緩急異用。本劑而衷之。皆得其平。至本所自立條教。皆鑿鑿中竅。大得士心。守南司業可七載。澹然安之。始遷右春坊右中允。掌南翰林院。已遷左中允。領左春坊事。上心不欲權下移。而本試題用禮樂征伐。自天子出。其文又最精。劃大得上意。手以丹鉛標之。中外藉藉。傳本且大用。明年遷南祭酒。甫至。召領國子祭酒。本素以寬平得士心。其任兩都國子。士爭稱頌之。時嚴嵩獨相久。上謀置貳。令廷臣羣推。吏尙書聞淵。南吏尙書張治。吏侍郎徐階。南兵尙書韓邦奇。禮侍郎歐陽德。未及本。上得本名。意若曰。是故能尊君者耶。持之十日。因密採國子諸生。稱本若一口。於是特簡本與張治。而本爲少詹事。兼翰林學士。疏辭不允。當本少時。謝遷引自擬。而遷之大拜。其廷推與李東陽同日。亦以少詹事入。而年亦相埒。人始歸知人於遷。時上居

西苑齋宮獨嵩直侍機政咸趣之。本日入文淵閣。默默無所爲。則手錄國史之有關於館閣者。凡十餘帙。居久之。上始召本與治入直。賜金帛酒饌甚備。於是稍與機政。尋續修明倫大典。充總裁。明年進吏部左侍郎。兼東閣大學士。嘉靖庚戌。大敵闖入都門。內外戒嚴。時徐階爲禮尙書。而本與之階嵩召對於永壽宮。上顧本與階曰。二卿久失相見。禮階頓首謝。因頗陳戰守之策。而嵩請視朝。本皆推言之。上稱善。敵退。本上章請收瘞三輔暴骨。而賑其生者。嚴飭營兵以圖善後。悉下所司行之。上頗急邊事。問本。本言日風霾不以此。兵象不可不預防。而咸甯侯鸞方握兵柄。挾上寵橫甚。欲併都御史商大節。兵大節疑其不軌。不可。上怒。逮下獄。欲坐以領兵官已承調遣不依期策應失誤軍機律斬。本謂大節事方在議。非有所調遣也。且無失誤。不當坐之。不納。鸞又言敵入犯。請發糴餉從軍。又不給。則民禾固寇食也。聽卒自食之。便。本言業設督餉大臣。所至有伏食而復載糴。於軍過費。且古之善將者。卒納取人。一物卽斬。而故縱之食。田禾。非所敢聞也。鸞又議開市與虜。和本又持不可。鸞以是銜之切骨。數上密疏。詆譏本。上不爲動。而鸞竟敗。本前後所草疏。或自上。或階其僚長。咸伉直無所依徇。而其於裕邸事尤切。始上以己酉春立莊敬皇太子。旣冠出閣。亡何薨。上疑之。而二王生同歲。次長在裕王。禮臣請册東宮。上以問本。對曰。自古帝王莫不早建元良。以正國本。申令皇太子年十五。則選婚。東宮與諸王禮異。今二王皆長。選婚讀書其期也。宜亟正名。如禮臣請。上謂不難。己酉春事耶。本又對曰。酉春事何足慮。天所授之。必不以册累也。亡何禮臣復上請。婚期迫矣。以東宮未定。不敢議出府。乞暫於宮中舉之。上謂諸王婚於其府例也。何宮中爲本。

又言先年五王婚於府。故名位等。又當各之國。今冊立禮特未行耳。於婚府未使。且禮不可不別。上竟不肯別禮。聽以明年三月冠。六月出閣講讀。九月議選婚。本又言婚必當在大內。先朝有太后。有中宮。有東宮。故天子尊而羽翼壯。上骨肉唯二王耳。而驟遠之。願上竟然處空宮。臣等不勝寒心。上又不聽。二王卽邸隔一垣而居。歲時不復召見。宿衛單薄。人心洶洶。謂上有所適莫。各欲自爲地者。中允郭希顏上奏。請景王之國。以安儲。意大是。果爾則東宮可無冊。而物情自定。覲覲亦息。上大感悟。卒如其言。時創敵議。所云出景王以安儲。意大是。果爾則東宮可無冊。而物情自定。覲覲亦息。上大感悟。卒如其言。時創敵議。築外城。而燕之士庶財賄。南關獨當其大半。上欲盡城其四垂。本請併力以城南關。俟竣事有餘力。而更三之。報可。光祿歲費至三十萬金。上疑其有乾沒。以問本等。具陳光祿歲額二十四萬。先年費省。可十三四萬。餘以資匪頒好用之需。而今倍之而更不足者。豈盡上所用也。乃條上四弊。曰傳取錢糧之費。曰關支酒食之費。曰門禁之費。曰磁器之費。上乃責寺臣陳狀。而令給事御史歲籍以聞。本又與同官疏。謂入直諸臣有常祿。有大官餐錢。而又日三飯。於費尤甚。上爲停二飯。時嚴嵩久貴。爲上所親禮。雖視其僚。而子世蕃挾之橫甚。所願指諸司亡不披靡。巨璫助臣。緹騎大帥。靡不託姻婭相結納。願以徐階地逼。百方批根之。階惴惴不自保。本起東海孤生。亡絲毫爪葛其間。不親不疎。坦坦行意。自若。嵩亦無以難也。上多祠釐甘泉。應制之作。咸以稱旨自喜。本獨不爲意。聽客裁上而已。有所奏對。因心而發。卽不能盡合。亦不至忤。人以爲本遭每得天。盛德所假。蓋亦有之。自爲東閣大學士兼禮部尙書。再加太子太保。進文淵閣。

上特命本於吏部。俾差次六卿以下。堂上官有所登斥。事竣稱旨。進少保兼武英殿大學士。加太子太傅。再加少傅。階光祿大夫。勳柱國。廢一子入冑監。兩子拜中書舍人。累賜麒麟飛魚鱗衣。它金銀錢帛。不可勝數。賜俘奴如功臣。而它若遣永明殿釋奠先師。皆儒臣所希觀者。本以爲恆。本丰采如峙玉。旣以盛年居大位。出入朝行。咸目屬之。謂軒軒朝霞舉。如會稽王。撫按士大夫。有情禮。而性又至孝。其居官。母未嘗一日不在養。母卒。本已踰五十。哀毀不勝。上欲慰留不得。遣行人護行。給馳傳歸。上書謝。旣服除。念受上恩遇深。不取自同於去國者。遇大慶則賀。大工則助。而上亦時時念之。謂舊人惟本在。輔職缺。輒意屬之。而誤聞其病。乃寢。本家餘姚。餘姚之故城小。在姚江北。而江南多逼江而居者。十倍於北。本念島寇方訖。請之督臣胡宗憲。謀城江南。本聚材以倡。而其民憚興作。且逼江。慮有侵室也。譁而夜焚其材。本嘆曰。吾出資以衛彼。而彼乃仇我。復令其子元與邑之士大夫疏請於朝。下宗憲所。官爲給直城之。其偉亦數倍於北。寇後至。無所掠。徒睥睨去。民始大德本。爲生祠祀之。本歸。以牢醴上壽。與祀祠者踵相半。本自惟姚故饒邑也。以賦役兩困。其賦額輕於三吳。而苦奸胥黠豪之飛詭。田與賦恆相失。田去而賦留。不得不取償於里甲。白於邑。丈而清之。伏田出矣。又力主均其賦。則吏不得以下上其手。而役之困。則重於十年兩徭。雖名爲逸四而勞一。然當其勞。則加派蠅出。力竭而不可支。吾又邑多貴客。科第優免過當。於中產益束溼。白於邑。盡徭其民。民歲出錢以予縣官。官爲召傭。又請以身先之。不得名一畝。徭士大夫信本。亡敢違者。賦不徭俱不困。民益德之。而御史遂推行之全浙。及它省。皆稱便。本家頗有池亭花竹之勝。客至則

留留必盡興。本頽然其間。竟夕不倦。人以爲裴晉公白香山之在洛。不是過也。本居相位。仍李姓。自號南渠。人皆稱爲李南渠先生。至是始疏復姓呂。更其號曰期齋。謂吾雖愚。敢忘以聖賢自期。天下乃亦更稱曰呂期齋先生。年八十。上命彩幣餼酒。卽家存問。命有司月給米四石。歲給夫六人。本頓首曰。上不忘老臣。老臣乃以邱壑之腹。累縣官帑。因上書謝辭。不允。錄一子中書舍人。又四年卒。上聞之。爲咨嗟。賜祭葬。贈太傅。諡文安。仍予一子中書舍人。所著有期齋集奏稿。爲文典暢平直如其人。

史官曰。呂本立朝。與嚴嵩俱。幾類挾兔之鷗。才弱位逼。鮮或免者。卒能安坐政事堂。躡躡公孤。以功名終。豈傳所謂得天者乎。抑道固委蛇。不來入宮之妒也。他日太常議諡。郭正域毅然欲起而奪之。斯其人可概睹已。



明書卷一百三十三

列傳四

名臣傳 十八

宋儀望傳

宋儀望字望之。永豐人。成嘉靖二十六年丁未進士。爲吳縣令。未幾。卽擢監察御史。移疾歸。復爲御史。未幾。陞大理寺右丞。緣事落職。出知蘇州。未任。拜霸州兵備僉事。尋陞大名兵備副使。卽移監福建軍。尋削二秩。需次。久之。始補四川按察僉事。卽進副使。移視福建學政。以婦卒自免歸。道遷其省參政。卽入爲太僕少卿。甫上。遷大理左少卿。遂進都察院右僉都御史。巡撫南直隸。提督軍務糧儲。久之。以功遷右副都御史。改南京太僕寺卿。已轉大理卿。有所齟齬。乞歸。始令吳其邑人猶少之。儀望不動聲色。發摘奸弊如神。胥吏洗手而治。念諸區所苦者長賦。而長賦所苦者長運。往往破家。儀望倡諸區各出公田以贍之。所出田畝。計本受田爲差次。卽貴勢無得免者。民以不困。敵大入犯。餉不給。戶部計專官併責吳。舊人洵洵且竄。儀望白郡榜慰之。而條處其緩急。竄者皆復。乃與比邑合而置義塚於六門之郭。禁毋得水火葬。吳俗大變。孔門賢言子。故吳人爲創文學書院以祠之。與諸生講道肄業其中。後皆出爲名公卿。儀望旣

精於法比時時麗情兩造數百人。不踰時解去。爲御史時。上書論大將軍仇鸞擁勁兵。居肘腋間。挾敵自重。無人臣禮。時鸞恃寵驕甚。聞者爲縮舌。上雖內私鸞。而無以易其言。寢不下。未幾鸞敗。復陳時務十二策。上皆允行之。按河東巖。持法亡所徇許。巖事簡。乃削河東書院。與諸生講習。多興起者。移疾歸。銓復爲御史。因論邊事。語及嵩。子世蕃及胡宗憲淫侈。撫臣阮某之婪荒。請攝治之。嵩等不說。會儀望督視三殿工。中官議工直日一鑽。儀望不可。又欲悉易殿趾石。又不可。第易其燬而弗堪者。世蕃私賈人金。屬工尙書陟陽必進者。辟與工事。又不可。於是衆怨叢積。工成。敍遷大理丞。世蕃自以爲功。而儀望無所報謝。急請歸。適風霾變。嵩欲有所廢樹。乃考察諸司。時必進爲吏尙書。與世蕃比。遂謫彝陵。其兵備薪州日。前是有西甯侯宋道。其地盜夜迫之。倉皇溺死。盡剽其貲財。詔捕之。格甚峻。儀望鉤得其巨魁。悉置於理。甯人懼其威神。竟任無竊發者。涿爲都之南輔。力請城之。最爲堅完。又疏豁洪武以來養馬逋稅。民大悅。其自大名移閩監軍。於大帥戚繼光合筴破倭寇。斬無算。會福建鄉試。程式文出其手。冠絕一時。咸稱其有文武材。而計吏之譎復下矣。乃從容遊武夷賦詩歸。而灌園意甚適也。屬邊事棘。廷薦前後十八疏。於是起止補四川僉事。五遷。歷撫南直隸九郡。以其故令吳深曉民間疾苦。與吏弊風俗。至則一切務爲寬大。而於松江金壇溧陽豪貴人之匿賦。而以重累單赤者。亡所縱貸。會郡邑水災。乃上書減歲租。發儲粟以賑。是時海警稍解。吏士諱言兵。而儀望獨與兵備。王叔果計。修餘皇。練卒伍。飭戎器。申嚴賞罰。忽倭狎至。乃遣舟師三覆之。於外洋。浮斬敵口。奪杖器甚衆。會有詔雪建文死事諸臣。儀望謂金陵其死所也。建表忠。

祠聚而祀之。宋楊邦義以不屈敵死江甯。有祠與墓。而墓且湮。儀望求得之。爲置封樹。因爲祀而屬有司。歲饗之。其敦勵節義如此。太常卿袁洪愈。國子祭酒姜寶皆里居。向爲張居正所擯。儀望力薦之。意與居正左。噉給事中劾之。儀望不動。坐與御史論鹽盜事相異。同雖入爲大理卿。猶用前隙。營毀。解任去。遂決意不復出。萬曆六年戊寅卒。年六十有五。海內惜之。儀望少磊落。感慨有大人志。一日讀宋史岳飛事。掩卷而嘆。父怪問之。曰。令兒生其時。不飲血而碎檜首者。有如日。又讀唐史裴度傳。所謂賊滅則朝天有期。賊在則歸闕無日。大嗟泣。曰。壯哉。男子當如此耳。嘗從鄉先生聶豹游。已又游歐陽德鄰守益門。最後印證於羅洪先。其詣益齋深。服膺王守仁致良知之說。時方議以守仁從祀孔廟。人多難之。著或問一篇。見者無不爽然。後十餘年卒。以守仁從祀。儀望於學能識其大。其爲人氣豪。不帖帖細瑣。而內行特純篤。所著有陽山稿。華陽館集。

史官曰。闕

趙孔昭傳

趙孔昭。字子潛。別號玉泉。邢臺人。生數歲。動止卓犖不凡。十九舉鄉薦。二十六成進士。授鄆陵令。孔昭素精習法比。便案牘。大事斧斷。小事理斷。其興利去奸。腕字單赤。凡吏胥素舞文。皆若負霜雪。而大指寬。聞詣學宮。憫其傾圮。日非鼎新學宮。誨惠生儒。增修邑城百雉。必取穹堅。諸所厝置。不以煩民。蓋前六十年爲故少保王憲。爲令有善政。鄆人思之。至是爲之語曰。前王後趙。擢監察御史。始按遼左。風稜肅然。大帥

李綺者故與成甯侯仇鸞比而貴貪虐任情抗疏按核之褫其職他債帥以次論奪毋得免者再按福建所操持如遼左於吏治加密時閩已中倭孔昭筴戰守核功罪每奏牘上尙書無不嘖嘖賞服再按浙江是時烏夷訐朝廷命工尙書趙文華視師文華貪鄙無恥恃時寵挾嚴嵩卵翼則又最橫文華以浙人持監軍節會都御史曹邦輔有戰功文華惡其不相推遜反欲劾其調度失策孔昭業爲救邦輔疏以示文華而語之曰年來遺賊至唯有烏獸竄耳所見唯一曹中丞強人意而公摧折之何以厲天下文華語塞第曰任公救之上於吾兩人者孰重孔昭曰惡是何言也俱爲臣子伸所見何以能逆探人主意且公雖重安能越理而重於我文華度不可已又終以桑梓故懼孔昭難之追寢其疏以解孔昭會監臨浙闈試文華有一子應試乃謬暱而要之曰老特舐犢奈何孔昭陽爲不悟入棘約束諸寮案曰司空謂我矣毋得與寒士爭進罷其卷不錄文華恚甚然莫能報也文華具報績因盡籠諸人功而歸諸己孔昭嘗會蕞草盡削其張大誣罔語奏疏大有異同文華雖蒙賞賚卒以此敗陞南大理寺丞進南右僉都御史督操江防外艱歸服闋召撫宣府宣府故敵衝頻年土駁塚且盡孔昭撫循其瘡痍尋敵入犯精騎突至紅山京師大震孔昭與總督江東禱而尾之走論功賜金幣以不能事言者見苛摘解任需次於家將發而吏以故事進贖錢數千金酒卻之不願尋內艱除而誣盡白人皆交口譽以其所在著績而浙爲最遂以故官巡撫浙江提督軍務浙人謹呼曰是能折貴臣角者及至而烏警屬已緩則爲汰冗兵節縮不切橫賜溢廩尙方織作歲日益民不勝機杼疏請寬減之得報可又條奏地方便宜數十款其要者如定屬郡之

兼轄禁島土之開墾。搜礦盜之窩窟。裁三司之繁禮。又若議賑免停旬戍。補獨貨。上皆行之。著爲令。奏復新建伯王守仁世爵。召爲戶部右侍郎。尋轉左。兼僉都御史。總督漕運。兼撫江北。時淮徐屢中水。飄溢廬舍。民採芡苕。網鮭蝦。供朝夕。猶不給。孔昭於常請蠲賑外。復移帑金。招鹽商平糶。值所全活不可勝計。以糶運阻。免歸。穆宗卽位。言官薦起。改兵部左侍郎。兼官若故。撫山西。兼督雁門諸塞兵事。孔昭行相邊。微要害。乘高爲峻。因卑就深。皆屹然天險。敵騎至不敢入。賜白金彩幣。無何。大臣閱邊者。以其績上。賜如初。孔昭於屬吏賢者加膝。而至破侵餉。收伏贖。若神。一切以三尺繩之。不敢用其術支吾。入協理京營。尋病卒。年六十五。孔昭爲人。皙而秀眉目。朗洞森坦。不爲崖谷。孝友天性。習爲儉。衣浣不至三。緝不至三。不易也。出入倪素。徒從稀簡。所買產多廢。好吟咏。尤邃經術。所著有文集若干卷。七巡疏稿若干卷。

史官曰。閱。

李世達傳

李世達。字子成。號漸菴。晚更號靡菴。涇陽人。少穎異。日誦千言。自髫年卽具博大之器。卓犖之識。一時薦紳先生咸器之。年十二。名噪甚。爲布政使楊守謙所知。諸所崇禮備至。西安知府胡敬見而奇之。與爲忘年之交。常是時。已瑩精大道。旁練經世業。常夢謁太祖。授明珠一命。曰善自珍之。異日當爲國寶也。年十九。登嘉靖壬子鄉試。丙辰成進士。授戶部主事。癸亥調吏部考功司主事。已調文選。以養病歸。隆慶元年。起陞稽勳員外郎。未幾調考功。陞郎中。調文選。丁祖艱。三年起。陞右通政。進南太僕卿。神宗卽位。陞右僉

都御史巡撫山東。進副都總理河道。六年戊寅。以原官巡撫浙江。旋告病。居八年。復以原官起。總督漕運。兼巡撫鳳陽。甲申。陞南京兵部右侍郎。改戶部。是歲。陞吏部左侍郎。丙戌。陞南吏部尚書。改南兵部尚書。參贊機務。召爲刑部尚書。改都察院左都御史。掌院事。壬辰。以六年滿。加太子少保。癸巳。乞歸。許之。二十七年己亥。卒。年六十有七。賜祭葬。諡敏肅。始。世達在戶部。監兌湖湘。旦暮竭心計。佐度支之急。前後入銓司。佐黜陟。品藻人羣。百不失一。會大計。當事拱手聽裁。卽見斥者。無不心服以去。時徐階在柄。地而乘銓者。爲嚴訥。世達與陸光祖同爲司屬。得以搜揚側陋。薦進之。往往從田間。躋華廕。列卿貳。銓局之公。流聞宇內。前後所未有也。其開封山東議。班操。獨積逋。減馬價。著爲絜令。時蔣大爵。范儒以明經舉。安廷璞。李遐齡。以知印擢。楊果。趙蛟。以都吏進。膠河議起。世達身履其地。相土宜。權經費。所爲條析利害甚具。東土不至勞民傷財。爲大役累。撫浙不數月。辭疾引退。起督漕河。念寶應湖險惡。歲漂舳艫無算。爲請開越河。殺水勢。列五款以上。綱領節目。犖然畢具。葺年而竣。比原估料價省一萬有奇。在南吏部。與海瑞意氣相期。擔荷國事。所甄敍羣品。如闕眉睫。大察汰遺數百人。下逮輿臺。無不悅服。爲刑尚書。章數十上。平允詳慎。務廣上好生之德。時上惡邊臣僞增首功。怒至不可解。世達劑於輕重之間。以定厥罪。而比附重辟。執不奉詔。卒出其人於必死之地。人稱爲回天力。會密遣廠校偵部事。世達慮弊竇不可長。屢疏明其非體。乞亟罷去。上改容謝乃已。權璫憑藉威靈。勢張甚。在事諸臣莫敢誰何。世達具疏革其禁。近供事徐正。罪以杜禍源。每發宮闈所未發之奸。開廷臣所不敢開之口。御史職雄峻。所抨擊無與抗者。往臺長不甚有。

所甄別。世達謂吏治日衰。民生寡遂。皆此之由。乃舉行四道考察。例斥韓介。劉瑜。黃正色。輩數人。臺中棟然。且申明憲典。傳布天下。俾撫巡無得以間。餽相加遺。所薦下吏。亦無得執贄及門。遠者論如法。於時道路風清。苞苴弊絕。世達正以褻躬。忠以徇國。不難以一人排羣議。觸忌諱。侃侃然貞而不激。通而不隨。宏而不疏。細而不挑。獨斷於是。非雜選之中。抗色於傾側危疑之際。國事既濟。身名亦全。其經濟之業如此。有奏議八卷。

史官曰。孔孟論學。莫急於知人。蘇子瞻乃謂蕭何知韓信。非有術而可學。何其謬也。世達胸懷洞達。無所不苟納。卽窮鄉下吏。片長寸善。或舉以試之。無不知者。此豈得之性哉。呂夷簡爲相。於四方替罷謁見者。必問地方人才。客去隨疏於籍。故朝廷索才。如取之囊然。譬之良工構室。棟梁榱桷。小大畢獲。誠儲之素也。相傳世達有數巨冊。人才臧否良楛。種種皆具。惜未大用而去。然其及於世者。不可沒也。

陸光祖傳

陸光祖。字與繩。別號五臺。平湖人。性岐嶷不凡。四歲讀毛詩成誦。八歲從其父遊。道遇客語安南事。從旁曰。是必克夫。以聖天子聲罪討小夷。如振槁然。何煩兵甲。客奇其言。嘉靖十六年。丁酉。年十七。與其父同舉於鄉。又十年。丁未。成進士。授知濬縣。濬故額五十里。邑疲耗不能役。請裁其十里。以寬民力。當路不可。光祖持益力。卒如所請。秋潦傷稼。光祖涕泣呈兩臺。皆以非時卻其牘。乃自爲疏上之。辭甚懇。上爲惻然。下部減稅之十三。邑多輕俠。爲盜藪。光祖把其宿負。編之伍而討。以軍令。咸請盡力爲耳目。盜發輒得。獨

鉅盜李以平蓄異志不悛。乘入覲。嘯萑苻爲變。覲歸。立擒之。邑文士盧栢富而才。先後令皆與相昵。以得罪。令志中栢。擢大辟。坐繫十三年。有司以時高貨。莫敢釋。光祖立出之。御史故難之。曰。若不知栢富耶。光祖正色曰。獄果常。陳仲子無生理。否則否。尉何避焉。竟出之。栢爲謝。光祖曰。我伸三尺爾。竟不與見。陶仲文以方技得奇寵。勢張甚。邑有李榮爲其私人。橫行里中。光祖捕置諸法。仲文奉命祠邯鄲。故出魏。效爲榮地。光祖不爲移獄。內卿王占長垣民田爲業。民頌諸臺長。諸令皆嘍嗜不能制。臺以屬光祖。勘果民產。立歸長垣民。庚戌。胡闌入塞。尙書趙錦議役三輔民築塞。光祖持不可。錦劾其撓軍興。上置不問。及復。請出錢踐更。三輔民賴以免役。陞南禮部主事。內艱服闋。起禮部主事。歷議制郎中。侃侃持正論。守陵宦官張方進甘露請恩。光祖卻之。知縣吳府上方藥。欲邀寵。光祖召至邸。責曰。若儒者而欲技幸耶。官之以爲榮也。進以技。何榮之有。府悔稱疾去。景甯王入京。自陳設醮祝釐。有司邊維垣等毀牌位不道。上大怒。光祖言王擅離國。違祖禁。宜有所懲。艾他。妻非語不足聽。上從之。神宗生裕邸。光祖請告廟。受百官賀。疏入。留中。有頃。賜聖母寶鏡。中外翕然。謂其有卓識。癸亥。調驗封郎。已轉文選。光祖雅有人倫鑑。知天下士高下甚悉。至是。佐尙書。語對如流。黑白分明。乙丑。佐計。汰黜惟允。不爲權勢假。而又憐才持大體。如蒲坂王崇古。仁和張濟。嘉魚方逢時。曲周一鶚。肥鄉張學節。皆掛人齒頰。光祖力爭之。謂此皆天下士。可濟緩急。奈何以蜚語挫抑。留諸人。後皆躋九卿。以邊疆績著。涪安知縣海瑞。爲上官所排。光祖力明志節。奏授戶部主事。侍郎朱衡以智囊附擢。幸。士論薄之。畏其與。援不敢動。光祖推爲南工尙書。衡不勝憤。嗾御

史論光祖恣橫。時已遷太常少卿。而內璫位本仁申宿憾。從中搆。得旨罷免。居數年。神宗卽位。起太僕卿。進南大理卿。入爲工部侍郎。居正方柄政。橫。光祖其同年生也。以故事候朝房。大僚皆屏息立語。光祖素坐。坐故久。居正目攝之。前後調護給事余懋學。御史傅應禎。劉臺。比部郎王用汲。語劄切。居正蓄怒久。及爭改折漕糧。大恚曰。浙人難事如此。光祖曰。某忝九列。顧不得使論列天下之事哉。公奈何以訑訑聲音。拒人千里外。移疾歸。居正敗。起南兵部侍郎。改吏部。時改居正氣銳。又力爲居正解。御史李植江東之。丁此呂輩。爭壽宮發科場諸不法事。語侵執政。上心動。光祖佐尙書楊巍上疏。勸諸言事者。左遷各有差言。益譁。尋遷南工尙書。謝病歸。又二年起南刑尙書。亡何入爲刑尙書。改吏尙書。攻者斷斷未已矣。光祖不顧。銳然以清議爲己任。十年壬辰大計。破情面。拔孤寒。又嘗謂人才國之元氣。尤當注意老成。一時名碩。在考槃者皆推起。或問曰。公之啓事洵善矣。多要津所不予之人何也。光祖徐應曰。操世柄者不宜于天下。以好惡之隙。抑情而平之。勢不得不矯情。一切從某始。先是富平孫丕揚代爲刑尙書。長安老隸訖曰。是故御史以專擅編氓去者耶。光祖聞而笑曰。鄉吾被放。謝恩歸。而揖御史於朝。片語相知。今三十年矣。趙用賢。沈思孝。蹇諤。自喜。廷議數面辱光祖。光祖故折節。頹而柔之。且力爲推挽。用賢時語所親曰。吾乃爲平湖所容。思孝巖居久。每扼腕時政。曰。持公議而不以愛憎奪者。平湖一人而已。識者以此窺其權略。而政獨恨次骨。曰。不自意爲老秃翁所賣。光祖謝曰。祖昔爲郎。文貞知我。我不敢稍貶。以徇文貞常薦土。祖不可。文貞顰蹙曰。業已聞上矣。奈何。祖避席曰。相公不以祖不肖。備員銓司。誓不敢以所未信。阿相公。

意以誤天下。請從此辭。文貞始不堪。卒相信。今老矣。誓以文貞報相公。不意相公望之深也。文貞者。徐階也。光祖在銓。一行其意者。大指以抑僥倖。振淹滯爲急。京師爲語曰。近世之姚崇也。尋以枚卜拂臺諫議。彈去之。大學士王家屏亦已封還去。敕同出國門。光祖歸杜門。後進有知人叩者。光祖曰。凡人初以負氣執拗迂闊見排。卒多樹立。或稱善處事。識時務。此其人非君子者流。即使任事。亦無用人以爲知言。史官曰。余雅聞薦紳間論近世有道之士。必嘖嘖當湖。云及光祖生平行事。多矯矯孤立一意。以別白黑。辨流品爲己任。意所獨是。毀譽紛於前。愛憎炎於中。當之屹如也。傳所稱仁者必勇。歟。夫蘇之模稜。廣之中庸。其不得列於有道也久矣。

嚴清傳

嚴清字直甫。號寅所。其先祖子敬。自浙嘉興徙居滇。父鏐生四子。清最少。而咄咄奇悟。鄉先達光祿施昱擇壻得之。以女歸焉。嘉靖癸卯舉於鄉。明年成進士。除富順尹。富順故劇邑。或以調清。此未淬之劍。而輕斬蛟斷犀耶。清謹謝曰。小子何敢抑余劍也。乃方在治中。惟公之所鑄。而擇利可乎。至則能聲大騰。以救荒課爲天下最。內艱。再除邯鄲。治如富順。尋入爲工部主事。歷郎中。督修外城及九陵。皆斤斤謹出納。侵牟吏膠手。所省費以巨萬。已工戒。當敍陞。辭不受。受加俸。外艱。復除兵部郎。出知保定府。居保定三年。課復最。歷陞易州兵備副使。陝西參政。四川按察使。轉右布政使。所至自撫按特舉。及兩京臺諫會舉。不下數十疏。隆慶二年。戊辰。擢都察院右僉都御史。巡撫貴州。尋改四川。清故川吏知其民所疾苦。乃具籍川

課之當輸京者。議割二十萬金。就近改給陝西軍餉。罷郡縣卒之團操。成都擾民者。貢番入邊。則爲定限額數。額外不得浮一人。他約束一切。以惠利爲本。而痛持蒙家悍吏以法。以是士大夫譽誹常參半。而趙貞吉獨深知之。會有以流盜誣清。當落職。貞吉力爭。得予告候調。居五年。起督鴈門關。不果。改貴州。入爲南大理寺卿。尋改北。歷刑部吏部右侍郎。陞刑部尚書。上之知清。自其在刑部能執法。不愆權勢始。既柄用典銓。則日夜討故事。論官材。丞椽以下。皆親爲櫛署。楊遵彥之默識。黃次公之至精。不能絕也。上華孳以太平屬清。年未艾。以病歸。歸之日。遣使慰老。仍賜馳傳。萬歷庚寅卒於家。清性檢厲。勤於事。其操行嚴於趨舍。辭受尤廉。廩所居官。身自與僮僕食粗衣。敵然也。囊中裝雖圖書。與琴不敢取。諸人蜀王慕之。使使致扇餌微餉。不受。初拜尚書。貧不能具衣色。束素犀帶以朝。其輩或指戲之。清釋褐時。玳瑁七品帶。故在耶。清笑曰。不然。夫犀帶不裝金。安知非玉。吾願恐難爲上耳。清薰然長者。色溫氣和。人無賢不肖。貴賤皆禮接之。其立法處議。本人情。計久遠。無崖岸峻物之行。謹昨抵掌之談。以故主眷優渥。而海內稱大人之能安國家。鎮雅俗者。必推清云。

史官曰。闕

程文德傳

程文德。字舜敷。永康人。嘉靖乙丑進士。方上臨軒策士。覽文德對。嘉之。御批擢第一甲第二人。官翰林編修。已坐同官楊實卿封事。下詔獄。謫信宜典史。前後翰林三年餘。所獻郊祀議。選庶吉士疏。靈雪頌。靈鶴

詩親蠶行。再進內訓講章及四詩。上常開無逸殿。宴近臣。文德與上無逸講章。乙未量移安福知縣。丙申召爲南京兵部主事。轉員外郎。丁外艱。辛丑起復。補兵部督郎中。屢上禦口疏。甲辰擢廣東按察副使。提督學校。未上。擢南京國子監祭酒。庚戌擢禮部右侍郎。以外警奉旨提調監督宣武門。并相陸妃墳。壬子轉吏部左侍郎。癸丑兼翰林院學士。掌詹事府事。教習庶吉士。乙卯將擢南京吏部尙書。忤旨。改南京工部左侍郎。辭謝有言。擬職罷歸。文德爲人博厚坦蕪。不設町畦。聞甘泉吏部尙書滿若水明道術。走其門。未有得。其後激於人言。卓立檢飭。斷斷必爲君子。不忍以世俗終其身。幡然變故態。視舊所爲如兩人。嘗祭長陵。中道偶談孝宗事。爲淚下。悲不自勝。見實卿封事調停。削名甚衆。拷掠無一語。在廣中舉何王金許之學。誨諸生。遷信官學。建麗澤書院。至安福行鄉約。處里役。摧強節用。下士愛民。建復古書院。在兵曹。嘗言車戰法。多見采行。臨南雍。以體諸身者爲言。用情尙質。而謹服習。詹事故事。養尊望而遠外嫌。文德聞兩直隸河南山東大饑。朝議開納。而澤不速下。爲計粟麥黍菽可助食者。稱其數。請早入。以期有濟。上從之。至以得罪歸。囊無餘金。

史官曰。調

李遷傳

李遷字子升。豫章人。生而端重。不妄言笑。成進士。肄業禮部。奉昭聖皇太后遺詔使蜀。蜀王與其撫按藩臬守令。餽遺珍貨甚厚。悉卻之。又使滇黔。公而下餽之。卻之。俱入蜀。授南兵部車駕主事。司故積造舟資。

巨萬計。前是司出納者不能無染指。僅半與役卒。尙書張邦奇一見器遷。遽以委之。遷請邦奇會部官曹郎而下。坐堂皇上。集役卒授之。卒皆懼服。邦奇勸其法爲絜令。尋進員外郎。後宋景爲尙書。事事倚任之。其最巨者。諸衛貢舶。責之衛卒之饒有力者。官給其直。而中官監之。直盡入中官橐。而受責者挫其產以償。猶不給。遷請毋令中官監。亦不以責衛卒。而官董之。景如其議。人大稱便。景入爲左都御史。公卿出祖龍江。景曰。所與周旋士人多矣。耿介者虞其才。恢廓者虞其守。於李郎吾復何虞。已獨留遷。促膝論天下事。久之乃別去。尋進武選郎中。繼兵尙書。爲韓邦奇引遷與吏部郎楊繼盛輯定樂志。擢山東濟南知府。山東諸藩臬祿俸皆資之。泰山進香。珍貝錦帛織作之類。藩臬郡邑之長。多私其重者。遷獨會諸寮儕等之。使次第持去。不以毫髮益守帑。使者聞之曰。胡威之清。不加於此。諸長亦媿如其指。德王請惠民藥局。撫按業許之。遷執弗可。已復請織染局。復持不可。於是改建祠祀先儒。使諸生讀書其中。計吏爲天下循良第一。進湖廣按察副使。進右參政。遷廣西按察使。時靖江王與諸宗閱。而各上章相訐。下臺臺下藩臬。以藩使之懷不任也。使遷先遷以謁王。王謝病不見。乃奏記王曰。大王以某之來爲宗人耶。某非爲宗人也。爲大王也。某之來內之。必欲拒遷者。何也。王乃許以翌日見。見而蓄怒待之。坐定。王盛氣言曰。不穀之先王奉高皇帝恩。以有茲國。常攝諸宗人。諸宗人不受攝。而子大夫乃右之何也。遷對曰。大王宜自責。毋責諸宗人也。王益怒曰。何謂也。遷曰。大王能念高皇帝恩甚善。先王者高皇帝從孫也。以罪廢。嗣子惇僖王賢。而高皇帝復王之名。雖一郡其禮秩威命實大國也。今嶺以南毋貴於大王者。諸宗人之衆。亦無如

大王者。乃大王挾貴以凌諸宗人。諸宗人亦挾貴以抗大王。夫有司者。故出諸宗人下者也。諸宗人甘心有司之約束。而裹足不入端禮門。大王能忍之乎。忍之是大王徒擁虛器耳。不忍之。則王與諸宗人之訐無已也。且宗人之去賤無幾。罪易勝也。其指逾萬數。不易盡罪人。有如天子一旦赫怒。咫尺之詔下。大王能偃然而已乎。某等所以見者。願大王之爲悼僖王。不願如先王。故曰非爲諸宗人也。爲大王也。王色動。迺前席曰。先生何以幸教不穀。遷遂說王曰。大王急下教自責。令諸宗人一切聽臺議。某等請分諸宗人爲十餘房。房擇一篤行長者長之。其長得以懲訓不率。重則付柱後。惠王耳。大王無與也。月朔必朝見。祭必從。請名請昏。必以屬大王。則大王之貴長在。而諸宗人亦服。王曰。善。具如遷指。臺爲疏上。上從之。靖江遂甯。進湖廣左布政使。當入覲。宿郵中。盜以左使當巍。爨夜窺之。亡所得。得一稍重者。踰垣而出之。則古石研也。乘而去之。課績復爲天下藩臬第一。進右副都御史。巡撫真定。至卽疏請固關隘。考軍實。計儲餉。分保甲。定審編。嚴窩禁。設險分城。以時哨警。權閹馮保深州人。有侄當嫁。有盜可五十人。道剽其資。莊其兄疑仇家爲之。白州知州審其誣。縱之。遂白遷。謂守納盜賊。遷曰。守不受賕。吾悉之。復白之。監司爲捕仇家。鍛鍊五毒。強誣服。引同盜者至百人。獄上。遷曰。馮氏始訟。牒五十人。胡百耶。悉得其誣服狀。破械縱去。保聞怒甚。具疏草以語公卿。欲論守受賕。而遷故庇之。兵尙書楊博曰。吾不知守。知中丞毋太草草。當以質中丞。遂貽書問之。遷報曰。不佞以民命若泰山。此官敝屣耳。所能者爲貴人責捕盜。不能爲貴人理私仇。亡何。真盜發。守得白。敵大入犯。自縊子嶺。關京師東北。遷聞警。使其將勒騎入勤王。自以兵踵其後。

兵至都門。敵漸斂。已而諸鎮兵悉合。蹙之境外。破之。所部斬敵甚多。論功。賜白金文綺。尋入爲工部右侍郎。丁艱。服除。召補南京兵部右侍郎。尋進兵部左侍郎。都察院右僉都御史。總督兩廣諸軍。兼理糧餉。倭方大入。侵掠廣東。疾馳至端州。督諸軍大破倭。斬寇以千計。俄詔兼巡撫廣東。餘如故。其時古田苗亂。遷請平之。上便宜報可。乃調狼士兵十三萬七千人。分七哨進攻。以大帥俞大猷統之。而參政柴淦副使。邵惟中等監其軍。檄湖廣將士固守。東安黎平隘防奔逸。身自移鎮梧州。節制之。申飭軍令。嚴賞罰。仍戒毋妄殺。毋擄掠。兵進蕩其寨棚六十五。擒大會。韋銀豹。曾黃朝。猛戰死。餘會二十二。以次就縛。斬首萬餘。降餘衆二萬。進古田爲州。使監司鎮之。他增將卒。置學宮。選良吏。奏上從之。以功進右都御史。賜白金文綺。廣東蘇繼相世蟠據揭陽之黃寨。僭稱王。而其黨曾魁據石壁。杜高山據大節。相犄角爲聲援。流劫遠近。郭成故以總督劉燾檄討破之。且下矣。而繼相通成之私人戈柑。入賄於成。以免。遷刺得其狀。召成切責之。曰。左廣費大司農金錢。歲可二十萬。今三盜如故。而汝若不聞也者。日幸酒被色。歌舞自愉。快安乎。且汝之入三盜賄而縱之也。吾非不知。姑貸汝死。責後效。汝能自勉勵否。成惶恐叩頭曰。蒙貸成死。苟不擒三盜者。必不敢復戴首而謁。乃調兵二萬人。使成與諸將分將之。成強自力戰。戈柑以師遂破繼相。衆窮追之。獲於五房後。破擒曹魁。兵少倦。杜高山乘間襲奪資餉以去。遷切責諸將躡之。破其大節寨。窮追獲於古銅鼓障石岩。前後得柵三十六。俘斬千餘人。賊屬四百人。自拔歸者二百餘人。投崖阱死。焚雉經死者。不可勝計。復進破海豐賊。會朝元。下村柵十一。鹵斬五百餘。朝元斃死。復破繼相之黨楊仁寶於九重。

坑追之至鵝毛山而獲。俱磔於市。得賊田二十萬頃。予民捷聞。上賜白金文綺。時舶主許瑞者。擁萬衆出沒近島。諸帥私其賂而陰蔽之。時取羈縻而已。會倭三百犯廣之大金門。而許瑞相引恫喝爲重。諸將入問策。邊笑曰。吾已付倭許瑞矣。以武往。卽千人不必勝也。第令裨將將卒二百人往。俾攝市人立睥睨間。而使監司檄喻瑞。若名事中國而不純。今急取倭自效。不者大將軍悉二廣兵殲爾。非可賂免也。瑞惶怖。掩倭艘。悉獲以獻。前後所捕誅倭及劇盜凡十大勝。不報捷。或謂胡不報。冀得一男爵以貽子孫。遷謝曰。上威德與諸將士力。我何功。且家世業儒。何可復侵介士路耶。會高拱爲首輔。壽六表。諸侯之幣亡弗重者。遷獨以尺書挾兩吳繩進。乃寘之地。唾曰。豈酸至是。第用我賈名耳。以故於功多所裁削。是時清遠颶風作。地震。英德開建諸邑大水。急發庾賑貧者。因上疏引罪。且乞裁黃蠟芽茶。鐵鍋魚芽。柘茨銀硃。烏梅。銅錫麻。象鐵線膠。翎諸濫稅。不報。他疏若停逋稅以安反側。查濫俸以省虛冒。修水寨以資戰守。嚴門禁以固重地。稽商稅以慰民望。究武職以飭戎政。祠名賢以崇正學。得報可。兩廣賴之。凡三上疏乞休。不許。又陳情乞歸養。乃進南京刑部尙書。遷堅以骸骨請。允之。所積糜粟五千。悉歸之公帑。諸從官曰。例也。笑曰。我以不貪爲例。歸無復世念。顏其堂曰止足。間御筭輿。或跨款段。縱遊山水名勝。與田叟野父相問訊。或臺使而下。及故吏屏于施過之。欣然具鷄黍。燒筍蕨。清言竟日不倦。不及仕宦語。張居正。故人也。有鄉人入都者。乞書先容。乃具草幾千言。曰。崇寬大以存正體。曰。慎用人以肅官常。曰。宥直臣以開言路。曰。修戰守以重邊防。其言剴至。非人所堪。其子請易之。遷不可。旣而曰。上春秋鼎盛。江陵猶稚視之。且汰極矣。

是安能久。既而果然。以微疾卒。所爲詩文。清暢古雅。有漢唐人風氣。尤工八法。所著有詩文集十一卷。遺集摘稿皇華錄。京畿奏議。兩廣奏議。濟南議稿。郢曲同聲。楚越吟稿。西輶集。祇役雜言。修邊雜考。國朝典故。皇華便省錄。清音競秀錄。星槎萬里錄。官中紀事。

史官曰。李遷清足以勵薄俗。辨足以慎強藩。勇足以盪劇寇。天下才也。而能知止不伐。以功名終。近代賢公卿。鮮有儷之者矣。爵旣不稱。諡亦不及。請問諸司勳者。

申時行傳

申時行。字汝默。別號瑤泉。吳人。少卽能爲古文詞。明經。人稱爲經神。下帷攻苦。曰爲者常成。行者常至。作祛倦鬼文自勵。其後傳播入禁中。御筆改鬼爲魔。命中書繕寫。揭御屏。外艱服闋。提學御史。吳遵遘遺才第一。時吳令某編卷於句容佛閣。至時行卷。忽有巨人從空冉冉下。左右吏胥相顧錯愕。識者曰。此大魁祥也。嘉靖四十年辛酉舉於鄉。以尙書魁其經。明年壬戌會試中式。廷對爲第一人。授翰林修撰。一日代大學士袁煒草進白兔表。及白兔瑞應詩。大見稱賞。於本朝典章多所熟悉。癸亥憂歸。服闋。丁卯復守故官。尋晉中允。充經筵日講。無何晉諭德。修世宗實錄。充副總裁。未幾。穆宗崩。凡詔誥勸進箋表。皆出其手。聞皇太后及神宗覽之。爲之色動。萬歷元年癸酉遷庶子。充講官。甲戌陞少詹事。兼侍讀學士。掌翰林院。丙子晉詹事。充會典副總裁。一切綱領義例。悉苦心剴定。丁丑主會試。尋晉禮右侍郎。穆宗實錄成。加太子賓客。已改吏右侍郎。是年張居正奪情事起。一時廷杖五人。時行不勝義憤。詣政府方解不可得。丙夜

密從緹帥楊俊卿謀調護之。五人拜杖出。時時餽餼。及出都門。一一料理之。扶維調護。而自不任德。戊寅。以吏左侍郎兼東閣大學士入閣。參預機務。己卯春。進禮部尚書。是歲江南災。時行奏謂今日揀時急務。要在休養生息之意多。而鉤鋤搏擊之事少。庶可保固根本。振起凋疲。上然之。庚辰。主會試廷試。居正以其子鼎甲爲請。且示以上意。時行佯爲不省。列二甲。居正怒。密從閣保處易置。中外譁然。而知非時行意。八月。皇長子生。時行喜曰。時哉不可失。宜有大慶。施天下。張四維以爲然。乃盡出諸司所擬寬恤條。損益上之人。謂此番詔書。名爲寒陽春光。先是加少保。疏辭不允。癸未。張四維以憂歸。時行爲首輔。疏請簡用閣臣。乃薦新安許國。上從之。已議起廢。吳中行。趙用賢。晉中允。一時大小臣工。以言得罪。以寬見抑者。次第登用。盡洗舊習。言路大開。已而止。太和內監于預。都司之敕。減三吳織造之額。寢戚晚李偉。國公之贈。請潞邸之國之疏。止遼府爵土之復。恤江陵老母之田。上皆從之。是歲。以雲南隴川平。晉少師中極殿。力辭止。予文應。明閣臣自張治前。凡有軍功。無不廢錦衣者。其有軍功無世廢。自時行始。嗣後遼左報捷。慈甯工竣。會典告成。上咸特敕褒獎。晉秩。累疏辭不拜。嘗語其子曰。吾叨冒極矣。深恩難報。厚福難消。人以爲名言。乙酉夏五月大旱。時行引咎乞罷。上慰留。時行遂力請。敕錄言官。減上供袍服。停造磁器。蠲免天下災荒錢糧。俱次第允行。一品滿。加特進光祿大夫。支正一品俸。仍廢一子中書舍人。一日。上幸兵仗局。觀兵器。或言先朝有內教場。蓋指正德年間事也。上欣然舉行。乃選內豎二千餘人。更班團練。每朝。飽聲相聞。外議洶洶。時行深以爲憂。乃偕同官具疏。略以爲宸御清嚴。宮庭邃密。詎宜有此。及今停止。一以

安人心。一以杜亂萌。一以養君德。一以省濫費。不爾。恐蹈正德年間覆轍。不報。時臺省及諸司官亦以爲言。如故。時行曰。此不可以口舌爭也。乃語諸大璫曰。此事屬在禁廷。諸人攘甲荷戈。未明入內。設奸徒竄入。爲害叵測。卽有緩急。外廷不得聞。宿衛不入。吾輩大臣束手無計。此皆公等剝膚之患也。諸大璫皆悚然變色。乃乘間以閣臣言力奏上。遂命罷其牘。諫潛移類如此。丙戌春正月。皇長子五齡矣。時行念上亦以五齡出閣講讀。乃約同官於歲首。題請冊立東宮。以重國本。略曰。國本係於元良。主器莫若長子。故漢臣有云。早建太子。所以尊宗廟。重社稷也。皇上德澤浹於寰區。嘉祥鍾於允嗣。自萬曆十年。元子誕生。昭告天下。五年於茲矣。卽今麟趾螽斯。方興未艾。正名定分。宜在茲時。查得祖宗故事。宣宗以宣德三年立英宗爲皇太子。時年二歲。憲宗以成化十一年立孝宗爲皇太子。時年六歲。孝宗以弘治五年立武宗爲皇太子。尙未週歲。蓋冢嗣升儲。所以明震器之重。冲年貽哲。所以端蒙養之功。成憲具存。昭然可考。今元子聰明克類。岐嶷夙成。中外臣民。屬心已久。伏望皇上深惟大計。以今春吉旦。敕下禮部。早建儲以慰億兆人之望。以固千萬世之基。至於出閣講學及朝賀等儀。不妨次第上請。旨需後。越一日復疏。極言宜冊立報聞。周府中尉勤儉越關。懇寃語侵撫按官。上意欲罪撫按。時行力救。且云。國家大紀綱有四。親王轄宗儀。將軍轄軍士。有司轄百姓。提學轄生員。故大小相維。而天下治。若宗室事不問親王。不下撫按。此亂之道也。上是之。是歲荒。奏借發臨德二倉餘米。以充賑濟。借支太僕馬價四十萬。以資糴本。而又以四事責成撫按。令每月一奏報。曰。田禾有無播種。曰。雨雪有無沾足。曰。人民有無流亡。曰。盜賊有無甯戢。上稱

善卽行之。丁亥時册立久稽。異議漸起。乃以建儲封王並舉入奏。略謂本朝故事。成祖以永樂三年立仁宗爲皇太子。卽封趙王。英宗以天順元年立憲宗爲皇太子。卽封德崇等王。臣思列聖傳家世守之法。仰體皇上愛子均一之情。竊謂皇長子宜正東宮。皇第三子宜卽分封大國。一時並舉。尤爲盛事。疏入不報。庚寅元日。上御毓德宮。煖閣召四輔臣入。諭之曰。朕是心。先生是股肱。心非股肱。何以運動。又曰。朕旣委任。須代朕主張。任勞任怨。對曰。敢不服膺。因勸上涵養聖德。保養聖躬。清心寡欲。戒氣平情。已又勸上時御朝日講。以慰羣情瞻仰。已又以建儲豫教上請。上皆首肯之。方與同官叩謝出。上令內官援止之。云俟宜長哥與先生每一見。少選。皇長子皇三子俱至。上於榻前手攜皇長子。向明正立。時行等注視。因奏曰。皇長子龍姿鳳目。岐嶷非凡。皇三子玉筍蘭芽。娟秀可愛。仰見皇上昌後之仁。齊天之福。昔商山四皓。一出而羽翼遂成。臣等雖不及古人。而幸遇聖明。特鍾慈愛。造膝之一見。賢於苦口之萬言。因懇請册立封王。又屢疏請豫教。俱不報。兩京九卿科道咸合辭疏請。時行又特疏曰。當今第一大計。無如册立元子。而臣等第一職業。亦無如建儲一事。夫祖宗家法。傳畀萬世。列聖相承。儲位未有不歸元嗣者。皇上慕祖宗之緒。須守祖宗之法。皇長子當正儲屬。萬萬不可遲疑。一也。臣等先年奉旨。云立儲以長幼爲序。今年又奉旨云。父子至親。長幼有序。元旦之辰。皇上親挈元子。今臣等諦視。又親諭臣等。長幼自有定序。今言猶在耳。皇上豈得失信於天下。失信於臣等。二也。向來道路訛傳。皆謂皇貴妃獨蒙眷注。屬意所生。京師百萬軍民。頗猖後議。獨臣等不信。以爲元日親奉玉旨。謂皇貴妃每勸册立。安得有此不根之言。乃今鄭國

秦之疏。既上而不報。已稟而不行。則外間又生疑議。以爲皇貴妃姑令國秦塞責。皇上姑爲皇貴妃解紛。使疑在宮闈。憂在宗社。何以杜百萬軍民之口。副四海九州之心。三也。臣等竊謂祖宗一定之家法。決不可不遵。皇上已出之綸音。決不可不信。皇貴妃未白之心事。決不可不明。皇上何不早發德音。定以明春册立元子。敕禮部具儀擇日立決大計。盡釋羣疑。使臣等得闕其忠。無事曉曉強聒。自外於心。胥股肱之託也。臣等之言。盡於今日。臣等去就。亦決於今日。不報已。而上特命中書傳諭之。詞意甚厲。時行知上督過之甚。不得已。復言此舉一日不定。則流言一日不息。皇上心事一日不明。如必欲暴白上意。解釋羣疑。莫若先令出閣讀書。再議册立大禮。上覽奏報可。嘗疏言祖宗立法。入皇城者不得持寸刃。經斷罪者不得充宿衛。向者內操人員。持杖出入山者。每有隱憂。今內操久停。而兵器猶藏。謂當通行簡查。申明禁制。此又防之於漸者。上覽奏曰。元輔真可謂忠愛憂慮之至矣。因屢請册立。上惡煩聒。適工部郎張有德請上大怒。時行等力救。上不釋然。因力辭乞骸骨。上許之。時行瀕出都。以三事上陳。一曰。早立儲宮。以安宗社。二曰。力持廟議。以奠邊疆。三曰。甄錄逸才。以充任使。而復勸上慎起居之度。平喜怒之情。節用愛人。財以不蓄爲富。親政典學。治以無逸爲勸。娓娓數言。及歸。三年皇長子出閣。至辛丑册立皇太子。敕時行知之。陳謝疏中。猶諄諄然冀上返初心。修始政。勿今已渙之汗。反而復行。不調之絃。更而復鼓。上嘉納。嗣後以皇孫覃慶。又以年及大耋。屢存問。上遣官費敕。方及門。而時行卒。贈少保。諡文定。時行嘗語人曰。天下事平心而揣。則脈給明。平衡而治。則差數均。平氣而調。則節奏和。故其在事。一切以持平行之。不藏宿不

伎懣過卽釋然。又曰：吾受上恩寵無以報，惟是不居功，不弄權，不市恩，不微名，以誠心直道處己待人，可幸無罪。陸樹聲嘗曰：申瑤、泉正己以御物，侃直以持國，是苦心調劑於國體物情之間，而進退從容，沈幾不露。王錫爵曰：參合人情，權衡國論，聰明才辨者猶能之，吾獨服公於中旨，迫側衆咻紛擾之時，不難不疎，翁如廓如，信口信筆之語，有更數千言而不能盡，數百歲而不易者，所著有繪屏奏草四卷，繪屏笥草四卷，繪屏簡牘十卷，賜閒堂集四十卷。子用懋，進士，爲太僕卿，用嘉舉人。

史官曰：申文定當江陵專擅之後，而能平心以御物，退讓以自持，盡反伎懣吐茹之習，爲師師吉吉之風。近世賢相無能絜其度量者，武侯云：我心如秤，不能爲作輕重。文定亦云：平衡而揣，則差數均，平氣而調，則節奏和，斯言可謂端揆金鏡矣。

劉景韶傳

劉景韶，字子成，崇陽人。少家貧，無書可讀，往往從人所借鈔，又不給，則間行之市肆閱之，歸而誦誦，且釋其義。至終夜不寢，其所屬舉子文亦以臆摹時式，然輒工，始試爲諸生，輒利，諸生譁謂其鮮所師授。崇陽令沈碩曰：是子天下才，非而曹所知也。無何，遂舉於鄉，時碩猶在，詔曰：是子真神授也。又三年成進士，授潮陽知縣。潮陽故遠，而名爲饒，俗以鬪勝。景韶至，首寬其大狹於理，乃次第問俗所利害而平之，除虛賦，搜伏稅，禁逸讎，導河利，築海堤，釋滯獄，策郵營，凡十餘事。次第就理，謳謠載道，逾四載，入爲刑部主事。曹務閒，偕其同舍郎李攀龍、高岱、魏裳輩，相切劘，爲詩有聲，而問益習絜法，所請讞以精明稱。攀龍戲曰：是

日囁囁者何。安所得司空城旦言乎。久之敵入犯都城。景詔以選守安定門。時出密畫佐其長敵退。進署職方員外郎。會築外城。景詔得稍見長。睥睨間以功予實授。而忌者用喜事孽之。出爲貴州兵備僉事。屬峒苗之界。貴與蜀者。閔議職與撫執便。景詔爲策曰。撫未易也。職吾所不忍。書不云乎。分背三苗。姑曉以禍福而分背之。使貴者貴。蜀者蜀。諸苗帖然。所全活無算。總督馮岳甚器重之。薦爲撫苗參議。苗之擁圍箐者三十六種。八十三寨。其魁跳梁錯發。景詔乃與岳合策。捕誅其尤黠者。既奏功。景詔獨得大酋王獻任宸等。獲首寇二百餘。詔賜白金。加歲俸。會江南北屢中倭。羽檄不時。上進按察副使。治兵備江北。而李遂時爲都御史。撫其地。景詔念所治。與遂皆創府。而民久不習兵。卽賊至而亡。所問弓矢。弓矢具矣。度不能出一鏃。乃請於遂。以間行視要害。外地自瓜儀。內而如皋。北抵掘港。皆列水陸戍。其天長寶應則城之。繕衝選鋒。務爲不可勝以待。明年倭果大至。前鋒犯如皋。景詔單騎赴之。敕吏士開門以待。不敢逼。援兵亦至。乃呼諸將歆盟。書其名相服曰。是戰也不利。我必死之。諸將咸奮。會賊據白浦。意欲西。景詔計給之。東遣諸將據丁堰爲覆。自率兵倚之。景詔又築廟灣重地。請於遂以大軍軍焉。而身尾賊。殲其殿於潘莊。賊驟西。與遇於余莊。復敗之。又敗賊於馬遷。復尾賊於燕莊。賊犯秦興。追之。秦興民爭挽之。謂急入保赤子。景詔笑曰。城外非赤子耶。且吾在何虞城。麾兵前擣賊張字莊。走之。乃會兵於廟灣。合戰。凡四日。大敗賊。所擄獲無算。諸家欲置酒高會。景詔不可。曰。三沙之賊。勢且趣我。未幾。三沙倭果北渡。徑趨如皋。乃率諸將分道進。掩之於仲家園。蕪其衆。賊走鍋圍。與參將邱陞追及之。陞突前。中伏死。景詔併將其兵力戰。

敗之。已戰於小海灘。已戰於劉家橋。已戰於白駒海沙。各有斬獲。賊窘。悉衆趨劉莊。食其粟。當是時。三沙之裨將劉顯。以失律。罰自劾。景詔器其才。番中權之勁畀之。曰。請以賊爲若功。顯奮而前。景詔鼓之。賊巢潰。追殲之於白駒場。殆盡。零賊遁去。景詔前後不解甲者三月餘。生獲數百。斬首三千餘。焚溺無算。寇遣器輕重以萬計。捷聞。上大悅。進俸級二。賜白金文綺。遷浙江按察使。治兵如故。再論功。進俸級一。賜白金綺帛如前。尋進右僉都御史。提督軍務。巡撫鳳陽諸郡。當景王之國。道淮揚。中官責供張。驛騷甚。景詔力持之。民得無擾。郡邑頌功德者。麇至。至爲六祠祀之。尋內艱歸。爲御史。彈。予閒住。服除。杜口不言。冤與破倭時事。穆宗卽位。詔復其官。卒年六十二。所著有秋蚤燕臺戰餘漫稿。太白原稿若干卷。別號白川。世稱曰白川先生。

史官曰。闕

明書卷一百三十四

列傳四

名臣傳十九

孫鑑傳

孫鑑字文仲。燧之孫也。父陞禮部尙書。諡文恪。嘉靖丙辰成進士。除兵部主事。迴翔兵部郎署數年。世宗齋居久。綱言事諸臣。屢興大獄。舉朝糜糜。鑑上疏極諫。借秦宋爲喻。盡紕不法事。壅蔽者。徐階咤曰。懂也。郎奈何。輕批逆鱗也哉。中官憚上英察。秘不以聞。遂移疾歸。穆宗初起南文選。歷尙寶鴻臚卿。九年改太常少卿。右通政。進光祿卿。時張居正奪情。鑑乞休。家食十年。獨居一小樓。讀書嘯咏自如。萬曆十四年丙戌。以原官召進大理卿。時吳時來爲都御史。更律例。多紕鑿不可行。下法司議。鑑爭之強。兩請。上是其議。進刑部侍郎。改吏部。庚寅遷南吏部尙書。改吏部。是時事權初歸銓部。人情枳阻。一切遷除大政。不謁內閣。道遇閣臣亦不避。於是閣部水火。鑑感上知遇。汲汲以人才爲己任。時徵聘之典久廢。鑑獨於一二篤行士於科目外不次優擢。以維世風。於是江西舉人鄧玄錫推翰林待詔。劉元卿推國子博士。玄錫不赴。如貢士王敬臣。王升馮行可相繼進。士論趨焉。癸巳春大計京朝官。考功郎中趙南星慷慨曰。法之不行。

自親昵始。首摘其姻戚都給事王三餘。三餘少與南星爲齊名士。趙郡人。語人曰。無書不讀。王三餘。天下奇才。趙南星。此察以示公。實忌之也。而鑿以廉其甥。文選員外郎呂胤昌。時胤昌爲時論所鄙。人譽鑿曰。以渭陽不庇其妹子。公固無成心哉。愀然曰。言此渭陽。此心苦矣。自是部院臺省。莫敢以意庇其私人者。亡何。給事中劉道隆糾鑿權黨。無大臣度。上亦以專權切責之。已又以回奏不認罪。奪俸。鵜考功郎秩。諸朝官相繼申救。上不省。鑿去志決。獨以權黨二字不可爲名。上疏辯。報聞。乃堅臥乞骸。上遣中官賜養。羊上尊。辭疏累上。許之。歸踰年卒。贈少保。諡清簡。鑿純誠質行。與人煦煦長者。意所不可。責育莫能奪。時三王並封議起。諸曹郎岳元聲等皆引祖訓。上封事。久不決。鑿率九列廷爭之。諸論始是。

史官曰

陸樹聲陸樹德傳

陸樹聲字維吉。別號平泉。華亭人。登嘉靖十九年庚子應天鄉試。魁其經。明年會試第一。廷試御批第四。乃置二甲第四。選入翰林。爲庶吉士。疏歸省。又三年入京。故事無它授者。以見嚴嵩無加禮。見世蕃與講敵禮。遂欲議它授。張治故庚子南畿舉主。夙器樹聲。宣言曰。林生翹。與臺省則令之翹矣。拜部郎。無所容。翹乃以公議不合。授編修。惟鍵關孤立。一意謝絕諸賓客。一日偕詞林八壽嵩。衆服吉。樹聲獨青。衆問故。曰。不知嵩目屬之。又嵩宅九月盆菊繽紛。衆以事至。爭相呈身取色笑。樹聲從後。謂諸人曰。無壓倒陶彭澤。聞者解頤。館師初入館。關大學士手卮酒。其人跪飲。樹聲怒。誦誦不休。高儀笑目之曰。乃公性發耶。肘

而立出。是時詞臣多攻青詞爲職業。獨謝不爲。嵩雖悲樹聲。每心折之。同館有爲冢宰不禮者。羣訴嵩所。嵩曰。公等如林子閉戶寡交。彼橫逆者何施。外艱歸。六年起補南國子監。辛酉晉左春坊諭德。署南翰林院篆。改侍讀不赴。乙丑起太常卿。掌祭酒事。貞教樹軌。略去繁瑣。所著汲右叢語。及諸訓條。先定志。歸於慎微。國學奉以爲功令。猶存獎惜愛人才。凡人厲夏楚。張勅頤不能。或人十一樹聲。或人。人多於精神。矚中。戊午晉吏部右侍郎。以病請不起。三年起原職。教習庶吉士者再。又兩疏辭。時高拱挽機務。遇不如意事。輒三歎曰。平泉鴻飛軒舉。吾甚愧之。而趙貞吉猶心嚮之。以爲得此老成人。左足入朝。上亦爲感動。神宗卽位。晉禮部尙書。疏辭不允。姑免赴。計去國時二十年矣。陛見卑居正首謁。六卿於居正多改容事之。樹聲亦以先輩自處。席必端。言必盡。居正滋不悅。而所署部務。絕諸請託。會和虜議增歲幣。樹聲曰。虜欲無窮。國財有限。以有限填無窮。涯壑恐不繼。識者偉之。禮闈屆期。詎知居正欲私其子。而以其能塞羣望。乃勃然欲歸。時有進語者曰。今非昔。相公幸稍逝。禮闈柄軸在曉夕間。且江陵意固屬與同事。樹聲心惡其人。而怒曰。迺翁二十年出山。爲門牆鈞軸地耶。行矣。吾家輩尊無恙。遂五疏乞歸。許之。乃條列十事奏上。曰。辨宮府。抑戚倖。斥貂璫。皆觸時忌。居正得之心動。曰。誰令乃公爲此者。擬報聞。歸臥雲間者三十餘年。弟都御史樹德請歸侍。旣而子行人彥章請終養。上嘉其孝。特與常俸。士人高而榮之。又從子考功郎請南侍。芳晨良夕。昇藍輿出遊。丰神矯矯。咸作天際真人想。奉特恩加少保。夫米。又賜存問者三。樹聲退然穆然。時寓招提。時棲名園。冥心木榻。類苦行陀頭。一號無諍居士。一號長水漁隱。一號適園主人。

一號九山人。一號大歌生。所著有汲古叢語、適園雜著、禪林餘藻、清暑筆譚、陸學士題跋、老餘雜識、長水日鈔、病榻寤言、善裕毗議、公約、家訓、卒頭溫熱、徧體柔和、作黃金色、里人望巨星、從田間及屋角墜者。二贈太保諡文定。

陸樹德字與成。少貧。鬻於薛。四十餘始成進士。授嚴州府推官。在事精明。雖耿介絕俗。而不喜爲頽刻。每勇往無所避。太守意忌之。弗善。守入覲。署郡事。而巡撫處有所妻非屬。詞守何狀。樹德力爲明。其無他。守得免。亦不使守知。奉檄按武義。令夜行囊。樹德吐之。盡。法無貸。御史龐尙鵬於僚屬鮮當意者。至樹德。獨無間言。曰。廉士廉士。陞刑部主事。益治文法。亡何。改禮科給事中。穆宗每視朝及經筵。默不發一語。樹德謂易上下不交爲否。非與公卿輔弼相論難。何以劓君德。而酬萬幾。上疏極言之。不報。又條議諸邊計甚明哲。歷其科右左。巡視內十庫。乃擇諸中官之謹愿者。好語之曰。輸戶以公等抑勒。屢破家。然非自公等始也。吾欲言則傷公等。不言則不忍於破家者。公等胡不自謀之。而令我曹得爲名。諸中官爽然相戒。弗留難矣。遷禮科都給事中。皇太子將出閣。樹德疏所以資睿學者。而末歸之身教。語凱切詳至。是時太學士高拱張居正讀其疏。歎曰。向永流也。穆宗頗倦政。而日月交蝕。早魃爲災。樹德前後疏。皆危辭侃侃。會上不豫。乃疏請慎藥餌。內言伐陰之劑不可服。又言仲夏亢陽之月。所宜謹慎。其指益危。上意不懌。留中。獨下其所請。召輔臣以資靜養。疏諸閹憤。謂輔臣曉醫耶。必靜養而召輔臣。如我曹何。諸閹中復有請開戒壇爲上造福者。業得請矣。復抗疏言佛法故非聖世所有。特其空寂澹泊。稍有合於吾儒寡欲養。

心之旨。故其說久而不廢。若乃戒壇度僧。男女叢雜。宜淫導侈。固佛之所深惡者。奈何輕信左右之說。而遽復之。夫陛下不以聖躬爲虞。無所事佛。陛下而以聖躬爲虞。則大禹之惡旨酒。成湯之遠聲色。萬全道也。亦弗所契也。上爲止之。未幾穆宗崩。時閣馮保橫甚。高拱決筮去之。而樹德與言路各有疏。發其姦私。不勝。保遂逐拱。併齟諸言者。獨不能有所加於樹德。會當議禱廟。樹德請毋禱。宣宗而禱。睿宗於嘉靖初所建。世室奉之。議不行。天下隲之。神宗卽位。遷尙寶卿。擢應天丞。改太常寺少卿。故事。九列若四品。持資簿待遷。亡滿考者。乃前後七年。以馮保在事。故抑之。以進南京太僕卿。入爲太僕卿。甫上。進右副都御史。出撫山東。會保敗。樹德益發舒。且感上知。思有以稱塞。入境問民疾苦。罷供張。與使者約。脯修不相入。軍門絕私書。僚屬相戒爲慎。絕優宴。齊魯之詰盜者。濫悉集成案覆之。而出其冤者。裁募兵費。蘇里甲。戒苛罰。東人大悅。行部所給奉。不過蔬粥一算器而已。箠扑不妄施。獨於貪墨吏無所縱舍。時時一按核。皆以爲神明。德藩宮後有曰雲湖。故民田也。奪於王業。已歸民矣。而宦者與中官代保者。宏有連。必欲復之。執不聽。是以多齟齬之者。邑鬱不得志。上疏請告歸。歸闔門謝客。惟與兄少保尙書樹聲。日尋山間水。里中兒爭指目曰。非兩疏也耶。公踰躅不敢當。曰。吾何敢望少保。爲人孝友忠信。而砥節秉行。有壁立萬仞之概。生平未嘗以私干人。亦不受入私。其於諫忤旨。及犯權要人者數矣。然而竟以其身免。卒年六十六。史官曰。蓋雲間故有二陸云。樹聲難遇。易退。振衣千仞。而能履虎不驚。觸舟無怒。所謂鳳凰芝草。庸愚若識爲美瑞者也。樹德論難侃侃。犯顏劄上。一不得意。則奉身而退。爲時完人。二公皆晚而進。天壽平格。固

盛世之臣哉。

陳洪濛傳

陳洪濛字元卿杭州人成嘉靖二十年壬辰進士與其兄某對大廷俱暫而胡髯被膺班行中爭目屬之曰彼髯者伯仲也而借國器授刑部主事歷郎中刑部號才藪其儁者往往習古文辭杯酒倡和洪濛長古文辭而不屑以是顯益精爲法比是時同舍郎吳維嶽杜拯盧夢陽王崇古翁大立王宗沐皆善刑名家顧獨推次其精六載擢知彰德府人意其自法曹出必斤斤三尺而殊不然務隱恤閭左疾苦小民戴哺枉而治所榦飭田野闢橋梁固傳舍櫛刷彰德大治時郡所奉鄭王老儒慕危言以四箴上觸世宗怒時有廢侯詞伺指卽疏誣王罪惡至大辟以上上爲置獄使中官偕刑官緹帥往治之以屬洪濛力持之弗巧鍛亡所得中官怖曰如非上指何洪濛曰吾知法如是耳獄上王僅坐長繫國無奪其後復爵如故入覲能天下郡守第一遷江西按察副便飭九江兵備至則除戎器蒐卒補艘完城堞諸盜起必窮跡其窟而洗之長江偃然內艱歸服除仍得故治而益以楚之斬黃其吏民鼓舞迎其入不待拮据而理進山西左參政時伊王治河南以驕恣不道聞上使刑侍郎趙大佑偕中官緹帥往按如鄭故事大佑左右顧無可任者旣而曰吾得之矣故治鄭獄者陳守今在督移以往可也上疏請之卽報許而其治伊獄捕逮其國臣翼虎者攷訊不小借王坐長繫加等國除伊故寵王非鄭比洪濛不以指故小屈法天下快之還晉獲北虜諜白蓮教大盜論功賜帑金又常設法輸庾數萬石救隣道饑擢湖廣按察使有二令坐法當

讎斥其惡者而寬其中微文者。人服其明斷。遷四川右布政使。甫離境。而見寬令蠶金爲壽。乃大怒罵曰。吾嚮者誤寬之。何所自得金耶。令懼而去。尋轉左。時上方亟土木。取材於蜀。困且不支。洪濙從容調營費。公私俱賴以濟。上計復爲天下第一。拜都察院右副都御史。巡撫貴州。兼督川東辰沅諸軍。當是時。施州蠻黃中叛。跳川東。支羅牛欄坪。圍剽掠傍郡邑。詔洪濙偕楚蜀二鎮合兵討之。乃自川東率大軍入深箐。多張疑兵。誘其毒矢石殆盡。而問道募死士繞出其後。急擊大破。殺敵千五百餘級。焚洞砦百餘。而蜀兵亦從西北躡之。黃中迫。乃挺身走入楚。叩軍門請死。時貴與蜀兩鎮有戰功。而楚坐得酋首。蜀自以驅之。故與楚爭功不能決。洪濙第謂楚蜀勢異。不有勳者。誰與撫地。不有撫者。誰與勳窟。且皆天威也。三省安得微之。疏上。兵部倚以決。更推其能讓。而洪濙又與都督石邦憲合策。破叛酋楊珂之六峒十二寨。悉俘其父子兄弟。餘黨歸農者以萬計。前自計返。聞其兄計過哀。屬疾。至是劇。遂上疏請骸骨。許之。候代。而鎮遠印水巴恨苗普面等叛。率兵與疾剗平之。歸而御史三上前。後戰功。被賜白金文綺加等。性伉直。不能腹藏過。然亦不復留。尤不好侈靡。間挾二奚。輕刀信步。湖山間卒值之。不知爲貴人也。爲詩文。援筆立就。所著有五經輯略。性理纂要。諸子粹言。葩經講義。督撫奏疏。台鴈咏藁。歸時年方五十。至萬曆九年辛巳卒。年七十人稱爲抑庵先生。

王錫爵傳

王錫爵字元馭。別號荆石。太倉州人。嘉靖三十七年戊午舉於鄉。魁其經。壬戌舉禮部第一。入對大廷。成

進士第二人授編修。穆宗卽位，御經筵，爲講官，立褒其講書明爽切直。己巳陞南國子司業。明年轉北。尋陞右春坊右中允。辛未陞右諭德，掌南翰林院。神宗卽位，充穆宗實錄副總裁。癸酉陞右庶子。實錄成，陞侍講學士，尋陞祭酒。條上監規，欲行國初積分法，重胄子之選。申令公侯伯并應襲詣監習禮。一時模範嚴重，中外改觀。丙子陞少詹事，改修世宗實錄，充副總裁。書成，進詹事，兼侍讀學士。丁丑陞禮部右侍郎。是歲張居正父死奪情，編修趙用賢檢討吳中行疏劾之。錫爵憂禍叵測，約禮尙書而下數十人。詣居正求解，拒不見。乃獨造喪次，切責之。居正不知所對，泣且拜曰：「上強留我，而諸子力逐我，我何以處？」第有自到而已。竟入不顧。卒取中旨，廷杖此兩人。錫爵持之大痛，且首倡贖贈，皆人所縮朒不敢前者。旣而江陵予假歸三月，佞者輒疏請卽召使吏，邀錫爵署名，叱之曰：「此何事而以詭我爲？」竟投筆起，乃上疏省親歸。居正敗，人爭搏擊爲名高。錫爵復持平其間，曰：「人人如此，如國體何？」後張氏得解免。壬午外艱歸，服除進禮部尙書，召入內閣預機務。疏辭遣行人敦趨就道。乙酉入朝，上禁諂諛，抑奔競，戒虛浮，節侈靡。疏又疏關橫議，止新工，所裁省以百萬計。錫爵旣在政地，壹意佐上急民艱，進貞良，屏貪墨，丰采踔絕。丙戌充會試主考官。丁亥重修大明會典成，加太子少傅。先是入都，首以朝廷裁恩澤，士大夫重廉恥爲奏。故凡陵工、河工、邊工及玉牒加恩，皆辭允之。戊子江南歲大稔，力請破格蠲賑，貧民得以不流。時國本未定，巨閹張鯨潛蓄異意，挾東廠勢張甚。錫爵與同官決策除之。御史馬象乾疏論，且語侵輔臣，上怒，下詔獄。給事中李沂繼疏復觸怒，予廷杖。錫爵皆力爭之得釋。鯨亦敗。是年加太子太保。庚寅元日，召四輔臣入，上手

據皇長子令就視。輔臣趨拜已。命皇三子繼出。輔臣擬拜如前。上搖手止曰。不可。旋出。許事。德於仁。疏欲
實之法。而獨目冊錫爵。曰。卿意云何。對曰。于仁誠有罪。若予以重法。則于仁之罪人。不知以爲誦上。而以
爲納忠。皇上之法。人不知以爲治狂。而以爲拒諫。上意頓釋。因以升儲視朝上。首肯之。明日。忽奉御札。冊
立豫教。分爲二事。一可一否。甚而疑羣臣之請爲離間。乃上奏曰。凡稱離間者。本貴而間使賤之。本親而
間使疏之。皇上手擁皇長子。明示臣等以長幼之序。臣第因而早勸冊立。以成皇上之所欲貴。因而進愛
勞之說。豫教之方。以成皇上之所欲親。何名爲間也。且道冊立與豫教。皆不可緩。既而御札連下。冊立元
子倫序已定。朕豈有溺愛偏執之意。待過十歲。大典一並舉行。錫爵因謂同官曰。聖意無他。止以冊立大
事。不宜自臣下發之。吾輩但當默俟。會礦議起。上遣問閣臣。錫爵陳其非便。一防礦徒。二費多。得不償失。
三官隸釋騷。四示國置形。令四疆得窺淺深。非算事。寢後去。而採役興。辛卯。以母病數請歸省。久之。濱行。
疏乞上舉朝講召對之儀。躬祀天享廟之禮。除額進加進之例。錄建言廢棄之臣。皆一時至計。歸七辭不
允。上趣之。癸巳入朝。上悅。賜白金錦衣麒麟服。居數日。密以建儲請。上諭援祖訓。立嫡不立庶。欲暫將三
子一併封王。若中宮無子。乃行冊立禮。錫爵封還力請。上不聽。又疏請先行豫教。安人心。皆不報。復疏陳
太交要務。期以定國論。一政體。反覆數千言。又請召對御門。發章奏。灑宸翰。免口傳。及擬定進講經書。資
啟沃。而殷殷於爲君國者如此。八月。彗星入紫微垣。錫爵奏言紫微垣王者之宮。太子之象。惟早行冊立。
可禳此變。上需後。又奏曰。皇長子年十三矣。復何需民間子弟無十三歲不讀書者。況國元子乎。上曰。俟

之乃連六疏上略不爲迂上又申三王並封之說而錫爵極論常有差等上乃報可因請侍班講讀避詞林諸臣并擬閣臣侍從臣以上悉用東宮儀天下始曉然知元良之位定矣而中官開買出閣之費至踰三十萬復具請減十之三甲午河南大饑人相食錫爵請與同官盡辭薪俸佐貧民而亦望皇上暨兩宮各量發內帑什一以賑上及中宮貴妃各有助發全活者不可勝數自念國本既定可了出山之局因密薦舊輔王家屏會病作上爲之發帑建醮以祈安病甚辭疏允之特加吏部尙書兼建極殿大學士賜白金彩幣行人護送馳驛歸臨辭勸上戒盛怒親廟享勤視朝重詔令起廢臣核議論發章奏惜老成慎謹調節財用飭邊備稽吏治抵家數月母卒上聞遣官賜札及賻祭又遣官視葬是冬皇上以冊立禮成上聖母徽號推恩舊臣遣官賫敕存問曰冊立朕志已定但因激沮故從延緩知卿忠言至計尙鬱於懷今元子已冊立爲皇太子冠婚並舉念卿家居係心良切特諭知之乙巳皇太后六喪皇孫誕生加上徽號推恩再被存問錫爵陳謝附以規諫丁未上思之不置復召入輔政加少保兼太子太保遣官敦趨適病卒家以遺表聞上震悼爲輟朝凡祭葬皆加等贈太保錄其孫爲尙寶司司丞諡文肅子衡舉順天鄉試第一成進士有文名

史官曰錫爵先後入相調護升儲之力爲多然亦以此蒙詬處人骨肉之間宮府間絕昌言則內激入告則外疑蓋其難哉需遲歷年更端納牖注意漸移元良斯建而錫爵身已遠矣神皇遣中使詔之於家若家人父子之告成事者自睽之秦史册青蒲之功何可沒也其語岳元聲曰古人留侯鄒侯皆以權勝權

則未也。亦可謂迂其身以善其君者矣。

陳有年傳

陳有年字登之。餘姚人。嘉靖四十一年壬戌進士。除刑部主事。丁卯調吏部驗封主事。歷考功文選員外郎。督稽勳驗封郎中。會成國公希忠薨。其弟挾閹馮保爲重。張居正陰主之。以張懋例請贈王。下部議。皆唯唯。有年按令甲持之堅。居正擬旨。竟王之。有年移病。或曰不已急乎。曰不然。郎官與宰相殊。宰相或忍小就大。有年職司封。封外無職矣。不得其職。吾直行吾硯硯耳。竟歸。萬曆十二年甲申。起稽勳。歷考功文選郎。居正敗。有年芟其餘孽。彙征諸名流。海瑞家食十餘年。久不召。特起爲南吏侍郎。上亦嚮用。特改左都御史。乙酉擢太常少卿。丙戌以僉都御史巡撫江西。懲墨吏。絕餽遺。簡樸爲諸司倡。境內肅如。戊子歲大稔。有年酌積儲盈。縮量出入而均劑之。心獨苦。會方萬山爲南御史。有賈人子流言。以過糴糶有年。遂罷。庚寅起原官。提督南京操江。辛卯晉副都御史。刑部侍郎。改兵部。壬辰改吏部。尋轉南京右都御史。癸巳轉南京吏部尚書。尋轉北。赴召日。以二敵籠隨。郵吏指而歎曰。此亦太宰邪。視事止息公署。於朝房見客。中官人自失。各肅門狀。曰公洵潔矣。吾儕許以情白否。謝曰。老諄非敢爲名高。第中外一心。令朝廷清。如止水。不大善乎。皆佯應曰諾。有年大要以核名實。崇退讓爲主。且汲汲引用禁錮諸臣。觸忌諱不顧。未幾。刑部以中官獄。連上意。盡誦一司官。而中不與事。不列名者。閣臣以請。上特宥之。命如例。許所司復請。而故文選郎王敦削籍時。亦未經列名。因援例請。上怒曰。此新令也。安得竄前事耶。姑不問。有年引罪乞

休不允亡何會推閣臣忤旨盡謫選司諸郎顧憲成章嘉禎等有差有年上疏請宥諸臣不允再疏乞骸
曰臣不能多記近年楊巍爲尙書臣郎文選會推閣臣六人今元輔王錫爵是也臣籍餘姚前有兩閣臣
弘治時謝遷嘉靖時呂本皆由廷推言止四品而吏部尙書聞淵耿裕皆推首推今聖諭先名望繼不拘
資品意甚盛矣臣敢不仰承臣擬王家屏等七人皆時望所屬又謬以孫繼孫丕揚爲不拘資馮琦爲不
拘品及奉後旨通列名上籙丕揚削去矣李世達係二十年推推臣安敢違詔詔下再譴讓臣深懼焉臣
愚劣病憤以清朝爰立盛事取自聖明督過大譴臣卽褫職且有餘愧皇上獨舍臣而罪司臣臣能靦然
已乎時咨之義自堯舜迄昭代不廢卽先朝卜相不盡由會推未有不以會推詬者至臣以爲詬此不在
法在臣罪人耳儒其說遂長使相臣由他途進臣罪大矣上不允有年哀懇稱病篤上眷留遣中官賜養
羊上尊乃請益力疏十四上允之賜乘傳歸歸至西湖其夫人遣人迓之索油蓋數百有年訝問故對曰
枵隍數椽何恃不爲暑雨計聞者相顧嗟歎有年雅留意人材委曲保護不令人知孤標峻節岳峙淵渟
卒諡恭介

史官曰闕

張佳胤傳

張佳胤字肖甫別號蘆山重慶人少穎敏秀俊七歲父舉古書傳語卽能談質如素習者稍長知府劉某
出行部得其文大奇之使其與子游劉固以古文詞名又好談兵多奇文籍盡以屬佳胤每與其子談英

維而歎曰。夫英雄者。其吾家子房乎。當其動以無之用。當其靜以有之用。卒遇之而若素。忽斂也而巨測。若趙文子之談笑于衷甲。周條侯之安臥于攻壘。斯其亞矣。又益習先秦西京言。下上於黃初。大歷間。多所厭咀。二十三舉於鄉。明年成進士。授知滑縣。時緹帥挾上寵張甚。其所遣詞事官校。與旨並重。佳胤一日宴坐。有弁而急裝者。一髯輔之。至邑門。門者戟之。叱曰。我官校也。遂入。佳胤下與語。徑前曰。縣官欲捕若。邑耿氏豪亦與若有連。胥吏以下皆辟易。遂挾佳胤入別室。出七首交置於項。佳胤心知所謂。曰。若何。欲曰。予我萬金。陽驚曰。我何所得萬金。髯者曰。某庫有萬金。復陽驚曰。庫金誠有之。第上皆邑賦長名氏。若出十里外必敗。且今日予公庫金。法必死。不予亦死。死等耳。甯死國。引其項曰。七首胡不下。髯者曰。我何忍。第欲得金耳。佳胤徐謂曰。邑郭中多富人。我出一紙授之。即不得萬金。可半致也。呼一小吏前。命筆書紙。應賦金者二十。曹曰。緹帥責金甚急。何人賦致二百金來。予之時。丞簿跼踖儀門外。尚謂果官校捕官。既得其所賦金主名。乃皆賊曹游徼驍武者也。始知爲劫賊。亟進此二十人者。人奉二十金。而袖鐵椎前謁之。曰。民貧。所賦金止此矣。陽怒曰。賦汝人二百金。胡二十。何以解二公憂。復令一人前。忽躍而就之。髯者出不意。即自剄死。羣縛弁者。訊之名。任敬。髯者高章也。使游徼四跡郊外。有三四輕騎皆逸去。拷問皆得其人。磔於市。佳胤見劫時。從容若無事者。劫既解。解臥達旦。人以是知其可大受。居邑多暇。乃益爲歌詩。時李攀龍守順德。爲比壤。謁攀龍。出其詩爲贊。攀龍大善之。與折節講鈞禮。時歲大饑。平價納諸倉。爲粥食饑者。所全活數萬計。事聞。特賜金幣。擢戶部主事。與徐中行。梁有譽。宗臣。吳國倫。相酬倡。出權閩。

廣金帛毫髮無所私。道改兵部職方主事。外艱歸。服闋。補禮部郎。故社中友。皆徒謫無在者。第與南海黎民表汝南。張九一。濮陽李先芳。廬陵胡直。多所倡和。側目者譏之。嚴世蕃曰。故王李社中白眼而譏執政者。此子尚無他。於是假風霾變。察諸官僚。謫除州同知。遷知蒲州。遷河南按察司僉事。飭穎上兵。尋改雲南提學。以經術文雅振諸生。昆明點蒼之勝。皆以古文詞收之。自是望益重。遷廣西參議。陸大名兵備副使。累陞分守甘州右參政。山西按察使。所至有聲。未幾。超拜右僉都御史。提督應天等處軍務。兼巡撫。至九江。而安慶以兵變聞。道路洶洶爲梗。乃夜趨潛山。屬九江兵備使郵報。安慶軍門旦夕至矣。會叛卒前已就擒。餘黨謀外應者。脅息不敢動。佳胤自桐城走金陵任。謂得其實。則安慶之衛體宿重。與郡守抗。而知府吳志隆以南兵部出。稍裁之。又嚴核其占役。指揮馬負圖等忿役其舍人。挑悍卒故常爲盜。江洋者吳錫等。張旗幟犯志隆。志隆跳。遂行剽居民財。志隆乃與守備設策平之。佳胤上其事。請正法。而留守中官意惑之。謂守實激變。詔逮指揮等論死。以錫付其行法焉。守卒得白。時出履行諸郡縣。務持大體。不屑屑期會。務以民瘼吏弊爲急。以母老。上疏乞休。而吏尙書楊博故蒲人。熟其賢。固留之。所以褒揚甚至。先是佳胤爲高拱取才。而張居正亦從臾之。佳胤無所報謝。皆疑其偏有所厚。拱去而居正怒之。欲甘心焉。蜚語中。會前安慶指揮王應桂爲之於居正。遂調用。乃歸。諸謂其冤。而才可大用者比比。居正乃大悔曰。吾幾失此人。時居正雖伎。而尙能爲國家急才。尋補南京鴻臚寺卿。未幾。遷南光祿卿。擢右副都御史。巡撫真保諸郡。未任。內艱。服除。召撫陝西。未上。改宣府。未幾。而虜別部長滿五擁鐵騎。闖入獨石。時久已通。

互市。乃伏兵邀之。生獲其副八賴。滿五使求之辭甚哀。佳胤思縱之。則見狎。戮之。則見仇。乃以屬大帥麻錦。俾建旗鼓。縛八賴將斬。而馳赦之。八賴叩頭流血曰。微太師死矣。佳胤諭以威德。八賴誓不敢復擾邊。然八賴馴而滿五驕。明年挾益賞。佳胤下令。有浮予一餅一肉者。斬。滿五乃媾段奈台吉。銀定儻不浪數千騎。闖入邊。殺略。佳胤移文順義王。謂段奈吉馬駝牛羊以償。然滿五銀定儻不浪強俺答不能制。於是廷議有少益賞以羈縻者。佳胤疏謂今日之勢與曩異。曩者權在虜。不得不中彼之欲。以全吾之體。今者權在我。願乃屈吾之體。以伸彼之欲哉。卽欲有伸。漸不可長。彼苟叛而更大入。臣自悉一鎮之力。制之不效。則治臣之罪。慎毋使虜輕我。上曰善。虜旣聞其治兵。互相恐。乃更還所掠人畜。獻馬百六十四。牛羊橐駝稱之。求無解互市。上謂其處分能。憫敵勞。賜金帛過常。是歲所減省。緡錢以數萬計。城七堡一城。又城獨石半壁。貓兒峪三城。修南山邊牆萬六千九百四十尺。功倍而費省。復屢賜金帛。入爲兵部右侍郎。是時浙江有驍卒之警。浙督撫吳善言常取中旨。減卒月餉。卒訴之不聽。遂噪而縛善言車中。冠履俱破。至演武場。羣習欲殺之。會工部郎謙與二御史往解譬。然猶責狀復餉。而以二千金謝過。乃已。善言遂出。進於湖州。此時吳楚閩越卒皆驕。而督撫多悻。至有穴垣以防不測者。事聞。張居正曰。此事非佳胤治之不可。遂命兼右僉都御史。出鎮浙。許以便宜行事。佳胤甫與善言代。而市民之亂起。始杭城中諸柵。俱有役夫司千陳。諸王著者募游手充之。其後必取其役。其人惰。多借貴勢以免。夫數益以狹。役益迫。而遊手無所得食。僑客丁佐卿假利便言之。監司弗聽。意忿忿曰。謂吾曹無爪距耶。遂謀之市猾。相構誣爲亂。會佐

卿坐他法。郡囊三木以徇。市猾相與篡奪之。諸亡賴子益麀集。行焚貴勢家。謂庇其應役者。遂破撫按署。門掠衣資。諸官皆匿跡佛廬以免。事聞。佳胤謂其人曰。營兵不與市民合耶。曰未也。喜曰。吾知所以靖此矣。從吏惴惴無人色。佳胤飲食談笑自若。既抵鎮。民行剽愈甚。盡毀諸寨以快意。千餘人且抵臺門。佳胤以輿出諭之。祇從材官劍客數十人。皆彀弓挾鳥鎗以從。直前臨橋而諭曰。汝曹毋反。反則以天下兵拏侮汝矣。且汝必有所苦。曰。苦夜役。爲強有力役。貴勢者以免。免而官若罔聞。曰。易耳。奈何以汝一憤易汝族。卽下令除役。衆姑叩首退。退行剽如故。火光亘天。佳胤夜草檄。質明使一校馳諭之。衆裂其檄。乃大怒曰。上命我誅亂卒。今乃見亂民而靡耶。召游擊將軍徐景星。使呼營長入。勉之曰。亂民如此。非爾曹比易剪也。何不自以爲功。可贖罪乎。咸踴躍聽命。又呼黠卒之首倡亂者馬文英。劉廷用。曰。聞汝二人前自縛請死。汝死法。胡不死義。且必不死。二人亦踴躍聽命。佳胤乃率討之。四戰皆大敗之。生擒二百餘人。縛丁佐卿與其豪五十人。皆斬梟轅門。餘悉下獄。其從亂者咸惕伏。烏獸散去。乃具疏以聞。且謂邇來有司奉行太過。裁削太甚。徒務虛名。不究實禍。以至遠近離心。乘機竊發。始而兵變。繼而民變。誠見人心不固。戎首易生。若非仰藉明威。申飭法度。其接踵挾持。不知所終。上優詔褒答。以其奮身犯難。定變俄頃。賜飛魚服。白金文綺。是歲以追錄宣府功。又以考三載績。錄一子予胄監。乃私念事既平。而倡亂者未伏法。乃召馬文英。劉廷振。曰。爾罪可贖矣。爲之冠帶。二人意自得。揚揚羣卒間。多所侵侮。羣卒大怨恨。謂倡亂者自爲功得官。而使吾曹尙惴惴。殊憤憤。佳胤度二人與衆心左。無能爲。乃與兵備顧養謙。俾發諸營卒哨。

海去。遂密兵二人軍門。數而斬之。餘皆赦弗治。衆歡呼曰。吾曹始能食寢矣。復具疏聞。上大悅。拜右僉都御史。兼兵部左侍郎。召入。理部事。劉子聞之曰。子房之籌。與趙文子條侯之膽。少年時所自許。何若左券也。道拜兵部尚書。協理戎政。尋又改兼右副都御史。總督薊遼三鎮。兼理糧餉。至則申約束。蒐卒乘。信賞必罰。大將偏裨以下。凍若負霜雪。又似得春陽而霽之也。時遼左大虜數犯邊。遼左之大帥李成梁。素負勇略。麾下有強兵。佳胤虛心寄之。共率精騎。搗其營。斬酋四十五級。甲首一千五百六十三級。虜馬一千七十三匹。駝羊弓甲稱是。捷聞。告郊廟。獻俘稱賀。加太子少保。錄一子錦衣百戶。世襲。子誥命金幣。土蠻三萬騎入寇。復拒之。大有斬獲。賜蟒錦衣白金文綺。陞百戶爲副千戶。虜又大入。復與成梁搗其營。獲酋長十三級。餘八百三十七級。優詔加太子太保。進千戶。得世襲。當是時。山海關外之屬夷曰董狐狸。部曲頗衆。而桀黠多詐。貪功者以遼兵方強。與蘇兵夾攻之。可得志。佳胤獨謂邊釁不可開。藩籬不可撤。得弗行。諸所陳。邊備委曲數十事。於常虜出入要害。督梁墩百七十七座。牆六萬五千七百尺。營舍千八百楹。屹然金湯矣。入爲兵部尚書。中官驕。故以兵部爲外府。佳胤多執不之應。以是多怨。臺諫乘訕之。佳胤乃曰。功名遂身退。天之道也。吾家子房。非師哉。三上書乞骸骨。得歸。卒。有嶠嶽先生集若干卷。史官曰。佳胤度足以鎮猝。權足以制變。當生死呼吸之際。而能出奇無窮。機警權略。亦張乖崖之亞也。昔魏公謂成事在膽。未嘗以此許人。佳胤談笑七首之間。與魏公引頸暮夜之刺客何異。英雄有人。不得不以此許之矣。

余懋學沈思孝羅萬化傳

余懋學字行之。婺源人。生卓穎。有奇氣。九歲讀書。邑中。邑有鐵神爲祟。肖人形聲。伺其臥。將窘之。逡巡觀其神氣。恬如。輒自失。曰。此貴人不可動。吾謹避。旁臥者皆聞之。自是祟匿不出。人皆心儀。其有大臣器。隆慶二年戊辰。成進士。授撫州推官。撫許訟。蝟起。至則按宿牘。讞決若神。時有所縱舍。以示寬貸。閩郡肅然。會勦巨寇有功。賜帑金。神宗卽位。拜南戶科給事中。時張居正獻白燕蓮花頌於上。懋學以上方憂。早下詔罪己。與百官圖修禳。而以祥瑞進。非大臣誼。抗疏論之。又南京守備中官信橫甚。省臺交章劾之。不能動。懋學盡列其罪狀。得罷。所以相及閹。皆自攝之。時居正挾上沖。欲盡攬大柄。銳意振刷。而實行督責。陰排異己者。懋學奮曰。執政意所嚮。一切以操切苛辯承之。如國體何。遂以五事上。一存敦大。二親審譴。三慎名器。四戒紛更。五防諛佞。言甚凱切。居正銜之。次骨。其慎名器語。獨指中官。請乞無度。恩賫踰等。中官患甚。合謀於居正。斥爲民。乃怡然卷衣出都。人士聚觀。嘖嘖歎息。居正思中之未已。因下傳御史疏置獄。訊冀其扳引。傳備五毒。竟不忍誣伏。復以徵郡民爭絲絹賦。而關以激變歸之。移書撫按坐之罪。撫按皆指天自誓。不肯從。有第咎程任卿。汪時二人以解之。獲免。明年借京察。削諸言事者籍。而竄名其中。又明年居正死。姦狀露。其言大讎起。故官舉遺賢。校圖籍。釐贈典。書無慮幾上。尋晉南尚寶卿。是時人人自喜。爭言以爲快。而廟議稍厭薄之。懋學虛聞之。爲塞漸也。且羣臣相忌。交口詆語。傷國體。乃列爲十蠹上之。謂執事者得必居功。而失則歸挽回之難。曰。誣上之蠹。受官公家。而因以爲市。曰。招權之蠹。已不受言。而

苛求於上曰諱疾之蠹以窺矚爲常而弁髦公論曰承望之蠹敢於拂天子而難於忤要人曰雷同之蠹逆距言者而銷其氣曰阻塞之蠹倒置是非曰欺罔之蠹好勝不已而忿爭忿爭不已而黨比曰爭勝之蠹結款要津媚悅近習曰諛佞之蠹自負時流急於表異不觸而撞擊無疾而呻吟曰乖戾之蠹後一如其所指切留尙寶者二載晉太僕少卿司農請馬直支邊費懋學曰等無馬矣而又去其直一旦緩急何以應之持不與尋遷南光祿卿己丑晉南通政使尋轉北明年抵京會臨洮失事當事主和戎惡聞邊警邊吏持千金居間寄封事酒家爲謀懋學廉得狀立召而廷扑之亟以聞朝士多其不愧納言遷南刑侍郎改南戶部兼僉都御史總糧儲每取記籍鈎考斟酌之勒爲成書彙以絲絹事坐程汪大辟每懷昭雪之不果至此歎曰沈寃未灑吾何以立於朝乎乃上書白寃狀請解官贖二人罪上竟釋之攝工尙書事罷中貴無藝之供百千數以老罷歸卒贈工部尙書予祭葬錄其子昌祚於太學懋學內行惇備里居自爲約非賓燕不四筵他酬應一以儉樸爲閭里先每裹衣緩帶延見儒生談權古今無尊貴氣性嗜書饒著述明習國家典故議論娓娓而不詭於道所著有尙書折衷春秋蓋測論讀勿藥閱史隨筆日札家譜婺穉隨事排纒皇明大政類編嘉隆大政輯要疏草南垣論世考留儲志仁獄編凡十四種

沈思孝字純父號繼山嘉興人髫年英穎卓有巨志於隆慶元年丁卯舉於鄉戊辰成進士辛未授番禺知縣番禺爲金玉窟墨者相望思孝處之泊如時總制爲張居正私人以賄聞一日檄諸富人之外國權子母錢爲幕府費思孝曰是弄富民引賊入室也不可又聽豪家說令縣開海口山可獲稅無算思孝復

曰是必掘諸朽骨。職死不爲。如是類者甚衆。會兵亂。立撫定之。總制不能難。秩滿以卓異召。同事有憾於思孝。進屬總制曰。一令倔強。乃爾。藉令高。時省臺。乃公得燕然乎。總制密奏中之。不得與省臺擢。刑部主事尙書。以其有文名。欲屬起奏草。謝不往。萬歷五年丁丑。與員外艾穆疏劾居正奪情事。語極切直。奉旨廷杖八十。謫戍神電衛。抱瘡赴譴。十一年癸未賜還。而說者曰。茂苑夙契。大公在堂。稍委蛇。亦臣子天性。思孝憤而起曰。乃公以一死博富貴耶。入都會御史丁此呂發科場事。楊巍疏此呂妄言。思孝與之爭。而漸有波及者。思孝私忿曰。江陵雖往。遺氛猶燼耶。於是有擊之者。遂由順天丞從南太僕卿疏劾御史房賓。不宜論海瑞。及三進士罷官事。拂當事意。請歸。歸數年。起副都御史。巡撫陝西。調河南。不赴。晉大理卿。駁閹郝金獄事。金司禮。張誠嬖人。誠恫喝不爲動。晉兵部侍郎。陞右都御史。協理戎政。疏減羊羶。及止盜甲之請。省金錢無算。又廷爭日本封貢。乃與當事者左。疏乞歸。歸十餘年。杜門不出。年七十卒。總概思孝仕。所至輒與人角。陸光祖曰。吾里操行清潔。沈純父朱汝夔兩人。獨純父疾惡過嚴。人以爲確評。詩文爲王元美吳明卿諸人所推重。有集若干卷。

羅萬化。字一甫。號康洲。會稽人。少凝重。六歲就塾舍。舍傍屋忽圮。衆孩奔散。萬化端坐自若。識者異之。嘉靖甲子領鄉薦。隆慶二年戊辰舉於禮部。廷對膺上。穆宗有所更易。禱而探膺得之。置第一。及臚唱。狀貌清整。進止中度。一廷皆爲色動。授翰林院修撰。與修世宗實錄。辛未分校禮闈。神宗卽位。錄成。陞侍讀。筭理誥敕。與修大明會典。萬歷七年己卯。出典應天鄉試。明年復分校禮闈。張居正柄國。以嚴峻爲治。萬化

意內不然之。數形歎論。而居正亦以其伉厲自遠。欲羅之門下。其幸客周生者。生同邑。私欲從中縫合之。每過邸舍。數徵詞動之。萬化覺輒亂其緒。或舉酒浮之。令不得竟。居正寵奴尤七。建三清殿於都市。周生私爲請記於萬化。恚曰。吾天子侍從臣。而當爲奴作記耶。是歲復爲其子先期請試題。萬化愈怒。起曰。吾晚裝兩篋書。且出宣武門。謂吾難去官乎。何薄我。以是愈失居正歡。每與銓曹言。令外補。萬化或難之。居正怒曰。楊惟雄非狀元。不嘗補外耶。不果。而終居正不遷官。居正死。始遷右春坊右諭德。充經筵講官。明年陞國子監祭酒。條教甚謹。會有欲代之者。陰言於執政云。羅君親老。念之欲南。萬化聞之曰。正吾懷也。詰朝鞭馬詣朝房。如其言。請出爲南京禮部右侍郎。外艱歸。居五歲不召。朝賢或爲訟言。十八年庚寅。復起南吏部右侍郎。辛卯入爲吏部左侍郎。無何奉命攝部事。肅銓體。不假借。或諸司有失關請。輒面詰責。甚至逮繫掾吏榜之。銓事肅然。壬辰陞禮部尙書。兼翰林院學士。教習庶吉士。充正史副總裁。是冬回理部事。先是儲位未定。廷臣交章請。上以二十一年行。至是期迫。首輔王錫爵適以召至。深慮上意未可必得。而元子漸長。講讀失時。欲姑援嘉靖時封王例。出閣讀書。而陰系以立長之說。欲以動上聽。取萬全。以語萬化。萬化持謂不可。明日三王並封之命下。萬化率其佐詣朝房。陳說時勢。言甚凱至。錫爵謂已苦心瀝膽。取一時宜適。而公不已亮。意頗拂。萬化抗辯不已。而頰俱赤。明日繳敕諭。上疏曰。祖訓立嫡不立庶。蓋以有嫡有庶。自不得舍嫡而立庶耳。非嫡未出。而必待嫡之謂也。臣不暇遠引。歷考本朝故事。皆有嫡立嫡。無嫡立長。因時豫建。計不少待。無他。爲宗廟社稷立重也。今皇后祿兆未彰。皇長子睿齡日茂。節奉

明旨昭如日星。而復援立嫡之經。暫從封國之典。將使觀望靡定。疑慮叢生。臣等具員禮官。深惟大計。有死不敢奉命。會諸司疏日百數。上事遂寢。萬化復奏曰。皇上聖度如天。俯徇廷議。臣等可勝慶忭。惟於冊立大典。猶欲少俟歲時。臣等反覆思惟。此宗社大計。皇上豈不心明之。而未能斷行者。豈猶有窒礙於中。不能自決者耶。夫上意之微妙。或不可喻之於下。下言之委曲。容有不敢畢之於上。此百言而百不中。情宜有之。竊念廷臣之最倚信於皇上者。莫如大學士錫爵。誠宜及此時。御便殿。召而問之。令之考證古今。詳計審處。一言而定大禮。決大計。在此舉矣。疏凡十奏。錫爵亦具搢爭之。於是國本乃定。朝鮮之役。當事者力主封倭。而難信者。請勸使封使並出。萬化謂封議已堅。勸使祇假設耳。卽令勸使果不虛出。而以封命之重。出而復返。國體爲何。乃奏以爲今日封倭之議。督臣力任之於外。樞臣堅主之於內。則倭封已爲成事。更復何說。然舉朝爭之。不遺餘力者。何也。蓋以倭本逆。而誤以爲順。本詐而誤以爲誠。懼於墮倭計。損國威。爲天下萬世笑也。而督臣不察。至欲以封命與勸使同出。夫我以封而賞寇。倭以兵而邀封。釜山非封命所出之途。阻兵釜山。亦非叩闕乞封之禮。此與城下之盟。何以異。豈可使四夷聞且見耶。後封使覓出。倭敗約。使辱命返。上震怒。大出師逐倭。倭乃遁。竟如其言。宗祿旣告置。議者咸謂宜通祖制之變。令稍就四民業。疏支得開科應舉。而當事者懼。僭持後慮。積不敢決。萬化毅然請施行之。藩府隸制。請封上意向予之。堅不予。至有詔切責。執奏詞愈切直。時枚卜閣員。或言中人須少貸之。萬化歎曰。吾山谷寒士。被遇至此。於吾過矣。此何官而可貸得耶。會病作。思母。連疏固請歸。許之。賜驛資金。所以寵行者甚渥。旣

行病加遽。至寶應卒。賜祭葬。贈太子少保。諡文懿。
史官曰。懋學居官。譽謬能持大體。思孝所至。衲鑿不爲禍。揚萬化。特立輕去就。終始不渝。皆傳所謂剛者也。當江陵專國。呈身繞指者多矣。三君子乘鷹鷂之志。較然不惑。卒以功名終。孰云太剛則折乎。





明書卷一百三十五

列傳四

名臣傳二十

高拱傳

高拱字肅卿。新鄭人。嘉靖十九年庚子年十七。魁其鄉。明年成進士。改庶吉士。授編修。時嚴嵩徐階各以計相傾拱。無所見。厚薄時。穆宗爲裕王。出閣講學。居外府。遴爲講官。盡心開導。穆宗目屬而心儀之。時人情洶洶。穆宗日懷恐惻。兩府錯雜。讒言肆出。拱竭力周旋其間。王深倚重之。陞侍讀。尋陞侍講學士。在府九年。陞太常寺卿。管祭酒事。穆宗賜金繒甚夥。哽咽不能別。時雖在國子府中事。必令中使往問。穆宗思之切。親書懷賢二字。又書忠貞二字。又書啓發弘多四字。皆遣中使賜至。第四十一年壬戌。陞禮部左侍郎兼學士。癸亥。改吏部左侍郎兼學士。掌詹事府事。乙丑。陞禮部尚書兼學士。丙寅。進兼文淵閣大學士。參預機務。未及召入直。賜直房食用乘馬。時分御膳賜之。閣臣入直西苑。自世宗中年始。有事在閣。世宗諭閣臣曰。閣中政本。可輪一人往。徐階不往。曰不能離陛下也。袁煒亦不往。曰不能離陛下也。拱正色問階曰。公元老常直可矣。不才與李郭兩公。願日輪一人詣閣中習故事。世宗崩。徐階袖出草詔。欲以遺命。

盡反先政。拱謂語太峻。與郭樸對案相向。曰先帝英主。四十五年。所行非盡不善。上親子。非他人也。三十登庸。非幼小也。乃明於上前。揚先帝之罪。以示天下。如先帝何。吾不忍也。相視淚下。語稍聞外廷。而忌者側目。會穆宗卽位。議賞賚。拱曰。神宗無此例。自英宗卽位始。先帝以親藩入繼。時殷富。遂加倍。今第如正統時。則四百萬中。可省其半。會科臣論劾大臣某。其人實不當去。而諸輔重違言者意。議以揭請上裁。拱曰。此端不可開。先帝歷年多。通達國體。諸事宜請上裁。今上卽位甫數日。安得徧知羣下賢否。而使上自裁。上或難於裁。有所旁寄。天下事去矣。會科臣胡應嘉上疏。申救諸大計被黜者。執政以應嘉亂政。黜爲民外廷。爭謂拱主之。於是言者至十三餘疏。因力請去。不允。故事拾遺不及閣臣。而南給事岑用賓等銜之。遂以拱拾遺上不聽。更力求去。上驚問左右曰。高先生病耶。左右對曰。病甚。上猶弗許。久之。賜馳驛歸。賜白金彩幣蟒衣。居一載。詔還內閣。兼理吏部事。拱至。慨然以天下爲己任。凡晨理閣事。午視部事。人謂公門無片楮。拱曰。是奚足哉。大臣以體國爲忠。以匡國事爲美。區區小廉細節耳。甯足多乎。往黜陟取辨倉卒。不無紕繆。拱集諸司官。各授之策。曰。吏部職在知人人。不易知也。幸諸公早計之。某也德。德何如。某也才。才何如。書諸冊。某也不德。不德何如。某也不才。不才何如。書諸冊。某也所自見。某也得之何人。書諸冊。皆親封記之。月終以復於予。慎之哉。予且以此見諸君賢。每歲所得凡八百十餘冊。以爲參驗。以故賢否不淆。黜陟允當。鹵類入犯。中外以兵事爲憂。拱疏謂大司馬安危所係。至重也。不得其人。由儲之不豫。少司馬止二員。此無事時耳。閱邊事未免假於他官。或遇總督乏人。未免移於他處。假他官則非本職。不

便行事。移他處則補於東。缺於西。彼此候代。動經歲時。不得履任。門庭誰禦。請於兵部增侍郎二員。一遇巡閱。卽以一人往。邊方員缺。卽以一人往。凡邊方險隘。鹵情緩急。將領賢否。士馬強弱。皆已曉暢。方略素定。遇大司馬員缺。卽以補之。如此而稱乏用。必不然也。兵乃專門之學。儲養本兵大臣。當自司屬始。兵部司屬在軍旅。而不擇其人。泛然以用。又往往遷爲他官。今宜特高其選。而以有智謀才力者充之。使其專官於此。不復他遷。如他方兵備。卽以司屬往。邊方撫臣。卽以兵備往。邊方總督。卽以撫臣往。而總督與在部侍郎。時出時入。以候尙書之缺。如此而稱乏用。必不然也。邊方之臣。又宜特示優厚。使其功名常在。人先。他官不得與之論年月。脫或不稱。則律以法。使其功名常在。人後。如是而猶不盡力。必不然也。邊關總督之臣。在邊日久。著有成績。當令回署以休暇之。後不妨再出。使其精神不疲。而知慧不竭。以勤王事。爲濟必多。上從之。又上疏曰。臣惟邊方有司。有疆場之責。才者猶懼不堪。卽優禮而鼓舞之。猶恐不振。乃官其地者。非雜流則遷謫。待之既薄。志意墜沮。又何望其展布。蓋徒以地苦其人。而曾不顧人之苦其地也。徒以邊方爲遠。而不知遠安然後邇安也。請擇年力精強。才氣超邁。兼通武事者。調用。有能保惠困窮。俾皆樂業者。比內地超等陞遷。有能捍患禦敵者。以軍功論。不次擢用。惟以治效。不以資格。儻功名之路一開。或有藉口邊方。以圖幸進者。則爲一定之說。以限之。於是各邊各有分地。而邊吏奮當霜降。讞獄例。吏尙書執筆。乃秉燭視獄詞。漏盡不休。晝則集諸司議於朝房。出冤獄一百三十九人。時入覲。乃集天下有司策之曰。各地方有何賢才尙隱淪。有何兇頑尙梗。正有何利當興。何所沮而弗興。何害當革。何所畏而

弗革。皆得盡言之。令封識以告。拱每取入奏。故天下事如在目中。時重制科。輕科貢。拱曰。天下制科處其三。科貢處其七。是崇其三而棄其七也。乃疏請惟賢是視。不計科貢。故事推陞時。皆主事揭授郎中。呈於尙書。拱令吏抱牘至後堂。同堂屬揭之。商可否。而私不得行。鹽馬官暨遠方知府。率薄視之。以故乏善政。奏請以賢者往。不得復有低昂。積數遇貧薄之區。錢糧當苦寒之地。皆特寬其額。則官不苦難往。司教驛。遞開壩諸官。皆處以他省。使有官者不能赴。而去官者不得歸。拱謂彼無民社責。請得選本省人。皆稱便。它如開王親內轉之例。覆一甲讀書之規。正撫按舉劾之差。嚴京宦考滿之實。分進士講律之會。定王官陞授之條。議有司捕盜之格。皆拱經如故。黔公沐朝弼既謝事。請入南京赴葬。撫按奏曰。沐昌祚政事清明。以致歲豐。朝弼逼走昌祚。不知所往。請將朝弼錮南京。毋令回鎮。兵部入閣問計。拱曰。謬矣。雲南守巡。故以挫沐爲丰采。今又其故智耳。黔鎮衆所寓目。奚謂不知所往。昌祚孺子耳。安能動天地。朝弼有罪。朝廷以檻車逮之。胡賺錮耶。越數日。昌祚奏請還其父。且言撫按誣奏。廷臣始服其明見。其議處鹵會俺答。孫把漢那吉來降事。詳四國韃靼傳中。至議封貢事。時鹵哀求日懇。而朝中多疑畏。羣議皆以宋人講和爲辭。拱曰。天下之事。以己求人。機在人。以人求己。機在己。宋人求和於鹵。機在鹵。故曰講。今鹵求貢於我。機在我。直許之而已。彼曉曉者。豈爲國籌利害哉。徒念重大。恐有不效。留爲後言耳。乃請封俺答爲順義王。其餘都督指揮千百戶有差。套鹵吉能等亦以爲請。三邊總督難之。拱擬旨切責。復貽之書曰。三邊宣大。似難異同。異同則宣大之方開開。而三邊之擾如故。豈無俺答之人。稱吉能而擾三邊者乎。亦豈無吉

能之人稱俺答而市宜大者乎。是宜大有市而又擾也。三邊苦擾而實市也。同則兩利。異則兩壞。總督者議始協。於是俺答進馬謝。吉能亦附焉。而邊境大甯。復上疏曰。嘉靖十九年遣使求貢。不過貪賞賚。與互市之利耳。邊使倉卒失策。常事憚於謨謀。乃卻其請。斬使絕之。以致黠鹵怨憤。擁衆大舉。此往歲失計之明驗也。今天佑國家。弭耳入貢。息境土之蹂踐。免生靈之荼毒。省內帑之供億。停士馬之調遣。乘此閒暇。修我邊備。若見甯息。遂爾偷安。若從此懈弛。卒然有變。將何以應。是臣等謀國之忠。反成誤國之罪矣。請每歲特遣才望大臣。四出閱視。以今視昔。錢穀贏幾何。兵馬增幾何。器械整幾何。其他屯田鹽法。以及諸事。拓廣幾何。果有成績。論武功爵。若襲故常。罪如失機。上嘉納之。隆慶六年壬申。上久不御殿。忽且視朝。鐘鼓嚴傳。宜閣下。急拱趨至。則上已立於墀中。執拱手北行。至乾清宮。拱不敢入。上顧曰。送我。拱承旨。直至乾清宮。上御榻坐。手猶未釋。連云有人欺我。拱曰。有國法在。上色愷甚。拱慰解之。暫退。上傳高閣。老夜宿乾清宮門外。拱謂張居正曰。吾二人一去一留。是示人輕重也。吾爲公奏。得旨。二閣臣皆在乾清宮門外。薄暮又奏曰。禁地非人臣所宜宿。願宿闕門。陛下召可頃刻至。上可之。報御體漸復。乃退。且疏請上懲忿寡欲。上覽甚喜。至四月二十四日。申刻。宣內閣受顧命。司禮監以二札。一授皇太子。一授拱。蓋遺詔也。拱泣奏曰。受陛下厚恩。誓以死報。奏畢大哭。兩宮亦哭。二內臣挾拱長號以出。神宗卽位。拱上言五事。一謂御門聽政。玉音親答。以見政令出自主上。二謂題奏繁多。難以徧閱。自有節要。請先籤出。以便省覽。三謂事必面奏。乃得盡情。四謂大小章奏。俱發內閣看詳。若或未經發擬。徑自內批者。容臣等執奏。五謂官

民章疏。當行當止。未有留中之理。得旨報可。是時居正與閣保比。取中宮旨。逐拱。拱即日乘驛車去。歸杜門謝客。口不言時事。後有王大臣之獄。屢借危之。卒獲免。萬歷六年卒。祭葬半給。又二十餘年。始贈太師。諡文襄。錄一子尙寶司丞。

史官曰。高拱以藩邸腹心。得君行政。慨然以綜核名實爲己任。其所條奏。銓政邊才。鑿鑿可施之當今。練達曉暢。救時賢相也。然昧於幾事。輸誠同列。卒受傾危。抑所謂不學無術者歟。

郭正域傳

郭正域。字美命。江夏人。生而卓犖。籍甚膠庠。都御史王某延爲子師。陳其書。庭檢之。正域一宿。輒稱病出。武昌守徵爲古文詞。遣吏督促。乃故不應。曰。此誠士法也。識者已知爲公輔器。萬歷十一年癸未成進士。選庶吉士。自念北扉重地。而奈何諸君子逸於外。皆以作者自雄。妄謂登壇不由史館。吾當有以振之。博極羣書。尤究心朝典。文必西京。詩必鄴下。一洗臺閣體相沿之習。至於河漕鹽屯。兵食大計。四方風土人物。與利弊興革之宜。辯若懸河。胸有成算。丁憂服闋。補編修。大學士沈一貫初出山。嶽嶽自負。正域獨不降。一貫恚。正域侍東宮讀講業四年。例不當出。出亦不當南。而一貫以南祭酒遠之。未幾還爲禮部侍郎。則大學士沈鯉爲次相。望實出首輔上。勢相逼。每引正域爲忘年交。遂有南北黨之目。而一貫更大恚。正域以諛法濫。其甚者議奪。次議改。而故大學士餘姚呂本在議中。沈一貫王家屏聞之。曰。吾二人在。誰敢改。正域聞之。曰。吾敢改。若以黃光昇當諛。是海瑞當殺也。若以許論當諛。則沈鍊當殺也。若以呂本當

諛則守禮諸人皆當鐫其秩沒其恤也奪之當疏上竟留中禮部所司藩封例藩由中尉進封者次子不得封郡王而秦王請次子爲世子堅執不與秦王又奏旣不得封世子請封郡王又爭不與巨閹魯保旣竊兩淮鹺政又兼南京浙江織造請專敕與關防內閣業與敕正域獨不與關防爭之閣中不能得退而奏南京浙江各有內臣各有職司魯保欲任二職轄兩地儻諸閣效尤以請將海爭無已時非禮也關防竟得無給會有楚藩事益與一貫忤楚宗人華越奏謂楚王爲某氏子數邦滅郢正域素聞諸宗口語不爲王辯而諸宗嘖嘖謂郭侍郎爲王地欲須其歸以鐵錐錐其首髮其廕正域詣一貫請行勘一貫以體訪拒之正域以楚王所遺金上聞有詔廷臣會議於是人持一牘正域恐太煩爲節略以進而言者謂其匿議單不以實聞遂疏辯語侵執政一貫亦自理會楚王許正域歸聽勘正域行次楊村而妖書之事作妖書者爲東宮作危語而波一貫不知誰何筆也上見之震怒下詔大索時朝官引繩批根無所不至意常在鯉與正域至形之牘奏而正域兄正方友如刑部于玉立禮部田大年布衣沈令譽僧達觀繁榜且死_子無狀又數有人恐喝勸其自裁正域弗爲動同官華亭唐順之會稽陶望齡等以名義勸一貫而一貫曰此上意也我何與遷者謂爲京諸生嫩生光素險膚所引語略相合宜坐罪主讞者恐生光自誣無從牽正域而御史牛應元沈裕刑部郎王術古證成之生光死然亦不足爲生光筆也當其爲南祭酒有王生者條上太學利弊諸生聞而譟將羣殿之正域陽治輿臺解譟者而陰廉其魁率罪之甯遠伯之孫婚於魏國騎而過文廟門博士執而扶之須臾李家奴數百踣邸門思逞而魏公亦至正域謂魏公曰今

天子尙皮弁拜孔廟。柰何人臣騎過廟門乎。已則廢禮。令兩及門相謝而罷。其在禮部。回夷以王市而不得直。長跪泣道傍。正域上其事。上遽命承運庫子之。常熟諸生試於府。羣以小忿辱常州知府。或謂人衆法所不及。正域曰。以衆廢法。孰不與衆。有力者藉衆犯法。而以寒賤抵罪。長此安窮。請勘停一縣諸生。不得試。使相詬悔。庶有懲艾。其倡亂者以三尺從事。報可。自是辭歸不出。卒。熹宗卽位。奉光宗遺詔疏。恩舊講。贈太子少保。廕一子中書舍人。諡文毅。

史官曰。郭正域與時相忤。幾不脫虎口。然所爭藩宗。在禮言禮。皆守官正論也。妖書事起。張網彌天。小人之傾險至是哉。

李化龍傳

李化龍字于田。號霖寰。長垣人。母吳妊時。夢大雨中有玉柱自天而下。峙立庭中。化爲龍。所以命名。少聰穎。讀書五行俱下。爲文操觚立就。一時稱爲聖童。郡守王鳴谷名士也。重之。招之書院中。每試輒冠軍。萬曆二年甲戌進士。授嵩縣知縣。纔二十歲。吏皆見其少而秀羸。署字故草草試之。化龍心度弘廓。不問也。其輩遂駁媮。化龍忽攝以威嚴。寘之法。豪猾皆登邑。大治。遷南工部主事。權稅蕪湖。平稅無所染。尋調南吏部。曹務閒。時魏懋貞鄒爾瞻輩皆在南都。相與結期聯騎。游采石雨花燕磯之間。稱詩裁賦。人傳之爲金陵勝事。久之擢僉事。督學河南。每試。隨收隨校。一目十行下。卽品題。其所指文中利病甚詳核。有是學而久不遇者。往往駭拔之。人多鼓舞。一時稱神。已遷參議。復督學山東。當御試。例考遺才。有司以請。化龍

曰經我目無遺才也。既而曰有病及丁艱服闋者乎。羣數百十人試之。校其文曰有舉子六人。幾失之。皆獲雋。已而攝河南參政。尋入爲太僕少卿。晉通政。會遼東巡撫缺。遼東於諸邊稱廢壞。難其人。京朝官僉曰李化龍督學時。兼攝數道。事至立部。如簞之汜。輕塵。此何所不可。遂陞右僉都御史。撫遼東。是冬虜東西合謀入犯。化龍筴曰。西虜數萬。其鋒不可犯。東虜僅少易與耳。乃檄大帥董一元杖兵鎮武堡。空其營。賊入。率兵橫擊之。斬虜首四百餘級。鹵遁去。明日西虜至。攻右屯。乃檄將兵夜劫營。虜覺引去。上功。晉兵部右侍郎。磨一子錦衣衛。正千戶世襲。已而東虜以鎮武之忿。數入犯。化龍以精兵敗之於靖遠。又敗之高平。又率兵出塞搗巢。大敗之於什方寺堡。自是不敢內窺矣。捷上。賜金帛。升俸二級。因念兩親老。且數病。求歸。許之。時有播酋楊應龍之變。先是守土者控馭無術。或冒沒重賂。酋旣驕矣。而又治以漢法。激之成跋扈。乃請勦。上卽家拜兵部尙書都御史。總督川廣湖貴事。賜尙方劍。斬偏裨以下不用命者。比發家。則酋已破碁江。參將房嘉龍遊擊張良賢戰死。化龍往從容談笑。將吏恃以無恐。入碁江。卽爲文祭二將軍。曰人誰無死。以法死。以賄死。以寒疾不潰。五日死。以飲酒御婦人死。等死耳。曷若死國之不朽也。慷慨激烈。以是人人自奮。乃殫力經營。開畫方略。破其壘。詳具亂賊傳。酋投纒死。其妻妾子女皆就擒。凡斬首二萬二千六百八十七級。生擒一千二百二十四名。日獲五千五百三十九名。播地悉平。論功加少保。兼太子太保。勳柱國。又條上復郡縣等十二事。爲善後之計。皆報可。適外艱。疏求奔喪。八上而後得歸。服闋起故官。總督河道。先是治河者遷去。或里居。皆以所築隄次追罰爲畏途。化龍至。則徧行淮徐鳳泗間。歷

覽周咨得泃河遺跡。憤然曰：是所以避黃河呂梁之險而措之衽席者也。柰何既脫而復入乎？乃上疏言開泃河鳩工濬舊渠八十七里。開新渠八十二里。諸隄障閘關悉備。於是歲運千艘無所礙。昔稱過洪。今稱過淮。卽爲已至。漕運賴之。又見秋水漲溢。不無衝囓。乃疏請爲分黃保泃。一勞永逸計。以內艱歸禫除。起兵部尙書。武弁之陞遷。大都諧價於天市。而取之於職方。化龍揭其資薦之數於部堂。有缺序轉。而以功次參酌之。倖濫頓息。考察軍政。諸特與援。多羽翼者。以爲萬不可動。化龍稔其貪懦狀。斥之。時論壯之前後條議四十餘事。皆精密可行。卒年五十八。贈少師。子不矜。爲錦衣指揮同知。不盈爲錦衣指揮使。其爲詩文。隨手而成。章卓然大雅。少年通顯。立致鼎足。而親賢下士。形骸都忘。終日談笑。情瀾靡竭。而未嘗有漏言。遇事敢爲。計慮周密。所著有奏議藁二十卷。平計十卷。

魏允貞趙南星傳

魏允貞字懋忠。別號見泉。南樂人。父怡以明經爲通判。行廉而德厚。趙魏間稱爲大人。年九十六卒。母楊生三子。長允中。萬歷八年庚辰進士。官史部主事。次允孚。三年甲戌進士。官刑部郎中。文章氣節。並爲時論所推。允貞兒時。內穎外方。屹如成人。比就外塾。日惟讀書。不知嬉戲。四年丙子舉於鄉。明年成進士。授荊州府推官。荆俗剽悍。善訟。多疑獄。累年不決者。允貞縛律。誦情。悉斷遣之。時張居正擅權。作威福。官其地者。率畏事之。柔繞求容。惟允貞庶正自植。民賴以安。張氏奴有不逞者。衆咋舌莫敢問。獨繩以三尺。居正不恚。更重之。壬午徵爲監察御史。會居正卒。遺表薦其私人。禮尙書潘晟。當入閣。爲身後之利。允貞上

疏極言潘晟品下齒衰。衆必不服。不可相。若不知止。所謂苟患失之。無所不至。其爲聖治之累甚大。不報。既而陳四事。曰公文武之用。嚴科舉之防。慎臺諫之選。務戰守之實。語多侵執政。而居正諸子聯翩高第。遂爲相庭故事。駭及諸有力者。肆無顧忌。所謂嚴科舉之防。尤執政所恨。謫判許州。戶部郎中李三才疏救之。謫東昌推官。尋陞南吏部主事。南吏部事簡。獨胥吏有貼班銀。以佐四司僕馬費。允貞請悉革之。南吏尙書邱樞。侍郎海瑞。皆倚重。許其有大臣器。是時鄒元標以言事調南刑部。李化龍爲南工部。相友善。講道論文。人目爲德星之聚云。如是者二年。念親老。疏請致仕。不允。遷光祿丞。奉命祭秦藩。秦藩饋遺甚厚。皆卻之。陞少卿。請告歸。三年。卽家拜順天府丞。陞右通政。亡何。陞右副都御史。巡撫山西。至則條上五事。曰選授得宜。則吏治修。支放足數。則軍情悅。屯鹽不虛。則國計實。宗室不犯。則國體尊。禁林不伐。則邊防固。上皆報可。文武吏奉教令。競競飭篋。無貪暴者。平陽知府某歲所節數萬金。以報。允貞極其稱讚。用充平陽稅租。於是有司條議裁革者衆。或過於刻削。還其牘曰。非人情也。以汾州有二郡王。宗人多。軍民雜處。知州官卑不能制。奏改爲府。卜山西與虜鄰。自款市之後。邊備日弛。乃親歷其地。視要害。覈軍實。建議整飭。易忻州崞縣方山鎮城以甌石。而黃龍池草垛山河會水泉石茆等處。皆削爲堡。詔官養屯屯守之。發人徒修築。偏關老營等處。邊牆萬餘丈。督造鎧甲戎器。市買驛馬。又修文中子諸賢之祠。及書院。陶化人才。凡皆取諸其所節省。無他科索。值宮殿災。有密以礦說進者。武弁如仲春等。爭言礦處。允貞上疏言。人主玉食萬國。何以開礦爲。頻年調逐諸臣。其中豈無忠臣義士。有一人焉。可抵萬黃金。不此之寶。

而發天地之藏以求利。諸臣之爲計亦左矣。疏入不報。行抽稅法。自是山西中使張忠孫朝。及他省陳增。高淮魯保馬堂等益橫。文武吏士人注其意者。每繫繫於千萬里之外。候選臺省。久留京邸不下。允貞上疏言。陛下何重官寺而輕言官也。疏入不報。而中使遂舉劾有司。如典史驛丞等官。往往斃於凌虐。允貞上疏自劾。不能爲吏民延旦夕之命。臣罪宜罷黜。疏入又不報。則遂挺身扞之力。摧其爪距。其輩皆驚。見允貞不能出一語。允貞不少假借。其輩大窘。遂奏允貞沮格礦稅。而誣以八年公費酒稅等金數十萬。皆入己。上下其議。部院諸大臣於是九卿合詞上言。允貞操節清苦。天下莫不聞。彼既參內臣。內臣詆譎相報。天下共知其枉。疏上不報。山西吏民數千人叩闕籲留。事遂寢。中使之疏初上。允貞所興建。諸領其役者。及支給之數。翦記。至是出以相質。鏹銖不爽。自酒稅贖錢外。卽廩給乃其餐錢。亦以爲公用。至家人往來。皆自備車馬。所過傳舍。食餘計所費。償之。傳吏以報。於是衆益驚服。咸知其清。謂非有中使疏。亦不知其至此。撫晉九年。求歸養者二十餘疏。不報。至是乃下。卽日命駕。軍民遮道號泣。皆爲祠祀之。允貞天性孝友。而父子兄弟皆賢達人。居則以道德相敬愛。出則以忠貞相勸勉。允貞爲國家生民計。不知有生死利害。故能信心孤往。無旁顧卻慮。萬歷二十四年丙午正月卒。子廣微。萬歷甲辰進士。官翰林。仕至大學士。與閣忠賢聯宗比暱。人以其有愧於父云。

趙南星。字夢白。真定高邑人。少聰慧。倜儻譎浪。不可一世。萬歷甲戌二年成進士。授汝甯推官。稱廉平。陞戶部主事。張居正臥病。朝士徧走羣望。南星與顧憲成。姜士昌輩戒弗往。仍爲紀事詩曰。二豎能憂國。千

官爲祝年。傳播人口。居安歿。以輿望入銓司。改吏部。吏尙書楊巍挾私意。欲糾御史丁此呂。南星洩其謀於給事中王士性。巍怒。南星畏禍。遂引疾歸。後起選司主事。吏尙書陳有年。一日問南星曰。不敏多過。何以教之。對曰。人惟清靜。安得有過。有年曰。是謂我不任事也。因起用幽廢。如海瑞。何以尙等。以內艱服除。補陞稽勳員外郎。調文選。有直陳時務疏。所抨擊多人。朝論閔然。復引疾歸。後吏尙書陸光祖將去國。特起南星田間。與執政議相左。二十一年癸巳。廷臣當大計。孫繼爲吏尙書。南星司考功。先是政府三公。各有所庇。南星故入察典。皆不免。閣銓相水火。凡省臺之長。應預事者。南星以非其同類。恐撓其事。不盡使之知。奏上。諸失職者。又大闕。省臺臣皆恥不預聞。首糾稽勳虞澹熙。給事中劉道隆。疏劾其黨同伐異。剛愎自用。尙書竈俛首聽從。竈奪俸。南星外謫。南星常主計時。靜坐篝燈。精心參酌。有蟲巢於耳。繭成而不覺。援筆注考。於要津獨嚴。遇一權勢姓名。奮肘乙之。有疏救者。旨批削南星籍。二十八年。熹宗卽位。卽家擢太常少卿。左通政。尋晉太常卿。未赴。明年改工部侍郎。旋晉左都御史。掌都察院。天啓三年癸亥。主京察事。吏尙書多遲迴瞻顧。南星作四凶議。以堅其意。所鋤去略與癸巳爲考功時等。遇撫按報命。自屬吏及鄉人才。有濫薦牘者。立糾彈之。人多震悚。亡何。轉吏尙書。奮力仔肩。以澄敝爲己任。謂長安交際殷煩。士大夫朝氣皆疲於應酬。亭午入署。懷懨不支矣。請以全力盡職業。率諸曹郎。昧爽入署。以爲常。又欲廉巡撫之賢者。與郡邑循吏。皆久任。銓司如考功文選。亦不得皇皇弛担。官評報部。多循故事。以卑冗及惟魯寡援者。一二人塞白。使貪暴漏網。嘉與天下浣濯。此皆往時八品官移封父母有例。請下逮九品。疏濬

選法幕官以下皆區畫鼓舞以盡其用。謂簞篋溢則彈壓輕戒上官毋入守令貢獻。又知從來典選者竿牘盈箱臺省至雄貴。遇銓郎多望塵磬折刺刺耳語。嚴飭諸司毋徇一切請託。有挾而來者白其事。奏上罪之人始脊脊稱厲。所以謗譟繁滋。南星不恤也。時鄒維漣由兵部郎調吏部。江右一銓部尙在事。一省兩銓尤爲粉飾。又不與江右臺省謀。獨二三同志決之。又大闕。先是忠賢知南星爲人豪。傾意皈往。嘗於上前亟稱其任事。一日囑其甥傅應星事。介一中翰爲贊於南星。南星麾去。又嘗同坐弘政門。選通參。南星語忠賢曰。主上冲年。內外臣子各努力爲善。忠賢默然。怒形於色。南星遂杜門乞歸。而魏廣微父允貞曾與南星爲同好。南星素以通家子畜之。無少假。廣微時在內閣。南星畜之愈峻。或卜肆關說。執不可。積恨入骨。與閹比而謀嚙之。左都御史高攀龍發御史崔呈秀狼藉狀。南星議戍之。呈秀倉皇走閹。忠賢所請命言不去某某。我兩人未知死所。適晉撫缺。南星推謝應祥。它垂涎者不與。而論者謂謝爲吏掌垣師。故南星奉之。選郎與吏垣皆謫。南星亦上疏乞骸骨。許之。閹忠賢首用某御史言興詔獄。周內鉗網。奏多賾證。南星行。撫按鞠訊。當事者方藉事效首功。辱之詎庭。子工部主事清衡遭痛極。楊於市。觀者多憤泣。坐贖萬五千金。追呼甚急。六世之業一朝如洗。親友故人皆醜金爲助。讎上。南星謫戍代州。清衡謫莊浪。而其甥中書王鐘胤亦遣戍。南星坐短轡。攜殘書一篋。至代州。僦居一小樓。顏曰吉祥。又掃除土舍。顏曰味藜齋。日夕開卷。或弄筆爲適。卽有登然之音。謹屏不敢應。晉藩遣使存問。未敢開命。年餘。懷宗卽位。肆赦未及還。卒於戍所。其爲文抒寫磊塊。汪汪千頃。激爲怒濤。源本馬遷。而取裁於韓蘇。雄奇之中。刁斗

秩如。詩則淋漓沈痛語。使人欲泣欲嘯。有易水擊筑之音。有不得意。及有所稱揚。輒發爲詩歌。以豁其幽憤。無所回護。往往以此招怨尤。所著有芳茹園文集數十卷。世稱儕鶴先生。魏忠賢敗。復其官。贈太子太保。諡忠毅。予祭葬如例子。清衡。甥鍾胤。復故官。

史官曰。允貞南星。生同地。允貞忤政府。忤中涓。特立行一意。而無能中之者。以其公廉盡節。官下鮮伐異之謀也。南星嶽嶽。人折其角。意少激矣。遂爲闖禍首。兩賢相得。而盧奕有子。實狀真卿。疇謂忠孝有世類乎。悲夫。

成基命傳

成基命。字靖之。別號愆予。遼宣宗御諱。以字行。大名之元城人。少生有異質。就外傳。日誦數千言。屬文輒工。時鄉大夫皆以猶龍稱之。萬歷二十一年癸巳。以特選入太學。時葉向高爲祭酒。每語人曰。成子公輔器也。試輒高等。雍事竣。不受銓家蹇躓。益肆力學問。至三十四年丙午。舉於鄉。明年丁未。成進士。改翰林院庶吉士。乃取累朝舊典。若方輿利病。皆條悉不遺餘力。而於詩文獨進。秦漢大歷以上。館閣師皆重器之。庚戌外艱歸。壬子服闋。守故官。丙辰。分核禮闈。所得多知名士。皆蔚爲名臣。戊午。典江右試。庚申。遷右中允。尋改洗馬。管司業事。敦尙風節。爲太學先。諸生多所成就。熹宗卽位。疏請視學。不先關白內閣。閣臣恚。以原官回局。於是請告歸。癸亥。預備光宗實錄。錄成。遷右庶子。管誥敕。詞獨雅重。人爭求以爲榮。補日講官。每進講。敷祈詳明。寓以規諷。上肅容傾聽。其方音不合者。輒諭曰。盍取正。成先生。陞少詹事。加太子

賓客進禮部右侍郎。時閣忠賢初竊政。附影觀風者。每驟躋巍秩。基命風間澄峻。每正色講筵。獨弗推襟送抱。修歎謁。每自矢曰。無負細旃也。會楊漣左光斗諸獄興。搆者誣以爲漣等袷。以激怒閣。閣果恚。及天啓四年甲子。以講筵敍遷。獨基命守故官。不晉秩。基命遂決意去。或謂之曰。執政有瓜葛。可解也。基命不答。從容謂之曰。講官。皇上規繩也。規繩自墜。安作皇上規繩。乙丑注籍不獲歸。遂卮例以原官掌南翰林院篆。便道歸里。再疏乞骸。不允。亡何。以他人疏內批閑住。遂歸。集友人結春草社。翩翩高遠。快發高朗之音。不復念墮羿之矢。而顧尺口。若將終身焉。懷宗御極。卽家拜吏部右侍郎。充經筵講官。每進講。披瀝忠懇。如曩時。與修神宗實錄。基命每對上。鶴立至表。懷宗每目屬之。尋回部管左佐郎事。力任澄敘。疏壅剔滯。飭諸曹郎各舉其職。乃奏議。剴單發訪。使京朝官各舉所知。彙進上覽。以敍推補。仍先起廢。懷宗皆允行。未幾邊警亟。上御平臺。集廷臣講求方略。基命念綸樞爲戎行根本。無論籌略出自帷幄。卽文武大吏。在用得其人。而內爲應。非綸樞所願。多虻阱焉。綸樞非人。安問大吏。樞貳佐樞。曾不關其說。而悠悠置之。不聞預儲。事急則議多任少。或條議薦舉。非鑿鑿可行。常盡度勿問。至於大豪傑。抱兼資大略。急宜敕廷臣署舉。分曹讞試。不至要人攜所匿。以要常事。遠之遂有煩言。從之。輒以應人。當非常之變。而驟。乃應對條四事。曰。置輔弼。簡樞貳。采讜議。廣招來。懷宗嘉納之。崇禎二年己巳。特旨陞禮部尙書。東閣大學士。預機務。一日。合同官入對平臺。懷宗方敕大學士孫承宗督師關門。乃一一詢方略。基命奏云。願以戰守機宜付承宗。俾盡其才。勿掣肘。承宗必有以仰副聖衷。而他所敷陳。於戎務獨才。一時皆心服焉。懷宗每

拚命思得士一當敵。時庶吉士劉之綸薦蘇州僧申甫。申甫癡而點詭談兵事。之綸嘗泣陳申甫有橫行之請。曰：「幕生兵，置衝車，懷宗壯之，命基命詳閱。極言此小技，敵張甚，非可嘗試。第以甫爲駭骨之招，可懷宗默然。遂越格授兩人官，而竟不效。人皆服其先見。」會清兵逼都城，旋歸東。時紛召外兵，基命以爲外兵已來未定，方來當止。七萃乘城之士，宵旦不得下。宣雲之勁卒入衛，仍當額招，備諸衝要。調集費繁，額賦當急。凍糧當運。明年領兌贖運之法，當行。新餉當增。屯運當緊。豆料之派當均。行糧當覈。而司空之屬收發辦造，仰廩震怒，給發收貯，當晰。內造外造，當促其期。目前見行當急。來歲當預。然笙簫之選，或當箭括。矐頭銷燹，黃口又沓拖，不可奈何。兼以環衛區士不甘密蠶，而四方選卒，抵圻輒烏獸散。至於六垣注銷不講。六曹奏報，省試不聞，亦儆軍實。緩仍支應，卽錯立族談。未有擘肌分理。基命乃一一條畫，諸興革大計，仍痛言所以籌邊之策，謂不堪再。上語納嘉，命擬敕諭行。懷宗重漕，欲復勳臣董漕運，而諸勳攻詰四騰。基命極論勳臣削軍，蠹漕諸弊，事得寢。册立東宮禮成，加太子少保。一日，懷宗御文華殿，謂輔臣曰：「近法紀廢弛，宜大振刷。基命對曰：「治道第宜去太甚。警理亂絲，宜覓頭緒。驟用紛更，恐益撓亂。懷宗曰：「慢則糾之以猛，何如。基命默然。每以懷宗震怒不測，時多所挽回，人莫知也。是時清兵尙據遵永，而兵尙書廷棟，恚總理總兵馬世龍，謀更置之。先是世龍同廷棟分總文武。世龍負氣岸不相下。廷棟入本兵，曠邱禾嘉勅世龍，基命獨破羣忌力奏。上乃敕世龍進取，得弗更置。後世龍統五將軍，下西南兩壁於灤州。未幾世龍又於甯夏三戰，獲首虜七千有奇，非基命力護不及此。西虜乘機要挾，薊督請增兵。基命上言：西

虜忘我象恩顯爲助逆。應如聖諭。逢賊卽殺。不問種類。其召募當令督撫挑練土著。補足舊額。不必屬鎮臣妨勦。懷宗深然之。宣督議圖。插以伐合謀。基命謂東難方殷。插患再啓。力不堪兩應。但勿非其議。而力爲持重。從之。至議固根本。則請用道昌。涿三鎮重臣治兵。以壯聲援。又念兵尙書調發不得專兵。而四方倚兵爲驕。幾如藩鎮。因請一中樞大臣。親提勁旅。以彈壓驕悍。懷宗悉嘉納焉。上方銳意精嚴。一時臣下競競自護不暇。基命每遇所譴誅。輒按法原情。反覆開陳。不爲矯法以救時急。多平氣而奏。如尙書張鳳翔。喬允升。胡應台。韓繼思。皆與申理。得從寬典。如副都御史楊應昌。逮下詔獄。力奏改刑部。而御史李長春。給事中杜齊芳。以私書論斬。基命獨疏救。略云。恭誦嚴旨。仰見皇上明作求治。飭法整欺之意。然辟至決不待時。法重無以復加。二臣所犯。積習因仍。原非一日。有此一番天威。亦足使人警惕。濯魄洗心。祖宗法雖真正死罪。無可矜疑。猶必經幾番質再三才奏。總以事關重辟。不嫌過慎。因跪會極門。自辰至酉。上意解釋。遣戍。時御史劾州邑稽遲之苦。又奏餉司已飭撫按考核。而將怯兵驕。動以遲給爲譁。罪不在餉司也。懷宗俱從之。先是主事李逢申。以擁戴爲驅除。論基命。基命再疏請告。溫旨慰留。尋逢申以炸燬神器。同徐申懋擬遣。懷宗怒欲殺之。基命奏謂大辟下卽遣。而永戍又遣之重者。兩人文墨書生。不諳練。致違誤。非有他也。戍之外更無可加。得戍人服其量。以克復功加太子太保。進文淵閣。廕一子中書舍人。尋奉旨參詳功罪。乃奏謂敍功不宜併摘其罪。似當於行賞後。明諭前過。庶人知功賞區分。懷宗允行。以偶病不入。

直。上遣中官賜上尊白粲。持機密卽榻前稟擬。時軍興大匱。而戚畹乞填價數萬。基命曰。此不足濟軍餉乎。戚臣誼當體國。事平補給。甯晚也。會病劇。數上疏乞骸骨。允之。賜白金綵幣。遣官護乘傳歸。具疏謝。懇懇忠愛。進以保躬節用。鑿薊遼之前車。備宣雲之未雨。上優詔答之。既歸。遂縶馬懸車。作者英會爲詩酒。然時倦倦以國事爲念。中外望其出以安天下。前後論薦無虛日。於崇禎八年乙亥八月卒。卒之夕。猶櫛沐草遺疏。所云振國紀。肅吏治。正士習。憚民困。嚴兵清餉。娓娓數千言。奏上。懷宗震悼。予祭葬如例。贈少保。諡文穆。基命長身玉立。端凝峻朗。居恆恂恂溫厚。及遇事毅然。識沈力定。確不可奪。當帝前。每發所欲言。折衷羣議。諳練典故。體合公心。人咸心折焉。曾不作藩籬。樹同異。而賢者自親。不肖者自遠。至於機政之否臧。刑爵之輕重。文武大吏之去留。每以一言用不用爲效。天性孝友。周急恤孤。獎掖後進。汲汲不倦。門無私謁。罷相日。家無長物。人號爲清白相公。子克羣。成崇禎癸未進士。官翰林。史官曰。基命當闡魏黨灼日。去之若浼。其時文人韻士。率蠅逐影。率以希睟。矚。況生同梓里。獨弗窺鳩巢。爲借枝。羅吉連辭橫構。而不爲動。可謂骨鐵錚錚者矣。孫承宗謂其立朝忠厚正直。能見事於蚤。定謀於猝。衆默獨謬。衆智獨愚。衆佻獨沈。衆遲獨敏。知言哉。余謂非神識堅定不及此。



明書卷一百三十六

列傳五

孝義傳一

史官論曰。君子樂道人善。至於孝子悌弟。貞朋烈士之狀。往往播於街談巷說。耘夫牧豎。拱立而傾聽。婦人孺子。留連而隕涕。不必述者之爲悼史。與稱說者之爲君子也。嗟乎。天性之事。出於至誠。入於無間。理塞幽明。而精通玄感。豈不信哉。予考史傳。必列孝義。以其爲王事所浹。一代人心風俗所著。觀風者必採焉。然吾觀王者有作。禮備樂興。猶虞虞不敢言符命。而醴泉甘露。時流荆蓼之庭。擾鹿馴鳥。每聚墓廬之側。是匹士得天。盛於王公大人。而王公大人。或求一事之幾於匹士而不可得也。嗚呼。豈不偉哉。

廖欽字敬先。吉陽人。自少強學。明毛詩易書春秋。洪武三年設科取士。與弟敬存同薦上。有司不偶。輒歸。以事親講學爲務。明年例取至京試。才學優等。授河內縣丞。比至。一以忠信導民。未幾化其俗。河內西北要衝。往來絡繹。民疲供給。以祿入助民爲費。會稅務侵匿。課錢事覺。連及累年收稅之人。省臣督責甚急。民逃匿太行山。欽爲言曰。民竄矣。急之則不可得。盍少緩焉。與我以期。不效。併責我。省臣曰。諾。就以委欽。欽求侵匿人姓名及錢數。榜列於市。且潛使人告其速來。保無他。民素信欽。咸奔走而集。惟恐後。未及期。

錢足公私不擾。欽言於省臣曰：錢既足，民得無罪乎？曰：然。曰：何不許其自首？省臣從之。民獲無事。他郡械繫者不絕於道。民曰：徵我公，我其得免乎？八年秩滿，調吳江丞。素繁劇難治，抵任多惠政，民信服之。有隄護田數千頃，久爲水所齧，田萊淤喇，迷勢家相爭奪。事聞於朝，令官修築，期迫甚，同僚皆以他事避去。欽獨怡然任詣隄估工費，召民諭曰：隄成爾享其利，不成我受其禍。於是民私相戒曰：我曹當戮力成之。毋俾我公蒙害。至期隄成，秩滿既去，適河內舊虧課錢三千五百文，典守者指以誣欽，亦不辯，遂受謫。役作鳳陽，河內吳江之民來助役者千百。既而釋歸，杜門誦讀，鄉中無賴子，搆詞以誣欽，兄弟俱逮下獄。欽語弟曰：我與若萬一有不幸，其如老親何？莫若我受辜，爾得歸事親，俱溺無益也。弟曰：我當受之，留兄以事親。欽曰：兄可以蓋弟，弟不能掩兄，乃相讓於訟庭。主者惻然感動，由是弟獲免。欽竟謫戍富峪，數年以老病還。嘗經河內，休於途，民見之曰：是我廩父也。欽給曰：我商人非廩，於是聚老少爭識之，乃羅拜。欽不能隱，兢持酒殺相慰藉，留信宿，各持縑以遺之。須臾，哀數百匠，欽辭不受。民曰：父有德於我，欲報無所，今父幸涉我境，持此以報父，願卒受之。欽曰：我何德於汝？縱汝德我，何不愛我以德乎？苟以所贖爲可受，則昔之所爲，不過沽名，以觀今日之利。民益懇請，欽揣知民意，堅夕遁去。

林駟，字宗道，以字行，改字良御。先莆人，父寶，字惟賢。元末游漳，因家焉。讀書好古，家貧爲吏，不私人一錢。民有冤者，百計伸之。後生駟，少亦試爲吏。太守胡宗華奇之，勸令業儒。因究心得其旨要，奉父隱程溪。洪武五年，十年再徵至京，懇乞終養歸。徧訪賢哲，從趙彥進遊。趙蓋宗程朱之學者，依三年歸，以教授爲業。

立家法。別男女。黜不順之婦。修冠婚喪祭禮。非其義也。一介不取。父喜。且曰。吾爲吏三十年。閱居官者。始未嘗不皎皎著廉聲。久之窺其微。純白者鮮。將如是。真吾子。大吾名矣。十五年再徵。辭不獲。赴京。同召者八千餘人。對策第一。上命學士詹徽廉德行科。復居第一。賜宴內殿。與同時趙肅申甫。皆以布衣入侍。尋拜監察都御史。時有狂人入御座。詔求直言。陳格君心。澤民物。二十事。言甚切直。上嘉納之。每侍食。議大政。因論同列邵質參劾乖政體。上兩釋不問。質黨給事中董希摘疏中字激怒上。徙滇南。至蜀之瀘州。會大赦。常歸。郡縣以未得旨。留滯之。上忽思之。召入見。使者抵家不得。御史臺檄其父詣朝。令徧覓。至蜀。聞陵病卒。上思益甚。乃審像。詔取鄰居者旁求之。給路廩。且面諭曰。得宗道人賞千緡。時門人陳拯在遣中。遇駟於播州。距父沒二年矣。至渝州。拯始以告。被髮號慟。行奔喪禮。至武昌。囑拯誌父墓。悲不自制。赴水死。時洪武二十一年也。學以禮爲宗。修於身。教於家。及於鄉。皆以禮。故鄉人號爲愛禮先生。其教人內謹心術。外謹威儀。言詞日記功過。歷相考驗。反覆開諭。必使有所感悟而後已。最惡釋氏。欲驅之使不立於中國。陳北溪晦菴高第弟子也。產於漳。駟謂北溪之學。皆自庸行庸言。樸實頭做去。故其學一本於躬行。趙彥進則謂駟少講明而多篤信。輕體察而重力行。林雍稱駟事親至孝。扶植綱常。陳真晟稱其執禮化俗。大有功於名教。文集十卷。行於世。子嘉。趙府長史。

陳雅言。永豐人。父立本。興元路學正。雅言生年十三。祖可權常閉戶校書。偶至其傍。祖探架上書與讀。聲琅然。無一字齟齬。數過卽能背誦。稍長。授詩於傅翠微。授書於徐江東。二人見其穎異。咸歎賞之。肆力古

學經史子籍靡不蒐究。一夕夢人授以竹筒丸藥，啗之。由是文思大進。元末以茂材薦，弗就。乃著潛夫擬作閔已寒松二賦，見志。雖居亂離，不廢著述。已而喪父，捨擯中殮葬，必盡禮。明初平江西，郡縣設官，修舉廢墜，以雅言典教永豐，事屬創始。戶口土白失實，供需百出。縣官束手，求雅言爲規畫。公私稱便，建廟學，成祭器，招致賢俊，以就教育。後皆成材。收其族子之孤寒者，撫而訓之。有貧者衣食之，父母妻子殉，無以殮者，又具棺衾爲葬之。行之數年，無倦。民有負官租，至三年不能輸，督逋甚急，鬻其一女爲貸所逋。女得歸，改嫁士人。郡守屢薦，輒以母老辭。母年九十四，乃終。寢苦枕塊，三年衰毀，喪明。服闋日，草便宜十五事，欲上，未行。疾作，洪武乙丑卒。年六十八。

鄧學詩，字重雅，吉水人。有孝行。元季之亂，寇至恣殺掠，母劉老病不能行，負之走，避隘巷空舍中。踰日，寇窮索獲之，解所懷金得免。繼復有獲者，求金盡矣，斫之已斃。繼又有寇至，見老母哭，傍甚哀，憫之。予善藥，傅創，又解衣覆之。久，迺蘇起。負母走避他處。道遇渠寇，詢知其儒者，憫之，予酒肉。又自爲詩，令和嘉之。遺其下，導出城，使遠去。少好學，負材具有用世之志。明既定天下，御史劉昭先知縣事，以材舉江西行省，留爲宣使。慨然歎曰：士當局促效奔走人階庭下哉！謝病歸，尋復舉於朝，授固陵稅課使。乃曰：乘田委吏，可以行道。廉介寬平，商賈爭出其市。所入貨羨，舊額數倍，秩滿，徙平陽。持已愛民，如固陵。甫再歲，目眚致仕。歸，自號疾退子。耿介修潔，氣岸軒豁，不屑意生事。爲文章，長於詩。蚤喪妻，無子，旣罷官歸，輒貧，無侍養者。是時里中故人親友，往往慕其人，與其學。爭延致之，則挾痾童日往來。時爲歌詩以自適。官司皆知而禮

之數出直言以裨其政之闕。人曰：廢於官，而其所適於中者，猶不廢也。歷三十餘年，向之故人親友，或死或遠，出里後生，雖以士名，有不能究知平生多悔之。學詩不屑較也。年八十餘，氣力益衰，貧益甚，冠帶垢弊，十數年不得易。衣薄款款，寒冬不得出門戶。然其所操執益堅不屈。人片語不合，拂袖去，不顧。不肯一毫脂韋，渙恣徇人，以求所欲。建甯陳士希爲縣文學，獨愛重之。官滿將去，念將無以爲終也，爲備斂葬之具，適去。自士希去，知者加鮮。未幾卒，有紫雲覆屍上，閱旬日而如生。人咸奇而葬之。

唐豫，字用之，南海人。父奎，字景文。洪武初，鄉貢，授增城教諭。博洽羣書，鄉人號爲唐書廡。滿策寇至，被執不屈死。有龜蜂集傳於世。豫生而穎悟，少從翰林典籍孫賁遊，作詩文有古風。性剛介，交友盡義，痛父死非命，作蓼莪亭寓感。每日再至其中，東望灑泣久之。蓋其葬所也。學者卽其號稱爲樂濟先生。與東臬周祖生、南軒周祖念、節菴劉子羽、芸菴何淮、素菴劉子高，稱平步六逸，皆德行醇謹。衣冠嚴偉，爲人所欽。酌定鄉約，人皆信守行之。輸公賦，補尺籍，必遣少壯當行之人，禮遵文公，必敬必戒。子弟教以孝友，睦於親族，鄉黨讀書學文，毋令侈衣冠，博奕飲酒。鄉立爲甲，譏其出入，與所行事，卽有奇喪，聞之有司，子變有文行，母替不能自食，壁晨夕飲食之。徧求醫，母目復明。人謂孝感。一時公卿莫不敬重。參議陳曾待以賓禮，及改太常，執手別曰：「卿吾三益友也。」壁動循禮。大暑未嘗去衣冠，訓誘子弟，端立正坐，出入規矩。然後授以句讀，或見以爲迂闊，曰：「文藝末事，不收放心，何以受教？其敦行如此。」正統黃蕭養之亂，避寇佛山，畫策賊不能入，皆有集藏於家。

王順字性之義烏人幼嗜學嘗從許文懿受學讀書必見之躬行里有大鼓湖澗水灌田五千餘畝歲久益圯天稍不雨田咸作龜拆民不得蒔順卽倡興築之約田爲輸作有差而自出布錢鑿石作水門視時蓄洩民賴其利朝廷營建宮室徵木石工於郡縣縣胥緣爲姦利卽老幼廢疾不任役者請悉籍甚者捕比鄰以代順白縣覆實而新其籍有徵發按籍輸役之村疇疾急不能致善藥順儲峙以待其需鄉閭有單窶者出粟賑貸沒給楮積瘞之逋錢久不能償焚其券又以爲移文易俗必本於學乃建書塾招良師會鄉族俊秀俾子孫與共學月且十五日具觴豆延父兄列坐左右立諸生堂下而自正衣冠於中以孝友睦嫻之道誘掖飭導之官知其賢凡婚媾貨產之訟往往下順所調護之片言取決不復重有辭縣初定田賦科由之籍請順鉤較諸宿弊盡削順欲進均賦役之策會病卒素服而臨葬者千餘人大雨中皆爲嚴立縣官嗟異之順樂易未嘗有憂色好賢樂善通周易每鄉人飲酒奉律令每爲人解釋之閑居無事焚香鼓琴以自樂云

潘樞字景嶽鄱陽人元末吉安爲劇盜李道明所劇安福州屠掠尤甚明兵下江西李道明遁去以薦擢爲安福通判署州事舊有俘略男女數千官軍將奴之衆無敢言樞聞曰此輩何罪王師如時雨將平天下而反累平民且及其孥乎白於主帥鄧衡公請一切釋放衆皆憤憤鄧獨欣然令騎兵大索曰敢匿者斬乃得出自設糜食之婦女稍黠者俾以麈土澆而衆卒議乘夜來劫樞知之授以計曰脫有宵儆當同聲大呼已而果然衛公驚起擒首惡者鞭之乃已因度道里遠近次第放歸無家者與居傍縣者召其戚

屬辨識而歸之。大軍遠戍安福者僅五百，而降卒居半。潛與李寇通，夜抄略爲姦利。民訴於庭，懼變作。如所失償之，日撫振賑恤，漸以完實，而卒終不悛。引寨丁二萬，鼓噪南下，知不可守，開城門，縱百姓避寇。詣府乞師，與賊大戰，敗之。州以復完，已而徐達以大兵至，走韓門，獻計見用，進攻永新，轉餉不乏。戊申，改州爲縣，以爲主簿。前後九年，治爲江西第一。癸丑，召赴闕，未及用。卒年五十一。父希古，有文學，推善易數。號東湖適士。一日病疫，將革，妻胡氏拔髮祝天，期以身代。翼日愈。後五日，胡氏果終。東湖遭大亂，誓不受汙。後遇寇，將加害，樞及弟槐楫柄爭代死，賊憫而釋之。人作五義士傳云。

朱煦，仙居人，世儒家。母楊性嚴，諸子稍不如指，笞撻之。煦事之盡恭，不致母怒。父季用，薦知福州府。洪武十八年，詔天下盡革今歲以上積歲官吏爲民害者，輸作城役。季用任僅五月，亦以例逮。日用錢僱役數十緡，季用又病痢，被楚不能上，謂煦曰：「吾資力豈足任此？吾旦夕死已矣，無爲汝累。」汝第負吾骸歸葬耳。煦惶懼，不敢頃刻離左右。復戒二弟熊羔共守視之。時在役告枉，令嚴甚，而戍極邊者三人，抵極刑者四人矣。煦奮曰：「吾無術以脫吾父，訴不訴等死。」萬有一父緣訴獲免，卽戮死無恨。父寮同役者交阻不聽，具告枉狀上。上悲傷其意，赦季用復官。例復官者十四人，皆拜季用謝曰：「微君有孝子，吾輩骨肉皆爲城下土矣。」已而煦感疾死。季用傷煦病亦死，或者以煦冒死得免爲幸。又以父子俱死，王叔英憐而傳之。其時有陳叔弘黃巖人，與鄉人讐，讐人以賊告弘，罪當死。其子圭，上狀通政司曰：「圭爲子不能諫，父陷不義，圭罪當死，使父得自新，誠不勝至願。」通政司以聞，上大喜曰：「不意今日復有孝子，宜赦其死。」俟天下百官朝。

親將播告之爲天下勸刑尙書開濟奏曰罪有常刑不宜屈法以開僥倖之路遂聽圭代而謫其父隸兵雲南聞者皆恨濟之酷王中母沒廬墓所哀毀致瑞泉之應李英力貧養母冬必溫衾席母患疽吮而愈母病帶下取糞嘗驗易劇母卒廬墓三年周炳事母焦至孝母病篤禱天求代而愈後復病思食瘠肉求不得忽一豨入其家得以供復愈趙讓母沒廬於墓虎猝至讓不怛虎莫敢傷弭尾環繞而去盜六人夜入廬見其哀苦反遺之鈔卽埋於地不用給事中魏敏以母病乞歸未至而母卒敏卽走墓所哀慟水漿不入口者五日廬墓三年國子生張翼父母卒皆廬墓三年慈烏數百旦暮悲鳴暮樹亦三年鈞州人張宗魯少失明長遭元亂負母路逃難妻掖之以行歲饑賣卜以養妻采野蔬佐之天下定奉母還竭力爲供母卒仍求其前母三人遺骸合葬之父墓詔同表其門

錢瑛字可大吉水人祖本和號梧岡以篤行稱瑛生八月而孤稍長穎敏年十三中省試元亂奉其祖及母崎嶇避難最後自雷州奔廬陵之李坑路極險盜又追及之梧岡被鎗不死縛之瑛聞卽昌兵刃奔訴乞以身代盜并繫之瑛訴不已梧岡亦哀告無子惟此一孫情極悲慘賊憐其義兩釋之瑛方脫時其母尋亦被執而妻張翳伏叢薄中窺見賊已執其姑卽自出迎謂賊曰姑老矣請釋姑而縛我賊熟視良久旣解其姑復縛張旣就擲所攜袖中雙鞋與其姑訣曰婦無用此矣且行且睥睨其姑稍遠卽罵賊不肯行賊持之急益大罵攢刃解之明兵定江西有司知其賢凡三薦以親老辭親旣沒終身悲痛梧岡故所築樓瑛每一登輒流涕因名之曰思樓爲人豪健慨然以氣自負有劇寇殺人有司憚不敢捕以屬瑛立

擒殺之。一子曰遂志。中進士第。官山東僉憲。

孫維中。濰州人。世爲農。長身美鬚。朝耕暮讀。善談古今事。聲譽也。愛古名臣言行錄。能背誦之。爲甯海州吏。尋貢益都府。會父琳卒。皇皇不欲生。既葬。結廬其側。苦塊曠野中。深夜月冷。哭聲依依。隨悲風遠聞。人多爲泣下。日啜菽糜二盂而止。晨起掬雪頰而已。輒詣墓前拜。久之。手足皸瘃。形容憔悴。或勸其還。哭不對聞之。縣令戴友諒。勿之信。夜半攜二蒼頭往廬之。壓廬而聽。孝子蕭然塊處風雪中。聞足音。遙問曰。暮夜欲何爲。戴歎息。上於部使者。請旌。妻劉氏從。惟中之化。惟中居廬三年。劉亦居壘室。不近酒肉者三年。子尙志。業儒。爲禮部主事。

祝大昌。字公榮。麗水人。色養父母。意所欲。候知之。不言而事集。一日不見。皇皇如失。得一味甘。雖百里外。必歸薦之。乃敢食。母疾。晝夜煉藥餌。奉飲食。衣久不解。蟻蝨叢生其間。走禱羣祠。且泣且禱。語不成聲。見者爲墮涕。及母歿。號慟幾絕。諸復襲襪。綴殮奠。一衷於古禮。會場人不戒。火起勢烈甚急。莫能救。大昌伏母棺。號慟誓與柩俱焚。火忽自滅。既葬。乃肖二親像於堂。祀之如生存。事兄公亮如父。家事大小。必關白而後行。公亮出。大昌不敢中席而坐。弟公直歿。號哭頓仆。久乃蘇。孳孳以同爨爲念。請於公亮。建家範數十則。令子姪分任其事。視勤惰而勸懲之。莫敢不率。每旦序食堂上。氣象雍睦。不聞人聲。三世一體怡怡也。或問之分財。大昌撫膺長慟。痛自責。以爲吾不睦不友之過。故處人稱大昌孝友無間言。大昌風儀岸持。善談史。上下數千年。治忽幾微。加指掌。尊賢重傅。平心率物。未嘗以好惡有偏徇。故舊貧窶者。周

之死給之棺。歲儉輒出粟下糶。惠族孀。下及閭井。鄉人咸德之。以薦徵辭。隱居而終。

瞿嗣興字華卿。常熟人。父達仕元。爲蘇州提領。嗣興生而純愨。事親至孝。母患癰。癰潰。常長夏。臭穢不可近。爲燻湯洗滌。執扇驅蚊蚋。晝夜不休。旣又罹積氣疾。百藥不治。乃割股肉作羹以進。母不食。已五日。忽盡啖之。氣疾如失。一日母思芟食。時芟始花。求之不獲。凡川有菱者。解衣入水。歷覓之。腰脛赤腫。號呼顛神。俄得三菱。人以爲精誠所感。旣而貧益甚。歎曰。事急矣。株守不變。如父母何。移入蘇城。稱貸富貧。質遷分息。悉籌計。橐大裕。凡父母所欲。無不致也。宅心仁厚。單窶者必思賑給。而不欲其知。有王姓者。素賢貧。臥疾不能興。難初鳴。嗣興往以錢二十緡。投窗隙而去。民有告糶者。鶉衣百結。知其貧而賢。嗣興受其直五千。復伴問曰。吾性多忘。若欲糶十千耶。遂如數與之。有負販者。至價高下。嗣興一聽其言。不與較。家人怪之。曰。彼竭漢血以逐什一之利。寧能足吾用乎。歲大儉。來依者甚衆。嗣興擇勞近舍舍之。會厲氣作。病者相枕籍。每晨躬攜粥藥。撫視卒賴以全。方寒朝出。道中拾遺囊。悉歸求者。未幾又有忘契券白金者。見而蹙額曰。白金固易致。質劑乃資業所憑籍。其必起爭端。密偵而還之。其人勢家奴。因失主物。畏幾欲死。謝曰。三尺微命。皆公所賜也。嗣興雖不讀書。其篤行有士大夫所不及者。晚喜浮屠。讀其書。豁然有會。復閱北溪陳氏性理字義。旣解其要。曰。聖賢之學。蓋如是。因戒其二子懋。莊曰。我少不學。至老而始悔。若等勉之。乙卯病。恐馳慮。畫圓圈揭屏間目之。卒年八十四。莊官至參政。

邱鐸字文振。祥符人。通儒。兼習醫家言。聲動一時。至正末。父誠爲湖廣儒學提舉。鐸侍母馬留吳越。欲御

車往從。江右兵大起。路梗。避地四明。及歸。職方復奉母至建康。每向西泣曰。武昌有來者。庶幾知吾父之所在乎。已而其父至。鐸賣藥市中。給供養。驕然忘其貧。未幾。弟鈞爲上虞巡檢。鐸與父母皆赴上虞。母疾。鐸晝夜泣禱。及沒。哀慟幾絕。葬鳳鳴山。哭曰。鐸生也。咫尺不離吾母。今逝矣。可委吾母於無人之墟乎。山常白。馬上妃二湖。聞人跡。罕到。白晝虎狼旁午。結廬墓側。朝夕上食。如生時。寒夜月黑。悲風蕭颯。如臨鬼神。恐母岑寂也。輒巡墓號曰。鐸在斯。鐸在斯。虎交跡廬外。聞哭聲。輒避去。會稽人異之。稱爲真孝子云。先是。鐸在四明。從祖父母居。亡者八人。貧不能自存。咸迎養之。死皆返葬。先塋。人以爲難。其姑適河南匡氏者。年十八。夫亡。誓不再適。鐸養之終身。凡二十年。如一日。其制行峻絕。他皆類此。

伍洪。字伯宏。安福人。資稟清純。爲人剛介。幽居僧舍。力學二十餘年。慨然有志三代。元屢聘不仕。洪武三年。庚戌。定以經義試士。慨然曰。道可行矣。以春秋舉省試。明年。登吳伯宗榜。進士。授臨清丞。會有族叔任憲司。改績溪簿。有惠政。奏最。陞上元令。上察其清。將拔置要職。適父性中。總邑賦。輸於應天。病卒。奉歸。悉做禮制。既久。或趣之仕。辭曰。烏有母老而養不顧者。況吾志亦小試矣。家富丁繁。每欲效張公。藝以齊之。諸弟或有異同。曰。是吾德薄。強之終不安。且生他隙。於是隱居梅溪。養母。至於舊積。憑弟自擇。惟拾一二朽敝之具。庶弟仲舒甚稱。母子子無可依。爲子視之。及長。割所有。俾獲成立。洪武丙寅。異母弟伯讓得罪。出亡。上遣官校擒之。弗得。趨所居。執其母復命。公哭求代。母曰。汝往必死。莫若老婦當也。親故諷之。亦然。曰。母雖步。子卽自死。敢以弟故。累老母。全己身也。官校頗難之。奮然曰。罪固死矣。以子代母。以兄代弟。

何不可之有。就繁而行。竟死。人皆悲之。詩文溫雅。見李忠文於童子時。奇之。動必教以正。逮別。送者數百。無不涕泣。神色怡然。進忠文等曰。吾爲家也。子異日爲國。勉之勿自怠。

曾鼎。字元友。太和人。祖懷可。教授。稱鷓江先生。父思立。篤學不仕。稱竹間先生。鼎性孝謹。元末紅巾亂。奉母走避。寇追及。執其母以去。跪陳母老無供養者。寇怒。揮刀將殺其母。號泣以身翼蔽。寇益怒。連砍其頂肩及足。流血被地。而控母不舍。寇帥至。憫之。送其母子入營。調而藥之。得愈。資遣送出。江西行省全普菴撤理。辟爲濂溪書院長。迎母就養。全死。奉母歸里。經兵焚室。廬皆燬。縣尉楊爲搆數椽居之。榜曰曾孝子廬。母歿。哀毀盡力喪葬。江西平。辟典課稅。人稱廉平。洪武三年。改州爲縣。知縣劉昭以明經舉。辭。教授鄉里。鼎眉宇秀朗。潔白如玉。儀度偉然。博學彊記。專禮經。工詩。擅八分書。範銅爲小印章。渾然古雅。精康節數。占筮奇。中人皆稱之。二子迂頑。

陳思禮。字用和。鄞人。生七歲。父德祥歿。母石氏誓節自守。督思禮學甚嚴。雖大雪沒脛。必使挾冊往。或少懈。泣對之曰。爾父爲名儒。惟汝一子。吾所以忍死鞠育者。賴汝有知。取法成立也。奈何背之。思禮皇恐請罪。肆力於學。每夜分不休。母卒。思禮被髮狂號。曰。旣不侍養。又未見成立。顯吾親。何以生爲。於是求死。家人百方喻解者。久之乃釋。服闋入郡庠。母先爲擇婚。石氏至。是年二十四。不娶。曰。娶婦爲養姑也。失母又焉用婦。親友交責之急。乃得成禮。合卺後。號泣凡七晝夜不絕。婦亦化而隨之。益勉學不廢。洪武六年。貢入太學。以如在扁其堂。劉基陶凱皆重之。贈以詩文。稱純孝焉。

毛聚字德玄掖縣人幼事繼母秦盡孝寇至衆驚走秦老不良於行聚獨侍左右弗去寇問曰爾寧不畏死耶聚泣曰母老安敢自求活寇不忍犯後避地崑崙山會父病疫夜渴求酒飲山深多狼虎弗可行聚徒跌出山乞酒還飲父愈與兄弟分財恣所取而受其棄遺者長兄葬方及城訛言盜至人皆懼奔匿聚曰兄柩在忍棄之乎卒掩壙而還再從母殯城隅遭世亂人取其輓殆盡聚買地瘞之族女六人貧不能嫁皆出資爲妝族中不克葬者十餘喪皆爲葬之歲食有餘粟則推以濟鄰里貸不償者焚其券有過宿者且遺錢數百緡而去追還之鄰人耕侵其畔或以告聚曰安知非彼地耶其居家待人無長幼皆以誠久而人咸信之稱爲善士生二子蔚炳蔚生二孫紘縵皆以道學名紘由國子生爲禮儀司序班吳宗元字長卿諸暨人宗元孕十四月而生幼穎發屹如成人蚤失父事母甚恭母病夢白衣人謂曰汝壽止此今以汝子孝特延一紀疾果瘳以薦辟太息曰母耄年得力田爲養足矣何以仕爲固辭母卒號慟幾絕久之每語及輒嗚咽流涕如新喪已念父母沒惟教子孫毋析居乃可以繼先志詣浦陽鄭義門謁焉得其家範數千言以歸力遵行之庭無間言和氣所感家有犬病足子銜食哺之製家教書訓飭凱切洪纖無不及而惠利鄰族之事居多性恬沖於物無忤貌澗澄山聳出言不繁咸中肯綮其與人熙然如春頗嗜音樂自造短簫長可六七寸遇風日清美輒吹之聲振林木晚歲視聽行步如少壯歲時及卒期功總麻且千指就位而祭州里更相弔十數里哭聲不絕

朱環義烏人赤子時無兒啼聲仲父桂無子養爲子已桂生子璧及宗周頗疏外環環事之彌謹服勞事

不知有寒暑也。時境內多盜。白晝斂人財。桂有金數百兩。與璧謀瘞窖中。璧夜發之去。復誣環。桂怒。褫環襦袴。立之大雪中。一日夜。環涕泣謝過。終無一語辯其冤。桂虐使日甚。環五六年間。數瀕死。恆順受無怨言。桂見。遇璧益厚。璧子慶多暴。入獄。環竭力營救。卒免之。環有子曰元。女曰壽。元字子初。盜起。縉雲。置砦峽源山。將劫環及兄。魁奉之爲帥。環莫知之也。元聞。遽歸走白。二父當速避。環老憚奔走。又謂亡是事。不聽。涕泣請。又不聽。罵之。元度賊縛翁去。誰爲白翁。非抗盜者。必殺盜。庶有名。伏垣下。賊偵騎至。斫殺。梟其首。以血手入示父。負之去。未幾。台賊既獲。環亡。奴素有怨在焉。誣以通賊。遣之金。逮下獄。時所司方患盜。凡盜獄所連多論死。會元病。不能出辯。籌已嫁。適歸甯。元視壽泣。壽曰。昔緹縈能救父命。我獨非人耶。乃走告法曹椽馮聚賢曰。妾父無罪。亡奴欲誣以不道。儒事不得直。一家枉作泉下鬼。聞君素長者。獨不能相活乎。言訖。淚如雨。馮怒曰。此事豈汝女子所知。壽哀祈益切。馮爲惻然。良久。揮壽去曰。爾但歸。吾知所處矣。明日使吏椎碎奴口。不果誑。環喜讀書。嘗舉元進士。入明不受辟。年八十六卒於家。

危貞昉。字孟陽。臨海人。父孝先。洪武辛亥進士。坐法謫役浦江。貞昉時爲諸生。聞之。奔訴郡守。願代之。守以其名隸儒學。難之。貞昉號泣曰。人孰無父。奈何獨沮於我也。得如請。卽日上道。詣闕。上疏曰。臣父陵川丞孝先。不幸詿吏議。輸作大江之濱。筋力向衰。不能執事。而大母范氏年九十。旦暮念之。恐染霜露之疾。終天憾。或及其身。臣犬馬齒方殷。願代父作勞。使其歸養。雖死無恨。聖天子以孝治天下。惟哀矜焉。上從之。貞昉乃欣然改服就役。然體廑弱。不勝負任。苦越七月卒。人皆憐之。貞昉通周易。能詩。性剛直。讀古忠

孝事。斂衽久之。且曰。使吾生其時。亦當若是爾。遇交友惠難。蹈湯火不爲利害感。卒年二十八。

姚玘。八歲好讀書。貧弗能自給。從里中大姓塾師就讀。業成。元季亂。奉母陳避於野。遇河不得渡。母泣曰。吾聞古貞烈以辱身爲死。兵至。吾誓不受辱。不如死也。遂自沈。玘急挽不及。與俱溺。頃之負母出。而母子復生。數遇盜。中流矢。佯死。伏屍間得脫去。奉母過湖。已爲淮兵所得。疑從苗中來。縛送溇上軍。辨得白。將署爲部史。朝夕思母不置。泣以告。許之。得上舟。載母還。母病思魚食。暮夜無所得。有烏攫致白魚盈尺。以爲供。後兵息。臺臣聞而辟之。以親老辭不就。人益高其節云。

盧宗齊。字思訓。常熟人。元時祖安澤爲德清令。入明。以鄉兵統諸閭長。坐法當死。縣錄其父德良與兄某。宗齊私念。時法嚴必死。父老。萬萬無就逮理。兄冢嗣。且未有子。吾幸有子。得代父兄死。含笑入地矣。卽挺身詣吏曰。宗齊精力彊。久任官中事。父兄無所與。吏不疑。按訊一一引伏。獄具。洪武辛亥夏六月斬於市。顏色不少變。年二十二。知者無不哀之。爲具斂。以屍歸其家。

崔敏。字好學。襄陵人。生四十日。其父仕元爲縣竹尹。父子不相知識。踰三十年。獨依母氏。泊兄居。幼勤學。壯而彌篤。元末兵亂。與母及兄皆相失。子然獨居。思其父母。辭室家往。徧求之。入秦不遇。乃入蜀。抵縣竹。其城邑數經兵亂。奔爲荒落。詢遺民。求父邱壠。無一知者。乃獨徬徨叢棘間。仰天號慟。頓絕而蘇者數。既無所見。復歸秦。行次鳳翔野。遇其親戚。處有知者。訪得其祖父葬處。卽啓殯。負其骸以歸葬。人皆稱曰崔孝子。

劉謹字惟勤山陰人洪武中父謫戍雲南伯兄又以督運死京師謹六歲輒知痛其父一日問家人曰雲南在吾越何方家人以西南指之輒朝夕向之遙拜年十四矍然曰雲南雖號萬里天下豈有無父之子哉治裝爲尋父計時滇夷初服道路荆楚衆勸勿行卒不能已歷六月抵雲南艱辛萬狀遇父於逆旅相持號慟行道傷悲俄而父患瘋痺即欲以身代戍冀得歸父而國制戍邊者惟十六以上嫡長男始得更替於是復歸年十六往不能代於是又歸悉鬻其家資以往會赦三往返卒歸其父父歸家貧甚謹力供菽水晨昏必極其歡督學廉使張倬聞於朝旌之後子孫相繼科第多貴顯者人稱天道云

楊敬歸德人父晏洪武間死於陣時敬十歲聞訃哭踊每思求父遺骸不果乃取衣冠葬於先塋事母艾溫清以時服食有節凡母意所向無敢少違暇則讀經史開家塾以授生徒每閱戰陣事輒流涕不已時人以王褒擬之後母卒敬哀毀踰禮方殯在堂而西鄰不戒於火將及柩敬仰天大哭俄風反火息鄉里異之事聞詔旌其門子愍舉人任知州

顏琇字季栗吳人洪武初父戍鳳翔以母韓行琇獨留久之聞母歿即奔赴負母骨歸行數千里未嘗停於地寢則皮置之宿其下涉則戴之泳焉父既放免奉事尤謹旦夕自洗廁膾其父勞苦之云幸不乏食又何以爾爲令人趨代竟不肯父卒日夜號泣水漿不入口者五日不勝喪死子昌亦有孝行

胡剛字惟輔新昌人生有至性洪武初其父謫役泗上以逃役當死敕駙馬都尉梅殷監刑時剛往省代役立河上求渡聞之遂裸跣泗河而至奔走哀訴請以身代言與淚俱情甚懇迫梅憐而奏宥其父同坐

者八十二人俱免死。淮人至今傳誦云。

鄭氏金華浦江人。出唐宰相滎陽浦江白麟之後。於藝爲山邑。俗樸茂。力田作。梁貞明初。縣人何千齡四世同居。宋瀆熙間。鍾氏同居者三世。至乾道間。鄭氏有名淮者。自滎陽遷邑。之感德鄉居焉。去白麟十九世矣。淮生照。照生綺。綺字宗文。通春秋穀梁學。撰合經綸數萬言。事父母孝。父非罪逮。當死。綺上書郡守錢瑞禮請代。得白。母張氏病風癲。綺保護如嬰兒。每適廁。必抱負就之。三十年不懈。數薦辟。不仕。卒。賜號冲素處士。當處士世。實始創家規。勅子孫無異。綺生開。開生運。運生政。政生龍游。承德珪。青田尉德漳。敦睦彌固。爲仇家所傾。兄弟相爭死。德珪竟以計先死之。子文嗣。文泰家益昌。蓋同居六世。歷二百四十餘年。元至大四年。詔旌其門。順帝至元二年。復其家。初文嗣既卒。德璋子太和。坐堂上。羣從子姓皆盛衣冠。鴈行立。左序下。以次進拜跪。奉觴上壽畢。皆肅容拱手。自右序趨出。足武相銜。無敢參差。見者嗟慕。以爲有三代風。吉凶之禮。一遵古人所定。有家範二卷。使者余闕行縣。書東浙第一家。褒嘉之。太子聞其事。歎之曰。此國家祥瑞也。復親御翰墨。畀以鳳麟二大字。翰林學士承旨歐陽玄爲之贊。勒石子鉅。字彥宏。七世矣。方諸父主家時。日侍左右。操其權度。助大小之政。益能以義亢其族。與羣從傾誠。有周旋。畢得其懽心。比主家確守成法。內外政益治。鉅沒。從兄銘字景彝。次當主家。以母喪哀痛甚。衆弗忍請。至終喪。羣從固請。而銘先爲贊。塔於蓮塘。張氏盡籍所得。張氏田廬歸之。乃復還。已自念居於外者久。不親家事。從子潤賢。

能負荷。且宗子也。遂告先祠讓之。渭亦固辭。因虛其席者久之。銘受春秋學於吳萊。大義畢通。吳萊愛之。與相親如父子。然而銘與同門胡翰。宋濂。晝夜相摩切。肆力古學。早失父。事母黃至孝。黃素嗜鱖魚。必徧求以悅其意。會有疾。倉卒不得魚。力致之。藁香糝以進。疾遂瘳。奉諸兄如父。進退坐起禮甚恭。而目嚴毅。不妄言笑。不與人交。終日默坐。或焚香以銷世慮。臨事重然諾不苟。其文辭峻潔莊凝。絕似其爲人。卒年六十二。從弟鉉。字真嗣。主家政。方嚴有禮度。父病。適喪妻。不敢哭。強顏笑。進湯藥。後八日父卒。一慟幾絕。三日鬢髮皆白。或勸再娶。謝曰。鉉見後母。戕骨肉者多矣。忍令兒陷之耶。年未四十。竟不娶。家範益增。演修明之。家人翕然遵化。一堂之上。逾千百指。愛無不均。不知孰親而孰疏也。有家務。羣趨竝赴。雖甚勞不懈。不知其事非己出也。義浹仁孚。和氣充溢。過其門者神暢心怡。而鄙吝之萌。銷沮無餘也。凡食貨田賦。各有司者。出納雖絲毫。咸有文可覆。諸子弟晝趨功。夜聚坐棣華軒。講說古今。論理道。至更餘始休。雖貴仕若無。雖韋布色充然自得。子孫從化。孜孜執親喪。輒不御酒肉三年。卽童幼不識。塵市嬉戲事。諸婦惟執女工守教。不使與家政。內外甚嚴。僕使通命。不敢越堂限。家畜兩馬。一馬出一爲之不食。僕有施慶者。父死行喪禮如其主。蓋所感如此。鉉持正尙風義。善文辭。而於人有恩。出遊至燕。謁文安公侯斯。黃文獻公潛。方以文學重當世。皆折行輩與之交。論詩文或達旦不休。仲子泳。與從子深。同講授脫脫太師家。鉉上書陳時政。多採而行之。一時士大夫無不敬信。卽酣飲聞公履屐。未嘗不斂容也。故人子失官。留武林。貧不能自存。延其家十口來浦江。衣食且三十年。里中貧獨廢疾者。多養之終身。每夙興告饑者。

瑱門餉之不厭。元末兵亂，大將數統兵入境，皆戒士卒無犯樞密判官阿魯灰衆五萬，驟至劫掠，說以利害。阿魯灰愕問計，對曰：浙東據山阻海，其民柔順，撫而有之，使盜兵不敢東，爲朝廷障蔽，功莫大焉。阿魯灰不覺屈膝，致東帛爲謝。天兵取婺州，攜家避入諸暨。李左丞統兵至，歎曰：此義門也。躬爲扁鎗，事平遣兵護歸浦江。甲辰年七十卒，葬於諸暨州，以泳封從侍郎。浙江行省左司都事，渭字伯陽，文嗣之孫也。父鑑，義門第八世主家政，均平齊肅，有盜入林，僮往禦，爲所擊，僮妻往護，墜暨死，禁勿訟。官自殮之人，皆感化。洪武十年卒，年七十二。繼者濂，字仲德，號采苓子，美髯長身，貌肅而氣和，田賦推擇爲長，入覲太祖，識之。既與弟浦溲爭死，得宥。上問濂治家所以長久之道，對曰：守祖宗家法，不聽婦人言而已。上大稱善，手梨果賜之。濂拜賜，以手擎至額，出殿門終不食，懷之歸，畢剖分其家人。上遣人詗知之，歎曰：真家法也。欲官之，辭老不任。上生辰，捧香詣闕拜賀，勞之時，浙江巨室多以罪傾宗，而鄭數千指獨完，且食祿被賞，人以爲忠信之報云。上患俗習澆僞，益尊顯鄭氏，以風天下。會御史嚴震直有疏薦，詔拔其子弟年三十以上者，畢赴闕，召見擢用。其儀狀端正，識明敏，可用者官之。常選宮寮，濟爲春坊左庶子。同時有王氏亦善家法，上知之，選一人曰勲，爲春坊右庶子。久之擢濟弟沂爲禮部尙書，從子幹爲御史。濂自成童至老，言信行謹，事長撫孤，待昆弟接朋友，竭盡誠心。主家政十七年，卒年八十四。其王氏兄弟曰子覺、子麟、黃氏兄弟曰逢吾、逢昌，皆聞鄭氏之風而興起者。溲，字仲持，奇警有長才，貌魁偉。洪武十四年二月，有訴其家交通胡氏者，吏捕之急，渭兄弟六人爭欲行溲，曰：弟在其忍，使諸兄受刑，自詣吏請行。濂方以事至京，

迎謂曰。吾家長當認罪。湜曰。兄年老。吾自往辯。爭入獄。上聞召至。勉勞之曰。有人如此。而肯從人爲非耶。卽宥之。賜酒食。擢湜爲參議。上命舉有所知。以同郡王應等五人對。詔皆授參議。竝能其官。湜抵官吏民熟家聲。相誡勿犯。豪將病民。與爭可否。帖帖畏服。南靜縣民亂。誑誤者數千百人。部曲多掠其婦女爲奴。言於主將。縱去。兵不敢譁。商有二人遇盜。殺其一。而取其財。其一人得脫。訴於官。捕盜在獄。驗屍無有。公夜取盜鞫訊。因縛置於庭。匿吏案下。俾聽其語。夜半盜顧庭空無人。果私語。始知沈屍井中。明日詰之。驚服。人以爲神。十五年入京。卒。年五十六。洪字仲容。明初曹國公辟爲參謀軍事。已而薦入朝。爲引禮郎。轉江西行省照磨。有能聲。秩滿。改藏庫提點。未幾。同官有坐法者。辭累洪。累死獄中。妻石氏悲慟不欲生。吏議當配。石氏仰天歎曰。生爲義門婦。死則爲其鬼耳。吾夫已亡。豈使汚其身以玷旌門乎。遂絕食而死。事聞。太祖悼之。謂侍臣曰。此真義門婦。竝歸其喪。洎字仲宗。好學篤義。卽爭死入獄。病卒。太祖憐之。歸其喪。鄉人私諡曰貞義。子柏淵。字仲涵。與湜皆師宋濂。習舉子業。讀古文詞。有志濂洛關閩之說。濂亟稱之。謂其有聞於道。文冰潔而木茂。進未有量也。母病逾年。抱持終日不離側。夜則泣禱於天。請以身代。忽瞥患疽。不能坐。跪進藥。膝爲生胼。母病革。思食西瓜。旣食而卒。終身不忍食瓜。居父喪。絕而復蘇者數四。杖而後起。服雖闕。遇忌日哭奠如初喪。元季諸暨盜作。羣從子弟避東陽。遇盜。資盡沒。淵在金華聞之。泣盡持所服衣裝往分之。身泣寒不恤也。從弟澧與妻早夭。遺三女。淵鞠育長教。選名胄資嫁之。家族屬衆。卽有疾。不擇疏戚。夜三四起視。有死喪。匍匐身任。斬春王烈家燬於紅巾。與有族五十人。流寓浙右。館之數月。

而後去。同縣詞人貧不能養母。淵聞之。慨然曰。悲夫。吾卽欲養。其可得耶。厚周之。諸解衣推食。建渡濟物。甚衆。淵爲人。羸然不勝衣。而矩度峻整。神采卓然。於倫品則矚然如春氣流浹。不知秦和之襲人也。元季薦不就。明初聘以饋辭。卒年四十八。宋濂深痛曰。其事我不以師。而執子之禮。先子而逝。引徐仲車事。諡曰貞孝。所著有遂初藁十卷。子楷。鄭氏旣多賢子弟。源字仲本。剛介有志節。好施與。濤字仲舒。溫恭學多深造。元季以文學有時名。入經筵爲檢討官。危素稱南冠而北仕。德行當推濤爲第一。皆與宋濂爲金石交。漢字仲微。主家。建文四年詔旌其門。漢入謝。陸辭。日上御奉天門。親書孝義家三大字。題其榜曰。賜浦江鄭漢。而識以精一執中之印。燕兵旣入。有告建文匿其家者。遣人索之。先是廳事列十櫬。五貯經史。訓子孫。五貯兵器。備不虞。使者至。所發皆史。乃寘其半不啓。而榜以鉤墜暫輟。乃得無事。浦江歎美。以爲神實陰佑之也。

顧氏先金華人。後徙台。相傳以爲梁顧歎之後。南宋有知言者。通黃帝內經。治疾奇效。歲大疫。日夜囊善劑。巡里而與之。鄉人戴德焉。生子曰商卿。周卿。商卿故篤行。後以薦爲郡學官。明經講授。出其門者皆鞠躬君子也。鄉閭質平。周卿舉進士。爲奉國軍僉判。娶施氏女。裝甚設。周卿夜讀。割而假寐。施戲泚筆塗其面。覺而怒。旦卽出。再娶楊無子。會商卿卒。子幼。抱育之。商卿孫曰玉文。宋季亂。父申爲盜。得抱文頸求代。被劊得免。議婚應氏。已納綵。而女墮折其脛。或曰。盡已諸。曰。婚有盟。何可背也。彼體雖虧。行自若。竟娶之。應盡婦道。爲宗人女師。玉文子鎔。少穎稱神童。吳丞相堅以女妻之。大母葉與其母應。皆春秋高。鎔事甚

謹兄鎬。早世。撫其孤。有恩。念族屬衆。益闊疏。正月吉。與日長至。大合族。行聚拜禮。以親之。近者旬月。輒爲會。飲酒哦詩。情文藹如。疾必視。喪必弔。朝暮祇謁先祠。大寒暑不間。家畜二貓。偕孕。一旣產出。爲人所繫。未產者往乳之。及歸。同棲而抱子。人以爲和氣所鍾。鄉井孚化。有赴愬。不之公府。之其廬里。有陽歸。賑。田萬頃。當農功作。必繕築。以利里民。造版籍。履畝而覈。具書之。鎔性端恪。子性有不善。而質責不怒。而律身尤嚴。日暮。輒篝燈書。日所爲於籍。不可書者不爲也。年九十二而卒。蓋是時。天台多賢儒。自鄭氏外。若陳茂卿。吳清之。吳直溫。與聞洛閩之學。故人修士君子之行如此。

何潤。字子潤。吳元年四月。上海民錢鶴皋乘時未定。率鄉民鼓譟入城。執華亭知縣馮榮。場官李肅。袁浦等。將害之。潤挺身嬰其鋒。曉以大義。順舉家爲保。榮等得免。猶置獄中。知府苟玉珍逃之野。復還遇害。潤亟奔死所。收其遺骸。函藏哭奠。授其家還葬焉。府及屬司。入印皆散失。不知所在。潤物色得之。出私財購而納諸官。方倉卒時。老穉有不能出城避難者。無問識不識。悉爲寘之縣後堂。供其宿食。得免者甚衆。及葛指揮率兵來誅兇悖。潤復具羊豕酒醴迎犒於郊。費皆自己出。旣又率父老詣徐達。拜其殲渠脅從。罔治之德。一方以寤。馮榮深德之。將聞其事於上。固辭乃止。時咸稱何義士。

王世名。婺武義人也。年十七時。父良爲族姪俊。以爭屋毆死。孝子恐殘父屍。不忍就理。乃佯聽其輪田議和。凡田所入。輒易價封識。俊有所餽。亦佯受之。雖錙銖罔有不計。值封識者。私繪父像。自像帶劍侍。懸密室。朝夕泣拜。購利刃。銘報讐二字。母妻不知也。服闋遊邑庠。不專事舉子業。惟手書忠孝格言一編佩之。

已而生子甫數月。撫之謂母妻曰。吾已有後。可以死矣。母妻亦不知所謂也。一日。俊飲於其鄰。醉歸。孝子乃迎而揮其所購刃。立碎其首以報讐。故號於衆。歸以白其母。遂出其所向封識。租償餽值。及宿購首狀。赴邑請死。邑令欲白於上。曲宥以全孝子。孝子曰。此非法也。非法無君。何以生爲。遂不食而死。死之日。雲霧昏慘。烈風迅雷。大雨如注。迎屍歸。始開霽焉。遠近奔哭者載道。



明書卷一百三十七

列傳五

孝義傳二

張翼字飛卿。無錫人。大父存仁。負氣不羈。至元中。江南皆亂。有賣降授官。出入震耀。夜遇之。張目叱曰。斫頭賊。斫頭賊。既賣爾主。尚敢作此態耶。反足蹴破紗籠。其人恚甚。執送縣令。欲斃於獄。縣令命吐詞款。驚曰。此奇男子也。釋之。翼長七尺。面如頰玉盤。雙瞳炯炯照人。鬚髯奮張。見者爲之改容。然氣岸孤鶩。雖當時貴人。言不循理。必而折。不少貸。或毀疾惡太甚。則曰。天生吾口。所以出言也。當言而反訥。惡用尸爲。及張士誠據姑蘇。無錫爲莫天祐所據。與士誠相左右。號莫老虎。其所部髡黥盜販之徒。首纏絳帕。手執戈矛。巡門嘯呼。民情洶洶。恐旦暮有屠戮之慘。或謂翼曰。避寇路絕。奈何。捉筆大書邵堯夫聽天吟於屏曰。上天生我。上天死我。一聽於天。有何不可。鄰曲來問計。不答。指以示之。君子以爲知命。吳元年。丁未。大將軍達破姑蘇。達遣別將圍無錫。天祐猶欲聚亡孽固守。魏公達兩命使者諭降。俱被殺。達怒。傳令曰。卽不下。可屠其城。翼知事急。率父老往見天祐。抗言曰。吾民不見天日十二年。張氏已就縛。縱負固自守。將欲何爲。況未必能守耶。金陵兵有節制。櫻之者無不齧粉。一城生死。定在今夕。願熟慮之。天祐良久。擲帽於

地曰誠如君言。翼乃隄南城而下。走謁軍中曰。無錫亦良民。安敢自外聲教。不幸居割據之中。咫尺雖近。奚翅千里。耳目塗塞。若罔聞知。明公奉揚天威。孰敢不懼。今特爲生民請命。惟公加察。主將觀氣貌非常。言復慷慨。喜曰。君誠福人哉。城不受兵宜也。遂命還翼叩城門呼曰。亟開。吾事濟矣。關吏啓關而入。天祐出降。所活數十萬人。主將去。民爭聯帛爲賦詩詞餞之。翼作行草書。鳳舞鸞翔。人以爲不可及。素有志事功。常路忌其峭直。不敢薦。洪武中卒。年六十九。嗜學不倦。酷愛孟子養氣之說。反覆爲諸子誦之。聲詩須臾成章。皆可觀。而未嘗存稿。子籌。字惟中。博學攻古文。元浙江鄉舉第一。未仕。洪武四年。詹同薦授禮部主事。與尙書陶凱等。摠藩王善惡。可法戒者爲昭鑒錄。五年。凱出湖廣。六年。籌亦出廣西。皆參政。九年。陞禮部尙書。定喪服制。十年。調輸作。十二年。起員外郎。尋免歸。

楊煥文。鄱陽人。生而精悍奇偉。讀書尙氣義。元末四方兵起。蔓及於鄱。乃倡義旅。結寨。民賴以安。或勸乘時樹功業。則俛首不答。洪武初。鄉里有劇寇。匿山谷。剽劫爲民害。官捕之。久不獲。懸重賞。有能致者。給之煥文。糾膽勇數輩。往覘其巢。寇覺。鼓其黨。舞戟出拒。煥文力戰卻之。寇蹶。生縛之。械送有司。上功幕府。以前賞給。卻而不受。議奏與爵。酬其勞。辭曰。特爲民除蠹耳。豈希利祿耶。竟拂衣歸。同郡劉某。父爲寇害。往拜之。曰。茲不共戴天之讎。微公不能殄。獻白金爲壽。煥文笑曰。官賞且不受。寧受私謝乎。爲士者固當除殘去暴。況交遊之讎。飲三日而別。時議多之。稱曰。關西義隱。先時嘗涉海適遼。覘邊域形勝。阨塞。及得敵人虛實之情。因慨然將圖上方略。或勸之曰。計若遂。恐公筋力非少壯時。幸審之。乃撫膺嘆曰。誠晚矣。景

在桑榆矣。遂絕口不復言。每暇日登高。指顧山川。感劉豫州髀肉生之歎。因以杖擊石長嘯。歌老驥伏櫪詩。究五緯河洛之書。以耕釣終焉。

蕭紳字鵬舉。西昌人。早孤。育於季父自成。受學於劉尙書松明。初廣京師城。賦郡縣民陶甌運。上遣御史廉治奸者。自成長千戶。紳往代役。爲奸者所發。被收。自成詣御史言。縣實命。非我姪也。紳亦曰。躬任役者我也。叔固無與。御史驗籍名。竟坐自成。謫潞州。紳號泣傾囊送之。自成後亦得還。四明烏斯道爲作駢儀傳。自成沒。紳與弟鵬翔。鵬鵠。同居相親愛。諸弟亦皆敬事之。惟言是聽。劉松爲作五義傳。美之。洪武辛酉。以賢良徵。應制賦。指俊草。稱旨。授蘇州府同知。盡力公務。而自守甚嚴。無敢干以私者。居七月。坐秦府買民物不舉。謫河南驛夫。居河南十八年。貧甚。不自給。從者發地得金。匿不告。而求去甚力。有以其故白紳。請詰問者。紳曰。彼所自得。與吾何預。聽之去。復起爲山東運副。儉素不變。至沒齒。禦寒一縑袍。猶河南時所製。誠心恤下。歲課皆先期而集。曰。不可以累我公。稍暇。閉戶讀書。賦咏而已。諸上官咸敬禮之。長於詩。有集若干卷。歸老於家。

杜元字一元。吉水人。居金陵。苦學。有材氣。能爲詩。元張文穆公起巖爲江南行臺中丞。薦不起。以布衣終。少時父患疆疾。夜數驚。冠帶伏榻旁。父驚起。輒抱持曰。兒在斯。侍疾數月不寢。至愈乃已。貴人賢士多樂與游。未嘗以事干之。及有失心者。則爲用力不怠。趙弘中爲御史掾。坐法罷徒。步與俱行百餘里。僦屋居之。教授張鉉。被黜。金帛資其行。其子四歲失母。命婦鞠之。不異己子。兵部主事常允恭家夜失火。方醉臥。

衆怖散。無賴子利其資。將劫之。則猝集壯士。爲出篋筭於外。尤恭泣謝曰。微君。吾其死矣。鄰人陳鼎舉室死於兵。二兒匿舍側。怨家復害其小者。奮曰。脫并殺兒。陳氏絕矣。爲抱匿他所以免。吉之部運吏輸糧金陵。不足者三千。解吏受笞榜。號泣莫爲計。憫之。爲貸於大賈以償。吏以物來謝。卻之。蔣山僧爲御史所誣。夜竄求救。藏之。故人家獲全。宋楊忠襄邦父廟在城南。公本吉人。歲時率本廟游寓。具牲酒以祭。攻醫良於家治證。疾病來造者。不問有無。必予藥。藥必擇精善者。服必瘳。歲大疫。和藥走給之。不得食者。以薪米餽。由是人多稱其賢。及兵亂。相戒不犯。洪武壬子卒。年七十。子二。曰瑛。曰環。環字叔循。博通經史。長於翰墨。其書法端妍。至於行草。亦各臻妙。太學初建。環以儒士薦除學錄。以其書法示六館之士。皆倣而式之。尋入侍春坊。大爲皇太子所眷。時天下以工書名者。皆被徵至。流輩中罕見其比。故環之書名大盛。遷太常贊禮郎。終太常寺丞。爲人謹飭。重然諾。好周人急。父友常允恭死九江。其母張氏年六十餘。哭九江城下。無所歸。有識允恭者。憐其老。告之曰。安慶守談敬先。而子友也。盍往依之。母附舟詣談。談不納。母大困。念子嘗仕金陵。親友或有存者。庶萬一可冀。復哀泣。隨人至金陵。因訪至杜元家。母服破衣雨行。其時元死。環故嘗識母。是時對奕。客滿座。乍忘之。已忽省。驚曰。母非常夫人乎。何爲至於此。母泣告以故。環亦泣。扶就坐拜之。復呼妻子出拜。妻馬氏解衣更母溼衣。奉糜食母。抱衾寢母。母問其平生所親厚故人。及幼子伯章。環知故無在者。又不知伯章存亡。姑慰之曰。天方雨。雨止。爲母訪之。苟無人。事母。環雖貧。獨不能奉養乎。且環父與母之子善。今母困歸環家。此二父導之也。願母無他思。時兵後歲饑。民骨肉不相保。母

見環家貧。雨止。堅欲出。問他故人。環令媵女從其行。無所遇而返。購布帛。令妻爲製衣衾。自環以下。皆以母事之。母性褊急。少不愜意。輒詬怒。私戒家人。順其所爲。勿以困故輕慢與較。母病。親爲烹藥。進匙筯。以母故。家不敢大聲疾語。越十年。環以贊禮郎奉詔祠會稽。還道嘉興。逢其子伯章。泣謂之曰。太夫人在環家。日夜念少子成疾。不可不早往見。伯章若無所聞。第曰。吾亦知之。但道遠不能至。奈何。環促之。終趨起。未發。歸半歲。伯章來。是日環初度。母見少子。相持大哭。環家人以爲不祥。止之。環曰。此人情也。何不祥之有。旣而伯章見母老。恐不能行。竟給以他事。辭去。不復顧。環奉母彌謹。然母愈念伯章。又三年卒。將死。舉手向環曰。吾累杜君。吾累杜君。願杜君子孫世咸如杜君。言終而絕。環殯而葬之。歲時常祭其墓。

李疑。字思問。金陵人。金陵俗以逆旅爲利。一室月責錢數千。或疾病。輒遣出。病危。氣息尙屬。目眇眇未瞑。卽與乘之。而敗其貨。婦孕將產者。以爲不祥。擯不舍。其少恩如此。屬邑尤甚。獨疑以尙義聞。訓閭巷子弟。得粟自給。不足則以六物推人。休咎固貧甚。然獨好周人急。金華范景瀆爲人部掾。得疾。無他子弟。人危之。不肯舍。扶杖踰疑門告困。延座就掃舍。具牀褥。鑊竈。使寢息其中。微醫。躬糜藥。旦莫執手問所苦。如事親戚。旣而疾滋甚。洩汗臭穢。不可近。疑日爲刮摩浣滌。不少見顏面。景瀆流涕曰。我累君矣。恐不復生。無以報厚德。囊有黃白金四十餘兩。在故逆旅邸。願自取之。疑曰。患難相恤。人理宜爾。何以報爲。景瀆曰。君脫不取我死。恐爲他人得。何益。疑遂求其里人借。攜以歸。而發囊。籍其數。封識之。數日。景瀆死。出已財。買棺殯於城南聚寶山。舉所封囊寄其里人家。往書召其二子。及至。同發棺取囊。按籍還之。二子以米饋。

卻弗受。反贖以貨。遣歸平陽。耿子廉械至京。其妻孕將育。衆拒門不納。妻臥草中以號。疑問故。歸謂婦曰。人孰無緩急。安能以室廬自隨。且人命至重。倘育而爲風露所感。則母子俱死。吾寧舍之而受禍。俾婦邀以歸。獲男。疑命婦善視之。踰月辭去。不取報。人用是多疑。名士大夫咸喜與交。見者皆曰。善士善士。疑讀書爲文亦可觀。嘗以儒舉。辭不就。

姚伯華。杭人。元末兵亂。盜旁午肆剽掠。至親避匿山澤。不相顧。時伯華二十未娶。事父母極孝。晨夕定省。未嘗去左右。父母年俱六十餘。家頗溫。度不能存。奉二親。匿閭原山。挾貨行。爲羣盜所迫。投叢莽間。各散失。盜過。父不虞。後盜至。出呼其子。遂爲盜所得。母聞。齋所挾物往救。盜併驅以去。至一山路崎嶇甚。夫婦老不能步。盜怒。竝推崖下。墜石死。明日盜稍退。伯華徧野追求。不可得。哭聲徹天。忽有指示曰。爾親在崖下。趨視之。則皆死矣。伯華計盜來未已。用被二囊。其父母。以肩擔之。乘夜由間道奔桐江。時江無舟。躊躇間。俄漁人棹小舟來。伯華出。貨乞渡。復肩二骸至祖墳。採樹葉掩之。徐用木錐穿土。飢寒無力。又慮他盜至。晝伏夜作。二晝夜穴成。深丈餘。以二親殮於穴。仍負土築壘。高三尺。慟哭。血而出。明既定天下。民復業。於是伯華歸。卽舊居而屋之。孑然一身。形影相弔。久之。聘錢塘楊氏爲婦。生三子。家漸饒。伯華恨二親死非其所。每一念至。悲不自勝。計其遇難時。在二月亡忌。故每臨二月。則終月絕酒食。不茹葷。不接賓客。獨擁爐自泣。手持杖畫灰。隱痛裂肺肝。淚傾注。灰盡溼。或問之。故不答。勸之。益嗚咽。弗已。進飲食輒推去。奉祭祀執爵。哀哀呼父母。如在膝下時。聞者無不感動。伯華記逃難日。乏草履。幾不免。尋得之以著。始獲。

濟。遂終身手織草履。以施貧乏。弗取直。三子生八孫。變吏部尚書。龍河南左參政。子孫男女幾七百指。伯華壽七十卒。贈通議大夫禮部右侍郎。伯華少忠厚。嘗寄人物甚夥。一夕火發。家貨煨盡。一不顧。急移所寄物。或謂掩之。可給以火。伯華皆按籍各還之。無一失者。客有過其肆。少憩。遺一巨囊。視之皆鈔。急追還之。弗及。逾年遇其人。延至家詢之。其人謂曾遺。不自記憶其地。出囊還之。封識宛然。客嘆謝而去。兄伯榮。洪武間任河南永城典史。以事坐臺獄死。其內弟火其骸。攜歸。匿之。給曰。得錢事可解。伯華罄其所有。不足。復鬻田。付以去。既而歸語曰。幸弗累家矣。不意病卒。吾已收骨至黃山寺。盍往取之。衆知爲所給。欲暴其情。伯華曰。弟得兄骸歸葬足矣。置勿問。

趙祥。字景德。永平人。永樂初侍父百戶亮任金山。年十四。爲島夷所獲。轉商日本。其王知其中國人。召見之。留侍左右。改名元貴。因得力學。遂爲士官。畜妻子。然心未嘗一日忘中國也。屢諷王入貢。宣德中與使臣抵京。上疏陳情。臣夙遭虜。抱斃痛心。死生路梗。流離困頓。辛苦萬狀。生還中國。夫豈由人。伏乞歸省侍上意。在柔遠。不欲遲留之。遣令還國。許給驛暫詣金山。獨其母存。不識曰。吾兒耳。陰有赤痣。驗之信然。抱持慟哭。悲動鄰里。未幾重違上命。別去。祥至日本。啓以聖意。蕃玉允之。仍令入貢。申前請。詔許襲職。歸養祥母。母子相失二十載。又有華夷之限。得遂其養。難矣。祥事母備極甘旨。聞言及父事。輒哽咽不已。後母寢疾三載。朝夕不離左右。及卒。哀毀骨立。喪葬皆以禮。祥博覽經史。通左氏春秋。善吟咏。年八十餘。以壽終。

洪祥字士高黃梅人德性渾成無疾言遽色事親孝養備至服勞不息父友璋病癘延年餘起臥粥餌衣被垢穢必躬治之未嘗解帶妻完氏貴家女璋念兒卽孝而婦或少嘖心終不安一日強坐謂祥曰吾病將愈汝姑去就室留一僕扶我足矣士高陽諾而陰伏父寢傍是夜父少起呼僕不寤力殆而仆忽一人參脇驚曰爾爲誰士高曰兒也知父晝所云非實時候於此則相持泣曰天乎孝兒至矣已而父疾良已祥與妻益竭力承事優游十餘年及父卒思慕無所不至見父形於醜薦鏡中人謂誠孝所感士高喜讀書明義理死生利害了無疑滯嘗值暴雨或勸其急行笑曰緩急等溼耳壽九十七終里閭評祥行號曰隱德洪先生子六人俱賢曰亮者金華武義丞亦曲盡孝愛云虞謙字靜之明州人謙匍匐時卽依依戀父母父母行輒抱持不忍舍總髮就外傳讀書至明發有懷蘇蘇隕涕見者異之既長承志唯謹成化甲子從兄謙以富民籍亡歸有司逮捕甚亟父憐其衰老命謙代之行謙曰父命也行無難色入吳謁陸績墓次彭城訪劉士雋遺事過沛拜王陵像皆有紀著抵安定毅然就役若忘其爲他人者尙書楊守陳爲之請得免歸弘治辛亥父遭痼謹侍疾醫藥備極懇惻每夜稽顙北辰祝曰甯瘳於余身久之類爲墳赤血縷縷見父卒哭絕復甦殮殯率中度喪三日水漿不入口母勸之陽爲一舉母入復輒去坐臥苦塊祖髮而黑如因垢嘗念其父好老氏日誦道經一徧畢乃哭哭至淚下浸輒輒爲毀裂喪畢懸像置器如所生備陳平生若所見又作哀文五篇以見志母病劇痛不欲生及逝哭殮哀奠一如其父至遠其內子非祭不相接非病不入問如此者十五年或勸之曰人孰無室家之養子何自苦謙惟拊心嘆哭謹體貌壯

偉。至是骨立。不復舊容。守陳後見之。憐其志。爲詩歌。里人稱曰虞孝先。是月朔哭。有白鷓鴣來巢寢室。馴甚。每聞哭聲。鳴鳴若助之者。

楊晏。字克彰。淮安人。口鄉族長老。交游士夫。未嘗名字之。咸呼之曰楊孝子。故名最著。晏性端慤。自幼事父母孝。事兄恭。父蚤世。哀毀特甚。母陸慰解之。卽強顏以悅母心。而哀不衰。事母備極孝養。家無厚資。而甘願無不如志。母酷愛其孫。時牽率抱弄於前。枚指之曰。某可承家。某可事生業。某當作官。顯門閥。母聞之大悅。門戶有憂戚。不以告母。嘗愉色在左右。以安其心。暇則坐塾中。誨諸子。及鄉鄰之秀。必以躬行孝悌爲先。才質輕俊。善文章者。少忽於孝弟。則懇懇諭之。弗改。則厲聲斥絕之。母嘗病。醫禱備至。晝夜未嘗安寢。食母歿。哀號頓仆。水漿不入口者數日。及葬。廬於墓側。衰絰不解。晨奉櫛類。夕奉澆濯。如生時。不廢哀號之聲。聞者感動。烏爲之翔。獸爲之伏。時蘭陽邱陵爲太守。王竑爲都憲。鎮淮聞其名。奏旌其門。後子理爲給事中。封如子官。東海張謫過淮。聞其事爲之贊。嘗曰。子嘗過淮。問楊給事。則有知有不知者。曰。楊孝子。則皆能道其行事。指其里巷。噫。孝子之孝。誠可謂人不聞於其父母昆弟之言者乎。然彙考其事。不過日用之常。委曲致力耳。蒙莊有言。事親而能適。不問所養矣。然則世之立異爲高。而未必能悅親者。非真孝也。

劉和。字元中。吉水人。喪母。廬墓玉華山。朝夕哭。朔望令節。有奠物。不給。則織履易之。明年夏。風雹伐屋。獨其廬不壞。山多虎。虎夜繞廬。不相驚。其始人以爲詐。已而鄉之士人聞其果然。多往慰問。然不肖者惡所

行異俗。且不利已。謀陰沮其事。又明年聞知。且滿喪。乃結黨僞爲盜。夜火其廬。執而苦楚之。久乃得脫。抱木主徑山。就道院中避焉。時天苦寒。道人遣以衣。色不素者卻不受。黎明乃歸。納主於廟。而終喪於外寢。先是年十三時。聞父理豫溺死。池州慟哭。嘔血。以母周氏解臂得不死。自後往來其處。輒悲痛不食。設酒殺江。訢號者累日。聞者皆爲墮淚。每食甘美。必懷歸奉母。後客九江。聞母喪。棄貨而葬。家益貧。然遇忌日齋。必三日而後祭。平居寡言笑。事必效古。遇人非笑。而自信益堅。不喜戲劇。或強之。卽擁戶不顧。有欺侮者。忍以待之。故嘗自號耐辱居士。既老而貧甚。行愈高。人皆以聖人目之。子天曙。生五六歲。值和卒。能茹素。盡哀。與之肉食。輒哭不食。雖百試不改。嗚呼。將氣類之感耶。亦天有以厚之也。

歸鉞。字汝威。早喪母。父繼娶某氏。繼有子。鉞由是失愛。父偶撻鉞。繼母輒索大杖與之。曰。徒手傷乃力也。家貧。食不足贖。每令蠶倉。將熟輒逐去。於是父子飽食。鉞數困頓。匍匐道中。比歸。父母相與言曰。有子不居家。在外作賊耶。輒復杖之。屢瀕於死。鉞依依戶外。不敢入。俯首竊淚下。鄰里莫不憐之。父卒。繼母與其子居。鉞猶不見收。因負販市中。時私其弟。問母飲食狀。致甘鮮焉。正德庚午大饑。繼母不能自活。鉞往涕泣奉迎。母內自慚。無所資。從之。鉞得食。先母弟。而已有饑色。弟尋死。繼母終身怡然。諸與鉞游者。皆曰。未嘗見鉞言其母若何。鉞少饑餓。而黃而體瘠小。族人呼爲菜大人。族子有歸繡。字華伯。亦以負販養母。已乃至市舍中賣麻。與弟紋緯友愛無間。緯以不法坐繫。繡力爲營救。緯又不自檢。犯者數四。繡所轉賣者。計常終歲無他故。才給蔬食。一經吏卒過門。輒耗其母錢。終始無愠容。繡妻朱。與製衣必三襲。令兄弟均

平曰二叔無室豈可使郎君獨被完潔耶叔之亡有遺子撫愛之如己出里人稱爲歸氏二孝子何倫字宗道江山人天性至孝居父憂哀毀踰口久之尙日晝嗟涕泣如初喪時見母毛尤謹溫清定省必如禮家雖貧甘旨不缺衣服必備或營辦不足輒借貸於人曰不若是何以慰吾母心及母亡殮殮一遵古禮三年疏食如一日喪畢不釋服不入內鄉飲亦不赴曰親在淺土吾其忍乎守令皆高其行賻之對使者拜受終不造謝曰吾罪人不敢至公庭也倫貧失學年二十七始發憤讀書初從陽明先生講學復從王心齋王龍溪游充然有得其所論說嘗發聖賢之奧其邑令嘗欲見之倫不屈適族人有重役令曰孝子見我可免也族人向匪類倫薄其人竟不往族人詈之不顧也有醜酒者擠倫於溝同行者欲毆之倫曰此飄瓦觸舟耳奚毆爲又夜盜入其室竊器物而出倫覺識其人而不言將取釜始曰盍留此備吾母晨炊盜慚盡還其器物曰盜孝子者不祥自是不復爲盜

崔鑑燕人也年十三父佑賈於市性嗜酒有魏娼者善治淫聲佑聞而悅之與之私焉遂留與居鑑母王嫌其非類每諫止之佑不聽娼恨每搆譏佑每窘辱王篋楚之娼由是益肆一日佑出倡以語侵王王復之娼怒擊王敗面王含忿入室撫牀泣鑑自學舍歸詢其母王曰吾爲娼所搆被辱萬狀今且自引決爾善自愛鑑聞之泣怒曰母第安志勿他也語畢卽潛入學舍挾刀以歸踞娼所在娼適掃於廳傍口且詈王鑑從傍拔刀刺其左脇深八寸許娼隨斃鑑以刀匿牖下亡走數里餘忽自念曰吾殺娼而吾父不知必謂母矣吾走母無以自明必被逮吾殺人而令吾母抵罪哉因復歸未至佑果疑王已斃王將置諸理

矣。鑑至請解王所縛。曰：殺人者我也。母何罪。衆不信。欲舍之。鑑曰：若輩不吾信。吾殺人之刃尙存臚下。第視果然。衆乃釋王。而獨以鑑馳報聞。上詔下法司議。於是刑尙書聞淵等僉議曰：可緩死。故事：減死者悉發伍。淵輩以鑑幼。且情可原。議併釋之。乃公上奏曰：臣等竊見崔鑑所犯。母子之情。根於天性。雖冒重罪。志在全母。司寇議是。上曰：崔鑑既爲母冒辟。情可矜卹。其原之。鑑得釋。

劉閔字子賢。莆田人。幼有至性。及長。動循古禮。造次不苟。家甚貧。極力養母。定省溫清。疾不解帶。母或怒。則衣冠跪牀下。竟夕不敢起。以父與祖母二喪不克葬。遂斷酒肉。遠房室。訓徒鄰邑。朔望則號哭於殯所。如是者三年。鄰於憐之。爲助其葬。母歿。哀毀骨立。廬墓側。衰絰蔬食。終其喪。祭祀必齋沐。率男婦奠獻。一如家禮。閨門嚴肅。妻失愛於母。出之。終身不復娶。少保林俊疏薦曰：劉閔學行高古。雖詞藻不逮。而德宇道風。人自難及。宜徵侍青宮。講讀。不報。御史宗彝知府陳效又薦之。詔授本縣儒學訓導。前後按部使者及守令。率與鈞禮。時致餽以賙其乏。所著有家禮考。註昭穆圖。宗子說。五倫啓蒙。孝經刊誤等書。藏於家。姪孫自省。鄉舉。歷長沙府同知。持身敦樸。臨事周慎。頗有閔風。

樂枏。定海人。性孝友。家以亭戶籍。官枏承其役。弗替。洪武十二年春。會稽錢清高氏許從。兄弟歲輸鹽。痛自縮。迫小民。倍其輸。以掩己之數。事上聞。上以浙河以東。亭戶大家。皆罔上賊。下如一律。卽遣使編各倉。覆鹽。有損常數者。悉起赴京。鞠訊。咸承罪。坐輸作。枏亦在逮中。其弟稅願代往。枏曰：吾之往也。死生未可知。吾有三子。爾尙無後。豈其可。稅又詣縣庭請代。枏曰：枏之名。固不可易。服力鹽事。皆枏也。稅罔知。使往。

而被拘。必失對。縣因不敢遣。及枌行一舍許。稅追及之。枌叱之去。不聽。卽乘塹垣。以塊拋稅垣之塊去者。半。稅度伯氏心不可回。慟哭而返。十三年夏。枌果死。枌讀書窮理。凡醫卜地理書無不習。里之人聞其死。莫不哀之。稅走負其骸歸葬焉。

鄭士利字好義。甯海人。嘗爲縣諸生。其兄士元以儒薦。爲河南淮慶府同知。遷湖廣按察司僉事。利因告於師去。待其兄遊學有名。洪武九年。天下考校錢穀策書。空印事起。凡主印吏及署名者。皆逮繫御史獄。凡數百人。士利兄亦以河南時空印繫獄中。天子方怒空印事。以爲欺罔。行省臣三十餘輩守令署印者。皆欲置之死。佐貳以下。杖一百。免死。爲軍遠方。丞相大夫皆知空印者無他罪。可恕。莫敢諫。士利獨歎曰。上不知。以爲空印大罪。誠得入言之。上聖明。事有不悟。懷欲言之。適星變求言。士利曰。可矣。旣而讀詔。有假公言私者罪之。久之。士利曰。吾所欲言者。爲天子殺無罪。爲可痛耳。吾兄非主印者。固當出。需吾兄杖出。乃言。吾死不恨。其兄免死。出。士利乃爲書數千言。言數事。而於空印事最詳。其意以爲誠欲深罪空印者。恐奸吏得挾空印紙。爲文移以虐民耳。臣以爲移文必完印。乃可。今考校策書。合兩縫印。非一印一紙之比。縱得之。亦不足用。況不可得乎。且錢穀之數。府必合於省。省必合於戶部。其數誠不可懸斷預決。必至戶部而後定。省府遠者。去戶部六七千里。近者三四千里。待策書旣成。而後用印。則往來之難。非期年不可至。故必先用印。而後書。此權宜之務。所從來遠矣。何足深罪。且國家諸法。必明示之天下。而後罪犯法者。以其不可而故犯之也。自立國以至於今。未嘗有空印之律。有司丞相不知其罪。今一旦

捕而誅之。則何以使受誅者甘心而無詞乎。朝廷求賢士而置之庶位。得之甚難。位至於郡守者。皆數十年所成就。通達廉明之士。非如草菅然。可刈而復生也。陛下奈何以不足罪之罪。而壞足用之才乎。臣竊爲陛下痛惜之。其書既成。欲上者數矣。而未決。每歸逆旅。則閉門俯首而泣。泣數日。其兄子待行者。疑而問之曰。何所苦乎。士利曰。我疏上。觸天子怒。必受禍。然殺我活餘人。我更何恨。遂持詣丞相府。士利短小。容貌如常人。見丞相禮頗倨。丞相同何書。士利曰。吾將爲天子言之。丞相何問也。丞相因御史大夫入奏。上覽書大怒。詔丞相大夫雜問。誰教若爲。必有主謀者。士利笑曰。願吾書可用。與否何如耳。且吾業旣爲國家言事。自分受禍。人誰爲我謀乎。辭卒不屈。然猶輸作終身。而竟殺空印者。兄士享。弟士貞。皆有文名。高瑾。大梁人。爲人孝弟儉直。少事母。歲時上壽。自歌舞爲歡。事其二兄。旦趨侍食而退。出則爲執鞭道傍。伺顏色。猶事父云。喜誦讀。每稱說先王。不飲酒。嘗歲暮。出取逋負。見多窘乏。輒割券。馳一空車歸。里人望見。盡笑之。瑾不較也。子珣。爲東明丞。強逆養瑾。官邸。輒蹙頰曰。吾往未嘗入公府。乃今公府居耶。遂歸。時舊令得代去。往問瑾曰。我熟與新令賢。瑾默然。熟視久之曰。君似弗如也。人服其直。於是鄉閭從化。家居子弟。見輒趨拜。卻立。里中人假僮僕使。不復關白其主人。雞豚放猶一家。過者咸歎異之。斯益足爲滄風矣。妻侯口。孝讓。有幼子。爲嫂子捉殺之。侯泣謂瑾曰。吾幸尙有珣。奈何令伯氏無後。卒出之獄。嫂子以百金謝瑾。瑾不受。詣侯。侯不受。曰。吾利金而出汝耶。

汪灌。字慶衍。金華人。爲人廉直。能急人患難。人有故叩之。卽風雨寒暑不避也。鄉里大事。官皆倚之以辦。

一日念徭役不均而訟訐滋起也。聚其鄉人謀之曰：鄉之人非吾，吾則屬吾子弟也。願墜恩圮義而閔於役者，獨憚追胥科由騷屑之擾焉耳。請率里正一歲所須錢長短相覆，亡虛費三十萬。吾鄉戶各自實其貲，爲三等定著之。差次於籍，而衆寡金以異當役者。役之先後視戶籍，金之多寡視等則異。時戶有升降，則告於衆而進退之。如是則名雖值役者聽事，而實皆仰給於衆也。公無廢事而私可無敗家，尙何憚乎？願與父兄慮之。衆翕然稱善。卽日立約束，無違者。既又以裏金之難也，衆割田百畝爲之約成，登其書於縣，而各藏其副於家。竣於役而反，則會衆擊豕醢酒，舊里正以田授新里正，成禮而退。於是一鄉之役訟遂絕。行三十年，守令大善之。延灌等及他父老與爲禮，而志其鄉以風。歲惡，饑民羣起爲攘寇，以救死。守召灌爲畫，欲調兵。灌曰：無以爲也。此直向升斗救死耳。下片符可致，何俟兵乎？脫兵出，則挺而搏矣。守乃悟，然猶遣巡檢與俱。灌止巡檢於家，飲食之，獨以數十輩持符逮至，莫不畢集。吏覲功，悉論以死。灌詣府伏庭下不起，曰：是曹束手隨檄來，未嘗扞法。今逆論從復，無凶歲乎？且灌實召之，灌不忍民聽灌就逮而死也。守感□□解散其獄。

王芳，字德遠，太倉人。幼業儒，所交多名士。家頗饒，秉禮好施，而自奉甚約。晚喜閱叢書，故殺之物不食。卽遇一蠅，亦存悲濟。每每施棺掩骼，人呼爲佛子。有長洲簿告急，倒囊出百金畀之，請益。復以鄉人周氏所託金十錠貸焉。簿尋褫職，亡去。遂委居第，償周氏金，而草舍鸚鵡橋，晏如也。嘗訪舊小直沽，適慈谿生費廷槐病滯旅舍，與語，歎曰：奇士！奇士！乃困頓塵土邪？移至寓所共寢處。時其饑餒寒燠，而將護之唯謹。

明年春感異夢。攜至同舟南旋。復夢墮橋下。拯之不得。謂其弗祥也。晨輿輒焚香誦經。爲之禳病。病良已。已而又病。便溺狼籍。市盜街躬爲滌除。旁觀者率不堪無倦意。生數感泣曰。吾何以報先生哉。諸所需果餌藥物。無一不備。至潤州。昇易輕舸。欲就姑蘇。召醫調理。次呂城。生病革。索筆作家書。恨不及終。養二親。涕咽謂王君曰。生平心事。百不一伸。天乎已矣。僮埋道傍。乞書慈谿。費廷槐不暇目之。柩語脫口而逝。雙眸炯然。芳曰。古今旦暮。孰爲彭殤。豈君達人而但化耶。摩其匪。猶不暇。乃舉其首枕之股。撫之曰。四海一家。誰非兄弟。骨肉弗而命也何憫。況有四弟兩兒。親養有託。毋戚戚爾。生喉間書然有聲。目漸瞑。匿尸三日。舟人不知也。抵虎邱。稱貸營棺衾。手浴含殮。權厝半塘僧舍。訃其父。踰月而至。舉其柩弗前。遲明。芳絮酒來哭送。乃舉環寺門而觀者。嘖嘖歎曰。不意今人中得見古人。有阻涕者。

羅韓。字宗器。吉水人。其先曰復仁。明初以弘文館學士。從太祖定天下。後辭封爵。太祖嘉之。賜歸田里。其孫汝敬登永樂甲申進士。歷官工部侍郎。璋其孫也。幼能愛敬。長善屬文。以廢補太學生。授四川布政司經歷。屢遷常州府同知。所至清慎有善政。嘗居母喪。廬墓螺子山下三年。嘗隨一白犬。主哀亦哀。主息亦息。山故無虎。至是一虎渡江。周旋瑩次。狎犬爲侶。瑩偶以疾臥。其杖竹倚壁。生枝葉。一白鴉爲鳩鳴。久而不去。當是時。填生芝。荷華生於原。

史五常。內黃人。父萱。洪武中任廣東僉事。卒於官。五常始七歲。母以幼子。且無資。不能歸葬。遂卽和光寺僧地權厝之。攜五常北返。嘗語之曰。汝父棺中有大錢可驗。待汝長成時。尋骨歸葬。則汝可報父恩。而我

亦盡婦道矣。後母沒。五常年五十矣。乃入廣求之。既至不得。旦夕泣告於天。里人哀之。有爲進食者。數日。按察經歷張珪知之。爲多方物色。士人識其處。啓之。遺骸大錢猶在。五常以禮斂。禮官贖貨。爲給舟車費。歸葬。五常仍廬側居三年。事聞。詔旌其門。

何宇新。字子完。廣東博羅人。幼失父。事母至孝。鄉人稱之。及母歿。貧不能葬。聞者爭賻。比發引。奠者七十餘筵。遇積雨不止。及輻車屈道。隨在輒晴。雨若爲之迂避者。既葬。縛草廬墓側。夜有虎蹲其門。宇新祝曰。罪惡之人。孤哀萬死。盍蚤食我。毋徒相怖。穴壁覘之。二虎左右馴如也。既旦散去。夜輒復至。每浹旬。則易二新者。猶瓜代然。宇新忽得危疾。鄉人昇歸治之。其家在市。虎亦尾之去。疾愈。還墓側。虎又來。遂狎焉。若素蒙者。先是家畜一黃犬。犬三五日輒候墓所。宇新欲有所需。卽書片紙繫其頸。家人見之。具備。繫使負還。人稱皆孝感云。事聞。詔旌其門。後宇新舉鄉貢。入南太學。人見其近體尙結衰綬。帶牢不可解。以示終身之喪云。有羅瑞者。廬墓亦有馴虎之異。

楊成章。道州人。父泰任浙江長亭巡檢。嫡母何氏無子。泰娶杭州丁氏。生成章。甫四歲。泰卒於官。丁氏留杭州。何氏攜成章扶櫬歸。成章長爲庠生。初丁與子別。剖銀錢爲記。及何氏臨歿。出銀錢付成章。且告之。故成章持服闋。出遊尋母。不獲而歸。意猶懇切。後因鄉人李紹義爲東陽典史。知丁氏所在。復往求之。遂得母。人以爲誠孝所感。吏部侍郎唐龍上其事。授國子學錄。以旌其孝。

劉廷梅。別號同野。吳人。少惰學。好遊。父封跡而撻之。長跪曰。兒以佚故傷大人。心罪甚大。請自此改趨。遂

折節強學於屬文漸工其父以格言督之學乃懸之楣讀小倦仰視楣間卽佔僂聲益厲父卒慟哭嘔血死復蘇水漿不入口時祖父母猶無恙其祖樽叟強謂之曰豎子爲而父死不念而父之父母旦夕人乎且而母寡而弟弱而何以死也母蕭謂之曰若婦胡昔已委禽可從俗娶也廷梅謝不敢母蕭曰吾病憊不能奉二尊人誰與代吾饋者卽吾饋亦誰治胡之父聞而憫之歸女焉廷梅弗成卷也旣免喪益貧其祖父母相繼卒廷梅哭請於母蕭曰天其遂死不肖耶將困之極而玉於成也計窮矣有饋粥之產敢廢以歸三喪於是殯葬皆不廢禮用過毀滋病病益貧於屬文若有神助下筆累數千言督學御史蘇祐復首以其經誼行術超卓檄主同仁書院弟子蓋三百人弟廷楫於束脩之饒上以奉母蕭甘毳而餘資掛學母蕭不甚愛廷梅獨愛楫當兄弟就試而楫病作偕行萬山中乃徒步募二夫俾輿楫俄一夫店作路廷梅匿跡從輿後肩之楫不覺也道遇識者咸目之而笑不顧及俱領鄉薦楫竟以疾不能赴公車廷梅登第後念楫病無起時而虞母蕭憂亟假歸楫死母蕭果痛不欲生廷梅百方解慰陰痛幾絕迄不令母知筮選得欵令奉母蕭往欵人盛供帳侈酒食以俟乃亟揮之出曰是嘗我也自今卽束菜溢米不得闌入偶與同年友汪伯玉戲邑無魚馮舍人可以彈缺矣伯玉頷之至明日得一大魚以饋欲辭不可剖而五之以其一供母蕭餘四以付市司使鬻之稍取其畸至彌月不盡蓋自母蕭外居恆未嘗噉魚肉也嘗步行而一種自轉出以爲誤也引之愈長笑曰羹也吾以代縣鬪伯玉見而笑之廷梅亦笑曰吾昔讀書時嘗坐一木罌而積糞其中自腰以下皆煖今僅糞吾足侈矣令欵多善政居四年以循吏徵乃犢車

載母。敝衣羸馬從之。士民奉壺漿。百里不絕。得南兵部主事母蕭卒。廷梅踰踊如少壯時。強自力。居喪無違禮。除服仍補南部。累進郎中。出守漢陽。比至。漢屬大饑。以便宜發倉粟賑之。而收其暴。歸之士。設方略。誘縛盜魁。之漁於柳洲者。境內稱治。時楚國賜田在漢川者。與民田相錯。而欲併得之。楚人大譁。督衆鬪。廷梅爲正經界。樹標識。楚王不能難之。擢廣東按察副使。攝提學事。兼管四道兵符。攝司事。時寇大發。修戰具。而徵卒捕盜七十。且以其賊仗實之。嚴按之。則皆賈人。悉與辯理得釋。其署鹽筴吏。歲羨千金。悉歸之庫。充軍餉。引年乞歸。許之。既歸。筓其衣冠。杜門逍遙。偶出。則布帽練衫草屨。居然一田父也。問時政。則掩耳稱草莽。臣不敢語。及昔治狀。則曰忘之矣。凡利益人者。無不勉爲。每望邱墓。既白髮頽顏。哭每如初喪。先是居母喪時。尙無嗣。不知人者五日。夜時以無子故。羣睨而欲瓜分其產。忽夢黃冠羽衣人。以帝命予之藥。遂寤而起。睨者立解。卒年八十一。有子曰仕敬。能文章。

李德智。號大癡。武昌人。生平有隱德。得黃老養生之術。母死。鄰家火起。撫棺慟哭。反風。火竟不燃。一日晨起。坐門前。見甸者倚門而目。之。德智曰。汝無乃甸而盜乎。甸者跪曰。某非甸。亦非盜也。某名殷真。銅鼓衛人。本衛以填房料銀計千餘金。來納于都司。緣過黑舟渡。舟覆。文移溺水中。真以身免。欲歸而請之。某以孤身挾重貲。泛巨浸。恐不免。聞公好善君子。願以相累。俟請文而納焉。計四十日往返耳。德智慨然受之。至八月不得報。比其人歸。去家一日而病且死。遇所知陳大通。大道來哭。謂曰。我且死。煩爲家人言之。來視喪。然竟不言官錢事。二人歸而告之。家人至則死矣。後衛逮其家人。比勘官錢。家人無以應。則意前

二人來告喪。或爲所匿。告之。竟文致之。罪當死。後德智意前句者。以四十日爲期。而今三年矣。事且有變。遂封識前金。詣都司言。都司受之。爲文往勘會焉。而陳大通大道在獄中。衛官見之。大驚曰。楚有大賢若此乎。率大通等焚香籲天曰。我拜前爾拜後。其非常人也。出二人獄。聞者莫不義之。德智後持清齋。不茹葷。遇異人授五靈神符。治百病。輒效。壽八十三。無疾而終。

朱仲福。靈壽人。世業農。父生仲福早卒。仲福孩提時。卽能行喪禮。人咸異之。成童不爲嬉戲。出牧牛。每於鄉塾聽讀書。輒曉大義。從里人借書。卽其音尋之。乃識字。長力農養母。每帶經鋤灌。誦讀晝夜不輟。貧不得書。每從里中士借得。一覽輒返。人問之曰。閱乎。曰。頗閱。人無知者。母卒。哀毀盡禮。三年不笑語。鄉鄰異之。邑人給事中傅鳴會知之。造廬與語。大奇之。遂與之遊。蜚譽薦紳間。人皆以得見爲慶。仲福常戴圓絨帽。衣短布衣。諸士大夫贈以巾。仲福曰。仲福本小民。所戴此圓絨帽者。遵朝廷之制也。一加以巾。則諸公又何必與仲福遊。年四十。妻卒。便絕慾。獨處草堂。誦讀積歲。而諸士大夫家藏書皆徧。深明律歷。每元旦。登其鄉之阜。曰。狗臺望氣。輒言一歲休咎。無不奇驗。人勸之著書。曰。天地間道理。聖賢已盡言之。著書非複則偏。何益。況人世書未見者儘多。一落筆焉知非古人所已到者耶。人咸服其言。子二。力耕以養。仲福之母。庭前手植一柏。仲福終身不忍折一枝。每教其子孫。必以樹下。鄉里化之。無爭鬪者。曰。恐朱老知也。恭謹端方。雖疾風暴雨無改步。自鄉至邑八里。步履安詳。士大夫每使人尾之。未嘗有惰容。嘗與諸士大夫遊。許由山。其山觀唐宋碑甚多。衆誦碑文一過。數年後談及其碑佳。惜遺忘。仲福一一誦如流。人始驚。

以爲神。出言簡而理甚透。嘗有一佃僮士過其前。適一車至。仲福曰。君知車之所以載重而行遠乎。其人因放論數千百言。仲福曰。不然。彼體方面用圓。是以如此。其人嘆服。大略與人談多如此。一日。忽語羣公曰。明年某月某日。其長遠諸公乎。衆驚曰。先生康彊何言此。有術乎。何決如斯。仲福曰。吾無術。第臥聽吾耳。至每一伏時若干。則一斷。過一日則少若干。以歷法計之。明年某月某日。數盡矣。至先三日。徧辭鄉里親故。坐一室。人皆環視之。談笑如常而逝。其子爲修墓。人皆見仲福立墓上。鄉人私稱碣曰。孝德先生。著

折衷歷法十三

卷惜未付梓

阿奇者。潯安徐氏僕也。徐氏昆弟別產而居。伯得一馬。仲得一牛。季寡婦得阿奇。阿奇年五十餘矣。寡婦泣曰。馬則乘。牛則耕。跟踏老僕。乃費我藜藿。阿奇嘆曰。噫。主謂我力不若牛馬耶。乃畫策營生。示可用狀。寡婦悉營珥之。屬得銀十二兩。畀寄。寄則入山販漆。期年而三其息。謂寡婦曰。主無憂。富可立致矣。歷二十年。致產數萬金。爲寡婦嫁三女。婚兩子。齋聘皆千金。又延師教兩子。旣輸粟爲大學生。而寡婦則阜然財雄一邑矣。頃之。阿奇病且死。謂寡婦曰。老奴馬牛之報盡矣。出枕中二楮。則家計鉅細。悉均分之。曰。以此遺兩郎君。可世守也。言訖而終。徐氏諸孫。或疑寄私畜者。竊啓其篋。寸無絲粒粟之儲。一孀一兒。僅敵糲掩體而已。

明書卷一百三十八

列傳六

循良傳一

史官論曰。夫循良者。抱道溫溫。與民宜之。一夫失情。則負結於意。千人緩帶。則適忘於體。誠因心賦政。側隱之至也。然仁至則義盡。而利必興。害必滌。去甚去泰。而不居其名。里并用休。傳稱國僑爲政。老人作嬰兒啼。蕭曹清靜。民以甯。一循吏以斯爲最。潁川近名。朝歌近術。風乃亞之。夫褰帷行部。所至有赫赫聲。或飾廚傳。通環璜。稱過使客。以賣高譽於天下。又其賢者。內飭簠簋。外長耳目。亭豬鳥肉。察及細微。以爲守令聰明。周疾苦。治如是。是亦足矣。而長者爲治不尙焉。昔漢帝詔曰。庶民所以安其田里。而亡嘆息愁恨之聲者。政平訟理也。與我共此者。惟良二千石乎。又曰。惴惴之吏。日計不足。歲計有餘。聖主在上。良牧在下。上之考績。以實不以名。下之報政。以拙不以巧。其治之本。止於惴惴。其治之效。止於政平訟理。而無嘆息愁恨之聲而已。明太祖嘗諭廷臣曰。今布政司官。卽古方伯之職。知府卽古刺史之職。所以承流宣化。撫安斯民者也。然得人則治。否則病民多矣。所以重考課之法。嚴貪墨之刑。一有所犯。不爲少貸。而良吏乃輩出。厥後貪暴成風。是非顛倒。守令貪廉之目。專以苞苴之多寡。諂事之分數。執券而酬。不爽毫末。上



鄙下媮無所底止。以致民窮盜起。國運崩摧。守令之關。豈其渺哉。今取其體仁長人。化道烝蒸者。爲循良傳。庸以風焉。

魏觀字杞山。蒲圻人。父雲瑞。有隱德。觀讀書蒲首山中。勤苦弗輟。喜吟咏。觸物感興。陶寫性靈。乃構亭曰梅初。以寄志焉。元末薦被徵。辭不就。明初。觀與劉基宋濂俱受聘。同謁太祖。與語大奇之。授平江州學正。遷國子監助教。陞浙江僉事。吳元年。改兩淮運使。入爲起居注。洪武初。建大本堂。命觀侍皇太子說書。及授秦晉諸王經。二年十月甲戌。齊露降乾清宮。上問吳祥觀曰。帝王恩及於物。順於人。則甘露降。十一月冬。煖如春。上召僧危素詹同吳琳宋濂遊觀內苑。燕紫閣。御製賜之曰。卿等各賦一詩。以述今日之樂。觀奏詩。上覽大喜。三年。轉太常卿。七月。命改定太廟祝文。稱孝子皇帝某。凡遣太子行禮。稱長子某。著爲令。是月。陞侍講學士。十二月辛酉。編集大明志成。以觀爲國子祭酒。宋濂爲司業。四年。廷試進士。爲讀卷官。得吳伯宗。開科之始。得人最盛。九月。坐考祀孔子禮。不以時奏。謫知龍南縣。濂知安遠縣。未任。卽召還。爲禮部主事。賜燕奉天門。上曰。前日逐卿去。今日與卿飲。何其樂哉。仍命各賦一詩。五年。上召至內庭。諭曰。朕新得蘇州。恐餘孽包毒。朝夕在心。今思其人。惟卿公忠強幹。可爲朕一守。觀頓首受命。蒞事懲陳甯苛政。鋤暴樹良。寬而且肅。敬老恤民。闢宣聖廟庭。舉鄉飲酒禮。聘郡賢士周南老王行徐用誠教授。貢穎之。定儀節。高啓王彝張羽闡文學。郡多耆耄。崑山周壽誼年百有十歲。吳縣楊茂年九十三。林文友年九十。二皆延至之。禮成。彬彬可觀。壽誼還。躬餞諸郊。再拜送之。觀者如堵。時戎事倥偬。百物彫耗。禮文衰落。乃

能力挽躬行。風教勃興。課爲天下最。上嘉之。陞四川參政。蘇父老願留。仍命觀還郡。七年。觀以舊治爲士誠竊據。且郡多水患。乃修府浚河。以壯士觀。資民利。御史張度誣其與既滅之基。而高啓爲上。梁文俱獲罪見殺。既而上悔之。命所在致祭。皇太子諸王哀賻有加。歸瘞於蒲圻燈窩山。觀高明端重。學博詞贍。與宋景濂蘇伯衡相上下。其所履任。率有成績。事至不擇利害爲之。所著蒲山枚唱集。人咸稱之。

王宗顯。烏江人。少業儒。博涉經史。元季避亂。僑居嚴州。戊戌。胡大海克嚴州。得宗顯禮遇。及大海克蘭谿。進攻婺州不克。回蘭谿築城守之。留幕下。是冬太祖親征婺。召見。上曰。爾與我同鄉。正濟所用。命潛至婺。城察聽事體。其語甚密。至婺。察得城虛實。歸以告。上甚喜。曰。我得婺州。令汝作知府。進攻首敗石抹宜孫。所遣援兵。次日城猶未下。樞密院同僉甯安與守將帖木烈思不和。果如宗顯所言。夜遣都事李相繩城。詣上請降。開東門納兵。如約入城。遂克之。置分省等衙門。改婺州爲甯越府。以宗顯知府事。於是開郡學。延儒士葉儀。宋濂爲五經師。戴良爲學正。吳沈徐原等爲訓導。時喪亂之餘。學校久廢。至是始開。絃誦之聲。無不忻悅。未幾卒。上遣使祭之。

王興宗者。江浦隸也。拔知縣事。李善長李文忠皆諫。上曰。興宗從我有日。勤廉而斷。能儒法。吏莫或先也。秩滿。陞南昌府通判。嵩州知州。僉院任亮集民爲軍。興宗上奏曰。有元末世。聚則兵。散則民。明興軍民兩分。若皆爲軍。何所徵賦。上曰。善。陞懷慶知府。朝京時。上問養蠶種種官吏。至興宗曰。府主公勤不貪。不須問。還郡中道。使知蘇州。三年。盛有政。民安謐之。陞河南左布政。詣闕辭。上曰。久不見爾。老矣。我鬚亦白。賜

宴鈔撫遣之。

方克勤字去矜甯海人。學宗考亭。研究至忘寢食。喟然曰。爲學必合天人而後可。舍是非學也。元季亂隱山谷中。辟穀採松柏以食。明初被徵。辭。案之急。起家爲濟甯府知府。錫冠帶。寵行。比至官。首爲書一通懸康衢。諭天子愛養元元之意。民卽有不平。聽詣府自言。禁隸卒呵問。引耆耄坐語。訊得失。郡學官缺。聘賢者爲師。廟社各立學。學凡數百區。有傾圮者。撤浮屠氏。或新或葺。所在煥然。學子繫籍者至千人。始有詔民開廢閑田者。聽閱三歲。乃稅。吏徵近功。不俟期。輒斂之。復以田定科。由民益惰且散。克勤奉詔。益勸課田。以增闢。與民約。定簡書。列丁產爲上中下三等。等析爲三。有徵發。視差等書。吏不得並緣爲姦。歲暮轉戎衣於燕。時令役民舟者有誅。他郡以牛車從事。天雨雪。牛僵死於道。民破產十八九。民請以舟僦役。克勤曰。吾知從民便而已。抵法非所憚也。載以舟。行省義之不問。郡城壞。故事役兵築。指揮使橫甚。五六月間。輒聚民萬餘人治之。民不得田。哀號往。卽工。克勤奮曰。民困不救。烏用二千石爲。密聞之中書。卽日詔罷役。先是不雨。祖跣徧禱羣祠。涕泣臥祠下。詰朝大雨。連二歲。凡三禱皆應。皆大熟。五年鄰境蝗。克勤聞卽省愆。輟食。稽首籲天。迨夜聞空中薨薨聲。燭之。乃飛蝗蔽天而過。郡獨有年。民有獄訟。大者笞。治小事。諭遣。不留案牘。庶獄鞫。日省。錄無久淹。文具時。作糜徧食之。每秋成。卽與民期。日輸倉粟。聽民槩斛。不遣吏而稅常先登。江浙二行省。歲運糧百萬詣濟甯。水陸千里。撫如部民。不令有纖毫怨。言之朝。其耗。每徵發。下信符致民。民得并力耕桑。襁負來歸者相望。初赴官。戶僅三萬。稅七萬石餘。三年後。戶增

至六萬。稅十四萬有奇。二州二十縣。家給人足。野無流殍。羊牛雞犬。散被郊坰。如承平之世。諸壇墠。修舉民不知勞。郡故以葦困峙糧。火屢爲災。教民爲陶瓦屋百餘間。申戒火令。編民居爲什伍。遞相救恤。遂不復火。會大師十萬往鎮燕。官吏索糧芻。叢集於前。依序酬決。無不如意。一軍稱能。永嘉侯朱亮祖將舟師北征。水涸舟膠。不可動。勒民夫五千疏河。以軍法申督。克勤夜泣禱於天。天忽大雨。水起數尺而去。其爲政以風俗爲急。德化爲本。郡最煩劇。民孚化久。益無事。終日衣冠坐堂上。召諸吏授詩書法律。性不喜近名。常自誦曰。近名必立威。威必害人。吾不忍爲也。府庭不陳柎械。懸韋鞭撻間。示無刑罰。六歲積最。錫燕賞還郡。上召見獎諭曰。政成當顯用卿。尋爲屬吏程貢所搆誣。詔楊御史廉按。楊與程有舊。恐程坐誣得罪。以用倉中炭葦就逮。民號呼填道。隨行百餘里。數千人。子孝孺上書請以身贖父罪。不報。謫役江浦。會空印事起。又就逮而歿。年五十一。克勤孝友。與人交洞見肝膈。自奉簡素。一布袍數十年不易。日不再肉。每行縣。杯湯不肯受。竟州守因童子進二木瓜。筍而卻之。鄉人爲饒陽令者。以燭鴈侑書。力卻去。而待人最有恩。南冠過郡者。必米醪遺之。不能步者。僦舟車送之。同列以事奪祿。旦夕延共食。會飲醉。投案大詬去。禮待之益甚。及酒解來謝。陽爲不知者。曰。昔之夜吾亦大醉。不識君何謝也。晚益畏慎。晝所爲。夜必白之。天俯仰無愧怍。人皆以爲古體道成德之君子焉。子孝孺。在忠節傳。

胡壽昌。字子祺。以字行。吉水人。幼而好學。同郡吳莘樂愛重之。妻以女。明兵初下吉安。新淦寇猝至。民陷於脅從者千餘人。寇去。總戎者恚將盡殺之。壽昌走謁。言從寇非民所欲。殺之且失人心。皆得免。洪武三

年應詔集京師尙書考最上者十八人壽昌與焉是日太史奏文明之祥上喜曰唐太宗一世文學士十有八人豈若朕得於一日哉皆以爲御史卽臺賜宴數陳時事嘗上言今國家宜徙都關中累數千言未幾朝廷得廣西簡近臣往治上曰前上書胡御史其人達大體可遣授廣西僉事問察民瘼遇罹法者多爲哀矜時尋適爲按察使持法嚴急壽昌獨曰法貴持平卒不爲變每三四覆訊曰是欲其死無憾也融州石刻有元祐黨人碑命碎之三年改知彭州益務修惠政利民灌縣故有都江堰秦李冰所鑿兵興堰壞議修者衆謂伐石鋼鐵費多難成壽昌曰土木可固豈必鐵石哉請之不得固請乃聞於朝從之卽以委焉初議用萬人曰得二千人足矣悉疏決淤塞度所用伐竹爲籠實以沙土又伐木貫籠並緣壑岸江水乃復又修壩口諸堰成都各郡田悉資灌漑民大利之初堰廢井泉隨竭民出負級十數里甚以爲苦堰成井飲亦復教民務學民益知其愛己也莫不聽服居三歲流亡盡歸視初至增數倍收瘞白骨是夕夢人羅列拜堂下者不可勝算庭有枯槐十株復榮三年陞延平知府廳事側有淫祠數爲妖前知府徙舍避焉命毀祠更作室其上居之妖頓熄益修飭學校躬勵士子築祠祀李先生侗期年百廢具舉民皆敬信忽得疾數日猶視事不輟先日有大星墜舍至是復然其日沒於官年四十五郡人罷市奔哭如所親長子直次子廣大學士

王觀字尙賓祥符人性耿介儀度英偉善譚辯長於應對明初鄉試中式入太學洪武十九年授蘇州知府爲政嚴整多所興建發奸摘伏民禫之如神有雕吏錢英累構陷長官莫敢誰何廉得實以計縛至庭

立捶殺之。由是境內奸豪屏迹。人皆稱快。事聞。上嘉歎。遣行人白思中齎敕。褒之。勞以酒。歲大祲。民逋無所出。部使者督之甚急。爲延諸富室。集郡衙飲食之。使各量出貲。代貧困者之逋。衆驩然如指。逋乃得完。朝廷嘉其能。榜諭天下。勵怠政者。姑蘇賢守。前有李亨魏觀。後有姚善況鍾。皆惠政及民。稱姑蘇五太守。迄今郡人思之。並祀學宮。

郎敏。濟源人。洪武七年。以國子監生。選入武英堂紀事。授御史。九年。陞饒州知府。爲治廉明。有惠愛。樂平縣民詣闕。訴邑大姓五十餘家謀逆。詔都指揮司潘率兵往捕。兵至饒。敏驚曰。民素淳朴。未必有此。吾爲郡守。不可使民死無辜。請先往察之。既至。見民皆耕牧如常。時廉得告者。乃無賴子。素以假貸不得。怨諸大姓。故重誣。冀獲賞。敏還白。潘初不之信。自往察視。一如其言。於是各以家長至京。辯其誣。詔釋諸大家。誅妄言者。

蘇恭讓。玉田人。洪武十三年。舉聰明正直。任漢陽知府。恭讓弟慎密。爲治簡而明。嚴而不苛。刑而民不怨。密近省司。凡徭役科徵之事。獨倍他郡。故政繁而民困。前守多阿奉取容。無敢言者。恭讓每遇重役。必詣上官申理。事多減省。民賴以安。先是有趙庭蘭者。徐州人。知漢陽縣。愛民。凡有不便者。慨然以身自任。朝廷嘗遣使下縣。取陳氏散卒。他縣率多以民丁應數。規免己責。庭蘭獨爲民辯明。以故民得不擾。十餘年間。漢陽民言郡守則稱蘇恭讓。言縣令則稱趙庭蘭云。

羅性。字子理。秦和人。少孤貧。自奮於學。博記精思。元季兵亂。走避巖谷。崎嶇困窮。未嘗廢書。性耿介。一言

一行必端。不與俗人接。雖至戚。或涉邪行。輒絕之。然口未嘗言。陳海桑先生嘗稱性有冰玉之操。洪武初。詔郡縣立學。御史劉昭先聘性。及楊子淵。鄧彥高三人爲之師。時號楊羅鄧。四年中鄉試。明年敕免會試。授德安同知。先有寇號糟李萬戶者。以衆入府治。殺郡守。劫庫藏。官捕其衆。悉就戮。獨糟李逸去。久不獲。詔捕益急。蹤跡逮繫數百人。諸邑騷然。性初下車。民有負一囊詣府言糟李實死。此其遺骸也。問死幾何時。曰一歲。曰始死時曷爲不言。又驗其鬚髮皆在。而皓然白也。曰糟李年未四十。此安得是也。笞而逐之。悉出所繫諭之。與爲期十日。得糟李卽釋爲良民。衆叩頭願盡力。乃悉縱之。七日縛糟李至庭下。前繫者皆勞而遣之。方賦民鐵造軍器。時兵亂初定。猝無所辦。居第後治蔬圃。鏗然有聲。得窖鐵萬餘斤。民爭趨求售。曰固天以濟民。豈爲我也。悉以代民充賦。餘者皆入官庫。爲政以寬恕爲本。惟賊吏無所假。吏劉仁盜官麥。逮治逃去。誣訴於僉事朱逢吉。將就鞫。參政陶凱吳雲曰。十七府之賢守。裁三人耳。潯州馬河陽縣安可枉其事得白。仁始正罪。在郡四年。闕知府。皆性總之。秩滿詣京師。坐擅用棗木染軍衣。爲陳甯所劾。謫戍西安。旣至。達官貴人皆敬禮之。而安於處賤。未嘗一毫干人。諸生從之受經。後多大成者。是時四方老師碩儒。在西安者數十人。吳中鄒奕獨曰。合吾輩所讀書。庶幾羅先生之半。文章切實深厚。詩宗漢魏。近體宗盛唐。書法鍾元常。年七十餘卒。楊士奇少孤。依以居。受其教育焉。

楊卓。字自立。一字子淵。南昌人。父觀山。篤行碩儒。以書詩春秋教授學者。卓傳家學。博記精思。於書無所不通。洪武庚戌。舉於鄉第七人。明年會試第三。廷對二甲第一。授吏部主事。踰年陞廣東行省員外郎。坐

累謫鳳陽屯種。復起禮部主事。數月改杭州府通判。援例去官。卓儀度魁偉整肅。家貧。清修苦志。確不可拔。而爲政行恕。有豈弟君子之風。在廣東時。有周參政者。苛刻之不可近。兵卒二十人入山伐木。兩卒山下。邂逅婦人。獨行曳入道旁林中。欲亂之。婦人怒罵。卽共殺之。婦家蹤蹟得屍。盡疑二十人者所殺。訴諸行省。悉捕至。周親鞠之。竟夕拷掠。皆引服。屬卓署府閱案。曰。殺一婦人。安用二十卒。往白周。周然曰。員外欲縱殺人賊乎。悉付鞠。列庭下。視其色。聽其言。指兩卒語曰。殺人者汝也。卽吐實伏罪。周始歎服。餘杭民兄弟爭田。各有私親持說主之。累歲不決。卓至。悉屏私親。獨召兄弟兩人。曉譬深切。皆感悟相讓。卒歸於弟。歷官皆繁劇。躬蒞勤敏。未嘗有滯事。寅出酉歸。輒閉戶乘燭讀書。率夜盡二鼓。罷官家居。號其室曰退庵。杜門。惟經籍研覃。足蹟動澁。句不出戶。嚴交友。不苟許可。獨與羅性鄧尙契合甚篤。世稱楊羅鄧。應進士舉。相與約曰。有如吾徒。繼今有一行非其學。將何顏復見。後羅爲德安府同知。鄧爲四川鹽運經歷。冰蘖之操。皆無敢犯者。海桑陳先生嘗稱卓冰清玉潔之行。卒年四十九。爲文章必欲繼古作者。書法鍾王。有集若干卷。

吳履。字德基。蘭谿人。父景奎業儒。鄉人師尊之。酷好爲詩。游山澤間。方苦吟而雨至。濡其衣弗知也。履少從聞人夢吉學春秋。俊邁磊落。長通諸史。文有奇氣。最好書。尤工行草。元季教授鄉里。明兵取婺。李曹公爲浙東行省左丞。聘主郡學。數與語。知其才。辟爲掾。稱疾辭。有司舉於朝。爲南康丞。俗悍。其民以爲丞儒者易之。履默默自如。數月。皆周知其情僞。有所發擿。一縣驚伏。乃更以寬化之。視民如子。民有訴。召使前

與語弗加咄叱。民或援丞裾相爾汝。弗責也。有微調。召其大姓坐廳下。好言誘之。聽人人自說便否。由是民愛丞如父。而吏卒不能爲奸。民王瓊輝仇里豪羅玉成。執其家人笞辱之。玉成兄子王汝怒。集少年千餘人。圍王氏。奪家人歸。且縛瓊輝連道籬。至家復解衣撻之。殆死乃釋去。瓊輝兄弟五人庭訴。辭指出血。誓與羅氏俱死。履念成獄。當連千餘人。勢不便。乃召瓊輝語曰。獨羅氏圍爾家耶。對曰。千餘人。曰。千餘人皆辱爾耶。曰。數人爾。曰。汝憾數人。而累千餘人可乎。且衆怒不可犯。法固止於毆。不得過也。倘不願死。盡殺爾家而就逮。雖有司正法。汝悔何及。瓊輝久之曰。吾恨羅氏欲快吾憤爾。惟明公所命。乃捕操籬者四人。於瓊輝前杖數十。血流至踵。命羅氏對瓊輝引罪拜之。事遂止。兩家叩頭曰。公弭我事。德甚弘。咸願有所上獻。皆卻去。縣令周以中初至。召民轉輸至郡。不得躬至。鄉召之一民逸去。追及。命卒笞不肯服。走入山。罵令曰。官當至縣。何至此爲。令怒。吏卒因以語勸令。欲誣一鄉民圖賄。獲六七人下獄。扁鑄甚嚴。卒再往捕未返。鄉民大駭。履計民無罪。自出巡獄。叱卒釋之。卒以他辭解。履撻碎獄門。遣之曰。若無罪。還告父兄無恐。乃往告令。令怒曰。民無道。衆辱我。君乃釋之。何輕我至是。履曰。犯使君者。一匹夫耳。其鄉人何罪。且法乃天子法。豈使君解怒具乎。令意慙。卽以獄付之。始得解。其俗好淫祀。有蛇出戶限。民怪之。以爲神。至奔走祠祀。履罪神巫。投其主江中。乃熄。爲丞六年。陞知長沙之安化。去三月。吏用法急。南康民作亂。命師討平之。死甚衆。其民泣曰。我吳君在。寧有此禍乎。安化鄰古三苗。其士豪多糾民爲兵。旣盡降。萬夫長易俊原獨恃驍勇。與麾下數十人遁入山谷。保險自固。郡邑患苦之。江陰侯吳良承詔求餘寇。移檄旁縣。

兵且集。召履計事。履曰：易氏未有反狀，奈何激使生變乎？不若先以計致之。果反，用兵未晚也。侯曰：令言是。吾且從之。履乃屏吏卒，步至山谷中，抵俊原家。家空。一老人出對客。履曰：易俊原出見江陰侯，則無事矣。今不出，大兵且至。一縣民皆爲蓋粉，是殺一縣父兄弟者。易俊原，非縣令也。老人曰：俊原必出。惟明府哀憐，履得情故寬之。曰：俊原或未必肯來，得其子及麾下三四人先往，可免矣。明日其子及麾下至，如履言。兵止不發。旣而盡致其麾下。惟俊原一人度勢孤，乃招之曰：君侯願與俊原相見，俊原喜，詣軍門請見。遂縛送京師。事平民安堵無擾。江陰侯檄取故兵之爲農者，民咸自疑，驚奔相告，勢甚危。乃屬耆老諭民曰：侯所取者兵，民無與也。籍其願爲兵者數人而止。長沙郡令造戎衣，力爭曰：吾邑民貧而俗暴，恩之且恐其叛去，安可責以事功？如他縣乎？令格不奉命。其罪小，奉命而致亂，其禍大。郡從之。凡有徵徭，皆不使與。越三歲，遷知濰州。民畜官驢，萊守核其孳息狀，與籍不合。曰：驢當歲產駒，今幾歲宜得幾駒，乃何少也？欲責欺罔罪而徵其償。諸縣皆已勒民買驢，履獨戒民勿償。守怒問狀。曰：民實不欺罔，烏可責償？國家富極海內，爲吏者宜宣布德澤，除民疾苦。寧少數匹驢耶？守語塞。井上不便者數事，守不敢復言。井諸縣已償者皆罷之。山東民願以羊牛代秋稅。官從其言。履與民計羊牛後有死瘠患，不如納粟便。獨收民粟。他縣牛羊送陝西，民驅走二千里，皆破家。濰獨得完。他日受命，役千人，部送鄰縣牛。履列其不可。曰：有牛家送牛，雖勞不敢怨，使人代之。脫道中牛死，誰當代償耶？力爭不肯往。上官怒，居之自如。久乃得解。先後爲吏十五年，不求威名，以愛民爲先。尤重獄事。凡有訟而直之，解釋其怒乃已。不忍置民於獄。獄爲之空。

凡上官教下所需於民不務速辦稍緩其期約故物價不踴民視他所費恆減十二三民樂其簡易更感激爭先居二年會改濰爲縣召還濰民遮門抱其足泣拜送之至京謝事歸

蘭芳夏縣人倜儻有節概讀書通古今重義氣洪武中舉孝廉授刑部員外郎陞郎中太宗卽位陞吉安知府先是金華朱仲智知吉安寬厚廉潔剷革吏弊禮賢愛民民甚戴之已召改重慶民更思慕歎息曰賢侯去誰能繼者已而芳至持重得大體明習吏事間有告訐者數語立決吏無所容其姦宋季有妄言銀冶常開坐誣抵罪至是無賴子踵其說聞於朝遣官押其人覆視父老羣訴其罔芳惻然顧告者問之噤不能對父老又言其人罪惡積累皆應坐死益憮懼懼芳曰毋恐罪皆赦前今獨問銀冶有無耳告者卽吐實言素貧妄意禍鄉人爲此死罪死罪太守何以生之芳乃草奏大意謂告嘗聞故老言宋時說銀冶事而未及詳輒率意上陳今詢邑人長老皆云素未嘗有卽不實甘受鐵鎖言人人同謹以實聞同官或不肯署芳曰有罪請獨任卽自署奏同官不得已亦強署上得奏曰吾固意奸民之妄也遂罷其事然以告者出於率意亦不罪芳自奉儉約日常蔬食被服無紈綺事母極孝母亦善教凡芳日所行事夕則命陳於前有未善必讓之芳謹受教不違後爲工部主事浚河南河渠凡所經郡縣民情吏治有未便者輒疏以聞陞本部侍郎疾卒吉安自芳去其民稱賢守必曰朱蘭朱蘭云

顧光遠嘉定人元末辟爲京口掾太祖下江南京口首納款光遠預有力從入金陵監大軍倉支納三年授江西行省理問從征陳友諒督饋運明年平陳氏擢知蒲陽州招附懷來鑿革宿弊民賴以息越二年

改知秦和州。前守吳去疾有能名。以民好訟。告於光遠。憮然曰。民有冤抑。守弗爲之理。民將安訴。頃之訟者雨集。乃自爲書榜聯。紙長數丈。誨諭諄切。民爭來觀。觀已去者十二。又俾凡訟者居。誰門思三日。然後來訴。思不三日。去者過半。乃擇吏純謹者一人。實簡受詞。訟而句稽其始末。民誠負冤也。輒爲疏理。願悔自止者聽。未兩月。民不復訟。吏亦畏其精敏。無敢舞文病民。時禁民私蓄兵器。虎患不能制。訴於光遠。爲草檄告之神。虎一夕遁去。州以大治。祖母憂。赴闕辭。命留翰林。議編大明律。律成。復命監造天下均工圖籍。已而還服喪。未幾起授廣東行省郎中。二年。召拜吳王府副相。留京師。詿誤逮繫。疾卒。臨卒爲詩壁間。道其生平。有白髮歸朝之歎。聞者悲之。性澹泊。不尙奢靡。所居廡宇。室無長物。惟藝蔬數畦。衣食取具而已。至於治民。事無巨細。必盡其心。所至號令既明。而賞罰必信。遠爾翕然。賦詩氣豪才贍。而律調渾厚。尤工七言。晚自號蔗境翁。詩數卷。遂以題之。

歐陽銘。字日新。秦和人。家貧力學。嘗遊清節書院。與諸儒講論切磋。由是博通經史。元末兵亂。教授坐中。太祖徵賢才。薦赴京。丙午授江都縣丞。兵荒之餘。民死徙十七八。銘至。移文旁近。凡江都民轉徙者。皆還本土。勞來安集。出於至誠。流移四歸。邑漸完復。民有繼母告不孝者。察其民不能養。委曲開諭。母子泣謝而去。卒以慈孝稱。嘗治廡後隙地。得白金百兩。曰。此天欲以紓民力也。會部符徵漆。出以市之。政暇卽進諸生講先王之道。或行田間視耕穫。賞勤戒惰。一縣戴如父母。甫二歲。陞臨淄知縣。治一年。民稍給足。銘曰。兵荒所以相仍者。由民不知教。神無所託也。旣興學校。築山川社稷壇。與民從事於詩書俎豆之間。皆

欣然從之。初來臨淄時，常將軍過焉，兵十餘人，入民家取酒不得，相毆擊，讓動一市。銘呵止不罷，因笞而遣之。卽往見將軍，白其事。軍校有先告者，且曰：「縣令大罵將軍，既至，詰曰：『汝何敢爾？』」銘曰：「軍固王師，民亦王民也。民被毆擊，幾死，軍士顧不可笞耶？」某雖不賢，亦知名分，其敢他有言，常意解。責軍士而謝銘。一境晏然，無敢譁者。未幾，徐大將軍至，軍校有知銘者，曰：「是敢抗常公之健吏也。」因相戒勿犯。銘迎送有禮，自大將軍以下，皆賢銘所爲。臨淄古大縣，俗喜夸詐，輕亂益難治。銘廉靜平恕，上下化服。卽鄰縣亦開以濯濯。東土之民，無不樂業。洪武四年，入覲，卒。丰儀秀整，天性寬厚，樂易有仁人長者風。平生不妄交遊，非儒紳君子不接。其仕與處，言行多可紀者。

陳灌，字同叔，廬陵人。幼孤，事母孝，讀書穎悟絕人。元末，棄書學兵法。環所居皆良田，改築場圃樹木，人莫測其意。數年，樹成列，盜大起，募義勇屯其中，部署精明，人人效用。一鄉賴以保障。陳友諒據江西，其將熊天瑞來招，俱至九江。知陳氏必敗，去之。太祖在武昌，因羅復仁謁見，陳定亂安民之策，悉見聽納。擢湖廣行省左右司員外郎，累遷大都督府經歷。贊軍事，從大將軍北征，既克秦州，留督築城，旬日工成。賞勞，總制真州軍事。丙午，除甯國知府。灌凝峻清介，爲治務寬厚，興教化，是時習亂，人久不識俎豆，首修先聖廟，建學立師，推擇秀民教之。問民所疾苦，禁兼并，覈欺隱，所創戶帖，命布之天下。宣城田濱江者，歲患水，加築隄防，伐石作水門，以時蓄洩。諸邑率虛籍民租，官廩懸罄，人有發其事者，衆皆洶懼。念此特循舊習耳，非始作奸也。颺言當以某時行視邑廩，俾得豫爲計。及期，公帑皆盈，有劫麥舟坐死者四十八人。覆案曰：

此鄉民因舟漂抵岸。挺引取之。非有謀心。安得盡論死。乃坐先取一人。餘從減。得代去。代者山東鞠騰霄。素負才目。無前人及觀灌設施。不覺歎曰。第謹守當勿失耳。其年奉命督軍餉。詣北平。撫恤有方。民皆趨事。還朝辭歸省。洪武四年復召至京。未命卒。

錢本中。武進人。讀書習法律。洪武中以人才舉。歷知故城元城縣。有聲。改知吉水。豪民宿吏。素爲民患。苦者。捕其魁。徙遠方。邑中肅然。新壇遺學舍。召諸生。躬教之。旌別勸率。政務清簡。不任刑。嘗有盜聚山谷間。時出掠。郡守欲以兵殲之。本中單騎詣賊壘。諭禍福。咸相率縛首。賊自歸。會赦免。本中勵清操。門無私謁。妻子布衣蔬食。纔足朝夕。以誑誤罷官。父老奔走號泣留。不獲。郡人學士胡廣力保之。得復官。民間本中且復來。空閭井。迎拜如見父母。未幾以疾卒。民哀慕。留葬吉水。爭爲負土營墓云。

丁積。字彥誠。關西人。成化中知廣東新會縣。新會廣巨邑。號難治。聞邑中有理學陳真晟者。則大喜曰。吾得師矣。既至。事以師禮。月分其所得俸爲脩給。陳謝不受。有所聞。行之惟恐後。其爲政以風化爲本。而主於愛利。始下車。大闡弟梁長責民逋過倍。復訴之積。廉得其情。追其券焚之。由是權豪屏迹。申洪武禮制。參以文公四禮儀爲書。擇邑老成人主之。月朔進問於庭。優禮其能者。嚴賭博竊盜之禁。榜門示恥。良家子游惰不作業者。聚廡下。使日誦小學書。親爲講解。冀變化其惰習。春秋祠事。肅然將事。如神陟降。邑節義祠墓。各置田立守祠祀焉。異時戶賦均平。錢悉貯官。復令出私錢供用。名當月錢。歲單丁小戶亦不下五六千。積苦意節省。諸上下往來非經之餽。一切杜絕。甲首納均平錢畢。自歸田。弛然無復事。陳真晟爲

賦樂歲詩曰。長官願似丁明府。甲首終年不到衙。蓋其實也。歲大旱。春盡種未入土。積憂之曰。此令責也。於名山頂築壇以祈。晨夕齋沐。伏壇下禱。因得疾。疾既甚。猶日究心民事。遂卒。官民相與弔哭於途。歸德里有一嫗。夜哭而哀。或問之曰。來年當甲首。丁父死。吾何以聊生。其得民如此。



明書卷一百三十九

列傳六

循良傳二

徐成字子正號東濱以尙書領潮薦正德辛未登進士俊才穎發與人交不詭於俗居官不事儼察務持大體人樂其寬初守沔陽沔屬兵燹後且值陵谷懷襄民嗷嗷待殍成務在撫輯惠養區畫中理民多全活初沔地宜黍鮮植嘉穀成爲之陳厥疆畝引渠灌泉略倣吳地播種之法與民習之民享其利居三歲入覲屬吏託餽贖名盛貨帛以進率謝卻之廉譽益彰隨陟南兵部郎去民思之肖像爲生祠兵尙書喬宇雅知成會武宗南巡成凡事豫戒備無不周宇曰能助予者成也銓曹聞其賢擢守襄陽爲政一以平易近民爲本民以是益親附之歲旱躬率父老恪修雲間盛暑不輟而甘澍應妖民感衆禍叵測成計磔渠魁脅從不問悉解散其牧襄一如牧沔故襄人戴之猶沔人也廖道南作楚紀列成於登績傳其時以餘姚孫衍華亭張弘與成先後同官均有懿政目爲三高嘉靖丙戌入覲忌者阻之罷歸日事編纂有國朝名臣錄澤山野錄詩有東濱三稿平生天性孝友宅心坦蕩事親孝田宅不侈常祿之羨悉畀仲兄節奉怡二親不制其出入無毫髮留爲篋篋計後家事日落寒暑製衣及衾溫涼適體有疾奉美飲食至老

不衰。以故稱孝友者無間言。嘗築園城闕曰餘春。每遇勝日。邀兄弟宗黨。攜齒榼。棹於禪扉竹徑。觴咏陶然也。卒年八十有八。

徐九經。貴溪人。舉進士。初爲句容令。歷九載。治行爲天下第一。其始至。羸服坐一笱輿。延見諸侯人。恂恂無所詰難。諸侯人出相語。輿中人誠長者。第吾邑得無其黠豪而治乎。居三日。一吏出空牒而用印內袖中。九經搜得之。詰其狀。羣吏皆叩首曰。爲一某親故某事補牒耳。非有賄也。九經曰。吾不治賄。治竊印者。卒坐之法。已曉戒寮佐。毋得擅攬訟。及需賦民錢。而捕按其用事胥吏。於是人人惴恐。於法不敢有所舞。每受訟牒。必命其人與親識。偕往從和處。其不卽和處。而諭使之心服。間一杖之。數不過十。毋煩置獄。然至於武斷并奸輩。不盡法不止也。諸所催科受役。預爲期。過期不至者。俾里三老逮而笞責之。終不遣一隸卒下鄉落。隸卒列庭下如木偶。亡所資衣食。其黠者多自引去。久之。益習民貧富。與道里近遠。諸顧役之輕重。必以資其受顧而役者。必以便。卽田叟村稚。得用身應。毋使宿猾奪之。諸賦長收。賦於各區。故未有定額。司算者得上下其手。悉覈之。著畫一於冊。以示各賦區。邑故有賂賦米四百石。覈其欺隱者。應之賦得所歸。不爲累。他運解費有輕重。官故量資之。黠豪趨輕而責重。不相常久矣。九經已密得其概要。諸豪。詛之神而俾劑之。既定爲圖。使拈各以分去。毋恨色。居恆謂卽天子布大惠。安能人人賜租。獨役第在我曹。酌緩急而已。悉革一切浮浪費。里正絰籍邑耳。足跡不使至邑門。亦不使至民門戶。以爲恆邑最衝。輪蹄輻輳。取資於民不可計。九經減舊額。夫三之二。馬三之一。無弗給者。士大夫過從。所餽不過算器食。

不以貴重故加。有廢圃。廣輪數十畝。躬率吏卒治蕪穢。藝蔬果。鑿池種魚。間養牧雞豕。客過宴飲。取而用之。客更欣然爲醉飽去。邑東西車馬所踐。塵土盈積可三尺許。遇雨雪。泥濘至沒股。顛仆相尾。乃積顯役之羨。斲石以道之。行旅無所苦。歲大饑。民至屑榆而食。而上方祠釐行宮。多遣中貴人方士。醮神三茅山。三茅。九經所治也。歎詫曰。吾民困至此。而忍更驅之役。或謂應天屬邑。八是不可分任乎哉。曰。救災恤鄰。古道也。鄰民卽吾民。吾何忍紆此而困彼。搜故牘商引之金。宿於府者。請之上司。以供費。躬爲經畫。諸使者。慚其清嚴。竟竣事不復有所干。民忘其役。然歲饑益甚。穀價踊貴。丁都御史發庾米數百石。使平價而糶。取其直於官。九經曰。今流孳載道。數百石。幾何。而徒以資糶者。彼糶者皆豪也。於是從時價糶其半。還直於官。而取餘米煮粥。召三老受而分食。其餓者。餓者起。輒按倉穀餘尚多。使稱力分負以去。其山谷間稍遠者。則就傍富人穀。而取償於倉。居平持法寬。而至是獨改峻。有十七人禦貨而違穀者。捕得立置之法。曰。是非饑民。乃夙盜。以饑文其惡者。咸惴惴相戒。道不拾遺。九經於單赤無所不極意。而馭豪乃特嚴。然不敢修怨。視諸博士弟子。猶子弟也。歲時課經術。論經文義。饋粥膏油之費不乏。而其鄙無恥者。懲之。又方於事上。幾用此得罪。時應天尹汰邑。庾故常有席。富人謀之。尹欲以席市。謝曰。賦長已儲之矣。尹有所任。直時胥下邑。索吏賄不得。酌而詬諸庭。九經縛而笞之。尹怒曰。是不有我也。他日又以永康侯之幣。徵教讀呂某。九經報謂呂某者。蓋賈人子。不習書。不足以辱侯聘。尹逾怒。而會丁都御史。又他有所下。治荒者闕略不甚稱。九經以意格之。且不平價糶也。而諸生見懲者。中以蜚語。丁甚見辭色。三日。父老

數千人擁而廷見。稱九經賢。泣涕數行下。曰。微徐令。吾曹有溝壑而已。丁意稍動。下階。令不宜若等。故且爲移之。胡謬稱也。衆遂大哭。曰。必移令。請死於此。因極敍九經救荒諸奇策。與居恆善狀。且詆無恥諸生。謂彼不自知罪。以小懲而中民父母。民誓不與俱生。丁意大解。入都以語尹。尹曰。此強項吏。好以抗上自爲名。移之便。會丁入內臺。有所舉刺。而九經在刺中。營及操事。下吏部。尙書熊浹怫然曰。吾故聞句容令賢。不減古人。今不以舉而刺耶。考功郎邦彥具前後薦劾語報尙書。乃論譎丁於外。而特留九經。時謂都御史力不能勝一縣令也。九經旣以廉儉著聲。其下化之。民有華冠侈服者。出遇必責曰。何以見令君。爲具稍過侈。必相戒。令君知之得無不可乎。積九載。始遷工部主事。將治行而民強留之。彌月不得發。爭延請過舍。治觴炙。兒稚挽衣而泣。曰。公毋去我。度不可留。其長者曰。公幸惠訓我。使我奉之如奉公。九經亦揮淚曰。無以訓而曹。唯儉與勤及忍耳。儉則不費。勤則不墮。忍則不爭。保身與家之道也。生平不嗜肉食。唯噉菜佐脫粟。嘗圖一菜於堂。曰。古不云乎。民不可有此色。士不可無此味。至是父老刻九經所畫菜。而書勤儉忍於上。曰。徐公三字經也。家肖像而尸祝之。已又立祠祀。祠四五所。而其最者在茅山。謂其息民於荒獨。茅山之役巨也。在繕部議當築外城。而城址有犯陸炳圃者。炳挾上寵橫甚。人謂避之便。對曰。強寇未滅。何以家爲。孰謂陸將軍不如霍將軍乎。陸噤不敢發。圃分爲三。遷員外郎。督清源輓廠。舟北者毋論。勢人達官。必使附阿之。曰。此法也。遷都水郎中。治張秋諸漕河道。故通漕者與通鹽者。近而不相接。以故漕水溢。則汎濫爲田。患九經議築滅水橋於沙灣。使相接。漕水溢則有所通而不侵田。少則有所限而

不至涸工成田漕賴焉。時侍臣趙文華督大軍平東南倭。所過張甚。河渠郎逐送。恆出境外。幣餼充溢。猶不得一款色。而九經第遣一介齎牒謁之。云郎有事沙灣。不敢離也。文華媿罵。投牒於地。而九經以資重。得知高州府。或謂高雖遠。雄郡也。若公稱名令久。獨不能名二千石乎。答曰。吾老矣。安能自苦以徼身外物。陳牒於冢宰。謝不之任。臥貴溪山中。二十有二年。非禮會不入官府。守令以時問政。言之無所諱。於吏皆弊尤切。聽者爲縮舌。族貧立義田。周之立義學。教之自奉儉。不以老益。益衣絕。泉帛。然用施予。故窮年八十五。微恙拱手曰。茅山來迎我。家人馳之茅山祠。告於山之神。而已瞑矣。守祠道士夜夢九經朱衣從數騎。啓扉而入。天性孝友。重節義。不侵然諾。彊直自遂。家與少師夏言同里。未曾造其門。及夏言再相。被逮。九經獨使一老蒼頭侍行。唯謹。言從檻車中問而得之。爲感泣。故御史楊昌工部郎劉魁給事周怡沈東先後以直諫下緹騎獄。九經故不相往來。捐月俸。餼饋而致之。其所爲往往如此。

程燾字文純。建昌人。舉於鄉。授景州學正。裨身範士。務砥礪名節。次及文藝。常塗引重。命主瀛洲書院。遴十八庠弟子員。雋者從講習。聘充浙江考官。所錄稱得人。尙書鄭曉其首選也。丁憂。補曹州。轉松江府教授。松俗習靡。燾力鎮浮誕。崇廉質。謹條約。上禮讓。斥奔競。蹈履繩墨。以身爲諸士先。直指使視學。一生於講。未致頌美。蒙賞倍。方罷。燾惡其諛佞。取賞散諸生。斥責之士習丕變。擢知鹽城縣。鹽城海邑。民竄賦徭多奸避。燾正之。歲旱蝗民饑。燾兩行賑助。有冤獄。論死者十九人。力申雪活之。築隄捍決河。創水次倉。便轉運。凡與民興利去害。竭誠悉力。惟恐後。轉上元縣。在留鞏下。俗雜政殷。勳閭號驚。臺省牽制。燾一意利。

民弗趨避。心誠孚感。輿誦翕然。內璫以事過金陵。所至饕虐。夫廩外無備也。璫怒欲辱之。熾抗陳民艱。璫爲改容。民居近孝陵者。以誤殺苑中獸入死獄。莫爲直。熾白司寇。得末減。諸散荒錢。平市值。酌公費。後咸守以爲法。蓋宰二邑。三入覲。乘一馬。以一馬負冊。以一隸馭馬而已。時尙書霍縉在禮部。風稜矯矯。莫與匹。民爲之語曰。禮部霍縉。天有日上。元程熾。月無雲。蓋以並也。歷南刑主事。郎中。出守鎮遠。鎮遠夷方也。熾勤恤其隱。無鄙薄心。屏私餽。去煩苛。寬樵市。公聽斷。懲暴橫。清驛傳。時供億加意節損。省浮費。十五六。屢決疑獄。毀淫祠。建社學。有點卒妄奏。辯其誣。反坐之。豪民侵貧弱者。訟地四十年未決。斷還之。戍伍有三十年未支糧者。多方給與。叩苗叛。豪猾與私通者。痛鋤禁。擒其酋。蠻僭不敢犯官。九年轉陝西苑馬寺少卿。馬政弊已久。熾竭力振盪。至不下堂。五日夜。稽侵地。復收軍簿。覈丁馬。除補疾。作致仕去。熾入官四十年。初終一德。廉勤端惠。所至樹風教。白建節婦孝子忠烈祠。毀妖廟。以其址葬野死者。其折獄不務苛訊。要以理屈其心。或書聯語韻語於牆。闢訟者自愧退。或相視泣解。所去必有頌聲。或勒思於碑。或尸祝於家。或祀名宦祠。歸家無餘貲。自奉儉節。旣屬疾。獨倡建宗祠。定祭儀。增墓田。修譜乘。諸先產盡讓其伯氏。居室與昆季共。獨所宿樓。兄子又舉其半。嚮之作。離自障。爲詩有風雨半間樓。蓋紀實云。唐佩。丹徒人。競勵名檢。平生以忠孝氣節自許。爲諸生時。父被獄。上書請自代。弗得。乃藉草地寢。夏不帷。冬不被。夜不解衣。竟父獄乃止。及爲州縣。再轉官數千里。未嘗一日攜妻子。獨與一二老蒼頭相朝夕。飯羹豆藉茅以居。初令永豐。繼知山東武定州。皆悍訟。佩豈弟。務掩人疵瑕。以古教化先之。不忍以獄朴

苛細爲能。始若甚迂闊。久之真誠溢出。吏民至不忍欺給。念以爲永豐健訟。起於錐刀競利。與靡侈不節相高。於是躬率以儉約。進父老爲陳務本齋。用周恤相保之義。俗尙鬼。有嶽神祠。居人奔走雜男女。香火無空日。又喜爲俳優。使民淫於欲而置於財。侃曰。此大蠹也。痛革之。立木牌二。立於庭。左曰從刑。右曰從化。令曰。從理者左。欲和者右。久之民多立於右。以求解。言或當於理。雖賤吏必改容謝。爲立行之。無理雖權貴人。百方請說。終無所假借。以是告訐之俗爲之一變。在武定以鎮靜撫綏愛人。時清軍伍一州當解者三千餘人。并婦若解。長且萬二千人。侃曰。武定戶纔三萬人。是空州半矣。有議欲濬州境。徒駭河者。又力言不宜浚民脂膏。而填巨壑。皆得寢。章聖皇太后梓宮葬承天。道山東德州。上官哀民間財甚鉅。以給行。猶恐不給。侃曰。以半往足矣。至則舁一空棺旁舍中。諸內閣牌校。奴叱諸大吏。鞭撻州縣官。宣言供張不辦者死。欲以恐嚇得賄。同事者並逃去。侃獨不去。急乃謂之曰。吾與若詣銀所納焉。乃引之旁舍中。指棺示之曰。吾已辦死來矣。賄不可得也。於是諸閣愕眙相視。莫能難。而事辦。諸逃者皆被罪。而侃乃受旌。所居官率空囊以歸。及覲考滿入京師。又率空囊行。以是著節。亦以是淹於官。稍遷刑部主事。以執法得情。著稱病卒。貧不能殮。部尙書而下。及諸僚賻之錢。乃棺而歸其家。

龐嵩字振卿。嘉靖甲辰由鄉舉授應天通判。晉治中。先後凡八年。府尹缺。屢攝府事。初至大旱。嵩督賑。委悉霑洽。公粟既竭。貸之鄉先生富民。誠意懇惻。人多應者。所全活六七萬人。已而獨其積逋。於以勞來拊循之所。由以復業者十萬餘人。所部民苦重役。乃取公費議寬之。令甲首輸糧。免其置辦。付之印簿。以防

侵漁清寄居客戶以助夫役移僻驛馬匹以避銜塗數冒濫優免及詭稱官戶寄莊戶女戶神帛堂匠戶以實丁口八邑皆蒙惠焉時江甯葛仙永豐二鄉數有水患居民止餘七戶歲課不能辦嵩爲築隄闢萊得田三千六百畝立惠民莊四召貧民佃之流移盡還而全邑訖無代輸之苦百姓賴之折獄無細大必得其情有張元二者以追逃婦不反嵩躬至婦所見室畔縣厓矗立林木颯然心動行數十武而前伴執村老阿問之對曰我但見尸遂得元二被殺狀又高瀆傭人亡其妻妻家以爲死執之嵩偵知鄰有畫工以其妻歸且遜也計致畫工奪還之聞者以爲神咸曉王湧舉人彭若龍占良人妻殺人并論死居間者萬方拒不聽嵩饒吏幹在事拮据百廢具舉尤加意造士暇則進諸生課之自捐俸以資賞給歷寒暑無倦淹通五經爲諸生發疑扶異無不虛往實歸者故一時文行之士成就興起者爲多天性嚴明嶄嶄不可犯以是施政持身見義勇爲獨信一力雖賁勇不能奪也單騎行縣所至肅然一蔬片楮不以煩民而惠愛百姓委曲周詳人目爲龐青天云府在六年京察例而復與觀察嵩謂非禮上疏請止之至今著爲功令晉南刑部郎中曲靖軍民府知府所在士民銜德既去而追思之爲祠祀俎豆不絕

周思兼字叔夜華亭人生有異質其祖禋尉典國思兼方五歲從尉所視獄從旁輒能解曲直歲時知故有問遺尉者循故事或未卻乃抗言曰此不當受祖奇之孩提知學葩藻流聞時人以爲機雲復出才氣橫溢下筆每千言不休爲古詩歌詹事陸深見之謂其子曰吾年二十發解時不辦作此語爾善事之嘉靖癸卯舉於鄉明年成進士選知山東平度州州故凋疲歲屢侵守皆以不善去思兼至亟下令曰救荒

莫若省事。凡諸政令不便者悉蠲之。而身自巡行阡陌。不從輿隸。廬縛一籃。置飯一盂其上。令其鄉民以次昇。舉行。民皆歡呼。迎曰。吾父來。吾民更生矣。居一載。州大治。父雲鵠往廉思兼治狀。獨潛行宿東萊民舍。問守何狀。曰。往太守理一訟。輒經歲月。亡論枉直。卽理民亦坐困。今守神明。一食頃可立決。迺吾民感德。終不忍訟。吾知如是而已。晨起見其家一塑像。民率妻子環拜而祝之。視則思兼像也。藩府聞縱莊奴奪民產。民訟之分巡僉事。僉事捶莊奴斃之。獄闞。噉王奏之下所司鞠。選懷吏。惕王威。久不決。竟擬當僉事大辟。撫按疑其事。檄思兼往。王召宴。衆虞有它。王自陪宴。竟席王不敢吐一辭。思兼出則閱成案。對衆歎曰。是胡難決。僉事亡意殺人。決杖不如法。當得杖耳。令爲宗藩故加罪一等。闞誣告。法當戍。以宗藩故未減足矣。卒據以請於朝。僉事竟得復故職。旁郡饑民掠食。民間卒持之急。且作亂。幕府復檄思兼治之。將加勦焉。曰。此輩皆赤子。餓求食耳。奈何激之使爲變。而作小木牌數千。爲招輯語。散置四郊。令饑民得執牌來就撫。民得牌雲集。城下吏恐不敢納。乃大開城門。召之入而諭之。給以銀穀。皆復業爲良民。兵罷不用。幕府奇之。所得月俸。每割以贍士之賢而貧者。往往不能具朝夕餐。忽有野鴿來巢。種類驟繁。因取贍親州人。以爲天所惠。廉吏也。庚戌入覲。時嚴嵩用事。而墨計吏多有餽遺。思兼僅持一銀環。詩而贊之。嵩亦知其廉。歸其環。而報以詩。吏部考天下治行第一。當遷州父老。伏闕下請復留。遂還任。辛亥擢工部員外郎。督廠臨清。州人遮道哭送。擁車不得行。臨清去平度不甚遠。其人思之。輒往訊候。至則嗚咽不能返。思兼人人慰勞。或曰。賴公恩。妻孥幸飽食。乃爲色喜。或曰。不幸受某虐。使公在。吾豈至此。因大泣。思

兼亦爲泣。同年生李姓者。貌相類。使經平度州。人爭傳呼周君至。皆踴躍來奔。比見各歎息去。李初不測所以。已知之。嘗爲人道其事。密廠故多羨利。猾民蠶食其中。至則以常例獻。怒卻之。已摘其奸狀。尤著。杖而戍之。蠶廠盡剔。寂坐公堂。時呼吏卒以水濯階。曰。毋污我階。時河勢將決。思兼爲禱於神。募民蠶土築隄。身立赤日中。督之。隄成三日。而秋漲大發。民免於魚鼈。州人感之。居臨清。雖不治民。其頌聲不減平度云。晉郎中出爲湖廣按察司僉事。既夙著廉能聲。至則臺使僚屬所事受成。墨吏豪民。望風屏迹。武岡州有宗庶將軍五人。席藩封。恣爲奸利。糾集亡賴。白日探丸殺人。莫敢誰何。嘗持刃入王宮。王亟走匿。斫柱而出。州倅以下。悉奉其指使。監司爲不入境者垂二十年。民積怨氣。無所控訴。思兼聞而命駕之州。民遮道迎訴者千餘人。盡得諸奸狀。使民捕其黨惡。五將軍者。盛氣入。爲搆不動。頃之羣姬戟手鳴噪於門。又不爲動。已而民各縛其黨至。悉置之獄。五將軍無可奈何。則臂匕首入。思兼逆知之。佯爲揖而捫其臂曰。毋妄動。吾爲足下百口計。足下適爲此曹死耶。五將軍計沮而退。適密條其罪於院。馳奏聞。上詔卽訊逮。得旨。竟械置高牆。所奪田宅子女悉還之。民自是吏得爲治。民得爲生。皆焚香竹舞。爲塑像立碑。思兼拒不可。則使人毀像仆碑。民爭舁碑藏之。攝篆江防。有巨盜劉某者。其黨挾妖術。積不能擒。度無可自容於思兼。暮夜密投千金。思兼怒。廣設方略殲之。威惠旁流。聲稱籍甚。初二親就養。思兼雖在官舍。朝夕跪問起居。孝謹備至。二親欲歸。乃送之過九江。備兵使者駭謂胡。以至。思兼曰。吾以送親得罪。夫何憾。使者退而服其言。未幾以二親連喪。服除竟不復出。逾七年。足迹不入官府。屬歲饑。食指不給。闔門食貧。約不

爲人關說一事。時或操水艇。攜圖書數卷。游吳越佳山以間。嘯咏自得。終不令人知。有故吏門生知迎候。卽趣棹歸。其狷介如此。居鄉和易慈愛。藹然多隱德。不可勝紀。卽家起爲浙西僉事。堅臥不起。未幾復起。爲廣西督學副使。會病卒。年四十有七。思兼少豪於文。駕軼蘇氏。詩歌類太白。已稍出入歐曾。博綜王孟。善行草。兼工小畫。評者謂得趙承旨米南宮之趣。晚年悉斂而焚化之。凡世俗所慕宮室。輿服聲技珍玩之屬。都無染著。而一意靜修學道。常聚宋儒理學諸書。及當代名儒口義。辯析參互。手緘口咕。略無停晷。間與同志往復質疑。然終不集徒與標道學名。所著有西齋日錄。道學紀言若干卷。

樊玉衡字玄之。黃岡人。玉衡清癯骨立。幼不好弄。事親極孝。恬淡寡欲。聞人說海忠介事。慨然曰。我後常師法此人。生何用多取。我意只結茅三間。築場數畝。擁數千卷。樂而忘死矣。自是口不言財利。而讀書。父母有所予。或妻家奩資。悉以市書。湖廣布政使劉某好獎拔士類。嘗曰。樊生如孤松。亭亭獨秀。蒲圻有貴人女新寡。姁而厚蓄。欲屬之。卽託疾曰。吾不堪也。萬麻甲午舉於鄉。明年成進士。選知商城縣。還里覓一竹兜。二奚奴從之。聲響寂然。里中豪貴惡其太朴。媵笑曰。是何卑污苟賤也。玉衡笑曰。卑則卑矣。不污也。賤則賤矣。不苟也。已之商城。初下車。文案山積。執筆不輟。下商人疑其少年不諳也。一月後。察知吏事。肯竅出視事。無巨細。斧斷犁然。中情未明而輿日中而退。吏民大驚。以爲神明。一切文移握算。收貯出納。皆身自籌量。吏胥司文書。奉奔走而已。商每徵賦。遠民先集。諸保伍家。保伍與吏胥比而爲奸。所費幾半公費。玉衡召其民與約曰。今知諸保伍爲小民苦。欲盡罷之。而言不使者盈庭。是爲千金裘而與狐謀之也。

爾果能不保伍而辦乎。民懼應曰諾。已果先期辦。遂盡罷諸保伍。先是縣拘囚用馬兵。兵奉檄至人家。家立破。遂首罷馬兵。聽訟者自相拘。於是民裹一日糧。集公庭。訟卽畢。又爲息訟歌。悟囚歌。使木鐸巡於路。監門號於里。獄卒歌於獄。時自起。與訟者稱引孝弟忍讓和睦之說。獄囚夜半聞鐸聲。無不流涕。又簡其輕者遣之。并年而獄幾空。有訟詞。輒付外議息。不罰一釵。有不肯息。愀然不悅曰。有何大事。而曉曉不休也。少爲譬曲直去。汝穎燕趙間。有豪黠民。持官府長短。及人家得失。玉衡案誅其魁。而豪猾股栗。奸黨散落。有園叟訴人盜園中茄。曰夜盜。余安得知。因私語之曰。汝密以竹絲貫茄腹。勿令人知。叟去。翌日縣市茄。竹絲在焉。汝何爲盜某叟園茄。其人驚服。而邑之小盜屏迹。亡何開採內臣至。時內臣所驛騷。各縣哀金錢以結其驢。趨謁蒲伏庭下。惟謹。玉衡移文內臣。具言商邑無鑛狀。以止其來。不得。則鳴騶列仗。肩輿上堂。商民從觀者千餘人。中使氣奪。竟成賓主禮。明日治酒高會。中使執其手曰。好手。笑答曰。此手不污金錢耳。中使默不應。徐曰。人生幾何。自苦乃爾。答曰。我百姓苦耳。中使謝不敢。已令人開鑛。則導之險道。攀藤捫蘿。插旌而上。岵巖探者不堪勞。鑛竟無有。又趨而之金剛銀臺兩山。乃爲文。率內臣祭山神。曰。敬問山靈。有鑛耶。無鑛耶。近民爲汝竄。遠民爲汝徒。巨家爲汝破。何不吐符陳貢。以抒明主憂。聖天子視民如傷。如令與內臣藉口括金。以負聖天子。願神奪其魄。殞其命。辭極酸楚。商民感泣。已而竟無所得。中使怏怏去。欲中傷之。乃先挾其所移檄文。有歸過主上語。曰。若謗訕朝廷。我不奏聞。而敢媒毒我乎。欲草疏上。中使懼而寢。遂亦毀前疏。以安其心事。語人曰。人不可無友。吾於中使執前不撓。光州正薛君勸吾

一意行之。他人勸我如他邑下之。此事豈一下所可了。調崑山人咸謂商簡崑煩。不可以商治也。玉衡曰。惟煩也。故以簡。諸凡勸農息訟。一如商。崑俗好訟。縣署前牙僧借獄爲市。起高樓酒館。及爲治一年。幾於無訟。酒家徙去。是秋雨傷稼。率皆役駕小艇。勸視墟落。與饑民相對。噉菜粥。時司農急積逋。停邑長俸。崑逋至二十萬。玉衡曰。小民逋賦時。我甫十餘齡。今其人少者壯。壯者老。老者死。我奈何。惜己月俸。使萬口諷乎。止不徵。民亦輸負。惟恐後。吳諸生好與公府事。督學爲設門禁簿籍記之。玉衡曰。吾方求士。願聞令過。何禁爲。第署簿上曰。求澹臺生。而挾私來干者。皆反矣。崑當編審賦四十萬。隱覆萬狀。前令號開敏。鉤校月餘始完。玉衡獨以三日完。不爽毫髮。庚子大計。無一錢通長安貴人。卒舉卓異。擢兵部主事。旨不下。旋復之崑。時郡民以中使噪其門。郡縣欲相率往謝。玉衡曰。彼自擾民。賴郡邑戢之。彼不我謝。反謝之耶。吾卽往。不庭謁。恐反敗君事。郡縣以君不可。遂皆罷謝。在崑前後六年。嘗數擢吏部禮部戶部工部。旨皆不下。而父病乞歸。上官及邑人士競留之。度不可卒解。以印綬付學博士。五鼓馳歸。卒。兩縣皆祀之。學宮又特祀之。私諡曰孝介。

歐陽東鳳。號宜諸。潛江人。以進士歷郎署。當萬厯辛丑守常州。故事。新守至。屬邑設供帳。所值數千金。東鳳至。盡撤還之。自製布帷瓦器。澹如也。日費錢不滿百文。積公用千金。復龍城書院。故址爲先賢祠。祀一郡鄉賢。自延陵季子以下六十九人。考其行事。人著爲傳。頒布士庶。使知仰止。每以春秋集五邑紳。矜於祠中。講學問政。凡農桑水利。人才賦役。無不咨究。而於激濁揚清。抑強扶弱。有倦倦焉。每受訟詞數百紙。

非係風俗利害者不行。其不行者，必破所以。如見肺腑，皆以崇朝布發，民無守候之苦，亦不敢易詞再訟。亦不敢至當道越訴，訟以大簡。地方大窩大猾，悉擒治之。積年大盜滅賊，追罪官府，莫能詰。皆延訪得實，以他事致法。夙害悉祛，嘗以聽訟時下縣解官銀至。吏秤座右，公據案批牘，自若秤畢，卽曰：第幾包銀，何得獨重銖許。驗之果然，立扶吏人，以爲神。朝廷忽下罷稅之旨，邸報以已刻到府。東鳳不自當路，卽以已刻撤所部關稅。當路來詰，何以不俟明文。東鳳對曰：大哉王言，何明文如之。救民水火，寧緩須臾耶。後旨不果行，而常郡之稅，獨得浹月之惠。東鳳喜讀書，退食手不釋卷，夜多不寐。文移往來，日至夕發，不滯信宿。接搢紳士人藹藹，而正氣懷然。人無敢干以私者。擢監司去，民慕之爲祠祀。

馬思理，字達生，閩之長樂人。天啓壬戌進士，筮仕爲烏程令。思理冷而古顏，不苟訾笑，視之有不可犯之色。而居心甚慈，接物甚和，被服造次，一羶儒而已。喜誦讀，雖簿領雜還公事，如蟬席端，嘗安一卷書。小隙卽潛玩，如諸生。自謂心眼一日不接書本，則鄙吝叢生，應酬皆失。蓋天性然也。縣賦重，胥吏窟穴其中，不能理。思理勸立清單，里甲自註納數，次第押完，不施一鞭，課無負者。其法後人皆遵之。邑民雀鼠爭，往往以人命相訐，訟師傾人，一檢驗而其家立碎。思理約法不先檢，必待審實，誣者坐之。訐風始衰。民多完家，思理愛民如子，持身如處女，出於至誠。人不忍欺，訟者至庭，望其愀然之容，卽相率罷去。黠吏窺伺左右，未嘗見喜愠，竟無以中之。終其任，無胥卒敢爲猾。他人雖要囚禁切之，蔑如也。喜與邑中士大夫游，一見落落難合，雖貴不加熱，雖卑不加倨。久而意傾，無不欽服。尤加意造士，出謁子衿，手藝文相質，則禮之容。

館賞奇析義終日不厭間有所干請則正色謝曰至公庭議之士而發賴而退且潛心道業明鑒若神其校士有季課有月課皆手自點閱激揚鈍慧益人種智使物物怒生被其鑪錘無不成就遠方之士日進幾半魯國其所拔士如凌義渠溫璜皆以殉國大節表天下至以登甲乙榜者不可枚數數十年菴中起家之賢皆所拔識者也思理每遇水旱爲民零禱必芒鞋去蓋躬踐塵泥或盛夏暴烈日中請折請賑情見乎詞上官亦鑒其誠曰馬君所請何可同他令故在邑再罹儉歲凶而不饑緩徵蠲羨輸額至七分以止卽止不徵窮簷無吏呼於門者五年以考最內召鄉民扶老攜稚擁車下自郡治至吳江界七八十里間踵趾相接頂香牽袂環跽而泣爭以卮酒爲壽思理亦泣勉爲舉觴入京以上考擢給事中湖民士思之不已立社尸祝比於畏壘每邑人以運務上京望其署如歸走謁如家人有所便宜祈請應之如響士以試事入都者復如是凡出入省掖十餘年而烏程之利病凶穰無不聞父老子弟之祈求無不得再躡再起而民之思慕如一日其顛復亦如一日也思理在垣多建白巡草場以忤閣下詔獄以救翰林黃道周再下獄垂老以國難蹈海死

彭長宜字德符海鹽人崇禎癸未進士筮仕爲上海令長宜家本華胄而刻厲茹苦有踰寒畯置身高秋與物春煦至清而能容物甲申夏聞變以衰經蒞任哭於邑署時人情倉皇有倡亂海上者往往嘯聚而南臺新建徵發驛騷仰屋莫應長宜榜諭遠近開陳大義內銷奸萌外供征繕人情帖然長宜朴若無能才周四應邑故號劇一切錢穀刑法書檄酬應之繁皆手自辦給不召幕客一人官署如僧寮入其中蕩

蕩無有。寢戶皆塵封。案上惟圖書數卷。旁列竹筒。貯公服角帶。布衾在牀。奚奴一二頭在竈下。自到任至去官。不益一物。其甘節出於天性。上海去家近。凡銜舍魚米。皆取給家鄉。用不足。其妻至率婢指以紡績。續之。嘗言。值此季世。身家俱空。昔賢有毀家紓國者。我縱不能。豈可食官下一錢乎。邑民有擔水供官者。長宜問其故。曰。此總甲所派。長宜曰。汝能不傲而遠汲乎。奈何。以我渴。貽汝饑。遂計腳錢與之。故事。令坐公堂。或遠出。主藏吏必備。殺核以從。長宜謝絕。日聽事。啜茗一盃。郊外迎送。日晏不歸。則市胡餅療饑而已。縣多逋負。萬方督之不能楚。長宜至。設期會。與民約束。不鞭一人。盡革火耗。兌頭。若櫃役併封。有絲毫贏者。杖之。里民爭輸。恐後。至自相戒曰。往時持鐙入官。一比限而輸。吏皆十二。輸。兌耗十三。公今蠲之。以此抵官。過半矣。有君如是。忍負之。非人也。里有頑甲。爭詬詈之。數月中。逋課盡完。民小鬪訟。第開諭散遣。亦不施箠索。琴堂闕寂。終日不聞竹肉聲。隸胥垂手無事事。歸戒其妻子曰。若曹必餓死。卽餓死。不敢謂非好官也。邑民嘗以嘑語作偶聯。粘縣署。雙扉殆徧。又爲太平謠。徧揭街衢。好事者錄之。成帙。皆耘夫野老所口占。無一文士語。元旦啓門。父老望而再拜。焚一瓣香。婦媪亦過而膜拜。如入廟禮佛者。行春之日。邑人執香而隨者。填馬首。家家榜其門曰。官清民樂。有大環以督餉行部。所在苛索。至上海卽促還轅。曰。此老不解事。可亟去。邑有重客。長宜以一縑饋之。曰。物雖微。非盜泉。可飲也。客笑謝曰。吾亦不敢食西山之薇。相傳爲雅談。長宜以至嚴律己。以至慈接物。與人言。惟恐傷之。意所不可。毅然難犯。乙酉。夏。邑人攀衣留之。長宜曰。世蒙國恩。留此必死。遂聽之去。去一日。竟死。可謂不食其言矣。長宜大節未傳。傳其循蹟。

明書卷一百四十

列傳七

武臣傳一

史官論曰。武臣者何。別於勳臣云爾。人臣以德立宗廟社稷曰勳。以言曰勞。用力曰功。勳之勞之功之者。是不可以已也。舍是三者而惟武是覲。是或可以已也。古者擐甲執兵。非尋仇讎也。則以征無道也。若墮人以自成。亂入之家國。以自爲名。人之稱斯臣也。則謂之何。詩云。敦商之旅。克咸厥功。美周公之有是功也。旣破我斧。又缺我斨。悲周公之有是武也。且明非周公而爲是武者。尤可以已也。斷自北平之師。訖後之開邊典兵者。爲武臣傳。

張溫傳

張溫以指揮守蘭州。洪武二年十二月。元將王保保。大將軍南還。帥兵十萬。奄至城下。溫會諸將校曰。彼悉衆襲我。我兵寡難與爲敵。然彼遠來。未知我虛實。乘暮擊之。可挫其鋒。彼不退則固守以待援。於是整兵出戰。保保兵稍卻。遲明。溫收兵入城。敵遂圍城數重。溫堅守不與戰。于光來援。被執至城下。大呼大將軍將至。城中守益堅。多方卻敵。保保引兵去。方急時。夜二鼓。圍兵登城。千戶郭佑被酒醉臥不覺。巡城

官軍擊卻之。圍既解，溫執佑將斬之。天策衛知事朱友聞爭曰：「當賊犯城時，將軍斬佑以令衆，所謂以軍法從事，人無得而議之。今賊既退，乃追罪之，非惟無及於事，且有擅殺之名，竊以爲不可。」溫悟，杖佑而釋之。上知之，謂輔臣曰：「友聞以幕僚能守朝廷法，直言開諭官長，此正人也，宜加賚賜。」綺帛各五疋。陸溫都督僉事兼陝西行都督僉事入謝，上諭之曰：「蘭州之捷，可謂奇功。夫將帥之道，有功不伐，則功益顯，特功驕恣，則名益墜。是惟仁者不矜其功，而智者克成其名。仁智兼全，所向無敵，爾能守之，可以長保富貴矣。」仍賞守禦將士。詔曰：「蘭州乃西北重地，近因大將班師，元帥王保保乘隙攻城，指揮張溫獎勵將士，堅壁固守，屢出挑戰，大振軍威。元兵力屈，又聞大軍入關，彼遂斂兵遁去。以此保障關中一方以安，其功最大。指揮人賞文綺帛十四疋，千戶衛鎮撫十二疋，百戶所鎮撫十疋。圍城之日，在內守禦軍士，不論新舊，總旗人賞銀十兩，小旗九兩五錢，軍人九兩。其守鳳翔臨洮鞏昌綏德者皆賞。次蘭州。」

史官曰：「蘭州關西塞重，輕蘭州破，則保西連羌，北連寇，以數十萬窺關中，天下半搖矣。鳳翔臨洮之屏蔽壞，卽守亦艱難耳。溫以智勇撐半壁，厥功偉哉。事平不侯，亦可惜爾。于光列忠節，而溫之功又光成之乎。」

朱能、徐忠、李彬、陳珪、李潛、孫巖、徐祥、陳志、張興、梁銘、趙彞、郭亮、高士文傳

朱能，字士弘，懷遠人。父亮，開國功臣。世燕山護衛正千戶。能嗣官，辦事燕府。建文元年，燕兵起，能及張玉首議縛三司，奪九門，卽引兵東攻薊州，敗都指揮馬宣兵，拔薊州，度石門，又拔遵化，襲破大寧，還兵，破雄縣。

鄭州擒都督楊松長驅至真定。敗長興侯耿炳文。再戰渾沱河。能躍馬大呼突陣。敗炳文兵。還鄭村壩。破九門兵。又敗平安兵。白溝河二年攻濟南。退戰敗鐸山下。戰東昌。盛庸鐵鉞力戰。圍燕王數匝。平安兵又至。圍益急。能率周長等兵。合口騎奮戰。燕王潰圍東北角。出還營。能在諸將中年最少。善戰。張玉善謀。戰沒。東昌軍事一諮能。是年歷陞都指揮同知。三年收合諸軍將薛祿等。進戰夾河。擒都指揮張安。夾河之戰。譚淵死。燕兵窘。得能至。再戰勝。軍聲復振。敗盛庸兵藁城。三戰三敗之。遂率王興陳亨諸將攻真定。能先鋒衝庸中堅。殺幾萬人。擒都督顧成。出奇兵截大兵哨騎。連戰順德大名彰德衛輝。皆有功。戰西嘉山。破定州。十月戰蠡南。兵大潰。是年陞都督僉事。四年克東阿。進攻東平。殺判官鄭華。盡破汶上諸寨。至小河。王真戰死。平安兵大捷。燕諸將議旋師。能獨按劍奮罵諸將曰。漢高祖十戰九敗。終有四海。今舉事連捷。小挫輒歸。更能北面事人耶。諸將皆大不口。當斬。衆遂定。燕王引兵南下。大戰大店。又戰小河橋。又大戰齊眉山。連捷。盛庸平安等合兵六十萬。依潼山爲陣。能率李遠等設奇四面進攻。大敗平安等銀牌軍。都督陳暉來援安。又敗暉。擒平安等三十人。降十萬衆。六月渡江。進屯金川門。夜漏下五刻。門開。定京城。建文四年封成國公。食祿二千五百石。與世券。永樂四年充征夷將軍。率二十五將軍討安南。加祿千石。至龍州卒。能身長八尺。沈毅驍果。善拊士卒。被常服。依儒生。追封東平王。諡武烈。侑享太宗廟。庭子勇嗣。正統十四年。寇駕北征。寇卒至。勇引兵五萬迎擊。冒入鷓兒嶺。中寇伏。戰歿。隻騎不返。子儀乞葬。祭不許。停製。景泰二年。詔己已諸將敗劾者。皆受朝廷成算陣亡。成國公修武伯。與子襲爵。贈勇平陰王。諡武愨。

儀始得嗣守備南京三十餘年卒贈太師諡莊簡弘治九年子輔嗣守備南京卒贈太傅諡榮僖子麟嘉靖四年嗣卒八年弟鳳嗣卒子希忠累加太傅兼太子太師入直西苑卒子純臣嗣國變死難

徐忠字仲達合淝人父用開國功陞副千戶忠嗣官征寇功陞濟陽衛指揮僉事鎮開平燕兵起歸附立功燕趙齊楚間白溝之戰敵揮刃斬忠兩指未殊忠自斷指擲地裂衣帛裹創發憤進戰大捷歷陞都指揮僉事太宗卽位封永康侯食祿千一百石與世券仁宗監國留忠南京掌兵政卒贈祭國公諡忠烈忠三庶子安敬曦爭襲永樂十六年上令長庶子安嗣卒子昌先卒昌子鈞嗣卒子溥乞優給月給米十石卒庶長子源嗣與優給長嗣侯

李彬定遠人父信權指揮僉事彬善騎射嗣父官從傅將軍征朵顏經略宣府興和雲州築萬全懷來城從燕王率騎兵攻薊州轉戰雄鄭真定襲大寧糜鄭村白溝濟南滄州掠彰德皆有功歷陞督府僉事建文四年護仁孝皇后至京明年封豐城侯食祿千石與世券出鎮西陲六年以交趾功加祿五百石永樂二年卒贈茂國公諡剛毅明年子賢嗣侯鎮守大同守備南京景泰二年卒贈豐國公諡忠憲四年子勇嗣侯卒無子弟昇之子熙嗣無子姪儒嗣無子從姪環嗣卒子宏濟

陳珪秦州人開國功陞百戶調燕山護衛擢口乃兒不花陞副千戶從燕奪九門雄鄭功陞指揮又壩上立戰陞都指揮大戰楊村陞都督僉事建文四年陞太寧侯食祿一千二百石與世券卒贈靖國公諡忠襄子璽先以從燕功爲指揮使璽子鍾已嗣珪次子愉遂得嗣侯二十年北征失律下錦衣獄死鍾與愉

子鏞爭嗣。仁宗以鍾庶長孫二十二年嗣。卒。子灝嗣。卒。無子。弟灝乞嗣。宣宗曰：陳愉失律，念灝有功，灝孫灝與嗣侯，給半祿。十年，吏部言灝年十五，與全祿已已陣沒。是年，弟涇嗣。成化元年，失律坐斬，赦還。侯倅祿。卒。子桓八年嗣。十年，桓坐與僧娼飲酒淫酗，奪俸一年。子璣嗣。卒。子儒嗣。卒。子連嗣。卒。無子。弟瑄嗣。卒。子良弼嗣。

李濬，和州人。父旺開國功，爲燕山護衛千戶。濬嗣官。燕兵起，從執謝貴、張昺，奪九門，克居庸，轉戰永平，真定功。陞指揮僉事。鄭村壩大捷，陞都指揮僉事。白溝濟南功，陞同知。建文四年，封襄城伯，食祿一千石。與世券、永樂元年出鎮江西，召還。三年卒。子隆年十五嗣。伯八年從上北征有功，十四年留守南京。仁宗時出鎮山海，未幾復守南京。先後凡十八年。正統五年入總禁兵。十一年巡邊，明年卒。隆有才略，頗好文，恭慎不敢驕，守法度。明年子珍嗣。伯又明年沒於土木，無子。弟連病不能嗣。連弟瑾景泰元年嗣。伯成化三年總兵，與程信征川貴蠻，大戰渡船鋪，攀崖焚其巢，賊退保大壩，貴人犄之。川人角之，賊敗奔入洞，窒而圍之。逾月皆死。四年進流侯。宏治二年卒。贈芮國公。諡武莊。子勳嗣。卒。無子。連子鄺嗣。伯正德四年卒。子全禮嗣。伯嘉靖十八年卒。明年子應臣嗣。伯卒。子守錡嗣。卒。子國楨嗣。死闕難。

孫巖，鳳陽人。開國功，爲流百戶。改護衛。十三年從藩王之燕山，久之致仕。子亨嗣。官陞正千戶。建文元年巖以致仕官從燕兵守通州，奪門力戰，追奔至張家灣，掠餉舟三百，復還守城。又敗遼東兵。歷陞都指揮。建文四年封應城伯，食祿千石。與世券、永樂十六年卒。贈翼城侯。諡威武。亨先以從燕兵立功，薊州永平

鄭村壩大同白溝河滄州彰德靈壁入金川歷陞河南都指揮嗣父伯卒子英嗣伯無子弟傑嗣伯正統元年坐不敬勒罷卒子繼先嗣伯卒子鉞嗣伯嘉靖十八年卒子爵嗣卒子文棟嗣

徐祥大治人漢萬戶歸附從軍陞燕山護衛千戶燕兵起攻奪九門轉戰漁陽真定永平彰德白溝河滄州保定小河齊眉山渡淮河入金川門有功建文四年九月封伯十三人祥第一爲興安伯食祿千石與世券祥在燕諸將中年稍長及封益勤慎不敢驕怠永樂二年卒子永未嗣卒永子亨嗣正統元年征湖功進流侯加祿百石卒諡武襄子賢嗣病跛與半祿免朝請卒子盛優給十六年嗣卒無子從子良正德三年嗣卒勳嗣卒子夢賜優給嘉靖二十年嗣卒子□□嗣

陳志巴人開國功累陞燕山中護衛指揮僉事從燕兵戰真定白溝河濟南再陞都指揮同知永樂元年封遼安伯食祿千石與世券卒志二子長良坐法謫戍死次春立功爲指揮使先志卒春子瑛嗣指揮僉事矣至是良子瑄與瑛爭嗣伯吏部上請太宗曰瑄父洪武中獲罪無勞於國然志適孫也春有功陞指揮瑛已嗣父官今與瑛伯奈適孫何瑛又不肯讓下廷臣議議上瑄適孫宜嗣上曰瑄與瑛合陞見朕二人者見上曰二人者皆可嗣朕與汝鬪鬪得伯者嗣瑛得鬪上笑曰乃汝瑛也竟得伯者瑛卒子墳幼與半祿優給尋嗣正統十四年隨上北征陣沒無子墳叔詔與瑄又爭嗣景帝曰先朝言二人者皆得嗣今國家急人總兵石亨楊洪尙書于謙擇嗣一人必有功也與世嗣謙等上言瑄老詔壯景帝令詔嗣伯天順八年詔坐于撓軍政奪坐營成化三年又坐事謫立功遼東明年赦還七年乞恩與半祿朝請卒孫德

嗣伯正德中爲薊州總兵。朱顏入塞，召還。嘉靖中爲京營總兵。子先早卒。孫樹嗣。卒。□□嗣。
張興，壽州人。開國功。歷陞燕山護衛指揮僉事。從燕奪九門，戰漁陽、永平、大甯、廣昌、白溝、河濟、南夾、河西、水寨。功。歷陞都指揮同知。從子勇，年壯，有膂力。從興行間，先登，與管單騎追敵，被十餘創，病。勇領其兵。嗣護衛指揮使。戰淮、泗、渡江，入金川門。陞都指揮同知。太宗卽位，封安鄉伯。食祿千石。與世券五年卒。贈侯。七年勇嗣伯。明年從征。□失律，謫交趾。總旗立功。十年赦還。復伯。道病卒。十五年子安嗣伯。正統十三年出鎮廣東。十四年戰賊黃蕭養，敗沒。子鑄優給。卒。無子。安弟甯嗣伯。卒。子珣嗣伯。卒。子勳未嗣。卒。孫坤嗣伯。卒。子鑑嗣。

梁銘，汝陽人。洪武中嗣父燕山護衛百戶。從燕兵起時，南兵攻北平，又攻通州。銘守戰甚力，積功至督府僉事。侍太子監國，坐事下獄。永樂十九年赦，令捕倭廣東。仁宗卽位，進督府同知。充參將，鎮寧夏。上念銘舊有守城功，封保定伯。食祿一千石。與世券。宣德初，御史石璞劾銘守寧夏罪狀。上特原銘，遣銘副柳升征交趾。卒。軍中銘坦夷寬簡，敢勇當敵，能撫循士卒。銘不死，崔聚亦未至。敗沒。子璠宣德十年嗣伯。正統十四年坐失律，謫。從石亨立功，尋與半祿。復其爵，斬敵首。復與全祿。景泰元年充平蠻將軍，代王驥征貴州。又征福建，皆有功。三年進流侯。加祿五百石。世伯。天順元年與世侯卒，贈蓋國公。諡襄靖。子傳嗣伯。坐不敬，逮獄。習禮國子監。卒。子宗幼，與祿歲百石優給。卒。次子任嗣伯。卒。子永福嗣伯。嘉靖中爲京營總兵。卒。子繼瑤嗣。

趙彝虹人。洪武初，虎賁百戶。調燕山右衛，從穎國公友德征沙漠，城宣府，萬全懷來，歷陞永平衛指揮僉事。燕兵至永平，彝以城降，從徐忠等轉戰有功。陞北平都指揮使，太宗卽位，封忻城伯，食祿一千石。與世券永樂十三年鎮徐州，仁宗召還，卒。子榮嗣伯，卒。子溥嗣伯，卒。姪權嗣伯，卒。子武正德十三年嗣伯，卒。子祖徵嗣，卒。子龍嗣。

郭亮，合肥人。父聚，開國功。陞流百戶。亮嗣官，征口功，歷陞永平指揮，從燕兵與都督耿獻戰，又與都督楊文戰，皆有功。當是時，燕兵南下，亮獨守永平，與北平爲聲援。建文四年封成安侯，世伯，食祿千二百石。出守開平，築烽堠。永樂二十一年卒，贈興國公，諡忠壯。庶長子晟嗣侯，宣德五年扈蹕，先入德勝門，歸私第，勦下錦衣獄。天順二年卒，無子。弟昂乞嗣，上曰：如誥券與伯爵，卒。子謙嗣伯，卒。子甯嗣伯，卒。甯子璋早卒，璋從弟瓚嗣伯，卒。子寶嗣。

高士文，陝西咸甯人。洪武中，雲南塞北功。陞燕山護衛百戶，從燕兵戰大甯、廣昌、白溝、夾河、東平、汶上，每出入陷陣，先登，累陞都督僉事。永樂四年征交趾，五年交趾平，餘寇奔入七源諸川山谷中，出沒寇掠，張將軍遣士文捕賊，晝夜急攻，賊突出走。士文又進追賊，中飛礮死，部兵復追賊，賊又竄入七源川，以士文力戰故，賊竟潰亂。張將軍繼遣都指揮程錫平賊，贈士文建平伯，令子福嗣伯，食祿千三百石。與世券，卒。子遠嗣伯，宣德五年與成安侯扈蹕，不敬，下獄得釋，卒。子震病不能嗣，遠弟遠嗣伯，卒。無子。弟遠之子隱嗣伯，卒。子繼宗嗣伯。

史官曰。昭余之奮貔虎而瞰江皋也。策勳勘定稱奇傑。皆彬彬一時之盛。而獨彝之於武臣何哉。南風自不競耳。當時太宗以烏合之衆。數戰數敗。諸將固開國之遺也。喜功之習。決於胸臆。遂爾鞭斷江淮。戈殘宮闕。方之魏鄂。實媿鷹揚。享國久長。蓋有天幸焉。噫。

邱福孟善火真李遠王忠王聰張武徐理傳

邱福。鳳陽人。以小校事燕王藩邸。積年勞。授護衛千戶。燕兵初起。與朱能張玉首建議奪九門。轉戰真定。夾河滄州靈璧。先登有功。累陞中軍都督。建文四年封淇國公。食祿二千五百石。與世券。當是時。錄功詔福第一。福善高煦。數勸上立高煦爲太子。上不許。福質直無文。有勇力善戰。見敵輒深入。永樂七年爲征。□大將軍總兵。率武功侯王聰。同安侯火真。靖安侯王忠。安平侯李遠。五將軍。竝出塞擊。□上曰。本雅失里逆天道。羈信使。命爾徂征。自開平以北。卽不見敵。時時如對敵。日夜嚴斥望。遇敵設奇奮擊。否則審察事機。便宜進止。又密授方略。臨遣福出塞。率千餘人。先至臚胸河南。遇敵遊兵。與戰敗。敵遂乘勝渡河。又獲敵間我者。尙書一人。福願飲。□尙書酒。問本雅失里。今安在。□尙書言。本雅失里。聞兵來北遁。去此未遠。可三十里。福大喜曰。當疾馳擒此敵。時諸軍未集。皆曰。此敵誘我。不可信。俟諸軍畢集。遣精騎四偵。徐議進擊。否且墮敵計。福不從。又命□尙書爲鄉導。率衆直薄敵營。與戰。相持二日。每戰敵輒佯敗。引我兵深入。福意銳欲乘敵。遠力言敵示弱給我。退則乘我。進則伏我。惟結營自固。晝揚旗伐鼓。出奇兵與挑戰。夜多燃炬鳴礮。以張軍聲。勞困敵。使敵莫測。不二日。我軍畢至。併力奮擊。必大捷。否亦可全師而還。將軍

奈何不慮此。聰亦力阻。福皆不從。欲遣火真使詐□求和解。□謀率精騎劫□真猶豫未決。福厲聲曰。違命者斬。卽上馬先馳。麾士卒控馬者皆泣下。諸將見元帥去。不得已從行。不數里。敵伏四起。奄至合圍。遠聰率五百騎突出陣。斬敵數百人。聰戰死。遠馬蹶。與福真忠皆被執。沒敵中。太宗聞敗大怒。諭東宮。明春朕且親征雪恥。又遣使諭順甯王馬哈木。福敗績。或本雅失里得福軍旗幟衣甲。詐劫攻爾。慎防此敵。以故福後不得嗣。

孟善海豐人。立功洪武初。爲定遠百戶。十九年從征雲南。又後征金山。捕納哈出。歷陞燕山護衛正千戶。出塞敗□哈刺□。獲多。又以驍勇著名。時召宿衛藩邸。燕兵起。初攻九門。執薛參議。破松亭關。進指揮僉事。戰真定。破齊尙書兵。陞北平都指揮僉事。白溝濟南常山戰勝。進同知。夾河薤城敗盛庸兵。進使保定。收官軍萬三千人。陞督府僉事。進同知。建文四年封保定侯。食祿千二百石。與世券卒。贈滕國公。諡忠勇。子瑛嗣侯。洪熙元年。瑛弟賢連坐。奪爵毀券。謫雲南安置。宣德十年赦。與京衛指揮使。卒。子俊嗣官。天順元年。詔與嗣伯爵。卒。子昂乞嗣伯。吏部以詔無世襲文。執不許。內批昂嗣伯。卒。子達成。化八年乞伯優給。不允。十一年又乞嗣。仍與京衛指揮使。宏治元年又乞嗣伯。不許。

火真。韃靼人。名火里。火真居開平紫乾嶺。洪武初歸附。爲燕山護衛千戶。從燕兵取大甯。克真定。戰白溝河。馳馬突陣。手斬數十人。長興侯兵敗走。真領騎兵。每出輒有斬獲。呼噪歸營。敵皆憚其悍勇。歷官督府僉事。建文四年封同安侯。食祿千五百石。與世券。永樂八年戰沒敵中。

李遠懷遠人。父實開國功。累陞蔚州衛指揮僉事。遠嗣官。燕兵起。率所部及萬全衛兵。從攻大同。破滄州。徇東平。汶上。沛。沙河。渡。斷南兵餉道。累功陞都指揮。建文四年。封安平侯。食祿千石。流侯世伯。永樂七年。出塞戰沒。追封莒國公。謚忠壯。遠沈毅。有膽力。善騎射。在諸將中。言論侃侃。自許忠義。子安嗣侯。洪熙元年。爲交趾參將。失律。宣德二年。下錦衣獄。奪券。十年赦。謫赤城備禦。尋陞督府僉事。征鎮番阿古脫兒只伯功。進同知。充總兵。征松番及木麓川。又失律。正統七年。下御史獄。謫獨石。立功贖罪。卒。子清。十四年。請嗣。吏部言。安再失律。立功病死。清不得嗣。天順元年。詔與都指揮同知。

王忠。孝感人。建文時。以指揮守蔚州。強勇自負。燕兵起。與李遠歸款北平。戰白溝。濟南。滄州。薊城。率精騎爲奇兵。多斬獲。累功陞督府僉事。建文四年。封靖安侯。食祿千石。與世券。永樂七年。戰歿塞北。無子。弟禮斌。姪全。累請嗣。吏部言。券文子孫世襲。無弟姪。襲文不允。宣德十年。忠妻援武城侯姪孫王玘例。授斌京衛指揮僉事。奉忠祀。

王聰。新水人。起燕山總旗。陞百戶。從燕兵取漁陽。遵化。徇涿州。轉戰南皮。平滑口。獲馬千五百。還守保定。復南宮。冀南。徇淮泗。首獲舟渡江。累陞督府僉事。封武城侯。食祿千五百石。與世券。永樂七年。戰歿敵中。追封漳國公。謚武毅。上以李遠及聰嘗諫福。故得襲卹。無子。姪孫玘。請嗣。吏部言。聰券許子孫襲。姪孫不得嗣。侯。宣德十年。特與玘京衛指揮僉事。已而玘又累乞侯。不許。

張武。瀏陽人。裕達有勇力。稍涉書史。爲燕護衛百戶。從燕兵戰。真定。破耿炳文兵於溥沱河。設伏。戰勝。夾

河要敵西水寨。累功陞都督同知。建文四年封成陽侯。食祿千五百石。與世券當時武功第三。前二人邱福朱能封國公。武侯第一。卒。太宗出內廐馬賻武。贈潞國公。諡忠毅。無子。塔臧子聚義兒張旺匿語券。天順二年奪入官。

徐理西平人。甲午從軍。累戰功。歷陞永清衛指揮僉事。從燕兵。敗都督劉真兵於寬河。再陞北平都指揮僉事。又戰平安兵於白溝河。斬先鋒哨騎。追至雄。轉戰濟南滄德間。至夾河。戰敗盛庸兵。西援水西寨。陞督府僉事。小河敗何都督兵。克泗揚。入金川門。皆有功。建文四年封武康伯。食祿千石。與世券。永樂六年卒。子禎嗣。正統九年卒。子勇嗣。卒無子。成化九年勇義兄嫂趙言勇從姪文英家西平。吏部言勇歿且二十年。文英不得嗣伯。

史官曰。諸起於北平者。多簪纓奕奕。令終太平。而邱福等投隙龍驤。雄略懋著。然或以罅死。或至絕嗣。不得與張輔等聯步螭頭。永煌鐵券。考古者爲之憮然。又爲之快然。

李震王信牟斌劉驥傳

李震南陽人。父謙。督府僉事。震嗣指揮使。正統中征兀良哈木麓川香爐山。螭嶺。塞功。歷陞督府僉事。天順四年充總兵官。征武岡黎平賊。五年進攻兩廣貴州蠻。陞同知。成化元年還兵湖廣。征荆襄賊功。歷陞左都督。十一年清江水。斬捕功多。封興甯流伯。食祿千石。十四年革爵。閑住。震鎮湖廣時。與參將吳經有隙。經弟綬從汪直刺事。欲甘心震。適有道人以黃白術得罪。卽附會震。嘗匿道人。私習讖緯。且有謀反。遣

人籍逮之。途遇直震呼冤。言一介武夫。蒙恩儻爵。父子富貴已極。更欲何爲。此讎家經所爲。直不聽。下震錦衣獄。鞫問無驗。得不死。二十年復伯爵。乞誥券不許。子昂不得嗣。

王信字君實。南鄭人。正統中世官寬河千戶。父忠征迤北戰歿。母岳生信。方半歲。持節旌無忠臣節婦。旣長。嗣官。己巳敵犯京師。拒戰西直門。功陞指揮僉事。景泰六年。從征五開諸蠻。遷指揮同知。天順五年。破曹賊東市。遷指揮使。成化初守通州。改守倒馬關。移守荆襄。二年石和尚劉千斤反。荆襄信進據房陵。民兵不滿千人。賊四千餘衆突至。圍信。主帥逗留不援。信多張旗舉火。晝夜不息。累四旬餘。間以死士出城。五六里舉火礮。賊以爲援兵至。驚走。追斬有功。陞都指揮同知。鎮臨清。兼管倉糧。移鎮湖廣。條陳入事。又條上慎專任。實倉儲。修兵衛。禁科罰四事。十七年疏言湖廣蠻夷。雖腹中之蠹。實無能爲。但我軍奸黠之徒。利其竊發。可以邀功。今但選精銳。常加隄防。勿蹈前非。其忠自息。荆襄流逋。本意逃避徭役。長子老孫已成家業。濫加誅殺。恐傷和氣。南畝之農。無所蓄積。收穫未竟。餼糧已空。機杆纒停。布縷何在。乞選公正仁惠守令。大加存恤。濫陞官員。無慮千百。無一矢之勞。冒崇階之賞。乞查勘削奪。三司方面。所以折衝禦侮。承宣激揚。當公以格物。廉以律己。所部指揮劉斌。張全。智勇過人。力薦於朝。且云英俊之子。處心剛正。寧肯抑心低首。奔走媚求。若不曲加攬訪。則賢才多隱。志士沈匿。陞都督同知。總理漕運。卽日上道。常語人曰。荷國厚恩。未能報稱。此行當以江水洗滌肺腑。少盡區區。信沈毅簡重。被服儒素。出入省騎。從歷鎮大邦。不營私產。平居閉門。展玩經史。寬袍緩帶。攝飯蔬羹。故人婚喪。傾心賑恤。出鎮三十年。筭無華衣。廢

無肥馬鈴閣之下寂無人聲。子繼善從善皆舉進士有名。

牟斌字益之。趙人。正德初掌錦衣鎮撫。閣瑾竊政。遂方正大臣。言官劉滙戴銑等凡數十人下詔獄。斌輕刑緩械。曲爲申救。任御史者自愬諸僚。上奏時置其名。彼實他出。斌曰。古人恥不與黨人。君得名乃悔耶。瑾令復獄詞。去銑疏首權閣字。斌不肯。謂其僚曰。存此則諸君子臣節白他日。昔宋鄒道卿以失原奏被害。吾儕毋自爲計。奏入。瑾大怒。又偵知斌庇言官。矯旨廷杖垂死。瑾誅斌。復任鎮撫知府。劉祥與內臣相訐。下斌治。內臣賄張雄令曲祥并賂斌。斌不從。雄陷斌。安置武昌。感疾而卒。斌再用時。長子死。工部官賻三百金。斌指其兩子曰。斌司刑不道。天禍一子。天若受金。行及此矣。斌庫屋敝衣。再遭禍。怡怡若分然。崔銑曰。正德中。前則劉瑾慘行其毒。中則張永巧蓋其惡。終則張忠張雄錢甯江彬肆其愚暴。士靡靡矣。全臣節者。大學士劉忠。尚書傅珪及斌三人而已。

劉璽字廷守。南京龍驤衛人。博雅閑將略。襲世職。以才能選。邊撥船廠把總。以清慎勤蒞之。無不肅然。南兵尙書喬宇薦陞南京旗手等衛把總運糧。值武宗時江彬用事。以勢迫璽。索運船之利。瀕死。下從臺諫薦守備浙江溫州等處地方。清宿弊。訪民瘼。郡人大悅。兩越月。總督漕運都御史陶琰特奏。溫處一隅。漕運重務。必得璽乃可拯江西之弊。陞都指揮僉事。江西都司把總運糧。溫處之人乞留不獲。乃勒石建亭。江西總運。自宸濠之亂。歲兌者越歲不克完。璽盡心區畫。本總自是獨盛。科道撫按交章薦列。推掌江西都指揮使司事。時巡撫都御史盛應期知璽公明。每屬以疑獄。多所平反。璽乃請依期給糧。以卹軍士。清

衙門宿弊。以杜奸宄。革吏民入司之公罰。除衛所冊文之扛解。請廢府之餘材。以立官衙。出城濠之租稅。以歸公府。善政美意。不一而足。時祿入薄。自處有寒士所不堪者。於是科道督撫。按薦疏交馳。士林有青
菜劉及劉窮之號。朝廷亦知之。王守仁以總制經江西。一見卽重之。奏爲副總兵。命未下而守仁卒。尋充
參將。協同漕運。兼守淮安。銓注錦衣衛。凡條議漕糧疏。皆允行。尋陞署都督僉事。掛印充總兵官。提督漕
運。鎮守淮安。奏增餘丁月糧。以均勞逸。定考課。裨軍政。明漕規。以一衆心。疏濬江南河道。以濟糧運。折兌
山縣糧米。以免稽遲。凡三十餘疏。後皆守爲漕政良規。復患淮揚河道淤淺。奏起四府丁夫開濬。功成。詔
賜白金綵幣。具疏乞休。合屬狀留。如去溫時。撫按以聞。不許。再疏乞休。改僉南京前府事。尋改僉後軍都
督府事。歲餘。又乞休。不許。尋充總兵官。提督漕運。鎮守淮安。再葺淮安。於勢要。愈不假借。又屢疏乞休。得
歸。行李蕭然。書數卷而已。丁未。詔復起。已寢疾。未幾卒。爾平生志意恬退。漕例總兵三年當晉級。賜玉帶。
兵尙書張瓚。毛伯溫。先後欲爲之請。皆力辭。少事父疾。極盡勞瘁。遭喪哀毀。至嘔血。弟早喪。撫其遺孤。愛
踰己子。官雖廉。歲時必捐俸。以周親黨。至於卻舊屬之金。於暮夜之間。還亡友之寄。於十年之後。可謂盛
德矣。且問學該洽。議論識見。出人意表。外嚴毅而內沈靜。人不敢干以私。平生無他嗜好。不置侍妾。雖燕
居衣冠端坐。無惰容。有奏議數十卷。

史官曰。夫人之可傳。不必聖哲。卽一節著稱。已有過人者。李震免註誣。出羅網。必其行軍之際。有五事之
仁。七德之安和也。王信獎拔異材。爲韜鈴之所難。牟斌典獄存大體。不爲媼媚。蓋君子之流歟。劉爾功在

明書 卷一百四十

漕儲關國命脈。厚德公心。超絕流輩。洵可傳矣。君子是以取其節也。



明書卷一百四十一

列傳七

武臣傳二

楊銳、馬永、梁震傳

楊銳字進之。徐之蕭縣人。曾祖某。正統間以功進南京羽林前衛指揮使。父瓚嗣其官。掌小軍營。銳自兒時有機警。弘治庚申代父官羽林總神機營。正德元年掌龍江右衛事。衛久稱敝。至是一新。二年督造漕艘於淮浦。力餘事集。御史中丞總戎每議大事曰。非銳不可。四年總江西十二衛所儲運。艘艘連屬。比之陣法加嚴。運無後期。凡八年。進署都指揮僉事。奉簡書守備九江安慶諸郡。駐軍皖城。求余闕城守事曰。今日當不足憂也。九江盡獲。江賊於蓮花洲。事上聞。銳曰。江賊何足憂。所虞者豫章耳。意指甯藩也。又謂九江爲鄱陽上流。不可恃。湖最要害。當以九江中左所一旅置戍於湖口之高嶺。可遠望。有警可卽達也。乃繪長江圖。具事標識。凡數本。呈南京機務司馬重臣及臺院司江防者。又請造戰艦若干艘。習水戰於江上。尋與臺院密議兵食。繕皖城。周城中多浚井。十四年六月十四日宸濠反。卽告變。京師先引軍設鉤。距於江側。禁勿泄。二十七日寇至。船二百餘艘抵岸。爲鉤距所破。繼至者以千數。銳坐城上。與衆誓勦逆。

嘗得大功。告知府張文錦，俾發府庫金懸以示賞。有寇衣緋者稱凌十先，一登銳引弓中其首。其子繼登貫其吭而死。於是儒者皆起。城上建大旗，書勦逆賊以壯士氣。有安慶人僉事潘鵬，持黃紙衣緋，擁騎至城。稱後兵數十萬，能以城降，得不死。銳語鵬曰：汝死已後，尙靦顏爲悖言乎？吾刃至矣。捕鵬家一人腰斬。棄城下。鵬遁去。寇爲敵樓數仞向城，有甲冑者出關楯外，持鉤距大呼。銳發矢中左腋，藥火齊發，頃之樓燬。死者不可計。八日宸濠船泊南岸，聞不克，大怒，率衆分攻五城。各首舉木爲蔽，甚急。銳裂方布覆紙，裹藥火千數，散投所蔽木上，火發盡棄走。火光周而絕，寇無所遁。十二日寇於北濠結木爲棧，與城接。挾兵而進，城中大驚。銳曰：事急矣，乃詭以大將軍火，銳實石被緋，金鼓置城上，向寇兵望見大潰。潛使一卒從棧道出，燒棧絕。十六日寇衆解體，且暑甚溽，力德夜斫睡。銳幕善泗者數人於船中，聞斫聲，卽斬首，絕其纜。放之江中，又遣強卒突入岸上營，典礮城上，應之。乘勝捕殺，聲震數里。是夜宸濠浩歎出涕，舉帆順風而返。奏捷。武宗下蠶書褒之，又賜忠勤報國戰守奇功二榜，以旌實授都指揮僉事，充參將，仍守安慶。兼湖廣地方。銳疏舉鄭岳、胡世甯當大用，蓋鄭嘗爲布政，胡嘗爲副使，以拒濠譴者。濠既平，十六年兵部論功。進都督僉事。廕子平爲羽林千戶。疏辭舉御史楊必進，嘗與謀於未變時者。廷臣多賢之。安慶立生祠以祀。嘉靖元年僉書左府事，掌神威軍營。未幾以三關弗靖，移守保定。諸郡授驍騎將軍。四年詔還，保定人亦立生祠。生祀之。至京，掌立威營。五年以母老乞歸，改南京右府。八年授總兵官，鎮守遼東。掛征虜前將軍印。至鎮，秋毫無犯。士卒思奮，多著邊功。明年改漕運總兵官，掛漕運印，兼鎮守淮安。明年忌者有

言罷歸。又明年以疾卒。銳自立官。足不及權門請託。身歿囊無餘錢。諸子嚮衣爲葬。天下惜之。馬永遷安人。世金吾左衛指揮。好讀左氏春秋及兵法。機警善射。正德中江彬統宣府兵。練西內。卽自稱疾篤。不隸彬後。以參將守太平。虜入塞。再劄去。充總兵官。治三屯。盡簡諸軍。散遣其老弱。聽其農市。取其傭。倍給諸健武者。健武卒咸奮習武藝。益精當。是時漁陽一軍稱獨雄。未幾武宗至喜峯口。馳馬欲出塞。永叩馬諫。不可。上注視久之。顧內侍曰。此馬永也。笑而止。朵顏會把兒孫結諸虜要官賞。不得輒入塞。永迎擊。再敗之。自是效順保塞。嘉靖初大同軍亂。殺都御史張文錦等。朝議且撫。永力言不可。恐他日九邊效尤。將有河北藩鎮之禍。乃敕永出居庸討賊。以流言而止。永抗疏乞宥大禮言官。上怒奪總兵。寄祿南京。十六年大同軍再亂。召至業已撫。復還南。十七年遼東軍亂。召總兵遼東。十八年軍再亂。以家兵捕斬軍遂定。陞左都督。卒於遼。遼人爲罷市哭。喪過漁陽。漁陽人亦哭罷市。兩鎮皆祠祀。言馬永爲將善調虜情。先知所從來及衆寡。因勢設伏。以故虜往往失利去。善養士卒。同甘苦。又善勺人。所獎拔列校多至方鎮云。

梁震新野人。世榆林衛指揮使。嘉靖七年陞署都指揮僉事。協守寧夏。敢戰先登。進遊擊將軍。益奮勵。士卒練調。東西援應。有斬寇功。尋進副總兵。延綏以斬寇首功。陞都督同知。十四年總兵鎮守陝西。當是時關中少寇患。大同宣府寇數入塞。殺掠吏民。十五年陞右都督。改總兵。大同自五堡之役。殺巡撫張文錦。參將賈鑑。尋又殺總兵李瑾。鎮巡每甘言煦之。稍不如意。卽反唇瞪目。或飛章訛言。以相搖撼。震聞命率

家丁五百人馳至雲中。申明約束曰：我毋爾凌，爾毋我叛。王法軍令俱在，我不敢破紀綱，誤國。其家丁時向鎮兵語曰：爾敢蔑主將者，恃衆耳。兒郎輩無不一當百，五步內恐爾不得用其衆耳。自是鎮兵斂縮。十六年春，震率兵出玉林川，斬寇首一百四十，進左都督。又出黑山門，各斬首八十，斂一子百戶。十八年，震鳩卒給餉，修五堡。軍中不敢譁，每身先之。與同甘苦。五堡竟復，寇不敢近塞。未幾卒，以五堡功贈太子太保。震沒，五堡亦旋廢。十九年、二十年，俺荅阿卜孩、吉囊三入雲中塞，直逾太原，窺平陽。震不死，五堡不再廢。寇亦不敢輒經入，白是鴈門河東雲中上谷殘破。朝廷思震優與，卹典贈太保，諡武壯。震在邊專練家丁，時時出塞劫寇營，寇不敢輒近塞。得寇營馬及財物，盡與諸出塞劫者。以故人皆效死趨利，寇以故益畏之。或謂以出邊起釁者，起釁律有之，謂承平時寇牧獵爲生，不擾我邊，而我邊將撲殺邀功也。乃今寇數深入，駐帳塞上，官堡民堡十去七八，何名起釁？震卒，家丁無所歸，守臣以聞，令入伍。後邊將多得其力。

史官曰：古具將帥之才，而無先幾之見，乏禦猝之智。兵法云：致人而不致於人，果何指歟？明中葉承平久，人鮮壯武。一任鎔鈴輒縮，賴天子福獲殄滅。幸爾楊銳預策留藩，臨敵制變。卒老山澤如素儒，賢哉！馬永繁武宗馬，以廷臣之力爭不得，而永立得之。武宗其氣必有過人者，梁震定亂兵，提勁旅，獲宿寇。五堡之立，稽人成功者數年，是三人者皆所謂仁智勇無慚者乎？以方之東平，何幸不幸之懸岐也。

沈希儀。其先臨淮人也。廣西馴象衛世指揮使。未弱冠。已能馳馬。手搏賊。征永安盜。陷淖中。騰而及於陸。三會前趨之。希儀淚頸以過鏢。飛右足讓刀。顧射鏢者中決。頃死。又掣刀。斫刀會於鏢間。斷其頰車。又射其髀。會竟卻追兵而還。遷都指揮僉事。荔浦賊八千人行剽歸。倉卒部五百人往扼之。蛟龍滑石兩灘。相去數里。希儀曰。滑石灘狹難行。引繩乃濟。雖衆可薄也。蛟龍灘闊。衆成列難圖矣。吾欲奪其闊而致之狹。伐岸竹揭岸上。編筏以爲繆。頃刻成。數百旗插之。蛟龍灘。令羸卒數十人守之。以疑賊。賊果趨滑石。且半渡。發伏擊敗之。遷都指揮同知。嘉靖六年。岑猛叛。都御史姚夔奏行誅。召與計曰。歸順岑璋。猛婦翁也。當助猛。奈何。希儀能素得土官陰事。曰。璋女失寵。而璋心恨猛。貌合耳。是可使擒猛。何謂助乎。夔復曰。猛乘上流勢。擁兵下。如建瓴。邕梧危矣。奈何。希儀曰。是不足憂。土官大率飽富貴。戀巢穴。所爲叛者懼誅耳。豈有遠志乎。夔又慮猛且走交南。曰。猛走交則閉不能歸。彼豈無慮哉。於是分五哨進師。希儀將中哨。當工堯。工堯隘而糧盡。乃潛渡江。詣左哨將乞糧。請并兵攻工堯。左哨以分地爲解。希儀笑曰。兵糧吾自足。試君心耳。還夜分軍三百人緣山上。繞出工堯背。而裹餘糧爲稀糜。食士合戰。戰疾力。而所遣軍則立轍工堯山頂矣。賊大驚。遂入隘。得其積粟。食軍乘勝攻田州。初歸順岑璋素信希儀。使圖猛。則遣兵二千人陽助猛。精卒千人名護女。實爲間。官軍得工堯則先囂。工堯破。猛出走。則擁入歸順。左哨將知之。壓歸順境。索猛歸順。斬他囚首以獻。而先一日。希儀已獻猛。馘鼻軍門矣。夔議設流官。希儀曰。思恩設流官。反側至今。兩賊行合從。且復起。不見聽。而田州果叛。後竟復土官。田州乃平。擢右江參將。右江故治柳州。柳在萬

山中城外五里卽賊巢。軍民至無地可田。而城中兵弱不足任。前守劉璉殲於賊。希儀至。鼓士氣。破賊。嗣者耳目徧官府。卽閩關中稍動色。賊在谿洞數百里外。輒知。希儀至。願令熟獠恣出入。嬉遊城中。而求得與獠通商販者數十人。撫厚之。使爲詞。於是賊動靜聲息。願往往爲我所先得。所鳴勦。風雨來去。每出勦。卽肘腋親近不得聞。至期鳴號。則諸軍立集聽令。曰。出某門。旗頭卽引諸軍買實行。問旗頭。旗頭自不知。頃之。劄營。賊衆至。戰方合。而伏又左右起。賊大敗去。已賊寇他所。官軍又已在。雖絕遠村聚。賊度官軍所不至者。寇之軍又未嘗不在。賊驚以爲神。卽官軍亦不知。希儀何自得之也。所鳴勦必其劇巢。縛管繩爲記。無妄殺於劇賊巢。得婦女牛畜果。鄰巢者悉還之。惟陰助賊者。還軍立勦。曰。若奈何。陰助賊戰。或刀弩而門。劄者。曰。罰若牛五。若奈何。刀弩。劄我師。於是賊誓服。無敢陰助賊及門。劄者。嘗欲勦一巢。乃佯臥病。所部入問病。謝不見。明日又問。希儀起。曰。吾病思鳥獸肉。若輩能從我獵乎。卽起出獵。去賊一二里而止營。軍中乃知非獵也。最後計擒其尤黠猾善戰者。支解之。四懸城門。見者股慄。嘗以甚雨。淒風。天冥冥。夜察諸賊所止宿。散遣人。齎火若砲衣。囊帽與草同色。潛巢賊中。夜礮舉。賊大駭。曰。老沈來矣。挈妻子蒲伏山頂。兒啼女眺。往往寒凍死。或觸崖石死。妻子相怨。汝做賊何利至此。明詞之則寂無人。所散遣出他巢者亦然。他巢大驚。已相聞。愈益驚。陰詞之則老沈固在。參府不出也。自此賊膽落。或易而爲熟獠。而柳城旁一童子。牽牛行深山。無敢劄者矣。後熟獠旣服其威信。調征他巢。雖懼誓不敢不往。甚而大雨。徭懼失期。汨溪水以應。要有溺死者。論者以爲自廣西爲將。韓觀山雲之倫。能使獠不爲賊。比希儀則能使獠

人攻賊前此未有也。思恩奏設流官而州數反側不靖。已聞濬有子曰金。在鎮安益洵。曾楊留者在賓州。乃辭去。曰：留小主人在。請往。希儀時方憂思恩。聞留言則大駭。以金去賓州近。而留應之。且爲賓州憂。賓州危則廣右之咽喉立梗矣。乃婉色好語。謂留曰：是岑濬第九子耶。我往往田時固問之。因作自語狀曰：岑氏其復乎。欲以深動留。已呼留入密室要賂。卽得賂。行爲金復官。留乃大信。且出復呼入曰：韋貴徐五。今分將思恩。必讐金。善防之。於是金果將五千人。因留以見門者。擢走報請無納。希儀罵曰：金本土官子。非賊。奈何不納。則引入厚結之。又引以詣兵備。隨盡散其五千人。卒復金而思恩復甯。當是時。非深計賓州幾失。希儀在柳度十三年。移潯。後總兵貴州會北虜入犯。詔屯宣大。未幾署都督。總兵江淮已復。調廣西。貴州在江淮。饑販之警幾絕。然天雨輒苦創痛。數在告。已還廣西。瓊南五指山熟黎。本馴順。畏知州邵濬者。黷貨虐使之。而黎叛。兵八年不休。希儀言於督府曰：法家斷獄。必分首從。今諸相煽從逆者如虎。投奔勢不得釋。他諸夷疑而勦之。則傷亡撫而勦之。則墮信。莫若獨搗其首惡。首惡平。諸異志者褻魄矣。是公以生賜萬州也。都御史歐陽必進聽之。而黎平進都督同知。賜金幣。改貴州入銅平。巢甚奇。然秘不告人。人亦莫知也。希儀膽勇機警。善撫諸人爲耳目。賞不失頃刻。嘗染危病。所部卒至。自戒於神前。以鷹穿手刺股。痛毒諸體者皆徧。最後者一人。至以箭穿喉。其得士如此。唐順之言當世名將。識希儀及馬永。永魁瓌長偉。見人類首下視。寡言笑。希儀短小精悍。目炯炯燭人。議論磊落激發。皆所謂偉男子也。俞大猷。其先鳳陽人。世爲泉百戶。髫齡時輒僦儻。以豪傑自命。家酷貧。日不能再爨。願誦讀不輟。銳意文

事父卒。襲官學騎射。輒命中。從李良欽學擊劍。盡其術。益悟常山蛇勢。以爲兵法。數起五。猶一身五體。雖將百萬之兵。固可使合爲一人也。嘉靖中。登會舉高等。以千戶守金門。上書部使者言兵部使者呵辱之。奪官。大猷笑曰。此豈吾自見地耶。遂盡鬻其家。遊京師。以書于尙書毛伯溫。侍郎翟鑾。鑾得書。驚歎禮之。驚一軍。然終不盡用。尋守汀漳。遷廣東都司。會安南叛人入欽廉爲寇。諸司議募陸兵。大猷曰。賊由海來。獨當以海舟破之。若專備於陸。賊舍此擊彼。我不勝其備。賊不勝其擊。彼逸我勞。非計也。乃集海舟以擊之。連破之。永安萬甯。而安南函賊首以獻。倭難作。大猷以南直隸副總兵。戰賊平望。王江涇。六金壩。皆連捷。而提督尙書張經。以視師。趙文華言論死。大猷坐落職。奪祖官。於是東南之禍日亟。復浙直鎮守。而大猷言防江必先防海。水兵急於陸兵。蓋倭奴長陸戰。令樓船高大。集萬銳其上。倭船遇之。輒摧壓焦爛。固我兵所長也。善戰者毋以短擊長。而以長制短。且海無他法。在知風候。齊號令。以大舟勝小。以多勝寡耳。於是用舟師戰。而舟山積歲不除之賊。皆勦盡。汪直者。徽人也。以亡命入海。據烈港。句倭夷貿易。爲逋逃主。天子以連歲倭變劇。皆直。故必得之。至勤精禱。責總督胡宗憲。令必得自效。大猷言直在海島。能以緝物誘倭來。在彼國則一逋逃夫耳。倭之來不來。非關直誅不誅也。苦誘之來而殺之。則失信。且何以示後。盡請諸宗憲不聽。誘以來。天子聞得直則大喜。詔殺直。於是宗憲悲失信。怏怏曰。吾爲余帥笑矣。而羣聞殺直。焚舟殊死戰。大創。入掠閩。宗憲懼。乃奏言。大猷遠節制不窮。追以爲解。於是逮大猷。詔獄。謫戍邊。饒平民張璉反。號張流官。陷江閩諸州縣。詔諸道合師二十萬討之。而大猷遷南贛將。時胡宗憲已奉詔兼

督江廣矣。聞璉出行，剽下檄言棄巢出。此自投死，其速擊。大猷前以違節制見劾，幾得罪。欲言恐禍及，欲不言恐敗事。已乃曰：吾豈以一身之禍忘國事哉？乃具言璉雖離出劫，其妻子財寶乃在巢。若我以大軍追其巢，彼必聚衆自救。譬之虎方逐鹿，熊據穴而搏其子，虎安得不置鹿而還，還而蹙之，如拉朽矣。且三省會擊有期，又豈可以數萬之師從一夫團走哉？於是引兵萬五千人，疾走柏嵩嶺，瞰璉巢。賊果歸保巢，而大猷出擊，俘斬者千餘。於是潛使說璉黨執璉，已爲兩廣帥所奪，或請訟之。大猷曰：賊惡其不滅，豈必在已？翌日班師，不殺一人，以示信。陞副總兵，賜璽書，加節鉞，命控制江湖閩廣四道兵。加祖官一級，會倭陷興化，大猷自贛晝夜馳赴之，駐秀山。都督劉顯駐明山，而都督戚繼光提浙江兵未至。上怒宗憲失泉城責戰急，而閩士夫又洶洶急功。大猷念賊且萬人，能戰入死地，官軍數僅相當。若迫城而攻之，彼實我虛，彼飽我餓，彼逸我勞，一挫而東南之事去矣。不若列營以困之，彼欲攻柵以遁，則彼虛我實，彼勞我逸，彼餓我飽，而我師犄角取之，可使子無遺，且速戰勝亦可遁，負亦可遁。此賊之利也。遲戰則我兵日多，守益固而賊日益困，敵以戰爲守，我以守爲攻。於是星布兵營，盡地鑿溝，令東西通而列柵其上，賊挑戰不動。閩士夫訟其詬病之，已竟職賊。諸將各加秩，而大猷止賜金幣。蓋閩士夫業以爲流言，聞之朝矣。倭三萬寇潮洲，與盜吳平相犄角，爲廣患。詔移鎮湖廣，羣盜憚大猷名，競出降。吳平雖不能堅決，然亦詭殺倭自效。遂於倭人絕。於是大猷請於總督都御史吳桂芳曰：倭寇以出邊爲生路，山賊以歸巢爲生路。今潮兵驅賊入益深，益深則益以鬪耳，是死路也。當大集精兵，十圍五攻，無使片甲得還。如兵力單，若不能勝，又

散之令得遁去。則邊曠日久。爲勞費無已也。於是將漳兵二萬以來。果破平。而御史以招吳平爲大猷。負坐免官。吳桂芳爲抗言於朝。乃得留。二源山表千里。賊據洞如蜂房。水窩介三郡六縣之間。而雲溪尤固。大猷曰。此當誘而聚之者也。遣王鸞者。盛驕從。充裨將爲死間。賊得鸞自安。而大猷日發兵擊旁諸巢之。未下者以取之。諸巢果畢聚雲溪。以緩討。乃陽言誅李明。過雲溪。巢賊出牛酒犒兵。須臾兵悉集。擊破之。於是賞先登。酬死間。而東峒遂平。桂芳上其功。大猷爲將。事必先周慮萬全。旣事往往爲善。後長久之。畫爲人易簡。無町畦。而有容善忍。以忠厚自任。重然諾。功則稱人。罪則稱己。參將楊克寬罪抵死。大猷力爲常道言。克寬忠勇。慣戰。請保任。不效。甘同罪。詔獄時。妻子寄食甚窘。百戶鄧成亦就逮。適有遺數百金者。立與之。諸推轂揚弘舉會清之倫。皆大聲疾呼。期必用。後皆爲名將。禮布衣士爲上賓。平生澁官。誓衆。陳師鞠旅。一決於理。雖支干孤虛。雲物氛祲。堪輿奇遁。兵家以爲務者。未嘗一訊焉。侍郎譚綸與書言。綸近對人言。節制精明。公不如綸。信賞必罰。公不如戚。精悍馳騁。公不如劉。然此謂小知。誠如霍子孟。任如諸葛亮。大如郭子儀。忠如文文山。毅如于肅愨。可以託孤寄命。則公之大受然也。公精誠當不以老衰。不爲時變哉。蓋信重如此。而士大夫稱平閩浙功最者。往往但推戚繼光。

史官曰。唐順之之論。沈希儀譚綸之遺命。大猷書。不沒其所長。不諱其所短。夫是二將者。平生功業恒赫。故宜侯。皆弗侯。其功卒不可沒。說功者多殺戮。傾人以爲勝。絕類以爲雄。而二將存心仁厚。於戰伐之際。率多生全。古善用兵者。往往凶終。而二人者庶其爲君子歟。

萬表、戚景通、戚繼光傳

萬表，字民望，別號鹿園居士，寧波人。表生有異相，玉色方頤，額有三文，丰神炯炯，慷慨多大節，相者奇之。曰：異日當名高天下。讀書一目數行，下年十七，襲衛指揮僉事，志在鵠起，不事家人業，晝習騎射，夜燒燭讀書，揭孔明甯靜澹泊四言座右。曰：大丈夫經營天下，如武侯然，何能類首作求田問舍計乎？嘉靖庚辰，武舉中式，石瑄閱表卷以爲奇，置第一，衆以所對多忤時語，抑之，尋授都指揮，督全浙糧運，督視浙江關篆，南都坐營錦衣，已爲漕運參將者二，漕鎮總兵掛印者二，及南京中軍都督府都督僉事，皆以宿望爲當軸所推，表歷漕既久，國計絀贏，河溝通塞，祖制及時弊，當復常釐，靡不明習。嘉靖庚子，二洪水涸，漕舟並阻，議者謂黃河改流，表著論折之，力言黃河惟用洗汶沂泗諸泉足以濟，正統十二年黃河決，滎陽入漕河，潰沙灣入海，景泰四年，都御史徐有貞塞之，乃分流自蘭陽東至徐入漕，必疏濬而黃河始來，稍與清合。至正德六年黃河盛來，衝決，方黃河來衝時，清河狹淺，水固易盈，沿河設淺鋪，每年轉運無滯也。今二洪舊隄，宛然可見，但向者黃河漫漫，一旦水落石出，清河淺涸，人心乍見，不能無異，然實其故河也。蓋自洪達濟，自會通至衛河，一路隄防，原備河衝入爲漕害，今二洪以下，反用黃河之水而忘其故，及水不來，至疏濬以引之，此所謂以病爲藥也。渦河在淮之南，商船皆自淮入渦，至祥符銅瓦箱以達陽武，去衛河六七十里，議者欲鑿而通之，直至白河，則會通河可能，公議會通河之塞，自甯濟至臨清，計三百八十里，尙書宋禮發山東丁夫十五萬，鑿河建閘，爲費不資，以彼棄七十里之易，而事三百八十里之難。

此無異故。蓋鑿而通之。則黃衛二水合。二水合則衝決非常。孰能障之。此會通河之運。誠永利不可易也。若以衛輝置倉。歲以鳳陽諸衛之卒。部鳳陽諸郡之糧。令由渦河達陽武。歷七十里。輸於衛輝。其勢甚易。如昔山東流賊之變。運道中梗。又可爲備變一策。海運雖極險遠。第浙中海船。於遠番皆能通之。松江與太倉通。泰州有沙船。嘗由海至山東蓬萊貿易。云離天津不遠。若以松江太倉近海。歲糧至與。雇直量運三四萬石。使海道漸諳。爲事變之備。又一策也。太倉則例。每糧一石耗七升。至概運若輕。齋之。羨以還軍卒。故卒有餘力。運無愆期。後官悉收之。腹削四出。民不聊生。表憤然曰。此其患不獨在窮軍。而且移之國計矣。大者疏。小者議。累累百千萬言。且極陳本折通融。爲國長利。而又欲開河北山東圻內一帶荒田。重農薄賦。爲漸減歲漕之地。識者韙之。歲甲寅海上倭亂起。表散家財。募死士。奮欲往擊。會以都督僉事南京中府。道經姑蘇。與倭遇樓門楊涇橋。表率所募及少林僧。躬擗矢石。挫賊鋒。身中流矢。不爲止。遺書與子曰。我家世以戰功死王事。乃我獨持文墨。議論身不任兵。今晚年增一箭痕。不亦美乎。時賊據七團八團爲巢。我軍數戰不利。表謂巡撫都御史周琬曰。賊據內地久。近賊處民不得力田。逋負日多。催科敦迫。相率而去。爲賊是驅之。以助其勢也。宜亟請蠲積逋。懸賞格。使就中作計。以攜其黨。兼下募兵。則人人樂歸。如得士千。卽賊減千也。以較用他兵。孰利。議行。歸者寔衆。賊寔衰。乃進兵。賊懼夜遁。殲之海上。焚餘糧。若干內地稍甦。因作海寇議。所爲籌畫甚具。賊方蜂屯諸島。而欽王直者。以驍勇魁其曹。表策其疏。敵可誘而縛也。薦鄞人蔣洲。張惟遠。使爲間。兩人雅善直。其家坐通逮。約獲直以贖。且以上賞許之。日強晤當。

路前未及行而表卒。後胡宗憲卒遣洲使豐後山口諸島渠魁立致東南晏然。一時謂爲奇功。不知皆表本謀也。表策夷情洞如指掌而論北狄尤人所未發。嘗曰古夷狄侵中國未有中國人不爲之用而能突入者。夫華夷異俗居處寢食絕不相同。豈甘心棄衣冠爲犬羊役哉。不得已也。比年虜入太原殺掠慘毒上厪九重之憂。中外章疏類多擊截之計。所薦用者大都善戰善陣之人。而於籌邊固本之道則置而勿論。夫善戰善陣之人急於截殺。乃一時救變之事。如醫家所謂急治其標者也。每督諸鎮之兵日幸一擊虜以爲功。而他暇顧然卒不能禦。如病者屢投逐邪發表之劑而邪卒不去。元氣不爲其所傷乎。古方制參蘇飲發表逐邪必用人參固本者。深有爲也。且諸邊自將權移而邊政日廢矣。自屯田鹽法壞而邊儲日不充矣。邊儲不充而士卒殍死者衆矣。殍死者衆而士心日益離矣。士心日離。叛亡日衆。凡叛亡之卒徒皆厚遇之。與婦生子。給以牛馬孳息。士俗漸宜。心無變反。而後用爲鄉導。故地里之迂近。兵力之強弱。貨財盈虛。人心離固。將帥勇懦。事勢難易。皆得預知之。而諸邊饑餒劬瘁之卒。聞先叛亡者。幸少須臾無死也。輒相繼以亡。而不亡者亦無固志。是則深可憂耳。夫敵之來也不測。而我之禦也無時。諸邊日夕營營以目前爲事。何暇爲邦本計乎。此所謂決陂以取魚。圖一朝之利者也。先是庚戌寇闖入塞內。傳京都。表聞之日夜束裝爲行計。且曰吾世受國恩。今憂及君父。豈臣子安臥時耶。尋事定乃已。表少嗜玄學。已而閱內典。獨契於心。關西釋自然者。以苦竹鍊磨得悟絕學。表與語大悅之。自是參究不輟。一日披衲入伏牛山。曉行見日升。忽大悟。嘗言學貴真悟。語言真切。不離見解。又言世論克己。淺之乎其論顏子也。

夫視聽言動而溺焉己也。視聽言動而止焉己也。視聽言動而不溺不止焉亦己也。禮者中也。即吾之性也。仁之體也。不可絲毫容易於其間也。是故無思無爲。感而遂通。不識不知。順帝之則。克之至也。一日與達夫論道於臨江。達夫躍然而歸。遺書云。自聞教後。舟中終日忻忻。若出樊籠。見大世界。若入大海。見龍宮藏。舉手動脚。無非道妙。其相契如此。表雖超詣。獨往而諄諄。導人以實行。謂夫子教人文行忠信。至命與仁。則罕言。吾曹抗首談性命。而自愧於倫物。得無爲跖者。噓耶。爲文敏給疏暢。直寫胸臆。所著有學庸志略。論語心義。孟子摘義。道經贅言。九沙雜言。玩鹿亭藎。及纂經濟文錄。灼艾集。玩錄亭詩鈔。濟世良方。玄門入道。資糧山中集。諸書行於世。表薄田僅供饋粥。諸爲德於鄉。如建橋賑饑。不可指數。歷官四十年。家無餘財。瓶鉢蕭疏。與野衲偕遊。見者不知其爲名將也。嘉靖丙辰正月。無疾端坐而逝。是夕大星殞於庭。光射數十丈。

戚景通字世顯。定遠人。其先百戶。祥以略地戰死。世襲登州衛指揮僉事。景通長幹修髯。類關壯繆。既世官。踐更京師。嘗席地讀書。當暑不輟。劉瑾結豪傑爲逆。陰遣人遺席帽。約曰。某日當發難。著此者爲劉景通。且日爲黃冠。遁去。將率六郡良家子赴不測。瑾敗。乃還青州。賊李琪反。據蒙陰山。副使王良臣分部擊之。弗克。景通微得琪與姦民出入狀。將數十騎往跡琪。夜至。伏姦民舍傍。遂擒琪。頃之。劉賊起河北。橫行山東。景通檄守鄆以七百人往。入告母而遂行。師出平度。道中忽遇賊人曰。賊衆我寡。且成師以出。義不避難。陳以待賊。擊卻。遂入鄆。登陴督衆嚴守備。一日率輕騎過孟子莊。賊大至。列陳如前。邀賊遊騎擊殺。

之賊復遁。先後累數十捷。卒保境。嘗六月過戰場。僵屍枕藉。衆皆掩鼻不欲近。景通曰。偉哉國士。名與骨俱香。吾誠得與同遊。九泉無憾矣。爾曹顧病之耶。騎過沮澤中。率先下。得休其餘力。遇賊輒有功。兵罷。以軍政掌印。部使者舉孝廉。陞江南運糧把總。至則祛積弊。卻羨餘。比輸太倉。故有霽籌之弊。客以告。作色曰。景通自結髮事君。壹勿欺。吾寧受簿責。毋寧自欺。已輸倉不一計。對簿度支。當降級。所部張千戶者。懷贏金三百餽之。景通笑曰。吾以不欺受罪。顧納贏金爲欺耶。事白復官。戚勳以總督備倭。至欲引爲同宗。景通謝曰。先世故姓倪。載在勳府。卽自附。鹽書之謂何。卒卻之。陞山東都司僉書。陞大甯都司掌印。河間治河久未底績。屬爲植。不踰月告成。大甯缺僉書一人。部署匈奴內附者。景通言安榮可。榮奉百金爲壽。目攝之曰。吾薦賢故薦君。以此相加。則吾薦非也。榮慚而退。奉詔坐神機營。母閔貞節年老矣。請終養。從之。仍支俸山東。便奉給。景通白首子舍。每上食。率諸子女弄雛前。卽不當母心。蒲伏請受杖。母有疾。夜叩北辰請身代。居喪毀。斑白始。有子曰繼光。繼光綦履過庭。景通大詬曰。童子何知。綦履必錦衣。錦衣必食肉。爾父清白。必不爾壓。爾他日將饜卒伍。以自封。旣知爲外氏所遺。卒列綦履弗著。居第垂二百年。始改作。命綺疏四戶。列兩楹。間工請益綺疏十二。景通曰。使吾無得罪於先世。猶聚族於斯。四戶足矣。不然。此且不保。季年畫策備湖。累數百牘。其後趣繼光受職京師。病革。猶問吾所上備湖封事。上納之乎。未耶。垂絕。舍人納緒幣。納中。瞪目曰。我平生不索人錢。冥司必不受我錢。悉出之。乃瞑。子繼光字元敬。幼而捭闔。多權奇。隆準方頤。鼓而鷹揚。英氣勃勃。旣舞象。折節爲儒。以經術著。旣冠。奉父命上勳府。襲世官。待次司

馬門善相人者目逆之。將軍春秋三十六，乘鉞專征，不五等，則三孤矣。庚戌待試武闈，虜入犯，部列城守，簡材官戍九門，繼光條上便宜，部常其議。山東歲遣治兵使者，部六郡良家子，春秋入戍，繼光任中軍從，務輯衆心，一軍皆服。使者推轂進，都備倭都司尋轉浙江都司，僉書會倭難甚，上練兵議，其略曰：無兵而議戰，亦猶無臂而格千將，乃今烏合者不張，徵調者不戢，吾不知其可也。聞義烏人其氣敵愾，其習慄而自輕，其俗力本無他，宜可鼓舞。及今簡練，訓習一旅，可常三軍。督府乃檄繼光亟募三千人，假以節制，則以什伍起於邱，乘兵寓於農，第西北地夷，宜得地利，南而走險，不利竝驅，乃聞長短兵，夾振而進，隊二人爲長，偏則伍之，兩則什之，犄角互張，攻距擊刺互用，名鴛鴦陣，居無何，卒服習矣。督府請補浙東參將，分部台州，辛酉島夷入台州，觀旌旗皆辟易，所嚮以全取勝。其年江西告急，督府檄西行，既捷，露布以聞，軍益振，頃之閩寇張甚，分壘爲三窟，一據橫嶼，一據牛田，其酋長壁莆東南，出沒焚掠，因而塞路，沃野不耕，廣叛兵乘亂出入，毗若無人，繼光以督府命，部兵八千往，自橫嶼趨牛田，俘馘立盡，他夷部繼至，截先登者五之三，其二突圍南奔，窮追絕跡，勒功平遠臺，乃班師。兵尙書趙錦代督府發浙餉，屬繼光募精兵萬人，閩望援兵，如望時雨，兵至，寇相蹂踐而死，屍以澤量，當戰務釋俘囚，獨脅從，首功居多。隆慶初，寇陷石州，東薄昌黎，用廷臣議，召兵尙書譚綸及繼光入策備邊，乃上書備陳七原六失四弊，大較言兵制西北什倍東南，寇馮積威劫邊人，邊人望風而靡，戰前率糜軍費，案外舍兒，視寇飽歸，尾而鵬勦，掩老羸爲功，級既賣而賞有差，剗羶首以當雄飛，彼自以爲得計，借曰當戰，鮮不睡之，且不練，何以議兵，無兵何以

議戰練兵之效。臣嘗試之東南。請簡部將若而人。分出三輔州縣部幕三千丁壯。部將將之。合爲四營。營各五部。每營立一裨將。爲之連衡。總攬折衝。則主將專制。簡練調習。一如東南。比及三年。堂堂乎可格敵矣。長驅出塞。務令咋指而避穹廬。迨其非時大舉。討賊之師。逐北而虛大漠。然後屯田足餉。罷戍銷兵。坐致富強。則百世之利也。部持可否未決。既譚綸出就督府。命繼光督練。四主將兵。節制視督府。同筴者謂太阿之柄。不假武人。第易總理。於時諸主將不用命。視總理猶寓公。無靡宇。無人徒。無供億。督府言不便。狀。則又以總理專任薊門。卽不易銜。而練兵之議寢矣。又言薊當肩胛。幸而任臣。臣無多言。在薊言薊。塞上周垣二千里。一瑕則百堅瑕。比年遞圯遞修。滋費無益。請更版築。諸戍士畫地受跨。牆爲臺。睥睨四達。臺高五丈。虛中爲三層。臺宿百夫。械器餼糧具在。敵至則當陴以守。退則番休。第力繼未能舉。先築千二百座。薊人多木。疆律之軍。正將不堪。請幕南中入穀者一軍。以倡勇敢。督府上其議。許之。始幕南兵三千。如期至。陳而待命。郊外是日朝雨。甚至於日中。軍容益壯。總于山立。邊將大駭。將軍令固如是乎。卽相要害。程功能。部署臺垣之役。工力籍班。軍則以南兵爲渠長。薪木取諸塞外。其餘則以益樵蘇。繼光巡工。介弟爲植少舍。則課殿最。宴賞決罰有差。黔督益以壯麗獻功。不旬月告成。是役也。縣官僅發十萬緡經費。考工足當百二十萬。復增幕南兵二萬。編伍戍之。議立車營。出戰則以代城郭。車四面結鞬爲方陣。步騎二旅中藏之。遇敵乘陴。火器先薄。五百步外。稍近則步兵出轅下。距敵馬排擊之。敵卻而奔。則縱騎兵乘勝逐北。累師不宿飽。復益輜重營以從。有發則南兵當選鋒入。衛兵筴應。主兵戍守。踐更者任轉輸。

首分數。次形名。次技擊。次步伐。次偵邏。次鄉導。次批擣。次遮擊。次追襲。次俘馘。次首功。軍政畢張。無不以律。比年東西寇謀入犯。西酋得薊狀。恐誣。卜不祥。遂謝東湖。款關入貢。部言敵數苦薊。比修內備。不戰而伐。敵謀。卽軍政無所課功。其功上上。薊方不得入。梁益且將求多。總理故以參將入閩。進副將。再論功。最進中軍。署都督同知。充總兵。如薊。擁總理虛名。秩如故。及張居正當國。上遣兵侍郎出行邊。於是大閱。薊門十六萬之師畢至。營伍必整。旌旗火鼓必齊。約束必堅。號令賞罰必信。侍郎躬入諸營。驗諸器械。履諸關隘。登諸臺垣。歷諸亭障。周覽諸閭閻。比還報。悉以狀聞。既畢。使謁居正。上輔兵議。居正則以征伐自天子出。其如主幼。何。既而以修薊功。加少保兼太子太保。階特進光祿大夫。及居正敗。人言波及繼光。西裨將起記室。繼光卵翼而就之。乃陰布蜚語京師。頃之而自代。始移鎮南粵。敵入黑峪關。薊人願亟召還。不得請。則勒石頌功德。尸祝之。繼光度嶺南。任疆事。如二鎮。踰年疾作。得謝還登州。歲散千金徇客急。歸而暴折。卽延醫治病。且無資。卒。先是任子恩皆停。僅襲祖職。得指揮僉事。所著有紀效新書。兵制錄諸書。史官曰。督卻穀善讀父書。不善將。君子讓之。余謂正不善讀書者耳。人謂不破萬卷。不足爲儒。余謂不破萬卷。不足爲將。夫爲將必通古今。知往蹟之成否。究極性命。然後戰必勝。攻必克。卽畫方略。成籌策。皆彬彬可觀。而不知詩書。動中兵法。此又應運之天授。非其恆矣。萬表具玄悟。景通崇謙讓。而明季語將帥。具文武資。多推南塘。嗚呼。可以爲儒將矣。

著者(清)傅維麟編纂

Author

書碼 626·01

Call No. 7567

書名明書 一百七十一卷：十

Title

登錄號碼

Accession No. 007890

月日	借閱者	月日	借閱者
Date	Borrower's Name	Date	Borrower's Name

國立中央圖書館

書碼 626·01 登錄號碼 007890
7567

國家圖書館



000007890



音